

江苏省通志 稿都水志

繆荃孙

文硕阁

wenshuoge.com

目录

关于我们	3
序	5
第一卷 黄河	6
第二卷 厅汛表	18
第三卷 运河上	45
第四卷 运河下	75
第五卷 江	109
第六卷 淮	122
第七卷 海 海塘 太湖	140
第八卷 水利	189
第九卷 水利治绩上	233
第十卷 水利治绩下	273
第十一卷 水系	302

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

苏境之水，江、淮与河，四渎得三。会通利漕，则由人力。然自汉魏，汶、泗、洗、汴，津流多通，非始元明。为苏患者，大河实巨。自汉元光首汜淮泗，迨于宋初滑州之决，遂达彭城，此为再见。咸平、天禧两次之决，皆至淮泗。然皆筑塞，支流合淮，经流皆北。熙宁、曹村又称大决。分为二派，北派入海，南派入淮。元丰塞之，河复归北。明昌阳、武南决，剧前，大半入淮。或谓金人有意病宋。北派犹行，经流未一。元初南派由涡入淮，泰定合清，经流以改。至正之决，殒沛汜滥，因成巨浸。贾鲁塞之，施功实巨。然复故道，仍取合淮，不令归北。洪武而还，至于弘治，决溢十数，然皆入淮。黄冈之塞，北流始绝。明人治河，兼以济运，力挽狂澜，必漕之利。苏境之患不复置虑。李愷之请大名至沛必筑堤者，盖正为此。嘉靖、隆庆时有决溢，开津筑堤，劳费不已，河漕兼顾，本无上策。万曆潘督，尚告成功。所施功者，仍在苏境，利民拯灾，攻沙束水，人多称之。其后河患仍不能止，贾让下策，为时上策。清代疏治，亦重漕渠。累代昇平，耗国用者，此为大蠹。乾嘉而后，每一塞口，多逾千万，五六百万乃其少者。转漕之害，东南不堪。食其利者，在事之吏。嘉道河溢，谤之甚者，谓由河吏。数穷理极，决铜瓦厢，复归北流。苏境纪述，竟可辍笔工数月，郑工两期，涉苏境者，如是而已。同治漕督尚疏运工，职责所在，仅有五厅，亦报安澜。导淮文牍，汗牛充栋，终清之世，迄未畅行。海塘，自明堤坝初盛。雍乾以后，工作不辍。然视河工，什无其一。唐宋以来，国用之重，仰给东南。《新唐·地志》苏境已述，宋元至今，正史方志，皆于水利未敢忽略。水工水利，实本一贯。必水害去，水利乃兴。过为区别，将增眩瞀。河已离苏，江淮宜先。运河海岸，今顾列次。所会入者，各附于后。旧志体例，川后于山。今立专志，统载一编。经流支流欲为详核。在州县者仍为厘别。一纵一横，期便观览。农田荒治，本视乎此。实关民命，岂容稍略。旧日水工，大河綦繁，厅汛已废。今以金鉴载工特多，附于河后，庶有稽考。系运淮者，亦均如之。苏之海塘，未及浙重，新志所言，颇资实用，故亦为附。加高培厚，贾策所非。淤泊穿泊，宋贤善谏。与水争地，实梗厉阶。治国闻者，其研考焉。

第一卷 黄河

汉武帝元光三年，河决瓠子。东南注巨野，通淮泗。（《史记·河渠书》、《汉书·武帝纪》）

元封二年四月，瓠子河塞，梁楚无水灾。（《徐州府志》：河经徐州，凡二十四年）

宋太宗太平兴国八年五月，河大决滑州韩村，泛澶濮曹济诸州，南流至彭城界，入于淮。十二月决河始塞。

真宗咸平三年五月，河决郛王陵埽，浮巨野，入淮泗，逾月而塞。

宋天禧三年六月乙未，滑州河溢，又合清水古汴渠，东入于淮，州邑罹患者三十二。王贻永知徐州作堤城南。四年二月，河塞，上亲为文，刻石纪功。是年六月，河复决滑州西北天台山，下走卫南，浮徐济，害如三年而益甚。

仁宗天圣五年十月，塞河成。（《徐州府志》：河经徐州凡八年。）

神宗熙宁十年七月，河大决于澶州曹村，北流断绝，河道南徙，东汇于梁山张泽泺。分二派，一合南清河入淮，一合北清河入海。

元丰元年四月，澶州决口塞。五月新堤成，闭口断流，河复归北。

高宗建炎二年冬，杜充决黄河自泗入淮，以阻金兵。

金世宗大定二十七年，令沿河州县徐州彭城萧丰滕州沛等州长贰官皆提举河防事，县令皆管勾河防事。（《禹贡锥指》徐州之彭城萧丰滕州之沛皆为沿河之地，则当时河道所经，大略可睹。）

明昌五年，河决阳武故堤，灌封邱而东。诏同知总转运使高旭武卫军都指挥使女奚列奕同往规措。

元世祖至元二十五年，河决汴梁路阳武，由溜至怀远入淮。（《徐州府志》自宋建炎二年，此后虽屡决，皆东夺汴泗。至是始改趋陈颍。河经徐州凡一百六十一年。按阳武至怀远皆非苏境。故冯氏志稿不录。但不载此节，则大河此次离苏境，后来入苏境，原委不明。）

成宗元贞二年九月，河决杞、封邱、祥符、宁陵、襄邑五县。（《徐州府志》是为河复东行之始。）十月，河决开封县。

大德元年三月，归德、徐州、邳州、宿迁、睢宁、鹿邑等县河水大溢，漂没田庐。七月河决杞县蒲口，（《元史·尚文传》授河北河南肃政廉访使。河决蒲口，台檄令文按视防河之策。文建言：揆今之计，河西郡县，顺水之性，远筑长垣，以御泛滥，归德、徐邳，民避冲溃，

听从安便。被患之家，宜于河南退滩地内，给付顷亩，以为永业。蒲口不塞便。朝廷从之。山东宪部争言不可，乃塞之。明年，蒲口复决。塞河之役，无岁无之。是后水北入复故道，竟如文言。)(按：传言徐、邳民避冲溃云云，是河又经苏境之证。)归德、徐州、宿迁、睢宁、鹿邑、河南、许州、临颖、鄆、睢州、襄邑、大康、扶沟、陈留、开封、杞等县，河水大溢，漂没田庐。五月，河决汴梁，发民夫三万五千塞之。二年六月，河决蒲口，凡九十六所，泛滥汴梁、归德二郡。九年六月，汴梁武阳县思齐口河决。八月，归德府陈留、通许、扶沟、太康、杞县河溢。

武宗至大二年七月，河决归德府。又决汴梁封邱县。

仁宗皇庆元年五月，归德、睢阳县河溢。二年六月，河决陈、亳、睢三州，开封、陈留等县。

延祐二年六月，河决郑州，坏汜水县治。七年河决汴梁原武县。

英宗至治四年十二月，夏邑县河溢。

泰定帝泰定元年七月，曹州楚邱县、开州濮阳县河溢。二年五月，河溢汴梁，被灾者十有五县。四年八月，汴梁扶沟兰阳县河溢，河行汴渠，至徐州城东北，合泗入淮。

致和元年三月，河决砀山、虞城二县。

文宗至顺元年六月，河决大名路长垣、东明二县。

顺帝元统元年五月，汴梁阳武河溢。

至元元年，河决汴梁封邱县。三年六月，汴梁兰阳尉氏二县、归德府河水泛滥。

至正三年二月，黄河决白茅口。四年六月，北决金堤，径砀山丰沛十八州县，延袤济南河间，民居昏垫。五年七月，河决济阴。八年正月，河决迁济宁路。九年五月，白茅河东注沛县，遂成巨浸。十一年四月，命贾鲁以工部尚书为总治河防使，便宜兴缮。十一月工竣。（《河防一览》：黄河故道自虞城以下，萧县以上，夏邑以北，砀山以南，由新集历丁家道、马牧集、韩家道口、司家道口、牛黄烟、赵家圈至

萧门出小浮桥，此贾鲁所复故道。)(欧阳玄《至正河防记》)七月，河决归德府永城县，坏黄陆冈岸。十六年，河决郑州河阴县。十九年九月，河决济州任城县。二十三年，河决东平、寿张。二十五年，东平须城东阿平阴三县河决，小流口达于清河。二十六年二月，河北徙。上自东明曹濮，下及济宁，皆被其害。济宁路肥水县西黄水泛滥。四月，命王宣为河南北都元帅府都事，统领治河。(《行水金鉴》)数月工成。

明太祖洪武元年，河决曹州双河口八鱼台。徐达北征，开塌口引河入泗，以济漕运。《明史·河渠志》二十四年，河决原武黑羊山，东经开封，又南行至项城，经颍州颍上东南正阳镇入淮，故道遂淤。

成祖永乐九年七月，修复故道，自封邱金龙口(即荆隆口)，下鱼台塌场，合会通河，经徐吕二洪南入于淮。十三年，平江伯陈瑄督运筑淮安大河南堤。起清江浦，沿钵池山柳浦迤东，凡四十余里，制河南溢。《天下郡国利病书》：十四年，河决开封，经怀远入淮。

宣宗宣德二年七月，积雨连旬。徐州河水泛滥，冲决堤岸。

英宗正统三年八月，邳州河决。巡抚曹弘以闻，诏令随宜修筑。(《行水金鉴》)

代宗景泰二年，命工部尚书石璞治河。璞溶黑洋山至徐州以通漕。

景泰六年，命徐有祯为佾都御史，溶渠张秋。会黄河南流，沙湾始塞。自此河出济漕，南归徐吕。

孝宗弘治二年，河决汴城入淮。复决黄陵冈入海。命户部侍郎白昂、兵部郎中娄性治决河，筑堰于徐州，以杀河势。三年，白昂等筑堤浚渠于徐淮之间。自夏五月至秋七月，工竣。(徐溥《睢河纪略》：五年，河合沁水没兰阳考城，下决张秋，与汶水合而北行。《徐州府志》：自天顺末，河趋陈颖，既又分道西来，至是全河北注。)七年二月，副都御史刘大夏筑张秋决口，濬仪封黄陵冈南贾鲁旧河，由曹入徐，以杀水势。又溶祥符淤河，至归德，分由符离宿迁小河口入淮，而北流天津，南出陈毫，皆通河流。八年正月，黄陵冈等皆塞。上流河势复归兰阳考城，分流经徐州归德宿迁，南入运河，会淮水东注于海。南流故道以复。《明史·河渠志》十一年，河决归德州小坝等处，与别支会流。经宿州睢宁，由宿迁小河口流入运河。十三年，巡按直隶御史曹玉奏，河决丁家道口，徐州并萧沛砀丰皆被河患，请敕修筑堤。十七年五月，淮安总兵官郭鉉奏，徐州小浮桥一带干涸，有妨运道，乞行疏濬。从之。(《明孝宗实录》)十八年，河徙至宿迁县小河口入漕河。

武宗正德三年，河徙。至徐州小浮桥入漕。(《孝宗实录》)四年，河决曹县杨家口

，奈流曹单二县，东达王子河抵丰沛，舟楫通行，遂为大河。(《方輿纪要》)九月，又决曹县梁靖等口，围丰县城，两岸阔百余里。五年九月，河自仪封北徙，冲黄陵冈，入贾鲁河。泛滥横流，直抵丰沛。工部侍郎李鏜上修河事宜，请自大名府地名三春柳至沛县飞云桥止。筑堤共长三百十里。以防河北徙，可保运道无虞。工部覆请从之。(《明武宗实录》)(按：是役以河南盗起罢。)

嘉靖二年，河决沛县。五年六月，徐沛河水溢，命总理河道工部右侍郎章拯相度治河。是年，黄河上流骤溢，东北至沛县庙道口，截运河注鸡鸣台口，入昭阳湖。汶泗南下之水，从而东。而河之出飞云桥者，漫而北淤数十里。河水没丰县，徙治避之。(《明史·河渠志》)六年，河决徐州及曹单城武丰沛等县，杨口、梁靖口，冲入鸡鸣台，夺运河，沛地填淤。粮艘阻不进。其冬罢章拯，以盛应期为总督河道右都御史。七年正月，盛应期奏，请于昭阳湖东改为运河。会河决，淤庙道口三十余里。乃别遣官濬赵皮寨孙家渡南北溜沟，以杀上流。堤武城以西，至沛县南以防北溃。会旱灾修省，言者请罢新河之役。乃召应期还京，以工部侍郎潘希曾代。(《河渠志》)闰十月，潘希曾请浚黄河上流，修筑济沛间东西长堤。得旨允行。(冯志稿)八年六月，丰沛单三县河堤成，凡一百四十余里。九年五月，潘希曾疏奏河复故道。(《明史·河渠志》)帝悦，下所司知之，召希曾还京。九年，河决曹县胡村东，东南至贾家坝入古黄河，由丁家道口至小浮桥入运河。一自胡村寺东北分二支，一东南经虞城至砀山合古黄河出徐州，一东北经单县长堤抵鱼台，傍谷亭入运河。(按此支无苏地。)嘉靖十三年河徙，一出鱼台塌场口入运，一徙曹县榆林集南向徐州。是年十月，又决河南兰阳赵皮寨。南向亳泗，谷亭流绝，庙道口复淤。时刘天和为总河都御史，役夫十四万，濬之。已而河忽自夏邑大邱回村等集冲数口，转向东北流，经萧县小浮桥。十四年二月，刘天和濬赵皮寨百二十里，至曹县梁靖口，又二百七十里通单县，至谷亭入泗。十五年，督漕都御史周金言：自嘉靖六年后河流益南，其一由涡河直下长淮，而梁靖口赵皮寨二支各入清河，汇于新庄闸。遂灌里河，水退沙存，曰就淤塞。新庄闸正当二水之口，河淮既合，昔之为沛县患，今移淮安。因请于新庄更置一渠，以资蓄泄。从之。十六年，从总河副都御史于湛言：开睢州野鸡冈，由丁家道口入旧黄河，截涡水济洪。(《徐州府志》)此道即引水济洪，仍由丁家道口下通彭城。十八年，从河道都御史胡纘宗请，开黄河支流济通漕。十九年，河决睢州野鸡冈，由涡经亳州入淮。二洪告涸。兵部侍郎王以旂同河道漕运二都御史郭持平周金筑塞野鸡冈，濬李景口支河，由萧县以达小浮桥，凡六百余里。八阅月工成。二十一年，复凿野鸡冈上流李景高等口，支河东注，以济徐吕二洪。二十四年，河决野鸡冈，南至泗州合淮入海。二十八年，河决砀山县北戎家口，出徐州茶城入漕。三十一年，河决徐州房村集，至邳州新安等处。运道淤阻五十里。总河副都御史曾钧上治河方略，乃濬房村至双沟曲头，筑徐州高庙至邳州沂河。是年，又决房村至曲头集，凡决四处，淤四十余里，命官濬之，三阅月而成。三十二年正月，从河漕都御史曾钧等请，开濬黄河下流，并筑塞草湾老黄河决口。三十一年，曾钧奏：草湾老黄河口冲激，淹没安东一县。是年二月，从刑部侍郎吴鹏河道都御史曾钧等奏，建三里沟河牐。三十年，漕运都御史应槩奏：勘得三里沟河

在淮河下流，黄河未合之上，淮水清多浊少。议者谓宜闭清河口，开三里沟，使船由三里沟出淮达黄。三十七年，河北徙自新集淤而为陆二百五十余里。河分为十一。(《河渠志》：河至是遂决趋东北段家口，折而为六。曰：大溜沟、小溜沟、秦沟、浊河、胭脂沟、飞云桥，俱由运河至徐洪。又分一支，由碭山坚城集下郭贯楼，折而为五。曰：龙沟、母河、梁楼沟、杨氏沟、胡店沟。亦由小浮桥会徐洪。而新集至小浮桥故道二百五十余里，遂淤不可复。自后忽东忽西，靡有定向，水得分浑后数年不至壅溃。)四十四年七月，河决沛县。上下二百余里，运道俱淤，全河逆流。自沙河至徐州以北，至曹县棠林集而下。北分二支，南流者绕沛县成山杨家集入秦沟至徐，北流者绕丰县华山东北由三教堂出飞云桥。又分为十三支。或横绝，或逆流，入漕河至湖陵城口，散漫湖坡达于徐州，浩渺无际。乃命朱衡为工部尚书，兼理河漕。又以潘季驯为金都御史，总河道。(《明史·河渠志》)四十五年，朱衡开鱼台南阳抵沛县留城百四十余里而濬旧河。自留城以下抵境山茶城五十余里。由此与黄河会。又筑马家桥堤三万五千二百八十丈，石堤三十里。过河之出飞云桥者，趋秦沟以入洪。(《明史·河渠志》)由是黄水不复东侵，而沛流断。工竣，帝大喜。赋诗四章志喜。隆庆元年五月，加衡太子少保。(雷礼夏《镇新河工成记》)

隆庆三年七月，河决沛县。自考城虞曹单丰沛抵徐州均受其害。茶城淤塞，船阻邳州不得进，开回回墓。四年，河决邳州，总河侍郎翁大立言：治邳阏阻之策有三，一开泇口，一就新冲，一复故道工。仍请复故道以济目前之急。(泇口即朱衡。翁大立请于梁山南别开一河以漕避秦沟之险。)五年四月，河自灵璧双沟而下，北决三口，南决八口。支流散漫，大势下睢宁出小河。而匙头湾八十里正河悉淤。潘季驯役丁夫五万尽塞出口。且濬匙头湾故道以复。(按：北决三口者，油房、曹家、青羊。南决八口者，关家、曲头集、马家、阎家、张渡、王家房、白浪浅。见《徐州府志》)六年八月，工部尚书朱衡议：专事徐邳河修筑长堤，自徐州至宿迁小河口，三百七十里。并缮丰沛大黄堤，正河安流，运道大通。(《河渠志》)

万历元年，河决房村，筑沛县洼子头至秦沟口堤七十里。古北堤除筑新堤外，别筑遥堤。二年，河决邳州东娄庄等数口，寻筑塞之。三年八月，河决碭山及邵家口曹家庄韩登家口面北。总河都御史傅希摯改筑碭山月堤。暂留三口为浅水之路，至冬并塞之。四年三月，从漕臣吴桂芳请，开草湾入海之路。七月工成。河决韦家楼，又决沛县缕堤、丰曹二县长堤。丰沛徐州田庐漂没无算。河流啮宿迁城。从桂芳请，迁县治，筑土城以避之。五年，河复决崔镇。宿邳清洮两岸多坏，黄河日淤。是年，秦沟复淤。(《明神宗实录》：先是，嘉靖三十二年以前，黄河由小浮桥，后徙由沛县飞云桥，继由徐州大小溜沟以入碭河。四十四年，河大决，改由秦沟出口，以致茶城岁患淤洼，至是复故道。)六年，命吴桂芳为工部尚书，兼理河漕，裁总河都御史。桂芳甫受命而卒。六年，潘季驯代吴桂芳。时给事中李涑请多濬海口以导众水之归。给事中王道成请塞崔镇决口，筑桃宿长堤，修理高家堰，开复老黄河故道。并下河臣议。季驯与督漕侍郎江一麟相度水势，言为今计，惟修复陈瑄故迹，高筑南北两堤，以断两河之内灌，则淮扬昏垫可免。塞黄浦口，筑宝应堤，濬东关

等浅，修五闸，复五坝，则淮南运道无虞。紧塞桃源以下，崔镇口诸决，则全河可归故道。黄淮既无旁决，并驱入海，则沙随水刷，海口自复。而桃清浅阻又不足言。条上六议：曰塞决口以挽正河，曰筑堤防以杜溃决，曰复闸坝以防外河，曰创滚水坝以固堤岸，曰止溶海工程以省糜费，曰寝开老黄河之议以仍利涉。悉从其请。

《河渠志》七年十月，两河工成。(《河渠志》)是役筑高家堰堤六十余里，归仁集堤四十余里，柳甫湾堤东西七十余里。塞崔镇决口百三十。筑徐睢邳宿桃清两岸遥堤五万六千余丈，碭丰大坝各一道，徐沛丰碭缕堤百四十余里。建崔镇、徐昇、李泰、三义减水石坝四座。迁通济闸于甘罗城南，淮扬闸堤坝无不修筑，费帑金五十六万两有奇。(《南河全考》)八年，开复邳州直河及宿迁小河。(《河防一览》)十一年正月，浚韩家口，引渠出徐州。十三年，河决范家口，水灌淮城。又决天妃闸，福兴渐淤。遣科臣常居敬督塞之。加筑范口石堤，全河复故。十五年，河决茶城寻淤。是年，复命潘季驯为右都御史，总督河道。十六年，鲍家口开。十七年六月，河暴涨，决兽医口月堤，漫李高口新堤，冲入夏镇内河，坏田庐，没人民无算。十月，决口塞。是年，河决双沟单家口，筑塔山、羊山等堤。河防幸差事。草湾河通夺正河十分之七。至赤晏庙，仍归大河。(《淮安府志》)十八年，河大溢。徐州水积城中者逾年。众议迁城改河。潘季驯濬魁山支河以通之。起苏伯湖至小河口，积水乃消。(《河渠志》：时水势横溃，徐泗淮扬间无岁不受患。)二十年，两河堤防告成。(潘季驯《堤防告成疏》)二十一年五月，河决单县黄涸口。一由徐州出小浮桥，一由旧河达镇口闸。邳城陷水中。二十三年，工部覆奏。请令沿河诸臣导淮分黄，亟行兴举。二十四年八月，总河杨一魁兴工未竣。条上导淮分黄事宜十事。十月河工告成。(《河渠志》：是役役夫二十万，开桃源黄河坝新河。起黄家坝至安东五港灌口，长百余里。分浅黄河入海，以抑黄。强辟清口沙七里。建武家坝墩、高良涧周家桥石闸，泄淮水三道入海。且引支流入江。于是泗陵水患平而淮扬安。)二十五年四月，河复大决黄涸口，溢夏邑永城。由宿州符离桥，出宿迁新河口，入大河。其半由徐州入旧河。是年，总河杨一魁奏：溶小浮桥沂河口工竣。(《明神宗实录》：自河决徐邳，复见清泗，议者以全河水微，不利运道，决口不塞贻害地方，且恐下啗归仁，为徐泗患。独总河尚书杨一魁谓。黄涸口深阔难塞，议濬小浮桥沂河口。至是工程报竣。)二十七年，总理河漕刘东星奏：浚三仙台至赵家桥工成。(《明神宗实录》)二十七年三月，工部覆刘东星议：谓黄河自商虞而下，至小浮桥，下二洪，乃贾鲁老黄河故道。自元及嘉靖年间，行之甚利。至三十七年，北徙浊河，而此河遂淤。今河决黄涸而南徙，由韩道口至赵家圈百余里，冲刷成河，即先年议复之故道。由赵家圈老黄河开挑，由东镇曲里铺石将军至两河口，直接三仙台新渠，计长仅四十里，挑阔十丈，深一丈，募夫五万人，费可八万余两，不过一月有半，可以竣工。报可。又是年八月，东星开赵圈至彭城贾鲁所濬故道。起曲里铺至三仙台，四十四里。又起三仙台至小浮桥，开支流若干里。凡五月成。二十九年，河决单县蒙墙寺。入商永，南流与淮会。三十一年四月，河暴涨，冲鱼单丰沛间。又决单县苏家庄及曹县缕堤。又决沛县四铺口太行堤，灌昭阳湖入夏镇，横冲运道。三十二年，从工部尚书姚继可请，开泇分黄并举。(《明神宗实录》：工部尚书姚继可题，泇河已有成绩，泇成而漕可藉。至于黄河冲徙，鱼鳖丰沛，若非因势利

导，何以拯救元元。总河即李化龙议，于坚城集以上开渠引河，而下流多通，复分六坐楼苑家楼二路，而水势多杀。既可以移丰沛之患，又不至沿碭山之城，请开泇分黄并举。允之。)是秋，河决丰县，由昭阳湖穿李家港口出镇口，上灌南阳湖。三十三年三月，总河尚书李化龙建议严守堤赏罚。从之。(附李化龙疏略：年来缓于堤防，急于挑浚。及至堤坏水溢；尚不引咎于守堤之不力，而且委罪于浚河之不深。则何不取河势观之也。河北岸自曹县以下，无入张秋之路。南岸自虞城以下，无入淮之路。惟是向来运道，由徐邳以达镇江，故河北决曹单丰沛间，则由昭阳湖三百六十里之淤途，易而为二百六十里之捷径。此后黄河在山东直隶间能系运道之命脉者寡矣。独朱旺口以上，决单为沼，决曹则曹为鱼。与夫丰沛徐邳萧碭数十万生灵，总悬命于遥遥之一线，则堤防亦何可缓也。堤防固则上无泛溢，下必顺流。不固而下虽通行，上必旁夺。此一恒人能辨之，而何恃议者纷纷也。前年水行堤北，则曰：“昭阳湖不能行水，水且倒灌矣。”昨岁水分堤南，则曰：“新河不能行水，水且倒灌矣。”倒灌之说与筑塞之事缓。卒之堤溃河淤，水之取道昭阳湖而南者自如。安见其倒灌。则又何不取地势观之也。自朱旺口由苑家楼杜家楼以至小浮桥，上下相较，可低三四尺。北高南下，居可知矣。若水入新河，两两分行，纵伏秋暴涨，不过溢岸而止。岂能自卑趋高，自下趋上哉！故上堤诚守，则河必在朱旺口上下，亦其自然之势，又何倒灌之足患。倒灌之说，原为失堤者逃罪之地。乃其弊也。请西自开归，东至徐邳，必无不守之地。上自司道，下至府县，必无不守之人。掌印官与管河佐贰，同其赏罚。守巡与管河司道同其功罪。庶人人任事，不得分藩篱。人人著肩，不暇腾口说。)是年总河侍郎曹时聘大挑朱旺口，由坚城集出徐州小浮桥。(《南河全考》：自苏庄至徐州几二百里，悉州县正官受役分地而浚之。河垂成，徐州之上有八九里许未及浚。而苏庄逼近黄河，堤工单薄。忽从地下穿入新渠，震撼东下，不待放水，流至未开处稍梗塞，遂泛滥新河之外，然大势已定，可以堤约束之。鱼沛单济之水，悉归大河。)三十四年四月，新河成。(《明神宗实录》：四月癸亥，大挑河工成，自朱旺口达小浮桥，延袤一百七十里。渠势深广，筑堤高厚，溃流复故道。自十一月至今，阅五月而工成。)是年六月，河决萧县郭暖楼人字口。北支至茶城镇口。三十九年，河决徐州狼矢沟。总河刘士忠檄中河郎中吴大忠淮徐道袁应泰筑塞之。四十年，河决徐州三山口梨林舖以下二十里，正河悉为平陆，邳睢河水耗竭。总河刘士忠开韩家坝外小渠，引水坝东，复通舟楫。寻三山决口塞，河复故道。四十一年七月，河决祁家店口，徐州城南胥溺。四十四年五月，河复决狼矢沟。(《南河全考》：决水由哈蟆周柳等湖入泇河，出直口，复与黄会。)是年六月，河决开封陶家店。四十五年，河复决狼矢沟，淹徐州东北各乡村，吕梁洪水乾。(《明神宗实录》：河臣王佑言：狼矢沟决口不可不塞。黄河故道难听久淤，直河泛滥可虞。)(《河渠志》：后二年决口长淤沙，河始复故，总河侍郎王佑加筑月坝以障之。)

天启元年，淮黄涨溢，决里河王公祠。淮安知府宋统殷、山阳知县练国事力塞之。二年四月，河决徐州郭家嘴。(《行水金鉴》)是年七月，河决。围绕睢宁县城，庐舍漂没。徙治避之。三年，河决徐州青田大龙口，徐邳灵睢并淤，吕梁城南隅陷沙

。双决口亦满。上下百五十里尽成平陆。是年七月，山阳外河决乾沟，南河郎中朱国盛、淮海道宋统殷等筑塞之。更于清口分水处建立矾觥，以遏上流之势。四年六月，河决徐州魁山堤，东北灌州城。一自南门至云龙山，西北天安桥入石狗湖。一由旧支河南流至邓二庄，历租沟东南以达小河。出白洋，仍与黄会。总河房壮丽题淮大挑故道，复加埽筑塞之。(《徐州府志》：徐民苦淹溺。议集费迁城，给事中陆文献上徐城不可迁六议，而势不得已，遂迁州治于云龙山东。)是年九月，河决丰县西洋庙及十七铺。六年七月河决淮安匙头湾，逆入骆马湖，灌邳宿。

崇祯二年四月，河决睢宁新安口。至七月，城中尽圯。总河李若星请迁城避之。开邳州坝，泄水入故道。塞曹家口匙头湾，逼水北注，以减睢宁之患。从之。是月，大水决郭家觥，灌石狗湖，由下洪渐入黄河。四年六月河决建义。诸口灌兴化、盐城。七年二月，建义决口塞。六月，河决沛县之满坝及陈岸水口。又决长山堤口。参议徐标率河防同知张俊英塞之。十五年九月李自成决河灌开封省城，民尽溺死。决口有二，曰朱家寨，曰马家口。命工部侍郎周堪赓督修汴河。十六年四月，塞朱家寨决口。五月，决口再溃。(《河渠志》：周堪赓言：河之大势尽归于东，运道已通。疏甫上，决口再溃。帝趣鳩工，未奏绩，而明亡。)(《通鉴·明纪》：崇祯十五年，贼围开封半年，师老粮匱，欲决黄河灌之，以城中子女宝货犹豫不决。有献计于巡按御史高云京者，谓河决则贼可尽，遂凿朱家寨曰。贼自侦知之，移营高阜，多具舟筏以待。驱掠民夫数万，反决马家口以灌城。九月壬午夜半，二口并决，大雨连旬，河流骤涨，声闻百里，丁夫荷插者、随堤漂没者十数万人，贼亦沉万余人。河入自北门，灌城东南门以出，注涡水。城中百万后饥疫死者十之二三，至是尽没于水。巡抚高名衡等乘小舟及周王恭枵等从后山登城楼，王燮自河北以舟来迎获免。)

清顺治元年七月甲辰，以内秘书院学士杨方兴为兵部右侍郎兼右佥都史，总督河道。是年，黄河自复故道。二年，河决考城之刘通口。闰六月己丑，河决王家园。(《东华录》)三年，刘通口河流北徙，自午沟至徐州河涸。四年，河决宿迁罗家口。五年四月壬申，开封河工成。)(《东华录》按：即刘通。)九年七月戊戌，户部左侍郎王永吉条陈治河事宜。(原奏略曰：黄水自邳宿而下，至清河口。淮泗之水聚于洪泽湖，亦出清河口。淮黄交会东入于海。然黄强淮弱，势不相敌。淮泗逼而南趋直走四百余里，出瓜州仪真，方能达江。一线运河收速甚紧，即有大小闸洞沿途宣泄，而海口不开，下流壅塞，所以河堤溃决。修筑岁费金钱，九载以来，八年昏垫，海口之当开，刻不容缓者。)(《清世祖实录》)(按：王永吉疏言：“九载以来，八年昏垫”是自顺治二年至是年河无岁不决。而史不尽书，今录以补。)是年，河决河南封邱大王庙口。从直隶长垣趋东昌北入海。(《一统志》)(按：《梅村诗集·七律即事其五》自注：“金龙口决，河从北入海，清江宿迁水势稍缓，皆起新沙。”吴氏翌凤注：金龙口在封邱，即大王庙口。)十二月癸卯，杨方兴请复修兴福闸。原疏略言：“清口为淮黄交汇之处，淮弱黄强，遂内灌。前人置闸筑坝，原以防浊沙淤之患。自闸禁废弛，岁需挑濬，为费不貲。今请于清江通济二闸适中处，寻兴福闸旧

址，先行修复。启一闭二，以时宣泄，岁可省无限挑濬之费。十年十一月，邳州董家堂河决。(《清世祖实录》)顺治十年十一月戊申，河道总督杨方兴言；“黄河旧达邳城，因患其淹灌，始徙于艾山之阳。不意土中伏有虎山，复激水北流。今董家堂堤岸冲决，势难捍御。议于虎山象山以南改挑新河四千一百七十余丈，旧河筑坝截流，使水尽归新河，以利运道。章下部议。十二年，大王庙决口塞。十四年七月庚申，谕吏部右侍郎朱之锡气度端醇升兵部尚书兼右副御史，总督河道，提督军务。十五年，河决山阳之柴沟姚家湾。河道总督朱之锡筑塞之。

康熙元年七月，筑塞桃源县烟墩决口。二年十月丙辰，淮徐道事务归并淮海道。四年，河决安东茆良口诸处。五年十一月巳亥，以杨茂勋为河道总督。七年正月戊申，杨茂勋奏：烟墩复决，大溜南徙，正河淤成平陆，计三十里。亲赴河干相度河形，先挖引河。一面接筑进埽，决口渐狭。逼水由引河而下，向之淤为平陆者，已通舟楫。(《清实录》相同)六月庚辰，烟墩工竣。是年，河又决桃源黄家嘴。(《清实录》：工部议覆杨茂勋奏，河决桃源黄家嘴，坏堤工百余丈，令该督速行确勘修筑，从之。)八年十月乙丑，以罗多为河道总督。是年，河决清河之三汉口。九年四月丁亥，改淮海道为淮扬道。辛亥，增江南清河宿迁归仁堤同知各一，主簿各一。乙卯，河决归仁堤。(《清实录》)九年，河决清河之王家营二堡卢家渡文华寺至永兴集。(《扬州府志》：自九年后，黄运等并归仁堤瞿家坝白洋河等工，俱用正赋濬筑，皆总河罗多所请。)十年二月巳丑，以王光裕为河道总督。八月，茆良诸决口塞。(《淮安府志》：先是山安一带决口甚多，而茆良口为大。茆良决于康熙四年，历今七载始塞。)十月，河决桃源之陈家楼，即塞之。(《清实录》：十月乙巳，王光裕奏：河决桃源，坏民堤二百五十余丈。下部速议。)十一年四月癸卯，命侍卫吴丹学士郭廷祚阅视河工。六月辛丑，以吴丹郭廷祚回京言：“黄河自宿迁至清河，皆为紧要。虽有遥堤一层，未足捍蔽水势。应否于遥堤之外，再筑遥堤”。谕工部行河道总督漕督会同商度。十四年，河决徐州之潘家堂及宿迁之徐家楼。是年，河又决王家营，清河水入县城及睢宁花山坝口、辛安、黄山、白山、刘家庄、董家庄、青羊、木社等处。十五年，河决宿迁之白羊河于家冈。又决清河张家庄、王家营及安东邢家口二铺口、山阳之罗家口诸处。十六年七月，河决宿迁之杨家庄。十七年十一月，靳辅塞清河安东决口九，建王营决水坝十，挑烂泥浅引河五。是年从靳辅请，于黄河上流徐州及萧宿等县各建减水坝，以减黄河涨水。萧县堤决。二十年，塞杨家庄决口河工告成。(《淮安府志》靳辅治水，大要师潘季驯遗意。其最要者，均剂黄淮，使势均力敌。黄偏强则蹶淮内灌之患立至。淮偏强则遏淮上停沙立见。于建高堰立水坝以泄淮。又于徐睢山麓凿天然闸坝，遇黄涨减归洪泽，去河既远。沙澄水驶，并作淮势以敌黄流。二渎既均，遏蹶并绝。)二十一年五月，河决宿迁徐家湾，塞之。六月，河决宿迁萧家渡。三十二年，河归故道。二十四年，诏从靳辅请，于碭山徐州睢宁加建减水坝，以资宣泄。二十六年，开中河，自仲庄至宿迁。二十七年，河决李家楼口。五十八年，挑王营东引河。六十年，河决武陟詹家店马营口等处，灌濮范寿张。与赵王河合出运河，下大清河入海。(《徐州府志》：河自顺治九年北流，越三年。塞归故道，至是复决而北趋。河经徐州凡七十八年。)六十一

年，总河陈鹏年塞马营等口，河复故道。

雍正三年六月，睢宁南岸朱家口河决，由宿迁虹县泗州达洪泽湖。总河齐苏勒塞之，未竣。四年，朱家口水复溢。十二月，决口合。七年，改河道总督为江南河道总督，驻清江浦。

乾隆二年，总河移运口于旧运口以上，与三议河接。七年七月，河溢冲滩铜山之石林、黄村二口。东决沛县缕堤，入微山湖，淹及滕峰。八月工开。十年八月，河决阜宁陈家浦。十月，塞之。十五年，豆瓣集河溢，塞之。十六年六月，河决阳武祥符。分流入直隶山东，至张秋。梗运河入海。十一月塞之，仍归正河。十八年九月，河决铜山县张家马路。全溜南注灵璧虹等县，归洪泽湖。由五坝泄入高宝，东注下河。十二月，塞之。二十一年，铜山北岸孙家集河水漫溢，掣溜灌入微山湖，下及荆山桥河。铜、邳、宿、桃、海诸州被淹。荆山河淤为平地。遣刑部尚书刘统勋督筑，十月塞之。(《东华录》：十月甲申，刘统勋署南河总督，代富勒赫。)二十六年七月，河决中牟杨桥，趋尉氏县。贾鲁河由涡河入于淮，十月塞之。(《东华录》：八月己巳，谕祥符黑冈口漫溢。已命裘日修前往会办。兹据奏：河溜夺出杨桥，直趋尉氏县，贾鲁河旧流淤浅，于河防最关紧要。著大学士刘统勋协办大学士公兆惠速往督率查办。十月己亥，河南杨桥漫口合龙。)三十一年八月，河决铜山县韩家堂，分溜南下。由铜山、睢宁、宿迁、灵璧、虹县各境入洪泽湖。十月，塞之。(《东华录》：乾隆三十一年八月癸卯，铜山县韩家堂河溢。十月辛亥，韩家堂漫口合龙。)三十六年十月，河决桃源厅陈家道口，寻塞之。(军机处谕档：三十六年十月十二日，高晋奏：桃源厅陈家道口漫口合龙。)三十九年，河决淮安老坝口。漫水入府，十月塞之。(《东华录》：是年九月乙卯，谕：伊龄阿奏，淮安一带被水冲刷情形，漫口至七十余丈，经理亦殊不易。高晋督办固属妥协，何媚于勘办潘家引河后，即速赴老坝口会同速办。十月壬午，老坝口堤工合龙。)四十一年，高晋萨载请于陶庄上复开引河，使黄水绕北下注清水，至周庄与黄会二渎并流。绘图入告，以之引河成。明年放河由陶庄北行，旋塞旧河口坝。(《淮安府志》：于是河流畅注，清黄相安。复移东水坝子平成台。)四十三年闰六月，河决仪封考城等汛，全溜由贾鲁河故道南达亳州涡水入淮。四十五年二月，塞仪封决口。七月，河决睢宁郭家渡，三股分注洪泽湖。九月，塞之。四十六年六月，河决邳睢厅南岸魏家庄，注洪泽湖。八月，塞之。七月，河决河南北岸青龙冈，全溜入运。分泄微山诸湖，下注邳宿。九月，青龙冈漫水淹沿沛县城。(迁治标。)四十八年三月，塞青龙冈决口。五十年八月，黄水倒漾清口淤平。(《淮安府志》：始议借黄济运。)五十一年七月，清口一带黄河北岸李家庄汤家庄先后决溢。十一月，塞汤家庄漫口。五十二年六月，河决河南睢州十三堡，由商邱一带从涡入淮。十月塞之。五十四年五月，河决睢宁周家楼，分由宿迁桃源入洪泽湖。十月，塞之。五十五年，河溢出砀山王平庄民堰，萧宿被水。十月塞之。五十九年六月，丰汛四堡曲家庄河溢。水由丰县清水河入沛县食城河注微山湖6七月塞之。嘉庆元年六月，丰汛河溢。十一月十五，塞之。十一月二十，丰汛复决。(见《嘉庆上谕》档。)二年正月，丰汛决口复塞。七月

，碭山杨家坝河溢，下注洪泽湖。寻又决山东曹汛北岸。是年八月，杨家坝决口塞。十二月，山东巡抚伊龄阿奏：“曹汛决口合龙。”寻溃蛰。三年八月，河南睢州上汛堤工漫溃南注，分流睢州宁陵鹿邑，由亳州入洪泽湖。曹汛决口断流，下淤涸。四年正月，东河总司马驹奏：“睢工合龙，全河复归帮道。”八月，碭汛部家坝河决。五年十一月，邵家坝决口塞。八年九月，河决封邱衡家楼。决口塞，河归教激，十一年五月，启放王营减坝。六月，掣动大溜，直注周汛鲍营可张家河，入南北六塘河，汇为一片，下漫入海。七月，河决睢宁宿南厅三堡，分流审周家接旧河形入沈家湖，从归仁堤归洪泽湖。八月，河决周汛迤上六里之郭家房土堤。水仍归周汛漫口，河形下注。九月，两江总督铁保等奏：“周汛决口堵合。河又决徐州苏家山右坝，分入运河。”十二月，塞郭家房苏家山决口。十二年二月，塞王营减坝决口。是月，河溢山安马港张家庄，分流由灌口入海。七月，阜宁县陈家浦决溢，由王率港入射阳湖入海。

十三年正月，陈家浦决口塞。六月，云梯关外马港六套一带河溢。十五年十二月，塞出安厅(即马港)六堡一带决口，河复故道。十六年正月，以河复故道，增设淮海道。七月，河决邳绵拐山，由花山湖归顺堤三分岔湖入运。又决萧南碭山汛李家楼，分由毛城铺宣泄旧路入湖。八月，塞绵拐山决口。十一月，王营减坝决口塞。十七年二月，塞李家楼决口。十八年，河决河南睢州下汛二堡。全黄夺溜，尽归洪泽。苏境正河水落停淤。二十年二月，睢工塞口成。苏境正河复归故道。(《续行水金鉴》：是年三月初三日，黎世序奏“睢工台龙，江境黄河初归故道，两岸堤防倍宜慎重。”)二十四年九月，河决武陟堡马营坝，分流下注张秋。二十五年三月，塞马营坝决口。是年，河南仪封三堡复决，十二月塞之。(《东华录》：是年十二器丁酉，河南仪封漫口合龙。)

道光六年八月二，以黄淮并涨，启放王营减坝，掣动大溜，安东沐阳海州一镔皆成巨浸。七年三月庚辰，琦善等奏：“堵合减坝。”戊戌，以琦善等又奏，谕：请“开减坝，原为泄黄。今并无戏效。依然倒灌。总须勘明致病之由，速筹补救之策。”十二年八月二十一日，桃源县人陈端等盗挖桃南厅于家湾大堤，掣动大溜，永入洪泽湖。十三年正月，塞桃南厅于家湾决口。二十一年六月癸卯，河南下南厅祥符上汛河溢，下注凤颖入淮。二十二年二月初八，塞祥符上汛决口，河归故道。七月庚午。江苏桃北厅崔镇汛扬工河溢，自下口萧家庄刷宽夺溜穿运河破遥堤，由六塘下淮。二十三年六月，河南中河厅中牟汛九堡河溢，夺贾鲁河，下经陈颖入淮，扬工断流。二十四年十二月二十四日，塞中牟下汛九堡决口，河归故道。二十五年六月，江苏中河厅桃原汛北岸河溢。八月，中河厅桃源汛决口塞。二十九年六月，河决清河县五套以下之太平河，淤成平陆。旋塞之。

咸丰元年八月，河决丰北厅下汛兰堡，北出四文达昭阳湖，南出三支达徽山湖。三年正月，丰北厅下汛三堡决口塞。是年五月，丰北厅下汛兰堡复决。丰沛漫流如故。五年六月，河决下北厅兰阳三堡铜瓦厢，迳东北山东张秋穿运，夺大清河入海。(

《东华录》：成丰五年六月癸丑，谕，蒋启扬奏：“下北厅兰汛铜瓦厢堤工危险。六月十九日浸溢过水，二十日夺溜，正河断流，浸水微向西趋，直注东北。”七月丙戌，李钧奏：“黄河流失向西北斜注，淹及封邱祥符二县村落。复折转东北，浸注兰仪考城及直隶长垣县村落。复分三股，一股由赵王河走山东博州府迤南下注，两股由直隶东明县南北二门分注，经山东濮州范县至张秋穿运，总归大清河入海。”按，自铜瓦厢闪后，河遂北徙，苏境无水。特志之。）

第二卷 厅汛表

徐州道

丰北厅，通判。原属徐州河务同知。乾隆五十六年改设。咸丰十年六月裁。

铜沛厅，同知。原属徐州河务同知。乾隆二年改设。咸丰十年六月裁。

邳北厅，通判。原属邳睢管河同知。乾隆五十六年裁六塘河同知改设。咸丰八年归并宿北同知。咸丰八年裁。

宿北厅，同知，原属宿虹河务同知。嘉庆八年改设。咸丰十年六月裁。

萧南厅，原属徐州河务同知。乾隆二年闰九月增设通判。三年十二月铸给丰萧碭河务通判关防。五十五年十月改为萧碭南岸通判。嘉庆五年改为同知。嘉庆五年改设萧碭南岸同知。咸丰十年六月裁。

睢南厅，同知。原属邳州睢宁灵壁河同知。乾隆五十二年正月，分南河邳睢厅为睢南邳北两邳睢同知。原设同知为睢南同知，咸丰八年并归宿南通判。咸丰八年裁。

宿南厅，原属宿虹同知。嘉庆八年改设。咸丰十年六月裁。

淮海道

桃北厅，原属桃源同知。乾隆五十四年以桃源同知改设。咸丰十年六月裁。

山安厅，原属山清安海同知。康熙十一年分山清桃盐同知设安海，十七年裁并。名目山清安海同知。康熙十九年分设山安外河同知。咸丰十年六月裁。

海安厅，同知通判，原属山安同知。嘉庆十六年正月设海安厅抚民同知。道光十四年五月改通判。咸丰十年六月裁。

桃南厅，通判，原属桃虹同知。乾隆五十四年二月改镇江府通判为桃源南岸通判。咸丰十年六月裁。

海防厅，原属明淮安府海防同知。雍正九年改山阜南岸同知为外河同知。咸丰十年六月裁。

海阜厅，原属海防同知。嘉庆十六年正月设海阜同知。咸丰十年六月裁。

外南厅，本山清外河同知。康熙十七年改由山清安海河务同知。乾隆十三年改外南同知。咸丰十年六月裁。

里河厅，本山清河务同知。康熙十三年后改山清盱眙河务同知。十七年后改山清里河同知。乾隆改里河同知。咸丰十年裁。

高堰厅，康熙三十八年设高堰通判。驻高家堰。咸丰十年六月裁。改设淮安府同知。

淮扬道

外北厅，通判，原属外河同知。嘉庆十六年分外河厅之北岸汛设。咸丰十年六月裁。

山盱厅，山盱通判，道光十四年五月改设同知。咸丰十年六月庚辰裁。

扬河厅，通判，咸丰十年裁。

常镇道

扬粮厅，道光二十年扬粮通判改为扬运通判。二十九年并江防扬运两厅为一，曰江运同知。咸丰十年裁。

江防厅，同知，道光二十九年七月，改扬州府江防同知为江运同知。咸丰十年裁。

南河淮汛

徐州道属丰北厅

通判一员，守备一员。管理碭山、丰县、铜山三县境内黄河北岸工程。上自山东单县粮河厅马良交界起，下至铜沛厅大坝汛大谷山止。缕堤长二万七千四百丈二尺。为汛三：曰丰上汛，曰丰下汛，曰铜汛。

丰上汛，县丞一员，千总一员，协防一员，管堡夫四十名，兵八十八名。汛地自山东单县界马良集起，至丰下汛毛家马路界止。缕堤长八千六百十六丈，属碭山县境。马良交界处土坝一道，长一百五十丈。雍正十年筑。吴家寨起，至贾家楼止，外越堤一道，长七千二百七十六丈。嘉庆二年并七年两次创筑。今作缕堤。六堡二坝越堰长八百七十九丈。嘉庆二年筑。又筑二坝外越堰一道，长一百三十丈。外镶埽长一百五丈，旋淤。贾家楼外抢修埽，长六十八丈。嘉庆十一年建，旋淤。吴家楼

越堤一道，长九百四十三丈。康熙三十九年筑。内有旧涵洞一座，宽高各一尺六寸。

丰下汛，主簿一员，把总一员，协防一员，管堡夫七十八名，兵九十名。汛地自上汛界起，至铜汛黄村坝尾止。缕堤长八千一百八十五丈二尺。自上界至兵七堡，堤长二千二百七十三丈，属碭山县境。接前至天十一堤止，堤长三千六丈二尺，属丰县境。接前至黄村坝尾止，堤长三千九百六丈，属铜山县境。杨家庄越堤一道，长五百二十丈，乾隆二十五年筑。蟠龙集外越堰一道，起吴家楼铁犀，迄御水坝。长九百七十二丈。嘉庆十二年筑。十四年于堰头，筑马盘堰一道，长二百五丈七尺五寸。堰外间筑挑坝二道。坝头并各档内，皆镶护埽。今淤。蟠龙集堰外迤上挑坝三道，用柴盘头。旋淤。又迤下柴坝土挑坝五道。各坝空档岁修护埽一百五十八丈三尺。十二年后建。陈家坝下至御水坝，柴土坝八道。各坝档内岁修埽工长一百四十六丈二尺。嘉庆十三年二十年先后建。唐家林柴土挑坝五道，岁修埽工长四十丈，嘉庆二十一年建。于家庄挑坝五道。嘉庆八九年筑。包家楼挑坝一道长二百八十丈。嘉庆六年筑。石林南坝圈堰一道，长一百五十六丈。嘉庆十五年筑。现有岁修埽工四十四丈三尺。石林工后越堤一道，长八百三十丈。乾隆八年筑。堤内格堤一道。乾隆五十五年筑。接下梁家马路越堤一道，长四百六十丈。乾隆二十二年筑。接下二越堤一道，长四百八十五丈。乾隆三十二年筑。堤南兵九堡越堤一道，长四百六十丈。嘉庆二十年筑。外有埽工，今淤。胡家马路挑坝，长四百八十一丈八尺。嘉庆十二年筑。在石林工下。黄村土坝一道，长三十丈。嘉庆十二年筑。

铜汛，巡检一员，把总一员，协防一员，管堡夫四十八名，兵八十三名。汛地自丰下汛界黄村坝尾起，至大谷山铜沛大坝汛地止。缕堤长一万五百九十九丈，属铜山县境。徐家庄挑坝一道，长一百五十丈。嘉庆十二年筑。五兵堡挑坝四道，嘉庆八年筑。潘家屯：乾隆三十九年秋，河东总河姚立德以是年天旱，微山湖存水较少，不足济运，奏请于徐州北岸潘家屯开堤，引黄入湖。特命大学士仍管两江总督高晋勘办。当即勘覆，江南黄河上游，别无旁泄之路，只有毛城铺与苏家山二处。而苏家山滚坝，因有大谷山两相夹峙，坝建山根，天然节制，不能照办。惟有仿照毛城铺做法，量为收小。于潘家屯建立碎石滚坝，宽以二十丈为度。两堤头签桩砌石裹护。仍于滚坝外建束水堤，并钳口草坝。酌留口门六丈，以为金门关键。应于潘家屯东南米家庄地方，开挑进黄引渠一道，长二千一百十丈，深九尺，与新建坝底相平。势成倒钩，不致吸留。坝内旧日冲刷河形，名耿河，长五千九百三十丈。量为疏浚，两岸各筑子堰五千一百余丈。俟徐城水志消至六尺时开放，俾过水二尺入湖。徐城志桩长至七尺以上，即行堵闭。奏奉殊批。既有益无害，自当上紧兴工。遵照办竣。四十年复又启放。迨后黄河渐高，未敢再启。已久培筑大堤，一律修守坝下河堰。四十七年微湖水发，均为刷垫。夫十四堡土坝四道，嘉庆八年筑。谢家马路、许家马路、张家庄、刘家马路、田家马路、李家庄各土坝一道。嘉庆十二年后筑。夫二十堡起大谷山南面，嘉庆十二年包砌碎石，长一千八百四十丈。张家庄因乾隆四十六年河南青龙冈漫溢，黄水东注南阳微山等湖。开挖堤工分泄入黄。四十

八年堵闭。

徐州道属铜沛厅

同知一员，守备一员。管理铜山县境黄河两岸工程。北岸自丰北铜汛交界大谷山起，至邳北厅属董汛邢家楼交界止。堤长一万二百九十一丈，连山顺计，共程一百八里零。为汛一，曰大坝。

北岸大坝汛，主簿一员，吕梁司巡检一员，把总一员，协防二员，管堡夫五十二名，兵一百七十五名。汛地上自丰北厅铜汛界大谷山起，中历各山，至邳北厅董汛邢家楼交界止。缕堤间段共长二百九十一丈。有堤无堤计程一百八里零。大谷山至苏家山：康熙十七年筑堤，长四百四十七丈。乾隆二十四年，即堤顶建碎石滚坝，长五百二十丈。坝上临黄挑河长三百丈，以泄黄涨。后因河势径直，四十六年改于苏家山根挑河，长七百九十六丈。引黄入坝，积久渐淤。并将滚坝南长三百十丈淤没，止存北长二百十丈。嘉庆三年过水太畅，跌塘堵合于坝外，加砌碎石。六年复于坝上由大谷山至苏家山，筑缕堤一道，长六百十丈，外抛碎石。又自大龟山至小龟山筑格堤一道，长一百八十丈。又自小龟山至凤凰山筑缕堤一道，长三百四十五丈。为大谷山新筑缕堤重门之障，苏家山石闸一座。康熙二十一年修建。金门口宽四丈，南墙石高一丈二尺，北墙石高二丈四尺。嘉庆八年，两墙各加石三层。十四年，南墙上雁翅上，接筑石工，长八丈，计石十二层，本为减黄济运随时启闭，水同大谷山滚坝减下之水，由闸下水线河达彭家口河，入荆山桥河，入运。嘉庆十三年后，至今未放。闸上已筑缕堤。凤凰山天齐庙之东，嘉庆十二年筑碎石挑坝，长三十四丈，以逼水线河下注之水。荆山桥河一道，自微山湖边起，至邳州界止，长一万九千七百五十二丈，上承照阳、微山二湖之水，经蔺家山出荆山桥下，至邳州猫儿窝入运。乾隆二十三年水利案内复加疏浚。嘉庆十二年，大谷山闸坝泄黄过大河间淤塞。蔺家山为微湖尾间总汇之区，向筑拦河坝，长一百二十三丈。乾隆四十八年奏明中筑柴坝长四十三丈，以蓄湖水，随时启闭。荆山桥石桥一座，康熙三十年里人张某捐修，长三百六十二丈。岁久倾圯。乾隆十一年，河臣白钟山以该桥为南北通衢中大路，驿递要道，奏请重建石桥长四百九十二丈，内中间大桥十九孔，每孔口宽一丈一尺，高一丈六七八尺。西首平桥九十五孔，每孔口宽七尺，高七八九尺，至一丈二三四五尺。东首平桥四十五孔，每孔口宽七尺，高六尺，至九尺一丈二三尺。陡山至子房山缕堤一道，长一千四百二十六丈。康熙三十八年筑。堤下有镇口闸一座，即明时旧运口，久淤。黄山至骆驼山止，缕堤一道，长二百二十五丈。内康熙五十八年原建，长九十丈。嘉庆十二年接长一百三十五丈。华家楼起至长山头止，缕堤一道，长二千五十二丈。康熙三十八年帮民堰为缕堤。堤北邢家楼越堤一道，长八百丈。康熙二十五年筑。嘉庆四年黄山坝漫溢，并水线河历次倒漾，黄水淤平。又土山寺前土坝一道，长三十丈。土山寺至时家山土坝一道，长一百八丈。皆乾隆十五年筑。邱家山前土坝一道，长一百二十五丈，嘉庆二十三年筑。凤凰山东关帝庙起至王家山止，缕堤长二千四百四十丈，系明季筑，即长樊大坝堤

。北有明季所筑越堤一道，长二百九十丈。接下越堤长四百九十丈。康熙六十一年筑。下越堤长三百丈，雍正三年筑。接下越堤二道，一长一百七十丈，一长三百八丈，皆五年筑。接下越堤至白马泉迤东山根止，长四百二十四丈，乾隆八年筑。内有民修涵洞一座，宣泄白马泉水，由出头山裹头闸达房亭河入运。又自九山头起，至出头山止，遥堤一道，长一千六百八十九丈，康熙三十八年筑。为大坝险工重门之障。内有民修涵洞二座，一雍正十年建，一乾隆九年建。裹头闸一座，康熙二十二年建。堤南碎石盘头土坝十道，并各坝空档及工尾护崖碎石，共长四百八十五丈五尺。嘉庆二十一年至二十四年建。又夫十堡抢修埽工，五十九丈六尺。王家山至阎家山缕堤一道，长一百三十丈，名天生坝。本系民堰，乾隆四年官为帮培。现长二百丈。茅家山至秋山头缕堤一道，长一千六百三十四丈。本系民堰，原长一千五百五十四丈。雍正三年官为帮培。嘉庆三年又越接长二百六十三丈五尺。内以下首作为越堤，长一百八十三丈五尺。余为缕堤。堤南茅工埽工，长一百十七丈，埽工上下碎石盘头土坝五道，各坝空档并包坡碎石长一百七丈。嘉庆十七年建。董家山至陆家山土坝一道，长二百四十丈。康熙十九年建，西面包砌碎石。庞家山至邳北厅属交界止，缕堤长一千五百三十七丈。康熙十九年建。现在临河堤坡均包碎石。房亭河长二万一千五百丈四尺。

南岸郭汛县丞一员，把总一员，协防一员，管堡夫四十六名，兵一百四十八名。汛地上自萧南萧下汛胡家楼交界起，下至三山头小店汛界止。南堤一道，间山凑长七千三百二丈七尺。自萧下汛胡家楼起，至天然闸止，缕堤长一千七百二十九丈。内堤北滩面，嘉庆二十三年刷有顺堤河水入天然闸。二十四年于侯家楼筑做拦水滚坝一道，长五百六十丈。两头用土，中长一百七十丈，筑成碎石滚坝。较准北门志桩存水二丈三尺五寸，该坝过水二尺。俾有节束，以免天然闸吃重。又于迤东七百三十丈处河形内筑土坝，长一百五丈。又于迤下二百八十丈处筑土坝长七十丈。天然闸西临河筑顺水坝一道，长二百五丈，嘉庆七年建。天然闸西堤南越堤一道，长二百九十二丈，乾隆三十四年建。天然闸一座，金门宽三丈二尺，闸墙原高二丈二尺，康熙二十二年建。历年加高十六层，现高四丈一尺二寸。闸上东西钳口坝一道，土尾柴头东长一百八丈，西长七十五丈，中长三十一丈。每年启闭西钳口坝之南格堤一道。长四十九丈五尺。又自缕堤至东西钳口坝，各筑拦堰临水，一面护以碎石，皆嘉庆六年建。闸下河堰，起铜山经萧县，历安徽宿州、灵璧、泗州以达洪泽湖。嘉庆二十年创。十八里屯滚坝，其水由虎山腰泄入天然闸河。随培堰濬河，将近闸东岸王家山至赵家山筑堰一道，长一千七百三十七丈，两面包护碎石。又培两堰，起自闸下，经萧县、宿州艾山止。工长一万五千六十一丈。内铜境堰长三千九百四十一丈，萧境堰长九千四百六十丈，宿境堰长一千六百六十丈。又自宿州史家山起，至彭家闸止，培堰长五千八百二十丈。铜萧境内间段濬河长七千四十九丈。宿州灵璧境内间段濬河，长一万三百九十丈。泗州境内间段濬河长六千四百九十丈。该处河堰向系地方州县修理，所用钱粮归民摊征还款。此次需用较多，民情拮据。经督臣百龄河臣黎世序奏，准作正开销。苗家山至冰雹山，即十八里屯，缕堤一道，长一千五十丈，康熙三十八年建。历年帮加，现长一千一百三十九丈。堤之东西

两头，康熙二十二年各建有天然石闸一座。年久淤没。十八里屯，嘉庆二十年创建滚坝，以泄黄涨，而护徐州郡城。内缕堤之北凿山为底，就山建头石坝一座，两墙砌石。金门宽二十八丈，东墙高二丈四尺，计石二十层，两墙高一丈八尺，计石十五层。二十三年又加两层，闸尾至缕堤建东束水堤，长三百六十丈，西束水堤长二百八十丈。临水一面均护碎石。中挑河长三百五十四丈。较准北门水志，存水一丈七尺五寸，与该坝石底相平。二石坝一座，西距苗家山十丈。陂堤就山，金门宽三十丈。两墙砌石，中铺碎石为底。东裹头高二丈四尺，计二十层。西裹头高一丈九尺二寸，计石十六层。闸下即丁塘湖，东西南三面皆山。泄下之水向西出虎山腰。两山对峙，中有洼槽。东西长一百十丈，南北宽十六丈。山根石脚相连，可作天然滚坝。水入天然闸河，湖之东西有黄山，筑堤长一百七十七丈。西包碎石，又阎家山至尖山筑堤，长九十六丈。拦御入湖之水，不令旁泄。自虎山腰起，至宿州艾山止，河长一万三千二百九十九丈。二滚坝迤东缕堤，北面碎石挑坝五道。嘉庆二十年筑。迤下又筑碎石盘头土坝十道，二十四年建。迤下九里沟埽工，长六十八丈五尺。迤下间段碎石土坝五道。各坝档内皆砌碎石，包护堤陂。南山洼至韩家山缕堤一道，长一百二十五丈。康熙三十九年筑。雍正五年接，长四十五丈，余皆后加。韩家山起至梁山口止，缕堤长四千五百八十丈，内堤北自山边起，至石矶嘴下柳园头止。新旧石工长二千九百九十一丈七尺。查徐州护城石，明季间段创建。乾隆十六年翠华南幸，亲临阅视，指授方略，以近城石堤最为紧要，令将从前已有者加帮，以培其势，从前所无者，接筑以重其防。遵建工长一千五百六十八丈二尺。四十六年又补筑韩家山东石工四百五十丈。内韩家山起长二十丈。计石十二层。接前神庙起长四百三十丈，计石十七层。皆四十六年建。接前周家庄起，至泰山庙止，长五百三十四丈五尺，计石十七层。乾隆二十二年建。自泰山庙起，至四大王庙止，长六百五十六丈二尺，计十七层，明季建。接下至东门外止，长二百四十四丈，计石十七层亦二十二年建。接下至拐角楼止，长二百五十五丈五尺，计石十七层，明季建。接下至梓潼阁止，长五百九十四丈二尺，计石十七层，亦二十二年建。接下至石矶嘴止，长六十一丈八尺，明季建。接下至石工尾止，长一百九十五丈五尺，计石十七层，亦二十二年建。内四十六年间段加高一二三四层，嘉庆四年间段加高一二层，七年间段加高一二三層，十八年间段加高一二三四五层。前石工外韩家山迤下大黄庙、黄楼等处，二十三年帮土作堤，包坡碎石工长一千三百八十二丈二尺，外包碎石。嘉庆十八年办。又泰山庙后碎石挑坝三道，嘉庆二十年建。又北门外抢修埽工，长二十四丈。又东门外越堤一道，长二百六十丈，北坡包碎石，嘉庆十八年建。现已作缕。又自火星庙起，至石矶嘴止，长三百七十六丈七尺。乾隆四十六年后，历年于石工外抛砌碎石，假护石工。石矶嘴迤下七百六十余丈处，乾隆四十年筑小越堤一道，长一百丈。堤南杨家楼越堤一道，长四百三十四丈。康熙三十八年筑。接下段家庄越堤一道，长八百九十二丈，康熙三十八年筑。苏堤一道，长七百九十二丈，南起云龙山，北至段家庄越堤。中有涵洞一座，乾隆二十三年建。泄石狗湖之水，经户部山北以达奎河。石矶嘴堤南逼近奎河，嘉庆二十五年建。石工长五十五丈，石高十层。奎河一道在铜境者，长一万九百三十九丈五尺，明季挑。乾隆二十二年水利案内复加挑濬，以泄郡城之水。

南岸小店汛，主簿一员，千总一员，协防一员，管堡夫四十八名，兵二百五十六名。汛地上自郭汛界三山头起，下至睢南厅王家堂汛交界止。南堤一道，长一万八十六丈。堤北距山根三十七丈处，顺水土坝一道，长八百四十五丈，乾隆十一年筑。黄工韩家堂张家房，为昔年险要埽工。张工后塘，乾隆四十八年放淤。今埽皆淤闭。又魏工埽工，除历年抛护碎石停修外，现修工长六十五丈。又埽工迤下筑碎石土坝四道，嘉庆二十年建。迤下孙家湾又筑碎石土坝六道，二十一年建。迤下又筑碎石土坝三道，二十四年建。小店埽工，除历年抛砌碎石停修外，现修工长二百四十一丈七尺。堤南杨横庄大越堤，长三千六百五十五丈。康熙三十一年建。内有潘家马路越堤二道。一长三百十八丈，雍正五年建。一长三百十五丈，雍正四年建。迤杨横庄小越堤一道，长二百八十四丈，亦四年建。接下黄家庄越堤一道，长四百二十七丈。康熙三十八年建。接下韩家堂大越堤一道，长八百十九丈。乾隆二十五年建。内有格堤长一百八十三丈，四十六年建。接下张工大越堤一道，乾隆十九年建。原长七百五十丈，内上长四百六十丈。嘉庆十二年后作为缕堤。接下全家楼大越堤一道，长九百丈。乾隆四十八年建。内有附缕堤李家楼越堤一道，长三百七十丈。康熙三十八年建。又接下康熙三十六年原筑越堤，长七百九十二丈。现作缕堤。房村牛市河一道，长万二千七百五十八丈。乾隆二十三年水利案内挑濬，以泄涝年积水，入孟山河，下出归仁堤达洪泽湖。宿州州同一员，本驻宿州。雍正十年移驻州城西北徐溪口，弹压地方。因徐溪口水利河道为毛城铺下游，乾隆十七年题改河缺属铜沛同知辖。分管濉河闸坝工程，上自萧宿界起，下至宿州符离桥止，计九十七里有零。又分管南股河，上自永宿交界翟家桥起，下至符离集九孔桥止，计五十六里有零。又分管北股河，上自萧宿交界土型桥起，下至符离集七孔桥止，计五十三里有零。

徐州道属邳北厅通判一员，守备一员。管辖睢宁邳州两境黄河北岸工程，上自铜山县铜沛厅属大坝汛界起，下至宿迁县境宿北厅属皂河汛界止，缕堤长一万九百五十二丈，又无堤山冈长四千七百四十六丈。为汛二：曰董家堂汛，曰五工头汛。

董家堂汛州判一员，千总一员，协防一员，管堡夫二十四名，兵二百三十一名。汛地自铜沛大坝汛界起，至五工头汛宋家湾工界止，堤长五千二百二丈。自交界起至庙山止，缕堤长二百五十九丈。康熙十七年筑。庙山起，至绵山止，缕堤长五十八丈。嘉庆十七年筑。绵山起至虎山止。缕堤长三百五十四丈。堤后有康熙二十六年所筑缕堤一道，起绵山止拐山，长二百七十六丈。现作越堤。鲤鱼山起至黄山止，康熙二十六年创格堤一道，长一百三十八丈。蛟龙山起至马家山止，缕堤一道，长三百四十三丈。康熙二十六年筑。马家山中间空档缕堤一道，长五十一丈。嘉庆十五年筑。马家山至小峰山止缕堤一道，长三百九十丈。康熙十七年筑。小峰山起至青羊山止缕堤一道，长二百一十丈。康熙十七年筑。青羊山起至五工头交界止，缕堤长三千三百九十九丈。康熙十七年筑。内青羊山下，乾隆三十三年赵工放淤刷塌，以越为缕者，七百八十五丈。赵家庄旧遥堤一道，长二百七十丈。又赵家庄后越堤长八百六十三丈五尺。康熙四十四年筑。内上长四十四丈五尺。已塌入河中。

长一百九十九丈。连上首遥堤作为缕堤。下长六百二十丈，现为宋家房越堤。又乾隆三十四年所筑外越堤，长一百三十六丈。又乾隆二十一年创筑撑堤长二百丈。内上长一百八十丈，连上首作为缕堤。刘家马路埽工，乾隆五十五年建，长四十九丈。旋淤。赵家庄埽工，乾隆五十七年建。长一百十二丈。嘉庆七年淤闭。彭家庄埽工，乾隆五十一年建。长九十八丈。嘉庆二年淤闭。宋家房埽工，嘉庆十二年建。后渐下移。接生共长二百十二丈一尺。今全淤闭。夫七堡埽工，嘉庆十四年建。后渐下移。工长七十七丈四尺。埽外间段抛护碎石，迤下历次间档筑作碎石土坝十道。档内各镶护埽。塘池越堤一道，下抵羊山越堤，长四百七丈。康熙三十八年筑。接前至羊山止越堤一道，长五百二十一丈。康熙二十四年筑。羊山起往南抵缕堤止格堤一道，长一百十七丈。康熙十八年筑。张王庙东越堤一道，起格堤至七坝越堤止，长五百丈。康熙六十年筑。七坝埽工，雍正五年建，历年提移，淤复不常。现修工长三百二十八丈九尺，埽外间段抛护碎石。工竣越堤至五汛宋家湾工尾止，长七百五十七丈一尺。雍正四年筑。内在董汛二百四十八丈一尺，在五汛五百九丈。

五工头汛州同一员，把总一员，协防一员，管堡夫三十名，兵二百名。汛地自董汛七坝尾起，至宿北皂河汛界直河止，缕堤长五千七百五十丈。宋家湾埽工，雍正四年建。现修工长二百五十四丈一尺。埽外间段抛护碎石。戚家堡越堤一道，长五百二十七丈。康熙三十七年筑。沈家堂埽工，乾隆十二年建。五十九年上移于袁家庄七堡。嘉庆八年又上移侯家房。十一二年淤闭。工后原有雍正四年所筑越堤一道，长五百八丈。因乾隆十二年沈工放淤刷去缕堤，即以越作缕。接下鱼鳞越堤一道，长二百五十八丈。乾隆十九年筑。郑家马路埽工，嘉庆十三年后建，长一百丈七尺，十六年萧南李家楼漫工案内，挑浚下游河道，将该处河身取直，于河内筑坝拦截，上遂淤闭。十一堡埽工，嘉庆二十一年后接建埽，长一百四十七丈八尺。各埽档内历筑碎石盘头土坝十五道。工后三官庙越堤一道，长六百四十丈。康熙三十六年筑。

徐州道属宿北厅

同知一员，守备一员，管理宿迁县境黄河北岸堤埽，上自邳北厅属五工头汛界起，下至桃北厅属崔镇汛古城界止。缕堤长一万七千五百五十三丈七尺。为汛二：曰皂河汛，曰大古城汛。

皂河汛巡检一员，千总一员，协防一员，管堡夫五十名，兵一百七十二名，汛地自邳北五工头汛界起，至大古城汛吴家墩界止，除北山无堤山坡六百六十一丈七尺，实缕堤长八千五百四十一丈。自交界起，旧缕堤长二百三十七丈。接前嘉庆九年创筑外越堤一道，长一千一百五十四丈。现作缕堤。其旧有缕堤，自兵头堡至兵五堡止，长一千六百十丈。作为越堤堤后减家庄越堤一道，长六百丈。堤内格堤长一百十丈，皆雍正元年筑。接下朱家庄后越堤一道，长五百十三丈。康熙三十八年筑。兵五堡至兵六堡旧缕堤长二百四十八丈。接前兵六堡至七堡嘉庆八年创筑外越堤一

道，长二百三十二丈。现作缕堤。接前雍正五年创筑外越堤一道，长三百十二丈，乾隆五十九年作为缕堤。堤南张家窑埽工，嘉庆九年建。二十一年淤闭。接前以越堤为缕堤起，至夏家马路工头止，外起堤长一百五十八丈。乾隆四十七年筑。嘉庆十六年作为缕堤。堤南苗家庄埽工，嘉庆十六年建，二十一年淤闭。接前夏工头起，雍正十年筑坝台，长四百五十二丈，并建埽工。现修工长四百十二丈，埽外间段抛护碎石。该处南黄北运，相距仅数十丈。乾隆二十七年，高宗纯皇帝南巡，亲临阅视，指石放淤，遂化险为夷。自兵六堡至夏工尾止，旧缕堤长一千七十丈。嘉庆十一年作为越堤。先于雍正五年于工头工尾各筑格堤一道。工头长二十三丈五尺，工尾长四十五丈。夏工尾起至兵十堡止，旧缕堤长三百七十五丈。接前至岔路口止，外越堤一道长八百二十六丈。嘉庆九年筑。十一年作为缕堤。接前外越堤一道，长二百五十五丈。乾隆五十五年筑。现作缕堤。接前外越堤一道，长二百二十五丈。嘉庆十年筑。现作缕堤。接下何家庄外越堤一道，长六百七丈。乾隆二十六年筑。堤南何家庄刘家庄埽工，共长三百七十七丈二尺。嘉庆七年建。十七年下移刘工。埽外间段抛护碎石，自兵十堡至兵十五堡刘工尾止。旧埽堤长一千九百五十丈。嘉庆十一年作为越堤。兵十五堡起至兵十八堡下止，旧缕堤长一千二百九十三丈。河工后越堤一道长九十丈。嘉庆十八年筑。接下支河口越堤一道长三百丈。康熙五十八年筑。又筑堤内格堤一道长四十丈。旧叶家庄工后越堤一道长五百二十三丈，康熙五十八年筑。接下越堤一道长二百五十丈。乾隆五十八年筑。兵十八堡下起至北山根止，旧缕堤长一千六百四十八丈。现作越堤。兵十八堡下外越堤一道长六百六十丈。康熙五十八年筑。乾隆五十八年溜走堤根，作为坝台镶埽。名叶家庄工现修埽长三百三十四丈。埽外间段抛护碎石。接越堤下首起至县西叶家林止，嘉庆十七年筑。外越堤一道，长八百四十三丈。现作缕堤。又接长二十八丈。又北山南首张家桥起至交界止，嘉庆十五年筑缕堤长九十丈。

古城汛主簿一员，把总一员，协防一员，管堡夫四十四名，兵一百七十八名。汛地自西门外吴家墩皂河汛界起，至桃北厅崔镇汛界止。缕堤长八千六百四十五丈。西门埽工，乾隆五十六年建。五十五年先创外越坝台，长二百丈九尺。五十九年又筑工头横堰，长二十丈。现修埽工，长一百九十四丈。埽外间段抛护碎石。朱家闸埽工，乾隆五年建。工长二百一十丈。旋河流下移淤闭。工浚创筑越堤一道，长八百六十丈。嘉庆八年放淤，刷塌八十丈。现存一百八十丈。又格堤一道，一百九十一丈。乾隆八年筑。四十八年放淤刷塌一百十六丈。现存七十五丈。孙家房埽工，乾隆五十六年建。现修工长八十六丈七尺。蔡家庄埽工，嘉庆八年建。现修工长一百六十五丈二尺。孙蔡两工埽段毗连，在朱家闸工尾。埽外间段抛护碎石。工后韩家庄越堤一道，长二百十丈。嘉庆六年筑。内以下长一百五十五丈，作为缕堤。旧五保埽工，雍正元年建。后淤。工后创筑越堤一道，长八百五十丈。雍正五年筑。乾隆四十九年放淤。下首刷塌六十五丈，现存七百八十五丈。堤内上格堤一道，长一百五十四丈。雍正元年筑。下格堤一道，长一百四十四丈，五年筑。接越堤尾上套堤一道，长二百四十丈，乾隆五十二年筑。下套堤一道，长三百三十二丈。五十五年筑。五任工埽工，雍正二年建。嘉庆二十五年淤闭。河北镇埽工，康熙五十四年

建。雍正十年淤闭。乾隆十二年复生，逐年下移。现修工长五百六十三丈七尺。埽外间段抛护碎石。工浚大越堤一道，长九百九十八丈八尺。康熙三十八年筑。小越堤一道，长六百丈。雍正五年筑。又筑格堤一道长九十丈。王家庄越堤一道长四百三十丈。乾隆二十一年筑。越堤尾接下大古城越堤一道，长四百七十一丈。康熙五十六年筑。堤内格堤一道，长六十丈。雍正五年筑。堤南昔有埽工久淤。

淮海道属桃北厅

同知一员，守备一员。管理桃源县境黄河北岸堤河，上自宿北古城汛山边起，下至清河县外北厅界止。缕堤长一万四千八百三十九丈五尺。为汛二：曰崔镇汛，曰黄嘴汛。

崔镇汛，主簿一员，千总一员，协防一员，管堡夫四十六名，兵一百六十六名。汛地上接宿北古城汛界起，下至黄家嘴汛界止，堤长八千三百五十九丈五尺。古城减水坝，康熙二十四年建，久闭。古城埽工，建于乾隆三十八年。嘉庆十年溜势开行淤闭。本工后大越堤一道，长四百三十丈。乾隆二十八年建。越堤内格堤长一百一十丈。嘉庆三年建。小越堤长五十八丈，直堤长八十四丈。乾隆三十七八年建。乔家房埽工，长一百三十七丈。嘉庆十年建。二十二年淤闭，下移予赵家房。建埽长九十八丈，今淤。九里冈埽工，乾隆三十六年对岸稍上陈家楼漫缺，河势开行。迨陈工堵合，而九里冈最险，后竟淤闭。工后大越堤一道，长九百七十二丈。康熙四十二年建。东格堤一道，长一百二十丈。西格堤一道，长九十三丈。皆雍正五年建。崔镇石闸一座，康熙九年建。半路刘埽工，康熙四十二年建。迨后上下提移，或淤或出。乾隆年间名陶家庄，嘉庆年闻名黄杨工，今名杨工。皆因民居地段而名工。后越堤一道长二百二丈，乾隆三十一年建。二越堤一道，长四百五十丈，康熙四十三年建。堤内岔堤一道长九十三丈，乾隆五十二年建。三越堤一道长二百六十丈，康熙五十五年建。堤内岔堤一道长四十五丈，乾隆五十二年建。四越堤一道长二百丈，乾隆八年建。五越堤一道长二百八十八丈，九年建。单家庄埽工，迎南岸胡家庄、沈家庄下注之溜，雍正六年总河齐苏勒题建。并予工后筑越堤一道，长三百二十丈，撑堤一道，长五十丈。乾隆八年又筑越堤一道，长五百二十二丈。徐昇坝埽工，现修工长一百三十九丈。又接下首埽工长六十九丈，名河北镇工。埽外历年间段抛护碎石。乾隆十九年，于工后越堤内筑下格堤，长八十五丈。五十二年又筑上格堤，长四十三丈。徐昇坝石坝一座，康熙二十五年闭塞。

黄家嘴汛，巡检一员，把总一员，协防一员，管堡夫三十六名，兵一百五十四名。汛地上自崔汛界起，下至清河县外北厅属北岸汛交界止。缕堤长六千四百八十丈。顾家庄埽工，长一百九十三丈。埽外历年间段抛护碎石。工后上格堤一道长八十二丈。乾隆八年建。下格堤一道，长一百十四丈，二十年建。又越堤一道，长一百九十丈，五十四年建。兵四堡下外越堤一道，长六百丈。嘉庆二十年筑。现作缕堤。七里沟大越堤一道，长八百八十七丈，雍正元年建。又建撑堤二道，共长一百二十

五丈。小八堡埽工，长五十三丈五尺。孙平庄埽工，长一百七十二丈。两工相连。嘉庆初年七里沟河流下移淤闭，而小孙二工接连生险，建作埽工。埽外历年间段抛护碎石，工尾嘉庆八年筑外越堤长一百七十丈。现作缕堤。新庄旧越堤一道长七百五十丈，乾隆十三年建。今废。新庄口排桩工，长一百四十丈，康熙二十七年建。

《淮安府志》载明万历十三年，挑新河四十五里由五港口入海，以分黄水之势。崇祯十年淤塞。康熙七年河决黄家嘴、七里沟、陈家楼，俱通此河。十年以改季大减水坝建石闸于此，名支河坝，即新庄口。后开中河，遂建排桩工。至三十二年石闸闭塞，桩工遂废。三义旧减水坝，明万历七年建。康熙六年后时开时闭，十年改建石闸，三十五年闭。夫十二堡下外越堤一道，长五百五十丈。嘉庆二十年筑。现作缕堤，三岔横堤长二百五丈，嘉庆十二年筑。现作缕堤。三岔埽工，长五十二丈。迤下张工埽工，长六十五丈。又徐家庄埽工，长九十七丈。三工间段不远，埽外历年间段抛护碎石。工后大越堤一道，康熙四十四年筑。格堤一道，长九十丈。雍正五年建，鱼鳞越堤一道，长三百二十五丈。乾隆二十二年建。三越堤一道，长二百八十丈，五十四年建。

淮扬道属外北厅

通判一员，守备一员。管辖清河县境黄河北岸堤河工程，上自桃北厅黄汛骆家营界起，下至四铺沟山安厅属安东汛界止。缕堤长八千六百四十二丈。为汛一：曰北岸汛。

外北主簿一员，千总一员，协防两员，管堡夫四十八名，兵一百六十名。广济石闸一座，在县西三里仲家庄左，原系行漕之口。康熙二十六年建名仲庄闸。三十三年修，改名广济。四十二年改挑中河，出杨家庄口，闸遂闭。废闸东撑堤二道，一长三十三丈，一长二百四十六丈。康熙三十六年建。仲家庄埽工，长二百八丈九尺，嘉庆十八年建。埽外历年间段抛护碎石。玉皇阁埽工，在旧县前，康熙二十二年建。原长六百九丈。雍正三年淤闭，九年复出。乾隆四十一年开挑陶庄新河后，埽工淤闭。嘉庆十一年复出，以后淤出不常，现修工，长二百九十丈。埽外间护碎石。玉皇阁引河一道长七百六十二丈，因陶庄新河坐湾壅溜。乾隆五十一年，大学士阿桂会同总督李世杰总河李奉翰安徽巡抚书麟奏开此河。遇大汛盛涨开放分溜，直至顺黄坝下对岸，仍入新河，形势径捷。并帮玉皇阁后旧有越堤长六百丈，中间又接筑新堤长四百九十丈。又帮撑堤一百八十丈，以作引河南堤，长接中河缕堤，节次开放淤闭，现存河形。旧县后护城堤一道，自许家马头起，至陶庄闸止，长一千四十二丈八尺。康熙二十六年民筑。又县东护治堤一道，长二百八十四丈，四十二年筑。后归民修。广济石闸在旧县东二里陶家庄。康熙三十四年建，以备运行，因地洼未启。陶庄闸西县东撑堤尾起，至缕堤止，越堤一道，长四百七十丈。乾隆七年建。又自缕堤起，至中河二南坝止，接筑缕堤长二百九十丈，四十二年建。陶庄引河，《淮安府志》载：“广济闸外引河一道，长六百二十三丈。康熙三十八年部臣范承勋等开。以分泄黄水。后淤。五十一年复开。又淤。乾隆七年开宽复挑，共长

七百二十二丈五尺。旋放旋淤”。李家庄埽工，在杨庄运口之下，临黄缕堤贴近盐河。乾隆十一年总河顾琮题建。今淤。太平庄埽工，现长五百二十五丈。建于乾隆嘉庆年间。河溜上下提移，时淤时复。埽外历年间段抛护碎石。工头缕堤空档内撑堤一道，长八十丈。乾隆五十七年筑。工后至撑堤止越堤一道，长五百九十五丈，六十年筑。大坝埽工，康熙五十年建。原长三百九十九丈。雍正三年沙淤。乾隆年间复出。现修工长一百七十三丈五尺。埽外历年间段抛护碎石。工后越堤一道，长六百三十三丈。嘉庆九年建。王营迤西新减水石坝一座，康熙四十五年移建。在旧减坝西八十丈。减黄河盛涨及中河下注之水，以免倒灌，而护山海各工。坝下引河一道，与旧坝泄下之水同达盐河。乾隆三十八年，总督高晋、总河吴嗣爵奏请，又移于下首另建。口宽三十丈。四十七年，总督萨载总河李奉翰以前坝止离黄河二十余丈，坝底过高，启放之时，溜势直下跌塘，堵闭之时甚费周章，奏明又移下八十五丈另建，口宽三十丈，坝底较旧坝落低四尺。嘉庆十一年五月启放。掣溜涌猛，冲缺中河厅属盐河北岸遥堤，致将该坝并临黄裹头全行冲塌，跌成深塘。十二年堵闭后，遂无宣泄之路。十三年，总督铁保正副总河吴璥徐端奏请建复，大学士长麟、戴衢亨勘议，移建旧坝西首土头乾老之处。并于坝下四十丈添筑二坝一座，以为重门保障。十七年兴办，经总督百龄、总河黎世序奏准，于头二坝中间补筑三合土，以防冲跌。十八年完工，现在头坝在太东工第十四段埽工之后，距旧坝八十五丈之西，石滚坝二座。每座金门各宽三十丈，两墙各长五十二丈，高一丈六尺八寸，砌石十四层，坝底各长十八丈八尺，比旧坝底升高一尺。以嘉庆十六年盛涨，太东工存水三丈一尺一寸，该坝可以过水八尺一寸。滚坝两边至缕堤止，二坝尾拦堰各筑束水堤。西长一百五十六丈，东一百三十丈五尺。又两坝坝尾至束水堤各筑土堰，共长二百六十二丈。每逢启放，拆除临黄埽工盘筑裹头。随时办理，并无一定。该坝减下之水，盐河经平旺河达北潮河入海。王营减坝下，嘉庆十六年坐蛰过水堵竣。临河镶筑边埽，长一百六十七丈三尺五寸。正坝之后，浇筑土戗，坝内又筑二坝。长一百三十三丈五尺。烟墩埽工生于乾隆年间。河溜历次上提下移，时淤时复。现修工长三百八十二丈六尺。埽外历年间段抛护碎石。王营东坝北格堤一道，长二百三十八丈。乾隆五年民筑。内有石涵洞一座，今湮。王营迤东堤南引河一道，长八百二十丈。康熙五十八年挑。与南岸老坝口车路工相对。今淤。王营迤北越堤一道，长四百八十丈。乾隆三十七年筑。

淮海道属山安厅

同知一员，守备一员。管理清河安东两县境内黄河北堤河工程。上自清河县外北厅四铺沟界起，下至海安厅云梯汛交界止。缕堤长二万七千丈一尺五寸。为汛三：曰安东汛，曰上河汛，曰下河汛。

安东汛，县丞一员，千总一员，协防一员，管堡夫五十二名，兵二百七十名。汛地自外北四铺沟界起，下至东门工上河汛界止。缕堤长九千三百五十五丈六尺。内四铺沟起，至陈家庄西止，堤长三千六百七丈。系清河县境。陈家庄西起至上河汛界

，堤长五千七百四十八丈六尺。系安东县境。李家马路埽工，康熙五十五年建。原长五百四十二丈六尺。乾隆三十五年及四十年陆续淤闭三百二十九丈二尺。五十一年七月，工尾漫溢堵闭外镶埽工，迨后上提下移，旋淤旋出，现至萎工。共修埽长五百八十七丈一尺。埽外历年间段抛护碎石。周家庄现修埽工长八十七丈三尺。李工头堤北越堤一道，长一百五十六丈。越堤内斜堤一道长四十四丈。越堤尾格堤一道，长四十五丈。皆乾隆五十二年筑。于家马头埽工，乾隆十九年建。三十八年淤闭。矾嘴坝埽工，乾隆三十一年建。四十二年淤闭。齐家马头越堤一道，长七百五十一丈。康熙五十六年筑。于家马路越堤一道，长三百六十丈。接下张家庄越堤一道，长二百五十丈。皆乾隆二十二年筑。接下鱼鳞越堤一道，长二百二十丈。三十一年建。洪家荡外圈堰一道，长四千四百八十丈。嘉庆十五年筑。唐家庄王家庄刘家庄埽工，雍正八九年建。久淤。时家马头，康熙三十六年决。三十九年堵闭。乾隆四十一年又出。五十八年迤下傅家庄又生埽工一百七丈。旋即淤闭。蒋庄埽工，乾隆五十二年建。高庄埽工。乾隆二十五年建。久淤。工后越堤一道，长一千丈。康熙五十二年筑。接下越堤一道，长三百六十丈。乾隆二十五年筑。两堤相连，现作缕堤。又后越堤一道，长三百丈。五十二年筑。汤家庄乾隆五十一年漫缺。水由北卤沟入北潮河归海。是年堵闭。外镶埽工旋淤。嘉庆十三年复出。以后下越于萧家庄、孙家庄。淤复无定。现修埽工共长四百三十三丈六尺。埽外间段历年抛护碎石。工后越堤一道，长三百一十一丈。乾隆五十二年筑。接下至盐河越堤一道，长四百八十六丈。乾隆六十年筑。西门外临河越堤一道，长一百五十八丈。乾隆十一年筑。东门外现修埽工共长三十八丈一尺。

上河汛，主簿一员，把总一员，协防一员，管堡夫四十八名，兵九十二名。汛地自安东汛界东门工起，至彭家滩接下河汛界止。缕堤长八千九百三十三丈。工头外越堤一道，长四百五十丈。乾隆十四年筑。刘家庄埽工长二十二丈一尺。乾隆二十二年建。陈家庄埽工长一百二十三丈三尺。乾隆二十三年建。董家庄埽工长八十二丈七尺。乾隆二十四年建。二塘埽工长八十一丈六尺。康熙三十九年建。四工相连，埽外历年间段抛护碎石。工后格堤一道，长五十五丈。乾隆五十二年筑。陈工后越堤一道，长三百二十七丈。康熙四十一年筑。工堡埽长三十五丈四尺。工后越堤一道，长五百九十丈。乾隆四十一年筑。乾隆三十八年作为缕堤。王家庄埽工，长七十六丈七尺。接下孙家庄现修埽工，长一百四十七丈二尺。两工毗连。埽外历年间段抛护碎石。工后鱼鳞越堤一道，长一百五十七丈。乾隆十一年筑。后遂作为缕堤。又越堤一道，长九十三丈四尺。五十八年筑。吴家庄埽工，长二百六丈六尺。埽外历年间段抛护碎石。堤北民便河起，自北门通衢桥下至响水口止，长二万一千八百七十三丈。雍正十三年挑。乾隆五十一年汤工漫溢淤塞。五十九年复浚。今又淤。十堡越堤一道，长二百四十丈。乾隆三十八年筑。堤南大越堤一道，长二千八百十四丈。嘉庆十年筑。窑湾越堤一道，长四百丈。康熙五十二年筑。又小越堤一道，长四十丈。康熙五十四年筑。

下河汛，巡检一员，把总一员，协防一员，管堡夫四十八名，兵八十八名。汛地自

上河汛界起，至海安云梯汛阜宁县界止。缕堤长八千七百一十一丈五尺五寸。龙潭口老堤头埽工二处，皆康熙四十年建。久淤。七堡下越堤一道，长五百三十五丈。乾隆二十一年筑。八堡下越堤一道，长六百丈。乾隆二年筑。四年放淤，以作缕堤。二十堡张家庄外越堤一道，长五十八丈五尺。越堤外圈堰一道，长二百九丈二尺。皆嘉庆八年筑。佃湖埽工，长四百八十七丈九尺。康熙三十五年建。乾隆二十一年工尾放淤。现修工长五十六丈四尺。埽外间抛护碎石。杨家庄埽工长二百三十六丈八尺。埽外间抛护碎石。佃杨两工相连。工后越堤一道，长一百二十五丈。乾隆四十六年筑。堤南木涵洞一座，雍正九年建。泄堤内积水。又越堤北首木涵洞一座，乾隆五年建。泄堤内积水。皆久淤塞。车家马头撑堤一道，长一百四十五丈。乾隆十三年筑。嵇家马头埽工长一百八十二丈六尺。工后越堤一道，长四百三十一丈。乾隆二十一年筑。

淮海道属海安厅

同知一员，守备一员。管理阜宁县黄河北岸堤工。上自山安厅下河汛云梯关交界起，下至海口龙王庙堤尾止。缕堤长二万四千四百八十丈。内云梯关下旧堤一千三百八十六丈四尺。接前至马港工东二坝尾止。嘉庆十六年新筑缕堤，长一千一百二十四丈。又接前东二坝尾起，至东正坝尾止。嘉庆十五年创筑。作为缕堤，长一百九十五丈六尺。迤下至海口堤长二万一千七百七十四丈。皆十五六年所筑新堤。十五年初奏止设二汛：曰北岸汛，曰海安汛。十六年添筑新堤。后于十八年奏改三汛：曰云梯汛；曰十套汛；曰海北汛。海州州同专管海州河道捕务，原隶海防，今改隶海安。

云梯汛，巡检一员，把总一员，协防一员，管堡夫四十八名，兵一百十九名。汛地自山安下河汛尾云梯关界起，至十套汛界止。堤长八千六百四十八丈。马港口乃昔年减泄黄涨之地。堤北旧有引河水，达南湖河归海。日久淤垫。乾隆六年总河高斌题请疏浚。河长四千七百二十丈。八年，总河完颜伟于口门之外建越坝一道，长一百八十丈。十二年，总河顾琮复浚河，长五千二百丈。四十五年，大学士阿桂、总督萨载奏准，于马港口北缕堤起，至曹家圩北潮河止，筑格堤一道，长六千六百五十丈。拦御废堤漫滩黄水。马港口下废堤张家庄地方，嘉庆十三年漫缺，黄水旁分，由北潮河入海。历议移改海口未定，迁延年余，海口益垫，而马港堤北上下百余里内之支河汉港悉成平陆，惟北潮河有海安流三州县汇注清水，不致淤垫。嘉庆十五年，特命尚书马慧裕会同正副总河吴璥、徐端勘明定议，堵筑缺口，疏浚正河。九月兴工。十二月告成。马港口埽工即堵筑坝埽岁修数年。嘉庆二十三四年淤闭。西坝尾堰长一百四十五丈。大二坝内西格堤一道，长一百四十三丈。东格堤一道，长一百二十五丈。柳围头起至六套下止，嘉庆十四年筑顺水堤一道，长三千九十丈，拦截黄泥嘴旧河。二套引河，乾隆五十年夏秋乾旱，各处水源不旺，洪泽湖水未曾长发，清口以下全系黄水，并无清水合流，致河底垫高，易于倒漾。特命大学士阿桂勘办清口。五十一年春，议以欲去河身之淤淀，必先掣低黄水，使清水畅出，

以水攻沙。会同总督李世杰总河李奉翰勘奏，开挑二套引河，长八千八百三十丈，减黄水入北潮河达海，使大汛时多一分泄之路，俾上游得以畅达，下游河底自可淘刷渐深。奏准办理开放。五十二年七月，高宗纯皇帝谕，洪泽湖水势既经盛涨，自应即全由二套引河归海，但前坝所开二套引河较窄，若能挑挖深通，既可宣泄湖水，或能将二套引河渐加冲刷，走成熟路，将来豫省合龙大溜仍归正河之后，清黄汇合，竟可从二套引河下注归海，更为便捷。倘溜势未能全行逼入，或再于三套旧走地方，酌量建筑拦黄坝一道，约拦水势，使大溜全趋二套引河，自更得力。是否可以如此办理，着李世杰、李奉翰亲勘覆奏。遵经勘覆，臣等检查河防志载，康熙年间，河臣董安国等创筑拦黄坝走马港口，旋值黄水倒灌，清口淤塞，下流不通，上游溃决，淮扬常受水患劳费罔效。后于康熙二十九年，前河臣张鹏翮堵闭马港河，尽拆拦黄坝，正河下游开浚深通，刷宽百有余丈，滔滔入海。奏奉圣祖仁皇帝赐名大通口，即今之归海尾间也。今该处正河现宽二百一二十丈至三百四十五丈，较之康熙年间深至三倍。中泓水深一丈五六尺至二丈二三尺及二丈六七尺，两岸露出滩面计千余丈。合之中泓水面共宽一千三四百丈。正河情形实属宽深。伏思黄河本不两行，二套在云梯关外，与海相近，上年山安厅属之汤家庄李家庄同时漫口，各宽二三百丈，亦由北潮河归海。掣溜未尝不为涌激，而正河仍照常行，溜直出海口，此即正河宽深旁注未能全掣之明验也。此时即将二套引河大加展宽，亦不过挑至百丈口面，终不抵正河三分之一。似难望其全由引河归海。况拦黄坝一筑，则归海之路不畅，上游必致有壅遏之虞。具奏。遂停。复浚自马港口旁泄。二年此河亦成平陆。

十套汛，新设阜宁北岸，主簿一员，把总一员，协防一员，皆新设。管堡夫四十四名，兵九十五名。汛地自云梯关汛六套下界起，至海北汛倪家滩下界止。缕堤长七千九百二十丈。喻家滩河势湾曲，嘉庆十年总河吴璥题，于北岸取直开挑引河，长一千一百十七丈。大汛开放，溜走新河，旧河淤闭。

海北汛，新设，阜宁北岸。县丞一员，千总一员，协防一员，管堡夫四十四名，兵一百名。汛地自十套汛界起，至海口龙王庙堤尾止，长七千九百二十丈。叶家社小越堤一道，长五百十丈。又堤后大越堤长一千二百五十三丈。皆嘉庆十九年筑。又接大越堤后身下首起，至夫十四堡止。直堤长二千六百六十丈。嘉庆二十三年筑。叶家社岁修埽工，长四百六丈七尺。嘉庆二十年后建。夫十七堡以下至海滩止斜堤一道，长二千二百丈。嘉庆二十三年筑。因旧堤南向，故筑此堤以为重障。设河溜趋刷旧堤，毋庸镶埽，即可退守此堤，以越为缕。堤尾南北两滩，乃苇荡右营北汛官荡，地名二三泓。西有民界官沟，东北两面皆抵海滩，南抵黄河。

徐州道属萧南厅

同知一员，守备一员。管理砀山萧县铜山黄河南岸堤埽工程。上自河南商虞厅属虞城县界起，下至铜沛厅属铜山县郭汛界止。临河缕堤长二万七千九百六十四丈四尺

。为汛三：曰矜上汛，曰矜下汛，曰萧汛。

矜上汛，县丞一员，千总一员，协防一员。皆嘉庆八年分汛添设。管堡夫四十名，兵九十五名。汛地自河南虞城县界起，至关家马路矜下汛界止。临河缕堤长七千二百丈。虞矜交界处土坝一道，长一百二十八丈。嘉庆二年筑。杨庄土坝一道长二百丈。嘉庆二年筑。自交界起接杨庄坝外堰一道，东西长一百五丈。嘉庆三年筑。杨庄坝内圈堰长三百五十七丈。嘉庆二年筑。又外圈堰长六百五十四丈，嘉庆四年筑。李家楼嘉庆十六年七月漫溢。十七年三月，于堤北滩面越筑堵合。二十一年于大坝后放淤。现在岁修边埽长二百九丈。原筑西大坝尾堰长一千一百五丈。上抵杨庄圈堰、东大坝尾堰，长六百九十二丈。下接缕堤西二坝尾堰，长九百三十五丈。亦抵杨庄圈堰，东二坝尾堰，长三百五十三丈。下抵大坝尾堰二坝金门北面圈坝二百九十六丈。二坝迤南缕堤之北圈堤长八百八十六丈。现作缕堤。迤下顺水土坝一道长四百五十丈。嘉庆三年筑。吴家集康熙十七年筑越堤，长一千三百丈。嘉庆十七年淤没。堤北自荣家坝缕堤起，由东北折而向东，至王平庄三坝尾下交界止。民堰长三千三百九十八丈。乾隆二十二年筑。王平庄在毛城铺北三十里，乃河滩民堰地名。乾隆五十五年夏，民堰漫塌数处，水拥毛城铺漫坝而过，将西裹头浚堤身刷通四十余丈。王平庄沟槽掣成宽深。官为堵闭，筑大坝二百八十五丈。上挑水坝九十五丈。筑二坝长五百十丈。五十六年又筑三坝，长一千五百七十丈。并普修民堰，又于北岸河势坐湾处挑渠，引溜东趋。未成。王平庄遂有迎溜埽工。是年又于工尾筑下迎水坝，长五十五丈。所用钱粮，以在民堰施工，例应民出。奏准于矜萧铜睢邳宿各州县按粮摊征。其后此议摊州县虽经改自上江，而王平庄用项摊征之例由此而定。嘉庆四年邵家坝漫工之后，河行北岸，埽遂淤闭。二十二年八月，河复南趋，先自上挑水坝起，至下迎水坝止，于北面滩上筑圈堰长三百二十一丈。又接越堤筑埽靠长二百七丈。旋又帮宽越堰三百七十丈，为坝台建埽长一百四丈。二十三四年上下接筑埽坝。共埽长三百四十余丈。埽外抛护碎石十三段。二十五年，豫省仪工漫缺，下游濬河，于王平庄对岸取直挑河后，遂溜行新渠，埽工淤平。

矜下汛，主簿一员，把总一员，协防一员，管堡夫四十名，兵八十五名。汛地自上汛界关家马路起，下至老堤头萧汛界止。缕堤长七千二百十七丈六尺。毛城铺减水坝大石坝一座，口宽三十丈，高一丈二尺，康熙十九年建，三十二年倒卸，乾隆二年复修。两头镶筑柴裹头，中砌片石。二十三年又修两裹头。五十六年两头各展宽五丈，共宽四十丈，中填碎石，已淤。坝北石坝一座，原口宽一百三十五丈。东里头高一丈八尺二寸。西裹头高一丈三尺二寸。康熙三十三年建。泄漫滩涨水，由坝下小神湖入洪河，达濉河，经孟山等五湖，出归仁堤，以达洪泽湖。五十五年，石坝冲塌。五十六年复修收窄，改口门宽一百二十丈。乾隆二年中铺片石。二十三年又将口门收窄，止留宽五十丈，中铺碎石，顶宽二丈，底宽十丈四尺六寸，厚三尺，为滚水坝。东西石墙各周长十四丈，高一丈二尺六寸。五十五年涨水冲跌。五十六年重修，加高碎石二尺，加墙石高七尺八寸，新旧共高二尺四寸。今碎石淤没，惟两墙尚高出滩面六尺。已淤一丈四尺四寸矣。旧坝之西，康熙二十二年建石闸一

座。乾隆二十三年拆毛城铺滚坝改建后，金门宽五十丈，中砌碎石，坝顶宽二丈，底宽十丈四尺六寸，高三尺。东西裹头由身各直长二丈。上迎水各斜长三丈。下分水各斜长六丈二尺。上下水四裹头各横长二丈。二坝石裹头久淤。洪河西堰一道，现长四万八千七百五十九丈。自毛城铺坝下起，至宿灵交界李家庄止。洪河东堰一道，现长四万八千六百九丈。自毛城铺坝下起，至宿灵交界止。乾隆二十三年，安徽巡抚高晋奏明，派员分管濉河，自徐溪口至符离集止。派宿州州同管，兼理西流黄疃沙沟三闸，符离集至霸王城止。派宿州州判管兼理蒿沟挑沟唐沟北山河四闸，霸王城达陵子湖河道四十余里。派灵璧县主簿管，是年又濬南北股河，于河头各建闸一座。毛城铺东墙起，至老堤头萧汛界止。旧缕堤长四千四百九十二丈，康熙十九年筑。定国寺越堤一道，长一千九十丈。康熙三十八年筑。堤北王平庄迤下三坝尾上汛界起，至萧汛徐严工迤上止。乾隆五十七年民筑。临河大越堤一道，长六千四百九十七丈。内在碭下汛堤长五千二百九十七丈。萧汛堤长一千二百丈，现作淤黄缕堤。中有唐家湾河缺口。缺口之北，本有钳口坝，久堵。堤北有邵家坝二坝唐家湾二坝，皆堵闭。漫工所筑两坝土尾相连，中有南北直堰长三百四十一丈。于家集拦水堰一道长四百三十丈，南起旧缕堤，北抵临黄缕堤。嘉庆八年筑。三岔河东西拦河堰一道，长二千一百二十三丈，西起三坝集，东抵定国寺前旧缕堤。嘉庆六年筑。中有唐家湾河缺口长三百丈。魏家寨拦水坝一道，长三百九十五丈，东抵旧缕堤，八年筑。分管洪沟河两岸子堰至萧县界止，西长三百八十六丈，东长五百十七丈。乾隆十二年筑。

萧汛，主簿一员，千总一员，协防二员，管堡夫七十八名，兵一百三十二名。汛地上自碭下汛界起，至铜沛厅属郭汛止。原管萧县境内堤长一万一千六百八十九丈二尺。嘉庆二十五年，分铜沛郭汛缕堤自北辰起至胡家楼止、铜山县境内堤长一千八百五十七丈属萧汛管辖。共有缕堤长一万三千五百四十六丈八尺。徐家庄埽工，康熙四十五年建。雍正二年淤。八年复出，乾隆十四年淤。二十年复出。五十年淤。工后越堤一道，长五百七十一丈。康熙四十七年筑。接下越堤长二百七十五丈。雍正二年筑。现作缕堤。接下越堤长二百七十五丈。乾隆八年筑。现亦作缕堤。接下越堤长四百四十丈。二十一年筑。接下越堤长五百丈。三十三年筑。现多坍塌。严家庄埽工，乾隆五十五年建。工长二百丈。五十六年于对岸挑河长七百十四丈，引溜未成。嘉庆四年淤闭。李家楼埽工康熙四十四建。乾隆十年于对岸挑河引溜入渠，工遂淤闭。嘉庆四年复出镶埽，长三百二十余丈。五年于对岸梁家庄挑河引溜北趋，埽遂淤闭。工后越堤一道长一千四十丈。康熙三十八年筑。内有涵洞一座，宽高各二尺。泄堤内积水。嘉庆六年加帮越堤，将洞堵闭。二十二年重修。田家楼埽工康熙四十八年建。隆乾七年淤。四十二年复出。四十八年淤。嘉庆七年复出，接生工长二百三十余丈。工尾又筑挑、水坝四十丈。十二年下首淤闭，溜势上提。于工头之贺家庄镶埽，长二百六十九丈。十八年，于北岸郭家堂取直挑渠引溜，渠行走埽前，溜即轻减。现在修工长一百十丈一尺。田工后越堤一道，长六百二十丈。康熙六十一年筑。任家坝，嘉庆十一年建。埽工长七十八丈八尺。十三年废。分管萧县境内洪濉河堰，长八千五百十丈。乾隆十二年筑。

徐州道属睢南厅

睢南厅，同知一员，守备一员。管理灵璧、睢宁两县境内黄河南岸堤埽工程，上自铜沛厅属铜灵交界小店汛界起，下至宿南厅属周家楼汛界止，缕堤长二万二百九十四丈。为汛二：曰王家堂汛，曰戴家楼汛。

王家堂汛，灵璧主簿一员，睢宁县丞一员，把总一员，协防二员，管堡夫六十六名，兵二百十八名。汛地上自铜沛小店汛交界起，至戴家楼汛界止，缕堤长一万二千一百七十三丈。里堤一道长一千八十丈。雍正五年筑。上接小店堤尾。现作缕堤。刘谢工埽工长二百五十丈九尺。乾隆五十一年复生。嘉庆十五年淤闭。工后越堤一道长三百丈。乾隆三十二年筑。又撑堤一道长二百九丈。乾隆五十六年筑。小三堡埽工乾隆三十二年复生。原修工长二百三十丈三尺。四十三年淤闭。四十九年复出。修工长一百五十一丈。嘉庆十五年淤闭。工后西撑堤一道长二百二十七丈。乾隆十九年筑。东撑堤一道长七十八丈，乾隆元年筑。工后墨家庄善后里堤长一千一百八丈。雍正五年筑。张家瓦房埽工长三百八十八丈四尺。雍正八年生。乾隆三年对岸挑河引溜直趋，工遂淤闭。十七年溜复南趋，工又出。二十二年七月，总河白钟山放淤，分为东西两坝。四十五年又分为上中下三坝。嘉庆十五年淤闭。工后越堤一道长六百四十五丈。雍正五年筑。迤东小撑堤长三十二丈。乾隆元年筑。双沟迤西越堤长八百八十丈。康熙四十五年筑。接越堤尾缕堤北缕水堤一道，原长七百五十丈。乾隆八年筑。二十六年冲废三百丈，存长四百五十丈。耿家河堤南越堤一道，长四百五丈。乾隆二十三年筑。耿家河碎石戢工，长二千二十五丈。乾隆二十三年善后案内建砌。双沟迤上至朱家马路止缕堤北面，嘉庆二十一年包砌碎石坦坡，长二千三百十三丈。以上属灵璧主簿汛地。峰山石闸四座，康熙二十四年建。就山开凿，天然限制，以泄黄河异涨之水。本无启闭，迨后河身渐高，乃于闸外筑坝，以时启闭。乾隆二十二年奏定，以徐城北门志桩长水至一丈一尺开放头闸。水再加长，以次启放。五十五年后黄水过大，头四两闸久闭不启。头闸原建由身长四十三丈，金门宽三丈五尺，长二丈，高一丈八尺。二闸原建由身长四十七丈，金门宽三丈二尺，长二丈，高一丈八尺。嘉庆十五年拆建。二十一四两年加高。现在金门宽三丈四尺，由身长三丈，墙高闸底三丈四尺八寸，除崖石高六尺，实砌墙二丈八尺八寸，计石十四层。三闸原建由身长六十二丈，金门宽三丈二尺，长二丈，高一丈八尺。嘉庆十五年拆建。二十一四两年加高。现在金门宽三丈四尺，由身长三丈，墙高闸底三丈四尺八寸，除崖石高六尺，实砌墙高二丈八尺八寸，计石十四层。四闸原建由身长四十三丈，金门宽三丈四尺，长二丈，高一丈八尺。峰泰两山间山坡石脚相连，中间空档约长二十余丈，就势凿作滚坝。将临黄土坝帮宽，外镶护埽，即以凿山之碎石将临黄坝两面包砌坚固，永不开放，俾水由滚坝下注，递达于二三两闸。嘉庆二十四年建滚坝，南北宽二十五丈，为坝口。东西长八十六丈，为坝身，名曰峰泰滚坝。进水由东而西，流入二三两闸，南达闸下引河。二三两闸之北，西自虎山根起，东至峰山止，筑临黄拦坝一道，长一百六十七丈。两面包石，永不启放。二三两闸后身土堤加培高厚，两面并包碎石，共长一百十六丈。头闸外，嘉

庆二十四年添做柴挑坝三道。又于坝外包护碎石长三十六丈六尺。闸下康熙年间所挑泄水引河，由焦管营下达孟山湖，其迹已无可考。乾隆四年总河高斌疏。挑河长一万一千九百八十丈七尺，水向西南入灵璧县境之孟山、陵子等湖，达小河，下注洪泽湖。西堰自闸下起，至魏家桥止，长九千四百三丈。皆乾隆三十七年创筑。闸河堰工历次淤垫刷残，随时培浚，皆系民办民守。乾隆四十二年督河院议设堰长修守巡防。清水潭迤南遥坝一道长四千三百八十丈。系远年古堤，久已残废。清水潭越堤一道长六百丈。又撑堤一道长四十丈，皆雍正五年筑。官庄越堤一道，长五百六十丈。乾隆二十一年筑。武官营大越堤，长三千三百五十六丈。府志载康熙二十四年筑，久已残废。贾家楼迤西越堤一道长二百四十丈。乾隆四年筑，现作缕堤。朱家楼小越堤一道，长一百四十丈。乾隆七年筑。贾家楼迤南越堤一道，长六百七丈。乾隆元年筑。现作缕堤。王家堂大越堤一道，长一千六百七十二丈。康熙三十八年修筑。五十八年加筑。又小越堤一道，长二百四十三丈。乾隆三十五年筑。皆为嘉庆十八年漫工冲塌。房家庄埽工长二百丈。乾隆三十四年建。四十八年淤闭。五十四年复生，名房薛工。建埽长一百三十七丈。埽外间段抛护碎石。工头刘家庄，工尾李家庄，各筑柴土挑坝八道。外护碎石。各坝档内并镶护埽。工后越堤一道，长六百四十八丈。撑堤二道西长五十八丈，东长四十四丈，皆雍正四年筑。已冲废。

戴家楼汛，主簿一员，千总一员，协防二员，管堡夫三十八名，兵二百二十五名。汛地原管自王汛界起，至宿南蔡汛界止，缕堤长一万一千七百十四丈。内于嘉庆八年，将兵十堡迤下堤长三千五百九十三丈，分属宿南，改为周家楼汛外，实存缕堤八千一百二十一丈。戴家楼埽工，康熙十八年建。原长五百五十六丈。乾隆五年放淤，分为东西两坝。十六年放淤，分为四坝。三十年、三十六年两次放淤，工遂闭。四十年于中间复生，工长一百九十三丈四尺，名陈家庄。五十一年又于上首生，工长二百六十七丈三尺。五十六年又于上首二堡生，工长一百二丈。以后河溜上下提移，淤复不常，兼又接生，因居民之姓以立名。现在有余家堂埽长二百七丈四尺，纪家房埽长二百二十七丈三尺，马家房埽长一百四十九丈八尺，程家庄埽长八十五丈三尺，邹家庄埽长一百五十七丈五尺，夫六堡埽长七十三丈，或毗连，或间断，共工长九百余丈。埽外皆间段抛护碎石。工后戴二堡迤南越堤一道，长二百二十八丈。嘉庆七年筑。陈家庄西越堤一道，长一百八十七丈。乾隆四十一年筑。迤上越堤一道，长二百六十丈。乾隆四十四年筑。又越堤长四百丈，乾隆二十二年筑。现作缕堤。又越堤一道长二百二十丈。乾隆四十四年筑。又斜格堤长七十五丈。乾隆四十七年筑。戴工后大越堤一道，长一千一百六十五丈。康熙四十一年筑。现作缕堤。又小越堤一道长三百八十丈。雍正五年筑。邹家庄后越堤一道长四百五丈。乾隆五十七年筑。又外越堤长五百十丈。乾隆七年筑。江家房圈堰长四百四十丈。嘉庆元年筑。韩家坝大越堤一道长一千一百十八丈。康熙十八年筑。魏家庄埽工，乾隆四十六年六月初一日漫溢，堵合，遂成迎溜埽段。现修工长二百二十四丈五尺。迎溜埽外间段抛碎石。郭家渡埽工，乾隆三十九年建。四十五年六月十七日漫溢堵合。修工长一百五丈七尺。四十八年淤闭四十三丈三尺，后又溜势下移续生，现

修工长二百二丈一尺。迎溜埽外间抛碎石。魏郭二工上下毗连，考其地即在昔年韩家房工之下，其工不知闭于何时，而于乾隆三十九年移生下首。郭工后乾隆四十年筑越堤，长二百六十八丈。四十五年漫口冲塌。四十六年另筑越堤长五百五十丈。是年魏工漫口冲塌，合龙后补筑二百四十七丈，现长五百三十七丈。越堤内格堤一道长一百十二丈，已残废。

徐州道属宿南厅

通判一员，守备一员。管理睢宁、宿迁两县境内黄河南岸堤埽工程，上自睢南厅属戴汛兵十堡下交界起，至桃南厅属烟墩汛洋河交界止，缕堤长一万七千五百五丈五尺。为汛三：曰周家楼汛，曰蔡家楼汛，曰洋河汛。

周家楼汛，主簿一员，协防一员，管堡夫十八名，兵八十二名。汛地上自睢南戴汛兵十堡界起，至蔡汛界止，堤长三千五百九十三丈。历年加培添接，及以越为缕，现在实长三千九百七丈，属睢宁县境。周家楼埽工，乾隆五十四年六月九日漫缺，十月堵合。遂成埽工。嘉庆十四年淤闭。郭家房埽工，嘉庆十一年七月二十九日漫缺，十二月堵合，遂成埽工。现修工长二百二十六丈四尺。埽外间段抛护碎石。峰山楼埽工，长一百一丈四尺。朱家坝后越堤五百七十六丈。雍正五年筑。已坍。下接圈堤长一百七十丈。嘉庆十年筑。现作缕堤。后越堤一道长五百二十丈。乾隆二十一年筑。久坍。上越堤一道长三百二十二丈。乾隆四十年筑现作缕堤。格堤一道长一百八丈。乾隆四十六年筑。现作缕堤。下迤堤一道，长三百八丈。乾隆四十年筑。久塌入河。朱工坝台上护滩堤一道，长一百丈。乾隆四十年筑。又下护滩堤，长一百十六丈。四十六年筑。皆塌入河。小越堤长二百五十五丈。雍正九年筑。龙门坝台前格堤长一百二十丈。雍正九年筑。外越堤长五百十六丈五尺。乾隆二十三年筑。皆塌入河。周工越堤一道，长四百七十四丈。又下越堤一道，长三百丈。五十四年筑。郭工后越堤一道长六百五十丈。嘉庆十二年筑。

蔡家楼汛，县丞一员，把总一员，协防一员，管堡夫三十六名，兵一百三十名。汛地上自睢宁县境周家楼汛右堤头界起，至张王庙洋河汛界止，缕堤现长七千三百八十二丈。墩郎庙迤上越堤一道，长三百四十三丈。雍正元年筑。撑堤一道长一百三丈。雍正元年筑。罗家庄，乾隆二十三年建埽工四十三丈。三十一年放淤停修。墩郎庙，康熙五十九年建。埽工一百七十丈。乾隆二十三年放淤停修，工后越堤一道长三百五丈。康熙三十八年筑。乾隆三十一年放淤刷塌。又撑堤一道长一百三丈。雍正五年筑。乾隆三十九年放淤为缕。老堤头越堤一道，长四百三十九丈。康熙三十八年筑。雍正七年放淤为缕。乾隆三十一年放淤刷塌。田家房埽工长三十一丈五尺。嘉庆二十四年生。工后越堤一道长四百七十五丈。嘉庆二十三年筑。蔡家马路雍正七年建埽工长二百三十丈。乾隆三十一年放淤停修。小三堡埽工乾隆三十三年复生。原修工长五百四十丈。三十九年放淤废工。五十三年复生。历年接筑，埽工长三百四十八丈三丈。嘉庆八年下首放淤停修，工长一百四十二丈三尺。后于下首

接修埽长九十一丈。上首又接修埽长一百五十五丈。现修工长四百五十二丈。埽外间段抛护碎石。工后越堤一道长六百六十五丈。乾隆三十四年筑。三十九年放淤为缕。彭家堡越堤一道长九百十五丈。康熙十八年筑。臧家庄，乾隆二十年建埽五百八丈。三十三年放淤废。王家马路埽工，乾隆五十六年复生，工长三十丈。历年接生，工长一百五十四丈七尺。嘉庆二十四年淤闭，移生于下首兵九堡处，工长二百一十一丈一尺。埽外间段抛护碎石。工后乾隆十九年创筑越堤一道，长五百十丈。三十三年放淤为缕。又越堤一道，长六百丈。乾隆三十一年筑。三十八年放淤为缕。臧家庄上首鱼鳞越堤一道，长二百七十二丈。乾隆四十二年筑。迤下小古城圈堤一道长一百九十五丈。嘉庆六年筑。现作缕堤。朱家庄埽工，嘉庆八年生，现修工长三百五十四丈七尺。埽外间段抛护碎石。孟城庵越堤一道工长二百五十丈。雍正九年筑。嘉庆八年放淤为缕。

洋河汛，主簿一员，巡检一员，千总一员，协防一员，管堡夫二十八名，兵一百五十名。汛地上自蔡汛张王庙界起，至桃南厅属烟炖汛洋河钞关界止，缕堤现长五千七百六十六丈五尺。自张王庙起，至徐家湾下缕堤止，淤河堤长一千一百十三丈五尺。康熙二十一年重筑。久为缕堤。遥堤一道，自张王庙起，至缕堤头止，长九百九十二丈。康熙十九年筑。陈家坝埽工康熙三十八年生，历年接修，工长四百三十丈。乾隆三十九年下首放淤，弃工止修。工长一百七丈四尺。嘉庆五年淤闭。八年复生，埽工于陈工之下名杜家庄。现修工长二百一丈七尺。埽外间段抛护碎石。工后大越堤一道，长九百五十丈。康熙三十八年筑。小越堤一道，长五百丈。雍正五年筑。撑堤一道，长一百丈。乾隆五十六年筑。格堤一道，长二百三十三丈。乾隆十九年筑。三十九年放淤为缕。工尾鱼鳞越堤一道，长一百八十三丈。乾隆四十年筑。五十一年放淤为缕。赵家庄埽工，长三百六丈。乾隆五十九年建。迤下化村铺埽工，现长一百四十四丈。乾隆九年建。埽外间段皆护碎石。工后越堤一道，长三百十丈。嘉庆四年筑。吉祥庵埽工，长一百八丈七尺。乾隆四十七年建。埽外间段挑护碎石。工后越堤一道，长五百八十丈。雍正五年筑。夫十二堡埽工，长一百五十三丈五尺。嘉庆二十二年建。埽外皆护碎石。工后撑堤一道，长九十五丈。雍正五年筑。钞关埽工长一百八十五丈。雍正十一年建。乾隆九年淤闭。四十三年复生，旋又闭。嘉庆八年又生，名兵七堡，现修工长九十三丈。埽外间段抛护碎石。兵尾旧草坝越堤一道，长一百九十五丈。康熙三十二年建。嘉庆八年放淤。下首刷塌，仅存上长一百三十丈，作为缕堤。遥堤一道，自便民闸起，至桃源界止，长九百十五丈。康熙十一年筑。归仁格堤一道，自便民闸起，至五堡火星庙止，长二千七百十九丈三尺。康熙十九年筑。内北首有便民闸一座，二十二年建。乾隆四十三年，总河萨载以闸已久废，令拆石料运办外河顺黄坝石工无存。南首有石涵洞一座，康熙二十一年建，年久坍塌。乾隆二十二年水利案内修砌石裹头，以泄西来之水。四十六七年，郭魏工漫溢，淤淀废弃。归仁堤一道，北接五堡土堤起，南至泗州境乌鸦岭止，长三千五百九十七丈六尺。内自乌鸦岭至归仁集石工头止，土堤长五百九丈。又自归仁集起，至五堡格堤止，石工长三千八十八丈六尺。建自明万历九年、康熙二十一年。三十九年至四十一年屡修。雍正四年睢宁朱工漫溢，堤石多有冲

缺。乾隆四十六七两年，郭魏工漫溢，复间段冲塌淤没。现存间段堤石工，约长二千七八百丈。前堤之中有归仁安仁利仁双金门石闸三座，康熙三十九年建。各口宽二丈二尺，各高一丈八尺。雍正四年朱工漫溢，冲塌安利二闸，惟有归仁闸宣泄西来之水，并蔡家等处民便河水。乾隆四十六七两年郭魏工漫溢，并皆冲塌淤废。归仁堤五堡之东接涵洞口起，至九龙庙止，旧引河长一千二十七丈九尺。又自九龙庙起，至桃源县境老堤头黄河边止，河长三千七百丈四尺五寸。康熙三十九年开浚。在宿迁境内河长三百五十七丈七尺五寸。在桃源境内河长三千三百四十二丈七尺。南束水堤自五堡起，至桃源界止，长三千七百五十七丈。明万历九年创筑，康熙三十九年修，内自五堡迤下起，至九龙庙止，石工长一千一百丈。并桃源境内南堰接宿境堤尾起，至老堤头黄河边止，长一千四百六十二丈。康熙三十九年创筑。北束水堤自格堤三堡起，至桃源县黄河边止，长三千七百七十六丈七尺。在宿迁境长六百八十三丈。在桃源境长三千九十三丈七尺。皆康熙三十九年创筑。内宿迁境内有小石闸一座，俗名小闸，泄洋河积水，由运料小河出闸，以达引河，并归黄河。康熙四十一年建。便民河一道，上自蔡汛李家庄起，下至五堡迤下止，长八千三百六十丈。宣泄宿境黄河南岸积水，并分蔡家河水，由归仁闸入安河，达洪泽湖。乾隆四十六年以后，历被漫口之水淤为平陆。林子河即陵子河一道，上自找沟集起，下至涵洞止，长六千六百九十四丈。宣泄睢邑沈家湖并泗山湖之水，由鲍家河入安河，达洪泽湖，亦淤成平陆。鲍家河一道，自涵洞起，至桃源界止，长一千二百十丈。上承林子等河之水，入安河以达洪泽湖。亦淤平。罗家河一道，自杨家湖尾起，至归仁闸止，长三千三百三十五丈五尺。泄杨家湖之水，由董家沟入安河以达洪泽湖。亦淤平。董家沟河一道，自归仁堤起，至安河止，长二千七百三十丈。泄归仁堤罗家河诸水，入安河以达洪泽湖。亦淤平。

淮扬道属桃南厅

通判一员，守备一员。管理桃源县境黄河南岸堤工，上自宿南洋河汛白洋河钞关起，下至清河县外南厅南岸汛交界止。计长一万六千三百十五丈四尺。为泛二：曰烟墩汛，曰龙窝汛。

烟墩汛，县丞一员，把总一员，协防一员，管堡夫四十六名，兵一百六十六名。汛地上自宿南洋河汛界起，下至龙窝汛止，缕堤长八千二百五十丈六尺。堤内涵洞四座，祥符石闸一座。金门宽二丈四尺，高二丈八尺八寸，计石二十四层。康熙三十九年建。中格矶心，又建五瑞石闸一座。金门宽一丈二尺，由身直长十二丈，高二丈四尺，计石二十层。闸南东西束水堤二道，东长一千四百六十三丈二尺，西长三千九十三丈七尺，皆西接宿南洋河汛属归仁堤。东束水堤堰中有河一道，上接归仁堤三闸，下抵闸，共长三千三百四十一丈。亦属两汛。此二闸与归仁堤内三闸互相为用，以泄濰水，并睢宿境内诸湖之水入黄，并力刷涤，免注洪泽湖，以护高堰。

《行水金鉴》业已详载。迨后黄河底渐垫高，诸水不能出闸，面归仁堤上下诸河亦为屡次南岸漫口淤垫。堤中三闸亦为冲塌淤没，于是西水尽入洪湖，不由祥符五瑞

二闸出而刷黄矣。乾隆四十年以后，遇黄水盛涨之年，酌启祥五二闸以资减泄，自后率以为常。于是筑闸北至河边东西束水二堤，并筑头二土坝。又筑闸下南北束水土堰。南堰起自西束水堤，北堰起自半边店迤上。势向东南，拦束泄下黄水，以达洪湖。堤北于家港引河一道，伍家营缕堤一道，胡家庄沈家庄埽工，县志载二工毗连。上迎北岸半路刘之溜。康熙五十五六八等年总河赵世显题建挑坝，雍正元年工后筑越堤，长九百五十五丈。越堤之内又有小越堤长四百一十丈。雍正五年建。八年总河嵇曾筠题建护崖埽一百五十丈。乾隆初溜势开行淤闭。烟墩险工，顺治十六年生，最为险要。雍正年间溜势开行淤闭，乾隆五十一年后复生，名王家庄，至今修防。埽外间段抛护碎石。北门护崖埽工，雍正七年总河尹继善题建。工长一百四十七丈，旋即沙淤。工后越堤长三百九十丈。内堤南一段长二百二十丈。堤北一段长一百七十丈。

龙窝汛，主簿一员，千总一员，协防一员，管堡夫四十四名，兵一百五十九名。汛地上接烟墩汛界起。下至外南厅属南岸汛交界止。堤长八千六十四丈八尺。盛家庄埽工，长一百六十四丈四尺。紧接王家庄工尾。乾隆五十一年后，时淤时出。迤下滩面土坝一道，长四十丈。嘉庆十二年筑。以拦漫滩顺堤之水。张家庄旧埽工，并旧缕堤，乾隆初淤闭。颜家庄埽工，康熙五十八年总河赵世显题建。挑坝埽工，雍正五年总河齐苏勒筑越堤一道，撑堤三道。十年淤闭。十三年复出，乾隆四年总河高斌令弃缕守越，旋淤。八年，总河白钟山复建越堤格堤。今久淤废。司家庄，乾隆五十一年漫缺堵闭。工后筑越堤一道，长六百二十一丈。五十三年埽工淤闭。胡家湾因河南卧，嘉庆二十一年筑碎石盘头土坝，以挑河溜。李家口即李义口，康熙年间数受水患。所谓豁口者也，今年久，堤外已长淤滩。谈家坝埽工，乾隆五十一年以后弃缕守越堤，埽淤闭。刘家庄埽工，在谈工下里许，乾隆五十一年以后生。今淤。本工缕堤长七百三十丈，即乾隆五十六年所筑越堤。嘉庆八年旧堤冲刷，复又以越为缕。田家集挑水坝埽工，长一百八十七丈六尺。嘉庆九年筑。挑坝迤上滩面碎石盘头土坝三道，十七年筑。田袁工埽工，共长一百九十七丈六尺。嘉庆九年建。埽外历年间段抛护碎石，本工后大越堤一道，长八百七十丈。越堤内格堤一道，长一百三十丈。皆是年建。马厂陂旧斜堤一道，明万历六年筑。八年又建闸一座。康熙四年后，闸口屡漫，缕堤溃决，淹没民田。后筑堤御水，今久淤没。女儿堤，在马厂东北。旧有险工，派及妇女抢筑，故名。乾隆初遗址犹存，今无可考。高家湾埽工，康熙四十二年总河张鹏翮题建。又筑越堤一道，长五百丈。越堤下接小堤一道。雍正二年考建。又撑提二道，共长三百二十四丈。五年建。该工现修埽工长一百四十九丈九尺。埽外历年间段抛护碎石。埽工迤上，嘉庆十三年筑外越堤一道，长一百五十五丈。夫二十一堡埽工，长三百二十丈五尺。在高工下里许，嘉庆十三年建。埽外历年间段抛护碎石。工尾碎石盘头土坝二道，二十二年筑。工后大越堤一道长九百五十丈。嘉庆八年筑。十四年越堤内又筑格堤一道，长一百七十丈。又小越堤一道，长八十七丈。二十二年筑。

淮海道属外南厅

同知一员，守备一员。管理清河、山阳二县黄河南岸工程，上自桃源县桃南厅属龙窝汛高家湾界起，越清口下至山阳县海防厅上河汛界三岔堤止，缕堤长一万五千二百三十五丈。为汛二：曰南岸汛，曰外河汛。

南岸汛，巡检一员，把总一员，协防二员，管堡夫二十八名，兵一百五十名。汛地自桃南龙窝汛界起越清口至外河汛季家浅止。缕堤长五千四十丈。吴城缕堤，自高家湾界起至张福口止，长三千五百五十八丈五尺。吴城七堡埽工长三百十六丈五尺。嘉庆十一年后历年接建。埽外间段抛护碎石。工尾下首碎石土坝八道。二十三年建。夫八堡，上自缕堤起，至御桩亭上止，临河越堰一道，长五百七十丈。嘉庆十二年筑。御坝上下木龙五架，乾隆五年建。迨后历有添移，其多寡地段因时而殊，并无一定。拦黄坝顺黄坝中间空塘，四十三年填与滩平。四十五年圣驾南巡临视，指示全填与堤面相平。又自拦黄坝北首起，至新西坝迤上束水堤止，筑斜堤一道，长二百四十六丈。陶庄引河南岸临黄束水堤尾起，至新西坝迤上止。乾隆五十年因清水甚小，黄水倒漾，漕船阻滞，经大学士阿桂会同督河院奏挑倒钩引河，长四百十五丈，借引黄水以济空运。旋即堵还。清口以下，西大王庙前里河交界起，至旧东坝止。乾隆四年筑缕堤，长七十丈。接下至惠济祠后大营房止，缕堤长六百九十二丈。康熙十七年筑。又自大营房起，至外河交界李家浅止，缕堤长六百八十九丈五尺。三十八年筑。卞家汪石工，长八十四丈。康熙四十一年建。接下天妃坝石工长三百四十七丈。康熙三十年建。乾隆十九年石上加砖，长三百二十丈。接下惠济祠前起至大营房止，石工长一百六十二丈。康熙三十九年建。以上石工，于嘉庆十年自卞家汪起，至惠济祠后止，间段加砖，共长五百三丈二尺。后因堤日卑矮，十四年加高堤工，将所有石工通行包筑。淤土坦坡而石工遂埋于堤内矣。东西束水坝，御黄二坝，顺清河，嘉庆十六年以后，遇有南岸漫工，洪湖水大，开挖御黄西坝后身，以资畅泄，随时堵闭。御黄坝外东岸，嘉庆二十五年筑迎水坝一道。

外河汛，县丞一员，千总一员，协防二员，管堡夫二十六名，兵二百十名。汛地自南岸汛界季家浅起，至海防厅属上河汛界三岔堤止，缕堤长一万一百九十五丈。自季家浅起，至周家庄十一堡止，堤长四千五百六十二丈，属清河县。又接清河县界起，至二十五堡迤下止，堤长四千二百二十七丈，属山阳县。又接山阳县界起，至海防三岔兵工堤上止，堤长一千四百六丈，属安东县。陈家马头起，至小新庄止，临河越堤一道，长二千五百二十六丈。嘉庆十八年筑。石马头一道，南北长十八丈，宽一丈五尺。雍正六年建。老坝口小车路大车路朱家沟洪福庄玉皇阁周家庄七工相连。旧有埽工老坝工下，乾隆三十九年八月漫溢堵合。嘉庆十二年于对岸取直挑河，并在旧河头筑做柴土坝拦截。工遂淤闭。十八年工外创有越堤。工后大越堤一道，长九百十五丈。乾隆四十年筑。周家庄工下撑堤一道，长二百五丈。乾隆十九年筑。兵四堡埽工，嘉庆二十一年建。历年提移淤，复有徐家庄小新庄地名。现修埽长四百九丈三尺。埽外间段抛护碎石。工头碎石土坝一道。嘉庆二十三年筑。又于越堤尾筑碎石土坝三道，三老坝越堤一道，长六百二十五丈，嘉庆十一年筑。汤董庄埽工。现修工长五百五十三丈。历年提移。有潘汤陈高张等庄地名，埽外间段

抛护碎石，汤董庄工后越堤一道，长二百十丈，康熙十八年筑。雍正三年筑撑堤一道，长一百九十丈。又筑上撑堤一道，长二百八十三丈，下撑堤一道长一百八十七丈。上张庄埽工久淤，汰黄堤。《行水金鉴》载：自车路口起，至上河汛大茭陵止，长一万二千二百五十九丈八尺。康熙三十八年修筑。《淮安府志》载：柳围头石闸一座。注称减水由运料小河沿缕堤直出云梯关下掌家港，专为运料而设。康熙三十一年建，并未开放。

淮海道属海防厅

同知一员，守备一员，管理山阳、阜宁两县境内黄河南岸河务。上自山阳县外河厅外河汛三岔界起，下至海阜厅仁和汛陈家社止。缕堤长二万一千三百八十八丈七尺，为汛三：曰上河汛，曰童营汛，曰下河汛。

上河汛，主簿一员，协防一员，管堡夫千八名，兵六十名。汛地自外南厅外河汛三岔界起，至童营汛新港止。缕堤长二千八百六十九丈七尺，属山阳县境。杨家马头埽工，雍正十二年筑，久淤。工后越堤一道长三百九十二丈，雍正十三年筑，乾隆元年开缕堤放淤。二堡下至尹韩庄越堤中间止，乾隆二十年创越堤一道，长三百四十丈。现废。尹家庄韩家庄，两地毗连。雍正十年建筑埽工。十一年淤。嘉庆三年迤上王家庄生工筑埽。后于七年十二年先后生工筑埽，名刘家庄、曹家庄。现修埽工共长二百九十八丈九尺。工后大越堤一道，长八百八十丈。康熙十九年筑。越堤内格堤二道，一长五十五丈，一长七十二丈五尺。皆雍正五年筑。又真武庙起，至郑家马路止，越堤一道，长四百七十丈。乾隆二年筑。又接下至七堡下止，越堤二道。一长二百十五丈，乾隆七年筑。一长四百十七丈五尺，八年筑。汰黄堤一道，上接外河汛三岔界起，至董汛界严家马头止，长一千五百七十丈。康熙三十八年筑。

童营汛，巡检一员，把总一员，协防一员，管堡夫三十二名，兵九十二名。汛地自上河汛界新港工头起，至下河汛界叶家营止，缕堤长五千九百十丈，皆山阳县境。新港伍墩两工相连，名新五工。雍正十年筑。有埽工后淤。乾隆四十七年复出。嘉庆二十三年淤。高家庄埽工，雍正十年建。后淤。乾隆三十九年放淤停修。以后旋出旋淤。现修埽长二百四十八丈二尺。唐家堡埽工，雍正十年建。乾隆三十九年放淤停修。以后时出时淤。现修埽工二百五十丈四尺。新港工头格堤一道，长五十六丈。康熙四十二年筑。新港工头至伍墩越堤一道，长三百八丈。康熙四十二年筑。伍墩格堤一道，长五十丈。四十六年筑。现为缕堤，伍墩格堤尾起，至唐家堡格堤头止，越堤一道，长一千丈。康熙四十二年筑。下长六百丈。于乾隆三十九年放淤塌卸。现存四百丈。作为缕堤。接下周家庄，南越堤一道，长一千一百丈。乾隆十一年筑。内下长五百二十七丈，现为缕堤。内格堤一道，长一百十丈。十一年筑。接下唐家堡，越堤一道，长七百三十七丈。康熙四十二年筑。现为缕堤。七堡即小茭陵埽工，雍正十年筑。淤复不常。现修工长一百六十六丈五尺。胡家马头即何家

庄埽工，雍正十年筑。以后淤复不常。现修工长二百七十丈。吉家庄即大茭陵埽工，雍正十年筑。以后淤复不常。现修工长一百十四丈。埽外抛护碎石。埽工迤上，嘉庆二十四年筑。碎石盘头土坝三道。沈家圩埽工与吉工相连。乾隆四十六年筑。五十八年放淤停修。嘉庆十四年复生。现修工长二百二十三丈。工后大茭陵堤一道，长五十七丈。乾隆二年筑。今为缕堤。接下格堤头起至旧堤头止，越堤一道长五百三十丈。康熙四十二年筑。今为缕堤。堤内格堤长八十二丈。乾隆十一年筑。七堡格堤一道，长七十五丈。又小茭陵格堤长一百八丈。又大茭陵南越堤一道，长八百四十丈。堤内顾家马头格堤长一百二十丈。皆乾隆十一年筑。接前沈家圩鱼鳞堤一道长二百二十二丈。乾隆八年筑。今为缕堤。又戽堤一道长五百二十丈。康熙三十五年筑。又里越堤一道长七十八丈。雍正八年筑。又外越堤一道长二百二十一丈。雍正九年筑。又临黄外越堤一道长八百七十丈。乾隆二十一年筑。又里越堤一道长一百八十丈。五十二年筑。堤南遥堤内塘严冈苏家嘴旧有民建涵洞二座，汰黄堤一道，接严家马头起，至大茭陵工尾止。长一千六百七十二丈。

下河汛，巡检一员，把总一员，协防二员，管堡夫七十二名，兵一百九十一名。汛地自下河汛界叶家营起，至海阜厅属仁和汛止，缕堤长一万二千六百九丈。属阜宁县境。童家营东西裹头埽工，雍正十年建。后淤。蔡家马头埽工，乾隆二十二年建。渐淤。现修工长六十九丈七尺。钱家马头埽工，乾隆五十三年建。现修工长七十八丈一尺。埽外间段抛护碎石。卢家庄埽工，嘉庆十一年建。现修工长一百七十丈九尺。埽外间段抛护碎石。石家庄范家庄杨家庄埽工，康熙年间建，罗家庄埽工雍正三年建。四工相连。久淤。童家营越堤一道，长六百七十七丈。康熙四十一年筑。堤内格堤一道，长九十丈。雍正四年筑。蔡家马头大越堤一道，长一千一百六十一丈。乾隆元年筑。内下长五百七十丈。今为缕堤。接下斜堤一道，长一百九十五丈。乾隆二十一年筑。又下格堤一道长一百三十丈。乾隆四年筑。钱家庄越堤一道，长八百五十三丈。乾隆二十四年筑。又卢铺越堤一道，长一百九十二丈。乾隆元年筑。左家庄越堤一道，九百八十丈。又上格堤一道，长八十丈。下格堤一道，长七十五丈。皆雍正五年筑。接下董家庄越堤一道，长三百三十一丈。乾隆十一年筑。兵十四堡埽工，嘉庆三年建。现修工长一百七十丈五尺。埽外间段抛护碎石。马起营埽工。乾隆五十二年建。现修工长一百四十七丈二尺。李家庄埽工，嘉庆八年建。现修工长一百六十九丈四尺。埽外间段抛护碎石。工后越堤一道，长九百丈。乾隆二十三年筑。又中越堤一道，长三百二十五丈。乾隆七年筑。又鱼鳞越堤一道，长三百十丈。乾隆二十一年筑。涂家庄埽工，长一百六十六丈。乾隆二十二年筑。久淤。陈家社越堤一道，长四百八十丈。康熙四十年筑。又上下越堤二道，一长八十丈，一长六十丈。皆康熙四十年筑。

淮海道属海阜厅

同知一员，新设守备一员。管理阜宁县黄河南岸堤工，上白海防厅属下河汛界陈家社下起，下至大淤尖堤尾止，缕堤长二万二千八百二十三丈。内陈家社至灶工尾旧

堤长一万一千一百二十五丈。迤下至海口堤长一万一千六百九十八丈。皆嘉庆十五年所筑新堤。十五年初奏，止设二汛：曰南岸汛，曰海阜汛。十五年添筑新堤之后，于十八年奏改三汛：曰仁和汛，曰十巨汛，曰海南汛。添设河兵一百九十二名，添设堡夫六十四名。

仁和汛，巡检一员，即大套司把总一员，协防一员，管堡夫四十六名，兵八十八名。汛地自海阜厅下河汛界起，至岔堤尾止，缕堤长八千三百五十丈。陈家社里越堤长五十五丈。雍正八年筑。又外越堤一道长一百八十五丈。雍正九年筑。辛家荡滚水坝一座。《淮安府志》载：康熙四十一年建。未淤。今久湮没。乾隆十一年创里越堤一道，长八百六十丈。越堤一道长三百六丈。黄泥嘴南岸挺向北岸，河势弯曲。嘉庆八年在南滩取直挑河，长一千三百丈。大汛启放，溜走新河，旧河遂淤。自五堡上起至陈家浦南圈堰止，嘉庆十四年筑临河圈堰一道，长四千一百七十五丈。陈家浦即《行水金鉴》所载，地名陈家庄。西礪掌家港三处相连险要埽工，《淮安府志》载：乾隆十年七月十九日陈家浦漫缺二百余丈，九月水落始塞。筑重堤长一千六百二十丈。浚河溜开行，该工淤闭。嘉庆十二年秋汛异涨漫缺。以前所创越格等堤皆为刷塌。十三年春，在北首滩面筑坝堵闭。内自夫十五堡缕堤北面起，至大坝尾止，筑南坝圈堰，长一千二百二十二丈。又自北堤尾起，由东转南至夫二十四堡缕堤止，筑北坝圈堰长二千七百三十六丈。中间堵合柴坝连坝基长一百五丈九尺。又自南坝圈堰于家庄前起，至南三坝尾止，筑圈堰长七百丈。又筑南二坝尾圈堰长二百七十丈，中筑柴坝，连坝基长一百十五丈。又自三北坝尾起，至北圈堰止，筑坝尾堤长二百三十八丈。又于南圈堰之西筑挑水坝，长二百七十六丈。嘉庆十八年自三南坝基东至北圈堰筑重堤，长三百四十七丈。又自挑水坝至北大坝后筑拦水堤一道，长二百九十七丈，陈家浦三北坝外上下圈堰。嘉庆十七年后历年镶筑埽工一百六十余丈。今皆淤闭。

十巨汛，县丞一员，以阜宁县丞移驻，把总一员，协防一员，皆新设，管堡夫三十八名，兵七十名。汛地自仁和汛界岔堤尾起，至海南汛十巨以下于家港止，缕堤长六千八百五十丈。自上汛夫二十四堡新堤尾起，至灶工尾止，嘉庆十三年筑外越堤一道，长六百六十丈。

海南汛，县丞一员，以盐城县丞移驻，千总一员，协防一员，皆新设，管堡夫四十二名，兵七十八名。汛地自十巨汛尾于家港起，至大淤尖堤尾止，缕堤长七千六百二十三丈。卫滩越堤一道长一千四百五十丈。嘉庆二十四年筑。越堤下首，二十五年又接筑套堤一道，长七百八十丈。东洼埽工，嘉庆二十年至二十五年节建。埽长三百七十五丈二尺。上首九十二丈。已经淤闭。工后越堤一道，长一千一百九十四丈。嘉庆二十年筑。七巨港至八巨港下止越堤一道，长一千六百五十丈。嘉庆二十二年筑。堤南卫滩迤下，即苇荡右营官荡，西界卫滩，南界后洋，北界缕堤，东抵海滩。

第三卷 运河上

明洪武元年，大将军徐达开塌场口，入于泗以通运。五年二月，命两淮都转运盐使司移通泰等州批验所于仪真县，仍疏浚运河以便商旅。九年，令扬州修高邮、宝应湖堤六十余里，以捍风涛。十四年十一月，浚扬州府官河，自扬子桥至黄泥滩，凡九千四百三十六丈。十五年十二月，浚扬州仪真河九千一百二十丈，置闸坝十三处。十七年闰十月，修筑江都县深港坝，浚河道五百六十七丈。二十年正月，命工部主事杨德礼往高邮督有司修筑并湖堤岸，因扬州府同知任祥之言堤岸圯坏，故有是命。二十六年四月，命崇山侯李新往溧水县督视有司开胭脂河。上面谕之曰：“两浙赋税漕运京师，岁实浩繁。一自浙河至丹阳舍舟登陆，转输甚劳。一自大江泝流而上，风涛之险，覆溺者多。朕甚悯之。今欲自畿甸疏凿河流，以通于浙，俾运输者，不劳商旅获便。故特命尔往督其事。尔其蒞事维勤，役民勿暴。”新顿首受命而行。暨河成，人皆便之。

建文四年，修常州府武进县剩银河闸。

永乐元年七月，户部尚书郁新等言：“淮河至黄河，多浅滩跌坡，馈运艰阻。请自淮安用船可载三百石以上者，运入淮河沙河。至陈州颍岐口跌坡下，复以浅船可载二百石以上者，运至跌坡上。则以大船载入黄河，至八柳树等处。令河南车夫运赴卫河。转输北京。”从之。闰十一月，浚扬州府江都县瓜洲坝河道。十二月，修扬州府江都县永真沙边江圩岸。二年正月，扬州府高邮州耆民言：“自州北门至张家沟湖岸，两京之要路，民田之巨防。湖纳天长盱眙诸水，雨潦涨溢，风波冲决堤岸。每岁修筑，旋复倾圯，阻绝驿路，伤损民田。乞遣人相度，重为修理。”从之。十一月，镇守淮安都指挥施文言：“淮安诸坝，舟航往来，每遇天旱坝下淤浅，重劳人力。近城旧有清江浦二闸，比年圯坏。乞命有司修砌。以便往来。”从之。浚仪真清江坝下水港。三年五月，淮安府海州言：“临洪场民岁于笪渚场界耕种输作，陆运艰难。州北旧有河上通高桥，下接临洪。近年淤塞。乞疏浚以便舟楫。”从之。七月，浚淮安府山阳县运盐河计一十八里。十一月，浚淮安府支家河，长一万一千九百七十丈。四年八月，工部言：“吕梁洪霖雨水决近河路并圈沟桥一十九丈六尺。宜发民修理。”从之。九月，扬州府泰州判官黄通理言：“州境旧有运盐官河，每遇霪雨，辄泛溢，伤民田宅。乞于普定秦潼河及西溪南仪阡三处各开水口。使下流经兴化盐城界入海。仍各置闸，以时启闭，永为民利。”从之。十一月，户部言：“高邮州东河等处塘倾圯，江都县刘家圩港淤塞。”命有司发民修浚。十二月，常州府孟渎河闸官裴让言：“河自兰陵沟北至闸，六千三百三十丈。南至奔牛镇一千二百二十丈。年久堙塞，艰于漕运。乞发民疏治。”命右通政张璉发苏松镇江常州民丁十万浚之。七年，平江伯陈瑄筑高邮诸湖长堤，以度纤道。八年三月，修镇江府丹阳县练湖塘。十二月，苏州府吴江县言：“石塘官路，右临太湖，左边松江，南至平望嘉兴，连年土石坍塌，桥梁断坏。请及时修理。计用三万七千四百余人，十月可完。”从之。敕通政使赵君任督之，务令坚固，毋虚劳民力。九年正

月，扬州府高邮州言：“城北张家沟塘岸三十里，旧用砖石包砌，防遏蟹社等九湖及天长诸水，近因春雨浸淫各水暴涨，冲决塘岸九百八十丈。又自张家沟北至宝应县，南至江都县，东至兴化县界，塘岸百余里间有坍塌。乞发丁夫如旧修治。”令工部核实修筑。三月浚扬州府瓜洲坝河道及修通江减水二闸。修苏州至嘉兴石土塘桥路七十余里，泄水洞百三十一处。六月，淮安府沭阳县知县王泰言：“县南沭河，北连山东，南通淮安，洪武间常疏浚以便转运。今壅塞四十余里。转输既艰，水复为患。乞于农隙浚治。”从之。八月，浚常州府江阴县青旻等处河道。十年十一月，修扬州府仪真县缘江堤岸及浚夹港等处河道。浚镇江府京口新港甘露三港达于江。十二年八月，浚淮安府海州城南官河一百四十里。十月，常州府江阴县请浚万岁河及塘泾等河。从之。十一月，浚苏州府昆山县太平河。是年，平江伯陈瑄请凿徐吕二洪以通漕运，更于洪口建闸。(按宋元祐四年，京东转运司言：“清河与江浙淮南诸路相通，因徐州吕梁百步两洪湍浅险恶，多坏舟楫，朝廷已委官度地势穿凿。”此即瑄所凿之道也。)十三年五月，开清江浦河道，(《明太宗实录》)凡漕运北京，舟至淮安过坝，度淮以达清河口，挽运者不胜劳。平江伯陈瑄时总漕运，故老为瑄言：“淮安城西有管家湖，自湖至淮河鸭陈口，仅二十里，与清河口相直。宜凿河引湖水入淮，以通漕舟。”瑄以闻，遂发军民开河，置四闸：曰移风，曰清江，曰福兴，曰新庄。以时启闭，人甚便之。是年，建淮安五坝。运船经坝入淮。(《南河全考》)仁字坝、义字坝，在新城东门外。东北自城南引河水抵坝口，外即淮河，遇清江口淤塞，运船经此入淮。礼字坝、智字坝、信字坝，在新城西门外。西北引湖水抵坝口，外即淮河遇清江口淤塞，则官民商船经此达于淮。十四年四月，设直隶淮安府山阳县之清河、福兴，清河县之新庄，邳州之乾沟，徐州之沽头上、沽头下，沛县之金沟，山东济宁州之谷亭、孟阳泊、鲁桥十闸。置闸官各一员。(按明初都金陵，则漕于江，其饷辽卒，犹漕于海。自永乐都燕后，岁漕东南四百万石，由江涉高宝诸湖，绝淮入河，经会通河出卫河白河，溯大通河以达于京师，诸洪泉坝闸以次修毕。)五月，修扬州府邵伯镇上下二闸。是年，平江伯陈瑄疏浚故沙河，置闸通舟。(《南河全考》)先是漕至淮安，悉从府东北车坝入淮，逆水行六十里。至是瑄因宋乔维岳所开沙河旧渠，益加疏治，置闸通舟。逾年而功成。漕人德之，为立祠焉。十五年五月，遣官巡视北京通州至仪真河道。十九年九月，修直隶高邮州新开湖塘岸。

洪熙元年十一月，浚仪真瓜洲坝河。先是平江伯陈瑄奏：“仪真瓜洲坝下河道年久淤塞。请发附近军民疏浚。”上以东作方兴，姑候农隙。至是命镇江、扬州、常州三府，仪真、扬州、镇江三卫，共以军民二万疏浚。仍命瑄董之。

宣德五年，平江伯陈瑄言：“淮安西湖河岸，乃牵挽舟船往来通路。比因风浪冲激，岸多坍塌，桩木不存。淮安府满浦五坝问废已久。其官吏坝夫俱无差役。乞令守视西湖堤岸，遇有损坏，就令修治。”从之。是年八月，浚白坝河及仪真等坝河。(《明宣宗实录》)御史陈祚言：“白塔河宜开浚置闸。”又侍郎赵新言：“宜浚白塔河及仪真旧江口钥匙河、黄泥滩、清江闸，俱宜浚导。”上遣主事潘厚及扬州淮安

府官审视，仍与平江伯陈瑄议可否，及所用人力。至是厚还奏：“开浚实便。白塔河仪真坝河约用四万五千八百人，计四十日可完。清江闸河用一万八千人，计十五日可完。”上从之。于是工部请发扬州淮安军夫，先开白塔河置闸。工毕，就浚清江闸仪真钥匙河。上曰：“三处用工，劳人太甚。其仪真钥匙河俟明年农隙修浚。”七年七月，置吕梁漕渠石闸。(《明宣宗实录》)平江伯陈瑄以吕梁上洪地陡水急，漕舟难行。奏准令民于旧洪西岸凿梁渠，深二丈，阔五丈有奇。夏秋有水，可以行舟。至是复欲深凿，置石闸二，时其启闭以节水，庶几往来无虞。事闻命附近军卫及山东布政司量发民夫工匠协力成之。是年，陈瑄于白塔河置新开、潘家庄大桥、江口四闸，令江南粮船自孟渎河过江，入白塔河，至湾头入漕河，省瓜洲盘坝之费。(《南河全考》)江南舟由瓜洲车坝入漕河，自白塔河开，瓜坝弃不用，近白塔置坝，舟行瓜仪。

正统三年，筑高邮湖堤。(明《英宗实录》)堤长四百二十五丈，旧用土筑，遇风撞激辄败。即有木橛苇束蔽护，亦不经久。至是甃以砖石，用糯米糊和灰以固之，始坚致可久矣。六年，修高邮州北门起至张家沟一带河堤。七年，修筑淮安西湖中路十余里以便漕运。八年三月，浚瓜洲坝东港。(明《英宗实录》)洪武间，瓜洲坝有东西二港。永乐间，废东港坝为厂，以贮材木。正统初，廷臣议徙木浚港，未果。至是，督漕总兵官都督佥事武兴言：“坝废港塞，非惟舟楫往来迟延，且艤泊大江，有风涛之虞。请俟秋成，于镇江扬州二府佥夫七千余人复修。”从之。又浚常州孟渎河德胜河扬州白塔河。(明《英宗实录》)漕运总兵官都督佥事武兴巡抚侍郎周忱等奏：“常州府武进县民言：漕舟出夏港，沂大江风涛险阻，害不可胜言。常州西城有德胜新河，北入江，江北扬州府泰兴县有北新河，中间有淤浅者，俱宜浚之。以避大江险阻。”浙江都司署都指挥佥事萧华言：“永乐宣德间，漕舟自常州府孟渎河出江，入白塔河，江行不逾半日。今孟渎河淤浅，请浚之。”广东按察司知事黄武浙江处州卫指挥使牛通皆以为言。事下臣等计议，华等所言皆有据。请先浚孟渎河。其白塔河有四闸，可于其中大桥闸筑坝，候运河水泛，则启闸行舟，水落则仍闭塞。德胜河亦宜修浚。惟北新河计当役一十五万五千人。一月方完。请俟浚理孟渎河、白塔河、德胜河完再议。上从之。九年正月，福建按察司谢庄奏：“请浚镇江府丹徒县甘露坝，至常州府城东河道。”从之。十二月，疏常州、镇江运河。十三年二月，浚秦皇寺巴河。(《续文献通考》)徐州吕梁二洪皆分黄河水以通舟楫，其秦皇寺巴河，原系分水之处，年久淤塞，水脉微细。先此都督同知武兴奏请疏浚，以冬寒土坚而止。至是复请，上命所司发军夫浚之。十四年四月，修直隶高邮州砖河塘。

景泰二年正月，浚直隶镇江、常州运河。七月，浚徐州小黄河通漕。(明《英宗实录》)初以河决沙湾，水皆东注，徐吕二洪浅涩，敕右副都御史王暹处置。至是暹上言：“黄河自昆仑发源，流入中国。其所经历之处，自陕州以西，有山峡不能为害。陕州以东，则地势平缓，水易泛滥，故为害甚多。自洪武二十四年河改流，从汴梁北相离四五里许东南转至凤阳入淮者为大黄河，其支流分出徐州以南者，为小黄河

，以通漕运。自正统十三年以来，河复故道。从黑洋山复径趋沙湾入海。止存小黄河，从徐州出，岸高水低，随浚随塞。故徐州以南不得饱水。臣等遵圣谕自黑洋山东南直至徐州，督同河南三司疏浚，其临清以南，可令副都御史洪英督同山东三司疏浚。”从之。三年，镇江知府林鹗浚京口闸甘露坝。七月，筑沙湾堤。是年，浙江参政胡清言：“直隶镇江府有河通常州府河，有新港奔牛等坝，止能容小船往来，而输运粮草大船，俱涉历大江，风涛不测，常致损溺。请敕有司开疏其河，革去其坝，惟置石闸以蓄水，则船通而害除矣。”事下二部，移文核实，咸以为便。从之。五年七月，直隶扬州府奏：“六月大风雨，湖水泛滥，决高邮宝应堤岸。”命左副都御史王竑督有司修筑之。十月，工部奏：“近闻仪真瓜洲二坝，每遇冬春潮水退缩之时，往来舟船胶浅难行。宜于二坝下各置闸，于潮水涨时闭闸蓄水，用通舟船。”从之。是年，陈泰迁左佥都御史，疏理徐州吕梁二洪及运河。

天顺元年冬，尚宝司少卿凌信奏：“江南运粮者，泛大江至瓜洲坝，有风浪之险，宜从镇江府里河。而里河自新港至奔牛一百六十余里，河道浅狭，又有三坝，大船不利车盘。七里港口又有金山横阻，江水不得入。以故粮艘多冒险损坏。宜通七里港口，引江水灌入浚新港，至奔牛一带为便。”奏下工部覆奏，宜令管理粮储河道官佥都御史李秉及郎中沈彬提调附近有司通浚。从之。二年，浚仪真漕河及常镇河。（《明史稿》）右副都御史巡抚苏松诸府崔恭与都督徐公浚仪真漕河，又浚常镇河，避江险。三年四月，工部奏：“国家大计莫先于粮运。今闻自通州以南直抵扬州，河道胶浅，粮运难行。宜驰文于管河道官，令量起附近卫所府州县军民设法疏浚。其水塘泉源亦宜疏通，以济运河。”从之。六年，疏浚淮安以南运河。

成化元年五月，总督漕运副都御史陈恭请条筑高邮湖岸，自杭家嘴北起，至张家沟镇南止，凡三十里有奇。从之。三年七月，总督漕运右副都御史滕昭言：“仪真瓜洲孟渚诸处河港，乃贡赋必由之道。旧因浅滞，令旁近扬州镇江常州诸府卫兴工疏浚。是后著令三年一浚。然所司怠玩，浚不以时，直至穷冬，召众兴役，则手足皴痂，虽浚无实，徒为劳耳。请自后每于冬初即为兴工。”从之。四年六月，工部管洪主事昇昇奏：“徐州洪势最险。自昔两堤隘，稍遇水涨，舟行无路，往来甚艰。而闸河上口一坝，势亦如之。虽频年修筑，亦惟取办一时，殊非经久之策。又如外洪翻船等石，里洪坝下一湾尤为险恶，屡坏行舟。今欲以大石修砌两堤。其外则锢以铁锭，其内则填以杂石。而又凿去外洪翻船恶石，用石铺平里洪堤岸，以便来往。须劝率往来中外官员及远近客商以给其费，量倩所属各浅夫及本洪溜夫以供其役。”工部以闻，诏可。八年八月，修筑淮安抵仪真瓜洲湖河堤岸冲决者一十五处。（《南河全考》）河道侍郎王恕请治扬州至淮安湖塘，造闸磁，引塘水，接济运河。十一年，置仪真河岸三闸。（明《宪宗实录》）工部郎中郭昇奏：“江南进贡粮运等船至仪真坝，虽夏月潮盛，亦须人力绞挽，方能达河。少有错失，船即损坏。而里河坝岸恐为潮水冲决，多开缺口以杀其势。水退复修，为费甚大。仪真县罗泗桥旧有通江河港，上至里河几四里许。潮大之时，内外水势相等。此港可置三闸，潮来先后启临江闸，使船随潮而进。俟潮既平，乃启中二闸放之。如此不惟往来舟船利便，

而里河水势亦即疏泄，不待决口重费也。”诏可之。昇会督漕都御史李裕勘议修完，而仪真居户恶其夺己利，贿嘱所司，假以走泄水利闭之。至是昇复条陈开闸之利，不开之患。工部覆奏，以昇言诚有益经久之策，宜允所请。从之。是年，总漕李裕等奏：“新开扬州白塔河潮水往来，恐久而淤浅。宜下所司，与瓜洲仪真诸河皆三年一浚。”又言：“江南孟渎河亦多淤浅。乞下巡抚按等官勘验疏浚，以便漕。”工部覆奏，从之。是年，增设直隶江都县留潮通江三闸。十三年，总漕都御史李裕，巡河郎中郭异重修白塔河。十六年，增甃吕梁洪二石堤。堤长七十余丈，筑石坝一百六十五丈。复于坝西筑堤二十余丈。

弘治元年二月，修仪真瓜洲二处坝下河口及淮安府福兴闸。七年七月，高邮康济河成。(明《孝宗实录》)初，南京兵部左侍郎白昂奏：“漕船经高邮暨社湖最忌西北风，往来舟楫多致覆溺。若于砖塘内开复河一道四十里，引水行舟，可免风涛之患。”于是巡河监察御史孙衍管河郎中吴瑞因共挑浚，并置闸堰，筑堤岸，以利牵挽，往来称便。九年四月，重甃高邮堤。巡按直隶监察御史邓璋言：“高邮湖为运河喉襟之地，而自杭家闸迄于张家镇，凡三十余里。其堤面故砖为涛所啮，屡修辄坏，劳费无算。宜易以石，庶几可久。而新修康济河西岸，亦须预为甃筑，以免冲决之虞。河之北闸，仍宜北迁五里许，庶舟行可以尽避湖面之险。”从之。十年，建江口各闸。(明《孝宗实录》)都御史李蕙请于瓜洲新坝至仓坝、一坝至四坝港口仪真钥匙河及歇马亭各建一闸，以便漕运。工部覆奏，谓二坝边临大江，潮长则坝低水高，固易于车放，潮落则坝高水低，殊不为便。莫若于江口总港内各建一闸，潮平之时，下板蓄水，令与坝相平为便，从之。十四年正月，巡抚都御史彭礼奏：“镇江府所属运河，南抵奔牛坝，北至新港坝，先因河道浅狭，运船俱从孟渎河出大江经行，径抵瓜洲。递年起夫四千，往瓜洲坝挑浅。民实劳于重役。乞令本府人夫止于本处挑浚。其瓜洲坝一带运河，令江北府属并附近州县人夫捞浅，庶民无重役之劳。”从之。二月，仪真新建拦潮闸成。十六年八月，修通州至仪真一带河道。十七年十月，总督漕运都御史张縉请浚扬州淮安一带运河，及将清江口筑塞，淮安府仁信等坝修完，以蓄水利漕。十二月，疏浚常州运河。(明《孝宗实录》)工部议，浙江苏松等处运船俱由夏港口并孟渎河出江。二三百余里方到瓜洲，其大江中有黄图等山，风涛险恶，往年粮运皆由常州奔牛坝直抵镇江府京口闸，不过一百五十余里，径过江面，就抵瓜洲。近年以来此河淤浅。宜下所司，起附近军民夫并力疏浚。且修复练湖，导引水源，以防岁旱，仍三年两浚，务成永久之计。诏速行。十八年，重建仪真通济闸。是年管理河道工部郎中张玮奏：“高邮州等州县原设石闸石桥涵洞，盖专为湖河之计，将以时其启闭，而蓄泄水利比来为近堤人家私立洞口掌理。遇水溢则窃自闭，水消又窃宅堤岸，以致冲决遗患。乞将涵洞筑塞，每五里改砌减水石闸一座，以绝盗决之弊。”从之。

正德二年三月，添设清江浦新坝闸二座。(明《武宗实录》)议者谓春冬淮水退消，清江浦淤浅，外河与里河湖高下悬隔，设坝盘剥，舟行未便，宜将坝改作内外二闸，以时启闭，节水通舟。从之。六月，从督漕都御史洪钟言：“复开白塔河及江

口、大桥、潘家、通江四闸。”(明《武宗实录》)先是总督漕运都御史洪钟言：“苏松运舟由下港口并孟渎河溯大江以达于瓜洲，远涉二百八十余里，往往覆于风浪。唯孟渎河对江有夹河可抵白塔河口，旧设四闸。经四十里至宜陵镇，再折而北，直抵扬州运河，于舟行甚便，请开浚。”至是成。十四年三月，从督漕都御史臧凤言，修浚常州上下运河。

嘉靖五年，工部郎中陈毓贤奏：“修泛光湖堤月河。诏治河都御史章拯、督漕都御史高友玠会议相度。七年，河道都御史盛应期奏开新河。(明《世宗实录》)盛应期奏：“沛县以北河道形势庳下，泥沙易集，以故累浚累塞。今询之官民，盛称昭阳湖东自北进江家口南出留城口，约长一百四十余里，可改为运河。北引运河之水，东引山下之泉，内设蓄水闸，旁设通水门及减水坝，以时节缩，较之挑浚旧河，劳逸甚远，且可为永久之利。计用夫六万五千，用银二十万两有奇。期六月而毕。”章下廷臣杂议，皆言应期议是，上乃命应期及春和督官兴事。至七月，疏浚昭阳湖东一带新河工已及半，会旱灾修省，言者多谓新河之开非计。诏罢其役。冬，漕河侍郎潘希曾加筑济沛间东西两堤以拒黄河。十年十二月，户部员外郎范韶御史闻人铨奏，于泛光湖宜建减水闸五座，浚赴海渠五条，筑堤节流，以防冲决之虞。命总督漕运都御史会同勘视。十五年，从督漕都御史周金奏请于新庄更置一渠立闸。十九年九月，运粮千户李显疏筑运河三事：“其一，谓扬州南自仪真，北抵淮安，俱藉宝应泛光湖诸水接济，乃湖南北相去三百里，广百二十余里，卒有暴风，漂荡不测，议于泛光湖堤迤东开筑越河，以免水患。其二，谓北至淮安，南至瓜仪，水势上下相去丈许，惟赖瓜仪二坝关防。先年坝决水冲，河道淤浅。宜令瓜州陈家湾仪真新城地方并扬子桥及扬州东关，各增一闸。若瓜州坝冲决，则下陈家湾闸。仪真坝冲决，则下新城闸。如二闸闭水不及，则下扬子桥闸。再不及，则下东水关闸，以留水利。其三，谓仪真下接扬子桥大江，商舶辐辏，河道壅塞，粮运阻误。成化年间曾将新城通江旧河疏浚宽广，河道疏通，官民称便。后废不修，今宜仍前修浚，以裨漕政。”命工部议行。三十一年九月，河决徐州房村集，至邳州新安，运道淤阻五十里。总河副都御史曾钧上治河方略。乃浚房村至双沟曲头。筑徐州高庙至邳州沂河。四十四年七月，河决沛县。上下二百余里，运道俱淤河漕，工部尚书朱衡奏开新河。总理河道潘季驯议复疏旧河，衡巡行决口。旧渠已成陆，而盛应期所凿新河故迹尚在。地高河决至昭阳湖不能复东，乃定计开浚。而季驯则谓新河土浅泉涌，劳费不貲，不如浚留城以上故道初淤可复也。由是二人议不合。四十五年二月，遣工科右给事中何起鸣勘视河工。(明《世宗实录》)朱衡持前议益坚，身自督工。时浮议籍籍，有谓衡违众自用，故兴难成之役以要功者。给事中郑钦疏请遣官勘视，问新河与旧河孰便。起鸣奉诏至沛县勘河工还，上言：“旧河之难复有五。黄河全徙必杀上流，如新集、庞家屯、赵家圈等处以不貲之财，而投之于河流已弃之故道，势必不能。一也。自留城至沛，莽为巨浸，无所施功。二也。横亘数十里，褰裳无路，十万之众何所栖身。三也。挑浚则淖陷，筑岸则无土，且南塞则北奔。四也。夏秋淫潦，浚后难保不淤。五也。新河内多旧堤高埠，黄水难侵，开凿之费，视旧河为省，且可远将来溃决之患。故尚书朱衡任其必可开，开成运道必利

。而议者见谓难成亦有三焉。一以夏村迤北十六七里地高，恐难接水。然地势北高南低，大约止深二丈。一照水平加深，夫何患水浅。一以三河口积沙深厚，水势湍急，不无滞阻。然既建坝拦截，或用石包砌，每岁挑浅如例，夫何患沙壅。一以马家桥两岸筑堤五里，微山取土不便，又水口投埽，势必不坚，恐难经久。然此亦在委任得人，培筑高厚，无必不可措力之理。臣又观居民之情，在新河者，则称新河可开，在旧河者，则执旧河可复，皆市廛之私，非为国家运道计也。天下之事势，穷则变，变则通。沛县河患至此极矣。往时旧河淤塞未深，都御史盛应期开新河垂成而废，至今惜之。今黄水异常，伏漕无日，尚可溺于人情安土而不为通变之谋哉。故臣断以为开新河，宜如衡言。开新河而不全弃旧河，宜如季驯言。”疏入，下工部会廷臣议，俱合。上意乃决。

隆庆元年五月，河工成。新河自南阳达沛县留城百四十一里，旧河自留城达境山茶城五十三里，役丁夫九万余人。（《行水金鉴》）尚书朱衡从南阳以南东至夏村及东南至留城凡一百四十一里，因故都御史盛应期所凿而深广之，引鲇鱼诸泉薛沙诸河注其中，坝三河口。又疏旧河，筑马家桥堤，遏河之出飞云桥者使尽入秦沟，自留城至赤龙潭又五十三里。凡为闸八，减闸二十，为坝十有二，为堤三万五千二百八十丈有奇，石堤三十里。由是黄水不复东，运道通而沛流息。三年九月，总河都御史翁大立请于梁山之南别开漕河。诏令相度地势。未果行。十二月，开浚里河等处。时淮河自板闸至西湖觜，开浚垂成而里口等处复塞。总督漕运侍郎赵孔昭言：“清江一带黄河五十里，宜筑堰以防河溢。淮河高家涧一带七十余里，宜筑堰以防淮涨。”工部覆请里河等处亟行开浚，以筑堰事宜及海口筑塞宝应越河二事，均酌议举行。从之。四年四月，河道都御史翁大立修筑高邮等处湖堤。是年秋黄河暴至，茶城复淤，淮水亦大溢。自泰山庙至七里沟淤十余里，而水从诸家沟旁出，至清河县河南镇，以合于黄河。大立言：“黄河在睢宁宿迁之间，迁徙未知所定。请浚古睢河，由宿迁历宿州出小浮桥，以泄二洪之水。且规复清河鱼沟分河一道，下草湾以免冲激之患，则南北运河可保。”而大立已内迁，方受代诏，令新任都御史潘季驯区画。九月中河决邳州，粮艘阻不进。总河翁大立请开泇河以避黄水。翁大立言：“比来河患不在山东河南丰沛，而专在徐邳，故先欲开泇河口以远河势，开萧县河以杀河流者，正谓河沙壅聚，河面增高，为异日虑耳。今秋水洊至，横溢为灾，权宜之计，在弃故道而就新冲。经久之策，在开泇河以避洪水。乞决择于二者。会罢去，而季驯则主复故道。”五年，都御史潘季驯开复邳河。五月，工科给事中张博请改瓜洲土坝为闸，以便漕舟。（按，《穆宗实录》工部覆言：“兹议勘行已久，而有司莫为奏报。必牟利之徒倡言阻挠，当事者惮于改作，故议久不行。宜督河道漕运诸臣刻期会勘以闻。”）后二闸至万历元年始成。六年，礼科给事中雒遵会工部尚书朱衡勘泇口河。六月，工部尚书朱衡报徐沛等处河堤已完。是年总河侍郎万恭请建瓜洲闸，自时家洲达于花园港，开渠长六里有奇。其年冬，闸成，一名广惠，一名通惠。于是五总船始下坝。

万历元年正月，总河侍郎万恭檄浚苏松常镇一带河道，建三河束水吊桥。自是吴浙

之运，可与江西湖广征发相同。是年，万恭建复淮南平水闸与浅船浅夫。又建天妃庙口石闸，修复境山闸，仪真建平水闸二座，江都一座，高邮十座，宝应八座，山阳二座，凡二十三座。座三百金。自仪真至山阳有五十一浅，浅设捞浅二小船。船七金，浅夫十名。天妃口大闸一门，除堪改废闸石料，仍用二千五百金。境山旧闸五百二十金。凡费工料一万余金。二年三月，工部奏改瓜洲下闸，及建詹家洲中闸。七月，贡生许汝愚请浚练湖、焦干、杜墅，以济运河。（《行水金鉴》）许汝愚上言：“东南运道水势之涩，莫甚于丹阳；地势之高，莫甚于夹港。国初于此置为闸者四，曰京口，曰丹徒。二闸居上，以防三江之易涸。曰吕城，曰奔牛。二闸居下，以防五湖之易泄。自丹阳起至镇江，蓄为湖者三，曰练湖，曰焦干，曰杜墅。以济漕河之用，遂免海运之艰。以故四月交兑，五月过淮。维时雨泽大降，江潮盛行，不假湖水亦足以济。岁久延袭，居民侵为田亩。焦杜三湖俱为平陆，仅存练湖，犹有侵者。而四闸俱空设矣。今改为十月临仓，雨泽既少，江水枯落，不免剥浅。才十里之区，有阅三四月而不得尽达于江者。虽添设惯运，枉费推挽。而开河之议起矣。夹港两岸，高者数十丈，而河仅阔数丈许。下之开凿愈深，则上之坍塌愈远。濒冬役民以浚之，春来淤塞如故。岁兴大役，民何以堪。莫若修二湖之故址，就四闸之完基蓄泄以时。下修吕城、奔牛二闸，以时粮运之入。上修京口丹徒，以时粮运之出。况乎上流既溢，则奔牛而下，又何不通之患哉。破此说者，必以淹没民田为辞。不知前此占湖为田，今仍旧修葺，非废田以为湖也。即欲补此数顷之田，则沿江一带，新涨常稔洲田，无虑千顷，民方争佃，搆讼不息，其皆隶于丹徒，以此相易，不亦可乎。”时总理河道傅希摯言：“练湖先已疏筑，无容别议。焦干杜墅二湖，地洼源少无益运道，四闸若废，有妨蓄泄。”其事遂寝。三年二月，总河右佥都御史傅希摯请开泇河。三月，命工科给事中侯于赵会傅希摯及债运按臣勘议泇河。七月，修通济福兴新庄三闸。八月，总河都御史傅希摯言：“茶城一带，运道咽喉，宜自梁山以下挑浚，与茶城交相为用。淤旧则通新而挑旧，淤新则通旧而挑新。惟筑坝断流，通其一以备不虞。”从之。是年，河决崔镇。淮决高家堰。高邮湖决清水潭丁志等口。知府邵元哲开菊花潭，以泄淮安高宝三城之水，东方刍米稍通。清水潭口冲决，督漕侍郎张翀以修复老堤，工力浩大，数十年始可成功。恐新运已临，决口未就，宜令粮船暂由圈田以行。而御史陈功则称圈田浅涩，不便牵挽。外湖水阔四十余里，风有不便，必致稽阻。工科给事中侯于赵亦以两臣持议未决，恐致过淮后期，乞敕所司速议。并欲以淮南运道专责漕臣，而以淮北运道命河臣傅希摯一意经理，务时加挑浚，以图万全。从之。命漕运及河道衙门严督郡县，将清水潭原决堤口设法堵塞，勿得恃圈田外湖，致稽粮艘。四年五月，河漕侍郎吴桂芳题请修复高邮西河老堤。复傍老堤，由圈田改挑康济越河，并筑中堤。（按）高邮捍湖老堤长亘四十里。永乐时陈瑄所建。至弘治间，自昂于境内越民田三里凿康济越河通饷。避河者为东堤。其捍隔民田者为中堤。中堤之中有田数十万亩，所谓圈田也。嗣后圈田淹没，老堤倾圯。万历三年，泗水南下，冲决清水潭等处，故塞决后即议修老堤，甃砌砖石，改越河废东堤改筑中堤，以便牵挽。是年，淮安知府邵元哲修筑淮安长堤。又疏盐城石磁口下流入海。五年三月，修浚丹阳练湖武进孟渎河，以济漕运。是月，巡按御史陈世宝条陈六事。一增建仪真二闸，因江口去闸

太远，欲于上下江口迤邐十数丈许各建一闸。潮始来预启板以纳之，潮初退即下板以闭之。使出江之船尽数入闸，以免迟滞。一开瓜洲河港坞，将屯船坞挑浚深阔，使船之先入者屯聚于内。又于盐坝之东开一曲港，与新闻外港相合，使船之后至者续泊于内，以免金山挂江之险。部覆允行。是年冬，高邮湖土石二堤，新开越河南北二闸，又老闸加高石层，增设护堤木城各工竣事。六年九月，河道侍郎潘季驯筑高家堰，及清江浦柳浦湾以东加筑礼智二坝，修宝应八浅石堤长八十五丈六尺，又复淮安新旧闸坝，迁通济闸于淮安甘罗城南，以纳淮水，故道尽复。十年，河道尚书凌云翼开永济河。云翼以运船由清江浦出口多艰险，乃自浦西开永济河七十里。起城南窑湾，历龙江闸，至杨家涧出武家墩，折而东，合通济闸出口。更置闸三，以避清江浦之险。是时漕河就治，淮扬免水灾者前后十余年。十二年八月，吏科给事中陈大科请开宝应越河。报可。十三年六月，宝应越河工成，赐名弘济。(明《神宗实录》)宝应有泛光湖，素称重险。国初平江伯陈瑄筑石堤于湖之东，蓄水以为运道。上有所受，而下无宣，因决为八浅，汇为六潭，则兴盐诸场皆没。而淮水又间从周家桥漫入，汹涌排空。万历十二年，粮艘溺者数十。总漕李世达、按臣马永登、盐臣蔡时鼎议于石堤之东，开越河以避其险。乃命工科给事中冯露往视之。河身长一千七百七十六丈，凡为石闸三，减水闸二，为堤九千二百四十丈，石堤三千三十六丈，子堤五千三百九十丈，费公帑二十余万。八月，都御史王廷瞻、行工部郎中许应逵筑高邮护城堤杭家嘴六百丈，又小湖口堤五百三十丈。十七年五月，修清江浦运道，浚武进横林漕河。总河都御史潘季驯修建邵伯湖，石堤长一千二百八十丈。补旧石堤六百十三丈。又于宝应县白马湖东筑八浅石堤，长八十五丈六尺。又因漕水旁溃入宝应湖，以致流缓沙停。自黄浦至三官庙之西，筑西土堤，长三千六百三十五丈，束水由漕，以省挑浚之费。十九年三月，总理河道潘季驯议，以镇口闸去河甚近，虽淤易为疏通，宜照旧道挑浚。科臣复称引众议，欲开月河以分水势，通苏洵湖，以导积水。上命河漕等衙门勘议妥当具奏。(《河防一览》)徐北镇口黄运交会之处，伏秋黄水大发，多灌入本口，动至淤阻。原任中河郎中陈瑛创建古洪内华二闸。近工科都给事中常居敬题建镇口一闸，如遇水发，下板谨闭。俟黄水消落，即启闸纵水外冲，而漕河无淤垫之患。启一闭二，悉如清江里河事规，与近日题奉明例行之。其镇口闸外东西两堤，原系挑河所积，客土未坚，内水涌出未免剥损，伏秋之前密护桩笆，堤固则闸无虞矣。二十六年三月，命漕河御史勘议洳河。是年，总漕刘东星檄郎中顾云凤署道事扬州府知府杨洵督夫开挑邵伯越河，长一十八里，阔一十余丈。十一月，又挑界首镇越河，长一千八百八十九丈七尺。各建南北金门石闸二座。且邵伯越河又建减水石闸一座。三十年，凤阳巡抚李三才议治河缓急之策。镇口闸起，至磨儿庄，仿闸河之制，每三十里建闸一座，依时启闭，以济新运。及坚城集至镇口闸止，挑浚河渠，约费银一十九万有奇。五月，高邮北关小闸口溃决，长六丈。郎中顾云凤筑塞之。仍加砖石包砌。三十二年，总理河道工部侍郎李化龙疏请开洳河，自直河至李家港二百六十余里。漕船由以行尽避黄河之险(明《神宗实录》)工部题覆李化龙疏，请亟开洳河酌浚故道。大要言河自开归而下，合运河入海，其路有三。由兰阳道考城至李吉口，过坚城集，入陆座楼，出茶城而向徐邳，是名浊河，为中路。由曹单经丰、沛，出飞云桥，泛昭阳湖，入龙

塘，出秦沟，而向徐邳，是名银河，为北路。由潘家口过司家道口，至何家堤，经符离，道睢宁，入宿迁，出小河口入运，是名符离河，为南路。前督臣排群议以兴兹役，竟以资用乏绝，不得竣事。然自坚城以至镇口，河形尚尔宛然。故为今计，惟守行堤，开泇河。其善有六，其不必疑有二。泇河开而运不借河，有水无水听之。善一。以二百六十里之黄河，避三百三十里之黄河。善二。运不借河，则我为政，得以熟察机宜而治之。善三。估费二十万金，开二百六十里，比朱尚书新河事半功倍。善四。开河必行召募，春荒役兴，麦熟人散，富民不苦赔，穷民得以养。善五。粮船过洪，必约春尽，实畏河涨，运入泇河，朝暮无妨。善六。为陵捍患，为民御灾，无疑者一。徐州城向苦洪水暴至，泇河既开，徐民之为鱼者亦少。无疑者二。题请遵照施行。及工科都给事中侯庆远亦题，称共赞河漕大计事，部议泇河应挑，直河应建闸座，及筑堤应用钱粮，依议取用。如或原议所开河底不无欠缺，期日果尔太迫，经费果尔不敷，不妨照依科臣条议，再为增益，以图久远。至科议岁巡岁报事规，尤为河工急切要务，各该府道督臣，悉宜一体申飭。上曰：“泇河既屡经料理端绪可成。该总河身亲筹度详悉，著及时上紧分工开浚。所议经费如有不敷，许其再为增益。务图久远之计。”八月，李化龙奏报，分水河成，粮艘由泇河者已过三分之二，由黄河大溜者止三分之一，而过洪曾不逾限，国之福也。三十五年二月，总河曹时聘上泇河善后六事。（《行水金鉴》）总河曹时聘言：“全河既已就轨，泇河委应厚终。开泇于梗漕之时，固不可因泇而废黄。漕利于泇河之后，亦不可因黄而废泇。两利俱存，庶缓急可赖。如谓南阳之患已去，而徐邳之险可乘。异时有失，谁司其咎乎。因议筑郗山之堤，削顿庄之觜，平大泛口之溜，浚猫儿窝等处之浅，建巨梁首冲之闸，增三市徐塘之坝，以终泇河未就之功。又议设河官，置官夫，建驿递，立巡司，严闸禁，加裁展，以成新渠。三十八年九月，直隶巡按御史苏惟霖疏陈黄泇利害，请专力于泇。四十一年十一月，带管河道漕抚陈荐檄郎中何庆元、扬州道熊尚文，开宝应县弘济河，北月河长一百三十丈，南月河长一百五十丈。又建近湖西堤九浅七浅，滚水石坝二座。于明年完工。（按）弘济河南北二闸，遇夏秋淮水涨发，二闸不及吞吐，行舟覆溺。至是开挑月河，创建滚水二坝，分杀河怒，水溜遂平。

天启三年，筑高邮中堤及露筋湖口石堤。高邮中堤长亘四十五里，岁久不修，每遇夏秋水涨，堤力不支，农田被潦。先惟塞南北金门二闸以为障，而船由外湖以行，时遭覆溺，且以修筑扰民。至是徐国盛莅任，因会扬州道郭士望修筑之长六百四十四丈。

崇祯四年八月，河道总督朱光祚以江南连月大雨，淮黄交涨，高宝江仪山清六州县大水泛溢，疏陈障浚大略。帝命光祚筹度力行。十五年三月，总理河道张国维疏请挑浚山清高宝江仪三百里运河，计费四万余金。章下所司。

清顺治八年，大浚高邮漕河。十六年，总河朱之锡题淮河防事宜。

康熙五年，运河自仪真至淮多淤浅。冬春之交，盘拨甚艰，总河按地亲勘，仪真界内朴树湾、西方寺、五里铺三处，急需挑浚，檄知县何崇伦浚之。六年，决江都运河之露筋庙堤，次年堵塞。七年，遣大臣明珠等相视海口开天妃、石磁、白驹等闸。九年，决清河县运河之窑湾、文华寺，高邮州运河之茶庵、清水潭、江都县运河之东堤四浅。十年，清口为黄水灌入，裴家场悉起油沙，天妃闸底淤垫，回空粮船不能进口，乃于清河县南腰铺支河之连张福口者疏浚通舟，由周家闸行。十一年，总河王光裕修宝应县子婴、黄浦、永安等七闸。四月，清水潭复决。十三年，总河王光裕于江都芒稻河改造闸门，迎金湾河。建滚水坝于邵伯南。又清水潭决口塞。十五年，扬属漕堤溃。高邮之清水潭、陆漫沟、江都之大潭湾等处共决三百余丈。遣工部尚书冀如锡、户部侍郎伊桑阿等亲行相视。移安徽巡抚靳辅为总河都御史。十六年，总河都御史靳辅浚运河。十七年，靳辅筑江都漕堤，以高邮清水潭决口深不可筑，更于湖中绕回开河一道，改筑东西堤与旧堤相属。河成，名曰永安河。又大浚山清高宝五州县运河增筑两岸，其决口三十三处，并塞之。十月，总河靳辅疏另开南运口。十八年四月，筑清水潭东西堤决口工竣。六月，改置南运口于三议河。(靳辅《治河书》)大江以南各省漕运，自瓜仪而北，凡四百五十余里，至清江浦天妃闸以入黄河。此明臣平江伯陈瑄之所开也。万历间，臣潘季驯以天妃闸直黄河，故不免内灌因移运口于新庄闸，以纳清而避黄，后亦以天妃名之，非其故矣。然其口距黄淮交会处不过二百丈，黄水仍复内灌。运河垫高，年年挑浚无已，兼以两河汇合，滌洄激荡。重运出口，牵挽者每艘常七八百人，或至千人鸣金合噪，穷日之力，出口不过二三十艘。而浊流奔走，直至高宝城下，河水俱黄，居民至澄汲以饮。于是建闸置坝，申启闭之条，严旨刻石，除重运回空及贡鲜船只放行外，即闭坝拦黄。凡官民商艇俱令盘坝往来。夫闭坝之制不独不便于民，且空重往来之时，仍不能禁黄流之不入。乃不得已之图，非不易之策也。盖因当时太山墩一带及七里墩外皆森然巨浸，舍新庄之外，别无彼善于此之地。地形水势实限之，以不得不然耳。自黄河倒灌以来，西北自白洋河于家冈一带直接泗州，东北自吴城张福口一带直至武家墩，卑洼者悉变为高原。清口以内裴家场、帅家庄、烂泥浅周围五十里，凡垫成平陆之处，挑引河四道，淮水仍出清口。是则黄流之灌在当时诚大为运河之害，而在今则颇有利矣。何也？清口两岸垫高，天然成堤，黄淮不得交漫。一利也。太山墩上下洪涛尽涸，而运河之地形愈加完固，建闸置坝可以惟我之所择。二利也。清口之内，横亘滩洲，淮盛则泗水滔滔北注，淮弱则湖水常有所蓄，以济运而不至于尽泄，即黄涨内乘，亦限于滩洲而不得纵，不久而淮水盛涨，即便抵回。三利也。譬之清口全淮之口也，洪泽湖其腹也，所挑裴家场、帅家庄、烂泥浅诸河则其咽喉，而新庄闸河岸、则其唇吻也。夫以黄河之悍烈，而运口出于唇吻之间，宜其浅露而无庇，径直而受灌，济运之清淮反为浊流之所抵，而不得入也，于是酌议拜疏，移运口于烂泥浅之上。自新庄闸之西南挑河一道。至太平坝又自文华寺永济河头起，挑河一道。引而南，经七里闸复转而西南，亦接之太平坝，俱达烂泥浅之引河内。则两渠并行，互为月河，以舒急溜，而备不虞。外则河渠离黄水交淮之处不下四五里，又有裴家场、帅家庄二水乘高迅注，以为外捍。而烂泥浅一河，分其十之二以佐运，仍挟其十之八以射黄，运艘之出清口，譬若从咽喉而直吐，即伏秋暴

涨，黄水不特不能内灌运河，并难抵运口。间遇东北风大作，累日不止，浊流乘之，而风回溜驶，不旬日而停沙一刷无遗矣。是以迩年以来，重运过淮，扬帆直上，如历坦途，运水永无淤淀之虞，淮民省岁挑浚之苦矣。虽然旱涝不常，湖水设有时而浅涸，诸引河势不能畅注而俱出，则宁使裴家场之水断流，而烂泥浅一道务须挑浚深宽，毋或缓此而顾彼。此则意外之虞，不得不预为之筹者也。是年，增挑南运河，起土加筑两岸堤。开滚水坝于江都之鳊鱼嘴。塞清水潭大决口。十九年，再置滚水坝于高邮城南八里，又置于宝应子婴沟，创建山阳运河之凤阳厂减水坝一座，创挑皂河四十里，以通北运。创建杨山毛城铺大谷山宿迁拦马河、归仁堤、邳州运河东岸马庄集减水坝十一座。开皂河上接泇河通运，又开张家庄通运口。(靳辅《治河书》)明万历三十一年，总河李化龙开泇河行运，自夏镇达于直河口，不由徐吕二洪避黄河之险者三百里。漕运利之后，直河塞，改行董口。及董口复淤，遂取道于骆马湖，由汪洋湖而西北行，四十里始得沟河。又二十余里至窑湾口而接泇第骆马湖，本窑田也。因明季黄河漫溢，停积而成湖。夏秋水发不碍行舟，至冬春水涸其浅处不流束楚。且水面辽阔，纤缆无所施。每重运入口，即役兵夫数万于湖中，捞浚浮送北上。而所捞之渠，不旋踵而汨没于风浪之中。年年畚钟，宿邑骚然苦之。况黄河复故，雨潦各有所归，湖水必致日涸。且捞浚无所施，实漕运咽喉之大虞矣。查宿邑西北四十里皂河集，其地沟渠断续，有旧淤河形一道。若挑新浚旧，因而通之，可以上接泇河之委，而下达于黄。但取土于沮洳之地，为力甚艰。又南患黄河之逼，北虑山左群山之水。不有堤防，不可以行运。乃揆测规画，即取水中之土，以筑水中之堤，南起皂河口，北达温家沟水深之处。挑水旱工共二千四百丈，两岸筑堤四千八百丈。凡邳宿两州县旧河内一切漫流旁泄决口三十余处，尽行筑塞。又起自温家沟，历窑湾至邳境猫儿窝，计四十余里，从无堤岸，每山泉暴涨，即一望滔天，复两岸筑堤一万七千丈。然猫儿窝一带为徐兗诸水之所注纳，水太盛则堤必伤，故建减水大坝三座以泄之。至如猫儿窝以上，地亢土坚，则空之而弗堤。又猫儿窝以至唐宋山三千余丈，乃霪霖暴涨之所从出者，则堤之。盖自皂河而上者无不治矣。惟是下口直截黄河，遇伏秋暴涨，不无内灌之虞。于是复加斟酌，相得皂河迤东二十余里张家庄，其地形卑于皂河口二尺余。而黄河上下水势，大抵每里高低一寸。自皂河至张家庄二十余里，黄水便低二尺余，内外水面高低相准。乃复挑支河一道，自皂河历龙冈岔路口达之张家庄出口，盖前此皂河出口，如丁字形，黄水自西而东，皂河水自北而南，两溜相抵而不相比，且黄强清弱故易灌，今张家庄之出口如人字形，黄水与张家庄口之水，俱自西而东。与溜相比而不相抵，况又以皂河地高之水，下注于二十余里地卑之出口，其迅流更足以抵黄也。由是上则东省河流滔滔奔注，常束本等之水于漕中。而泄暴涨之水于坝外。下则运口常通，永无淤塞之虑矣。二十年，增置高邮南北滚水坝，前后凡八座。坝口二三十丈不等，对坝皆开越河，以防舟行之险。凡旧堤险要处，皆更以石。创建宝应子婴沟、高邮永平港、南关、八里铺、柏家墩、江都鳊鱼口减水坝共六座。改建高邮五里铺，车逻港减水坝二座。二十二年，大修两河各堤工告竣。二十三年，建惠济闸，在马头东南七里沟。(《清河县志》旧名通济闸，明嘉靖年建，引淮水以达漕运。后以河水南侵，闸底淤垫，至是新凿漕河于迤南三里，更建闸座，为新运口，闸名惠济。)是年

冬十一月，圣祖南巡，亲阅河工。(靳辅《治河书》)上驻蹕红花埠，问总河靳辅：“高宝兴泰一带下河。为何积水不去？”靳辅回奏：“高宝兴泰是洼下之区，如同釜底。向来河道淤塞是以下雨积水并减坝泄下之水一时难去。”上命动支国帑，速兴工挑浚下河。又奉上谕吏部尚书伊桑阿：“朕车驾南巡，省民疾苦，路经高邮宝应等处，见民庐舍田畴被水淹没，朕心甚为軫念。询问其故，具悉梗概。高宝等处湖水下流，原有海口，以年久沙淤，遂致壅塞。今将入海故道浚治疏通，可免水患。自是往还，每念及此，不忍于怀。此一方生灵，必图拯济安全。咸使得所，始称朕意。尔同工部尚书萨本哈往被水灾州县逐一详勘，期于旬日内覆奏。务期济民除患，纵有经费，在所不惜。尔等体朕至意，速行。”上回銮至淮安，又谕靳辅云：“河道情形，我俱详细晓得。只是下河之水，因无去路。民田尚然淹著，应速开浚。驾至天妃闸，问天妃闸险。何不再造一闸，分杀水势。”靳辅奏：“已建有七里闸一座。”上见运口新闻，问：“此闸为何而造？”靳辅奏：“臣恐黄水大涨，天妃闸不能承当，所以又造此清水闸束水，专为天妃闸而设。”上谕靳辅云：“今年黄水倒灌运河，不可为训。尔须酌一治安之策，令永不内灌。”十一月，上面谕吏部尚书伊桑阿等：“勘明泰州、兴化、盐城等处应挑浚海口。”伊桑阿等回奏，奉旨。九卿詹事科道会同确议具奏。十二月，命安徽按察使于成龙浚高宝等州县下河。二十四年二月四日，上谕按察使于成龙：“兹以海口关系运河下流，特命尔督理高宝等处下河事务，管辖所属附近海口州县等处地方，车路等河，并串场河白驹丁溪草堰场等口，逐一确勘，挑浚深阔，使高邮等州县减水坝一带运河水口引流入海。仍抚绥黎民，勤宣德意。约束衙门官吏胥役恪遵法纪，勿致作弊生事。严饬所属海口有司等官各循职掌，勿使糜费钱粮，怠弛旷废。一应海口俱宜善加挑浚，毋令沙土淤浅，以致水势涨漫，淹没民间庐舍田畴。其挑河一切事宜，并应设官分任之处，均申详总河具题定夺。敕中开载未尽应行事务，尔悉申详总河题请遵行。岁终将所修工程及支用钱粮细数，一并造册转报总河题销。仍听总河节制。尔膺兹委任，须持廉秉公，积心殚力，俾水患永除，民复旧业，惟尔之功。如或执拗乖张，因循冒破，殃民误国，责有所归，尔其慎之。故敕。”二十五年，总河靳辅奏开中河。二十六年正月，工部等衙门会覆。监修下河侍郎孙在丰等疏称：“先将近海口之石磁、白驹、丁溪等处估计兴修。”靳辅先前请修疏内称：“高邮以北、车逻以南、邵伯镇以北所有闸坝，于去岁堵塞。高邮以北闸坝亦有可以闭塞。”等语，奉旨修理下河成功，不在高邮州所有闸坝，而在乎堵塞高家堰之坝。并黄河南岸毛城铺等处所有减水闸坝皆堵塞，则黄河之水不流入洪泽湖。如洪泽湖既无黄河流入之水，唯止有淮水，将高家堰之坝暂行堵塞，一年后，挑浚下河，方得有益。”又奉旨：“下河工程，今年著止，将高邮州大小坝及高家堰闸坝，照靳辅等所奏，定限堵塞。令孙在丰等挑浚海口，其黄河南岸闸坝，著于来年堵塞一年。并高邮高堰等闸坝，俱仍照见议，限期堵塞。令其预先备齐工料人夫，自今年十二月兴工，挖浚下河。勿致违误。”二十七年正月，中河工竣。(靳辅《治河书》)百川莫险于黄河，然自南北通运以来，浮黄河而达者，凡五百余里。议者莫不以为治河即所以治漕，一似乎舍河别无所谓漕也。虽然水性避高而就下地为之，不可逆也。运道避险而就安，人为之。所虑者为之或不当耳。有明一代治河，莫善于浚河之绩，然其议倡始于

隆庆年间都御史翁大立，而傅希摯继之，再历舒应龙、刘東星两河臣，屡兴屡阻，迨至万历三十一年，河臣李化龙实始通运，卒避黄河三百里之险，至今赖之。嗣后直口塞，董口淤，骆马湖又浅涩不行。臣因有开皂河之请，而洳河之尾閼复通。然自清口以达张庄运口，河道尚长二百里。重运泝黄而上，雇觅纤夫，艘不下二三十辈。蚁行蚊负，日不过数里。每艘至费四五十金，迟者或至两月有奇，方能进口。而漂失沈溺，往往不免。盖风涛激驶，固非人力所能胜也。康熙二十五年，题覆词臣张鸿烈，圣心爱民已极。案内加筑北岸遥堤，后复加筹酌。若于遥缕二堤之内，再挑中河一道，上接张庄运口，并骆马湖之清水，下历桃清山安，入平旺河以达于海。而于清口对岸清河县西仲家庄建大石闸一座，既可以泄山左诸山之水，而运道从此通行，避黄河之险溜，行有纤之稳途，大利也。乃决计题请奉旨兴工。至二十七年正月而工竣。连年重运一出清口，即截黄而北，由仲庄闸进中河以入皂河，风涛无阻，牵拽有路，又避黄河之险二百里。抵通之期，较历年先一月不止。回空船只永无守冻之忧。在国家岁免漂失漕米之患，在各运大则无沈溺之厄，小则省雇夫之费。盖自吴开邗沟，隋开御河，历唐宋元明，漕东南以济西北者，无不仰藉黄河以为灌输。既欲去其害，又欲收其利，故治河愈难。至我朝康熙二十七年，而运道之利黄河者仅七里矣。或有议于中河北岸宿迁境内建减水坝数座，以泄涨者。臣曰：不可。盖中河之水，但患其弱而不患其强。若北岸遥堤减坝一建，则清水弱而黄必有内灌之忧，河身立淤矣。今当大工屡兴之后，钱粮未敷，未敢

轻议。若工帑稍充，再将遥堤加修高厚，更于中河之北挑重河一道，即以挑河之土筑成重堤，于西宁锡成两桥之间建闸一座，既以分泄东省之异涨，又以灌溉宿桃清等七州县之田亩，即遇黄淮并涨亦可分泄入中河，以并出平旺归海，真永赖之策。而臣初议挑中河之举，原拟如是，故有中河之名也。又运艘自清口入仲家庄闸，虽日截流而北，然逆流而西者居多。若于清河治东陶家庄再建一闸，重运则由陶庄而入，回空则由仲庄而出，则俱顺流矣。且两闸并建，用备不虞，尤为万全。统志之以俟来者。四月，上谕满洲大臣学士九卿詹事府科道等及往看中河等官：“前于成龙奏云：‘靳辅开中河无所裨益，甚为累民。河道已为靳辅大坏。’令凯音布往看中河。云：‘现有商贾船行不绝。若塞支河之口，则骆马湖支河之水汇流中河，水势现大，漕艘可通。’于成龙又奏，王新命曾向伊云：‘靳辅从上河放水。’今若以此问王新命，王新命其肯任受乎

？前召九御至乾清门会议，皆畏惧于成龙，无一人敢与辩难，悉顺于成龙之说。以河务尽为靳辅所坏，惟朕独与众人异，谓靳辅不为不尽心于河务，若云靳辅治河不善，全无裨益，即靳辅亦不心服。朕未亲至下河，不甚深知。若上河自宿迁至清河之两岸，河底及高家堰以至庙湾并运河诸处，朕皆洞悉。数年来河道未尝冲决，漕艘亦未至有误。若谓靳辅治河全无裨益，朕亦不慊于心矣。于成龙在直隶爱民缉盗，居官颇优。但怀挟私仇阻挠河务，殊为不合。朕非欲起用靳辅，祇以河工所关甚大耳。今九卿已将靳辅议罪，皆言其治河无益。若王新命闻之，亦必顺从于成龙之说，以靳辅所治不善，因将原修之处尽行更改。是伊等各各怀私忿，遂致贻误河工

。可乎

？且使黄河自宿迁以下冲决，犹可修治。若宿迁以上，或至泛滥，则为害甚大，所关非小。今应遣明悉大臣看阅，将作何修河之处，详确定议，此看阅河道，著图讷马奇、张玉书前去。须将毛城铺、高家堰等地方遍阅，就靳辅所筑之处甚善而断不可改者有几，不善而应更治者有几，详悉商酌定议以闻。靳辅以丈出民间余田作为屯田，及沮抑开浚下河，其罪诚不可追。至有言黄河底渐高，此断不可信。譬之盆内贮水，遇风且溢出使黄河果高，一有风涛，其有不漫涨横流决堤溃岸者乎。尔等明晨速往同九卿会议具奏。”二十八年正月，圣祖南巡，驻蹕瓜洲陈家湾地方，命修理高邮州南北一带残缺砖石工程。三月上谕：“朕前阅中河，初疑其狭隘。今行经丹阳，阅视河道，亦复狭隘。又闻众官民俱言中河挑浚有益，所关甚大，尔等会同总河总漕确议具奏。”八月，奉旨仪真河闸关系运道，著河道总督会同江南江西总督、漕运总督详阅定议具奏。二十九年，上谕：“河道关系最为重要。以前一二年，雨水鲜少，河道官员必将河务视为常事。今年景象，雨水似多，应行文总河严行晓示所属官员，无分昼夜防守，务使河道不致有危。”三十一年十月，奉旨，中河张庄运口筑堤建闸等情。著河臣将工费估计。三十二年，筑中河两岸束水堤。修清河县广济闸，在治西仲家庄，旧名仲家闸，至是修之，改今名。闰五月十日，上谕内阁：“保护中河堤岸之子堤，总河于成龙前奏称最为紧要。请急行修筑。今奏言水势盛长，难以兴工。俟水涸之时始行修治。朕思河务所系甚重，必待水涸始修。倘夏秋水泽泛涨，保无有冲决堤岸之事乎。可速敕于成龙再加详悉酌定具奏。”三十四年，清河县建永济闸，在甘罗城南太山墩北，与惠济相望。又建康济闸，在治东陶家庄右。又建双金门闸，在广济闸北。又建小闸在双金门闸北。三十五年，总河董安国题改建高邮湖西堤易土为石。三十八年三月，圣驾南巡阅河。奉上谕河道总督于成龙：“朕自淮安起行，沿途细阅河堤。除河底已高，东边甚洼，毋庸置议外。朕所驻蹕界首镇前湖边，用水平测算，河水比湖水高五尺八寸。揆此湖水似不能越此堤而入运河。前往高邮未知若何。但当湖之石堤，虽被水汕坏，朕细阅被人搬去损坏之处，亦复不少。此固属要工，修筑亦不甚难。尔差贤员作速查验俟工修筑。”又传旨于成龙：“朕自淮安一路详阅河道，测算高邮以上河水比湖水高五尺八寸。自高邮至邵伯，河水湖水始见平等。应将高邮以上当湖堤岸修筑坚固。高邮以下河之东堤，亦应修筑坚固。至于邵伯地方因无当湖堤岸，而河湖合而为一矣。不必修筑堤岸，听其流行。高邮东岸之滚水坝涵洞，俱不必留用。将湖水河水，俱由芒稻河入字河引出归江。入江之河口，如有浅处，责令挑深。如此条治，则湖水河水俱归大江，各河之水既不归下河，下河不必排修。”又谕于成龙等：“著将运河东岸堤工，凡有石工残缺者仍补修石工。其土工堤内有水之处，下埽帮筑减水坝。俱堵塞坚固，用心防护。越坝更属紧要，亦著加帮防护。淮安府泾涧两河，必须挑浚深通，毋任淤垫。如有漫顶堤内积水之处，即钉排椿。帮筑减水各坝，俱著堵塞坚固，堤防要紧。”又谕：“人字河若有窄狭处，可以相机挑挖。凡有需水旧口，修砌涵洞，令民灌田。堤岸单薄处，亦酌量加帮。”又谕于成龙等：“运河东岸再加高宽，不必开减水坝。其涵洞与金湾滚坝，旧有河身，民间用水灌田，仍照

例开放减水坝。著河官堵塞坚固，用心防守。至新加堤岸，亦著尔选择官员。或五十丈，或六十丈，责令加意防守。西堤土石各工，亦上紧倭修。高家堰亦速修完。下河田地不过一二年，可以见出。”又谕于成龙：“尔回去即看归仁堤高家堰清口甚属紧要。徐廷玺著往扬州去，往回查勘永安各石工，并东西岸各工，与堵塞减水坝。将京中带来各官，每员或五十丈六十丈，各责令用心防守，无得疏虞。”八月，总河于成龙等题准清江大闸加高四层，又将大闸北岸下雁翅倒卸十丈，并越河闸东雁翅酥碎砖工十二丈，一并改砌石工。又将板闸关口埽工一百二十丈改建石工。又将盘粮厅前埽工五十五丈，淮城西门外护城椿埽堤工三百六十丈，改建石工。又估挑涧河，自兴文闸起，至刘均沟止，长一万四千零三十二丈八尺。并泾河自闸下起至射阳湖边止，长八千二百五十丈。头石工头砖工长三十丈，中石工长一百五十七丈，尾石工尾砖工长一百三十一丈二尺，石工砖工长一百五十八丈，砖工仍修砌砖工，石工加高二层。九月，建南运河滚水石坝。加帮高堰堤工，自武家墩起，至小黄庄止；自小黄庄起，至周桥止；自周桥起，至棠梨树止，分三段修筑。旧有唐梗南北中三坝，及毛家圩南北二坝，夏家桥减水坝，凡六座，皆堵塞。挑挖王家营陶家庄引河二道，建陈家庄挑水坝一座，挑溜入陶庄引河，使黄水不至倒灌。又改建惠济祠后石堤一百六十二丈，以资防护。是年，以中河南岸洼下，子堤不能坚久，盛家道口起挑新中河一道。改北岸为南岸，另筑北堤。三十九年三月十五日，奉旨：“邵伯更楼决口，自去岁奏报，屡据奏称僨工修筑。乃迄今尚未报完，以致漕艘十有余只漂没击碎，其阻滞江干及瓜扬一带地方不能前进者甚多。著该督设法倍料兼工堵筑，刻期报完，勿致再误。”十七日，河道总督张鹏翮面奉圣训，“引河水使之由人字河芒稻河入江，朕所见最真，尔必须力行，不可忽也。”四月，九卿詹事科道议准张鹏翮请挑浚下河。奉旨，依议速行。五月，上谕员外郎拖克拖和中书张古礼：“著驰驿前往河道总督张鹏翮处，将修过河工情形阅看，伊等无有专责，将工程令张鹏翮缮写折子，交与伊等带来启奏。”七月，总河张鹏翮请中河出口仍旧。奉谕旨行。九月，总河张鹏翮题改中河奉旨：“前于成龙奏称将中河改移。朕屡经谕其恐有未便。今张鹏翮所奏中河事宜甚当。著照所奏行。打十二月，总河张鹏翮奏覆天妃闸建置中河石闸二座。部议覆准。奉旨依议速行。四十年正月，从总河张鹏翮请，修高宝江都运河堤岸。二十二日，张鹏翮题南河节宣豫防事宜奉旨：“这所奏已得河工秘要，著九卿詹事科道会同速议具奏。”九卿等议覆，奉旨依议速行。十一月，张鹏翮请将高邮州陆漫闸西岸改筑土堤。奉旨陆漫闸西岸改筑土堤。内外镶柴，见今钱粮虽省，但芦柴易致朽烂，二三年后又致重修。张鹏翮在任时，虽无可虞。若张鹏翮或离任，或黄淮水涨有危险之处，镶柴工程朽烂，岂不更难。著将这情由备写，差员前往张鹏翮处，令其确议具奏。张鹏翮遵旨确议奏闻，奉旨著修石工。改建清江汛北岸版石工。加高龙汪闸四层，见今巩固行漕。修清江汛北岸越河闸一座。建中河口门南岸石闸一座，金门口宽二丈二尺，高三丈一尺二寸。四十一年二月，建济运闸一座，金门口宽八尺。运河水小即行启版开放，运河水大即行下版堵闭，以济漕运。又加帮武家墩后横堤。又筑拦湖戗堤。十一月从张鹏翮请浚运河。四十二年正月，界首以下河道工竣。二月圣祖南巡。谕总河张鹏翮：“骆马湖竹络坝口门宜留。”四日又奉上谕：“仲庄闸清水出口，逼溜使南，恐

运口有碍。应于陶家庄以下杨家庄挑引河，令中河之水从此出口。于运口有益，虽杨家庄地势低洼，即使倒灌，不过一二里，清水仍然顶出。著即相度形势，估计具奏。仲庄石闸暂停。”五日，又奉上谕：“王公堤关系运河生民最为紧要。堤岸单薄，桩工渐朽，应再加帮，以资捍御。不可因淤滩可恃而忽之。筑骆马湖竹络石闸东络长二十二丈，西络长十丈，各宽三丈。口门二十三丈。”是年，移运口于杨家庄，遂建御示石闸一座。四十四年，圣驾南巡。三月十一日，奉上谕：“运河东堤保守最为紧要。堤岸应行加帮。高邮迤南河水高于湖水，东西两堤卑薄，加帮修砌量建石工。”三月十八日，上谕河道总督张鹏翮及河工官员：“今河工虽已告成，不可不预为修理防护，以图善后之策。朕见淮扬一带堤岸卑薄，未为甚妥。倘不加保护，以致冲决，则淮扬地方百姓何以能安。尔等宜急筹之。”闰四月，上阅惠济祠石工，谕总河张鹏翮等：“朕三十八年阅河，尔等所跪之处，俱属黄水。今清水畅流，逼黄，竟抵北岸，仅成一线，朕心甚为快然。睹此形势，朕之河工大成矣。”是年，命于王家营迤下鲍家营疏引河，泄黄河涨水。由张家集范家河三岔口，历石项湖入五丈河，下潮河入海，两岸筑堤，于河口建坝，以时宣泄。四十五年，总河张鹏翮题建文华寺闸一座。闸下挑河一万四千八百九十三丈，两岸筑堤。（《里河厅册》）是年，因运河水势大长，两岸堤土难以容受。有关运道民生，奉上谕造石闸一座，金门宽一丈五尺六寸，南岸闸墙共长十六丈，北岸闸墙共长十四丈，砌高二丈四尺。闸下挑引河一道，由杨家庙单杨口至白马湖。一遇桃伏秋汛，运河水涨，随即开放。宣泄水下白马湖，水涸堵闭。并将涧河挑浚深通。又挑挖清沟河，使涧河水势归海。四十六年，总河张鹏翮以前建南关车逻二坝不敷宣泄，更造五里中坝一座。坝下开挑引河，自中坝下起，由临泽至宝应三王河射阳镇，共长一万七千三百六十八丈八尺。是年，修筑大墩分水处西岸草坝。（《里河厅册》）总河张鹏翮奉上谕指授，将大墩分水处西岸草坝再加宽大，挑清水多出黄水一分，少入运河一分，不致运河东坝受险。张鹏翮即行题估，于四十七年修筑，加宽二丈，周围长二十九丈，分挑水势，敌黄济运。六月六日，上谕工部：“顷朕阅视河工，见黄淮俱已安流，运河亦较前深通，重运无阻，但湖水大涨，则运河东坝尤属紧要，应速兴工加修。这工程交与总河详勘。动用各省督抚捐输河工银两，尽心坚筑。工完报部察核。其天然坝建闸开河等工，亦著将此项钱粮动用。乃四十七年，总河张鹏翮疏题，扬州府属内江都东堤腰铺、中腰铺、南越潭三处，及邵伯萧家涵起，至万缘庵止。万缘庵起至坝口止，并黑鱼塘诸处石工，及金湾三闸间堤东关对河沙坝石闸并皆坍卸，宜修筑以资运道。奉旨准行。四十九年，总河赵世显改建天妃闸外越河添置石闸一座。五十一年，添建九里冈谈家庄水坝一座，拆建泾河闸，浚崇家湾等处运河。五十二年，建筑中河口门头闸，南北两坝建雁翅共长七十五丈。五十三年，修惠通、惠济二闸。五十四年，宿迁中河口门头坝，下及崔家宅柳园头二处，建挑水坝四座，又桃源之九里冈七里沟二处建坝二座。是年，修建邵伯镇石工，自奶奶庙起，至萧家石涵止，又修筑坝巷口石工，丈尺一如前制。五十五年，总漕施世纶将瓜洲绕城河开坝行漕。（《江防厅册》）向来漕运俱由瓜洲闸行。其闸下运河南岸花园港一带，乃粮艘之所停泊者。至五十四年，江溜北趋，将花园港地方冲塌一百二丈，以至屯聚无多，总漕施世纶移咨河院，恐粮艘迟滞，权将绕城河开坝行漕，至雍正

六年筑塞。建运口筑坝以济运行。五十六年，加修山阳运口临湖埽工二百九十丈。又于吴家庄建挑水坝一座。胡家庄、颜家庄、九里冈诸处各建坝一座。五十七年，宿迁龚家庄建鱼鳞坝三座。五十八年，堵筑高邮挡车楼迤南缺口。建筑谈家道挑水坝一座，建筑九里冈鱼鳞坝二座，建筑叶家庄迤下鱼鳞坝一座。五十九年，修筑高宝江三邑西堤石工，于宝应西堤柳园头迎湖险工二段，加帮下埽，以御风浪。修筑平桥汛北岸洞口堤，建筑窦家林挑水坝一座。六十年，浚邳州运河徐塘口。加修清江汛北岸小坝碑亭北角楼西门并三城坝等处堤工。以保运道。挑浚山阳县涧河。是年，总河赵世显以宝应张家直对河等处并高邮护城堤工，为风浪所掣，渐次坍塌。议于张家直对河起，至白田铺止，长二百二十八丈，又秤钩湾长四十丈下埽帮筑。其高邮护城东西堤补砌砖石。奉旨依议行。筑山阳南岸韩家庄挑水坝一座。建桃源北岸九里冈挑水坝三座。又建宿迁吴家沟济运草坝一座，长五丈。内通湖挑挖引河一道

，长一千二百六十三丈。六十一年，署总河陈鹏年题准，徐塘口迤上挑挖越河一道，接入彭家河行运。又浚宿迁王家冈西湖口正引河及东西支河各数百丈。又浚九里沟对岸及王家营二处引河。添修骆马湖竹络闸东裹头二十五丈，西裹头十五丈，口门只留十五丈，以遏黄水内注，而运河始免沙淤。

雍正元年，挑王家营正引河及东西支河，筑清口东西束水坝。二年总河齐苏勒题准，宿迁西宁桥迤西建拦水三合土坝，两头筑拦水堤六百丈。建邳州运河河清、河定、河成三闸，闸旁并开月河以便漕。河清闸一座，两墙各长二十二丈四尺，高二丈八尺八寸，金门宽二丈二尺，闸旁月河一百二十丈。河定闸一座，两墙各长二十二丈四尺，高二丈八尺八寸，金门二丈二尺，闸旁月河一百二十丈。河成闸一座，两墙各长十六丈四尺，高二丈七尺六寸，金宽门二丈二尺，闸旁月河一百三十八丈。十一月，总河齐苏勒题准，瓜洲胡家嘴运口东岸建护口埽工长一百十八丈，又于唐家庄建筑束水草坝一座，两岸各长二十丈。三年，浚江口至奔牛闸一百六十里运河。四年七月，总河齐苏勒疏奏：“高堰山盱一带临湖石堤高卑不等，请通行修理，以高出水面一丈为度。背后土堤一律加高，并将大堤单薄处，择段帮宽，接筑湖心石堤，与石工高厚如一。”十月，齐苏勒议称：“洪泽湖滚水石坝三座，安砌门槛太高，每遇湖水大涨，不能畅出分泄。请将三坝门槛各落一尺五寸。所需物料，即于沿河两岸先年废弃之闸越石块内拣选添用。”奉旨依议行。五年，加帮江都、宝应东西二堤。补修平桥汛东岸砖工，三百十九丈。修宿迁中河南岸，上自支河口起，下至九龙庙止，并添筑子堤一道。建王家沟孔石闸一座。骆马湖经邦闸旁旧中门，筑拦河闸一座，长十六丈。竹络坝迤北创筑拦水撑堤一道一百一十丈。是年署江南总督范时绎奏，会勘地势水利情形，并应挑应建河道闸座涵洞堤坝等工。六年五月，署江南总督范时绎条议，京口一带运河，请檄杭嘉湖苏松常镇太八府州属，按漕额协解，以充工费。九月，郎中鄂礼疏请将苏松境内凡粮艘经由之处低薄堤岸，悉开沟种树。是年，仍开瓜洲旧闸河漕，浚吴江震泽两县运河，共五千五百七十九丈，河面阔十丈，河底五丈，连水面浚深一丈。又修筑倾圯堤岸，改建如皋唐家闸

，并南北石涵洞，及挑挖引河等，共计夫料银四千三百五十五两一钱有奇。县丞刘永钥承修。修筑皂河石裹头闸一座，金门宽十丈，高一丈八尺，挑月河一道，长二百丈。现今行漕。加修运口、平桥、清江三汛土埽砖石等工。七年七月，上谕：“江南运河堤岸历年残缺之处，应照黄河堤岸，分别缓急加高。浚通州如皋运河，自泰兴交界三里墩起，至丁堰镇止，长一万二千四百四十八丈三尺。”八年加帮高邮宝应清江诸处运河堤岸，修筑山阳沈家园堤岸，三月浚淮安涧河。自兴文闸迄下至葫芦套止，共一万五千十六丈，面宽五丈，底宽二丈，深七尺。又自葫芦套起，至马家荡湖边止，一带河形纡折，至易停沙。改向直东，起湾取直。创开新河长三百六十八丈。浚扬州通州盐运河共二万五千七百八十丈有奇。江都运河南岸董家沟地方，建单门石坝一座，白塔河建石涵一座，董家油房筑土坝一道，设木涵洞二座。江都运河北岸高家老坝筑土坝一道，中设木涵洞二座。徐家涵筑土坝一道，中设木涵洞三座。杨家渡口筑土坝一道，中设木涵洞一座。加帮罗鼓墩起洪家圩两岸堤卫，运道攸赖。加高运口、清江、平桥三汛土工共三十七段。九年二月，总河嵇曾筠题准发帑，转饬印河各官，修筑江都汛东西二堤土工长三千二百五十丈八尺，宝应东西堤土工长二千九百五十四丈三尺，高邮东西堤土工长六千九百五十四丈三尺，浚湖河自宿迁起，历桃源清河安东沭阳，下入海州龙沟，出义泽河，入孟家渡，出五丈河入海。加高清河县甘罗城、卞家汪天妃坝及山阳县老坝口朱家沟大车路口等堤。又加帮韩家庄缕堤，增筑宿迁中河汛内堤北岸，上自支河口起，下至桃源古城坡墩，一万一千五百五十三丈。又自拦马河接越河起，下至桃源古城坡墩，八千五百八十七丈零。浚清河县杨家庄盐河闸迤下盐河。长二万九千六百七十五丈。又创筑两岸子堰，长一万一千二百余丈。又筑鲍家营引河头坝一座，又修筑旧遥堤。十年九月，大学士总河嵇曾筠题准建运河西堤石闸一座，金门宽一丈，两墙由身各直长二丈，上迎水雁翅长一丈五尺，下分水雁翅长二丈五尺。每边长六丈，两墙共长十二丈，高一丈二尺。（《宿迁运河县册》）设版启闭以通黄墩湖水济运。又其中河汛内重建竹络东坝，长二十九丈。坝后建筑撑堤一道，长三十五丈五尺。竹络西坝长十二丈。坝后建筑撑堤一道，长十八丈，以束水势。又补修刘老涧减水闸底并下口三合关石梅花等桩，以资巩固。移建清河县运口天圪闸于二草坝下北岸堤内，又挑引河并修筑两岸束水堤。是年，江督尹继善议疏通串场河存水五尺为度。（按江南水利，扬州一带河道必兼权运盐民田。开人字河入芒稻闸，则盐船有闸水过陡上下不便之说。再疏越河筑三空闸底高于芒稻三尺，以平其流，又以芒稻泄水过大，恐掣盐河之水，下泄水浅，不能任载。议建闸筑坝二条。复经会议，闸坝俱不可行。惟加挑串场河，使蓄水常存五尺，毋碍盐运，而议始定。至是疏称盐河蓄水须以五尺准。）十二年九月，大学士总河嵇曾筠题准重建芒稻河西石闸一座。十三年，修筑山阳县清江浦龙王闸一座。又挑挖凤阳厂引河，修建仪征县响水、拦潮二闸。

乾隆元年，浚通州吕四等场河二万六千八百余丈。五年，河督高斌议增湖河入江之路，以保下河。（按：高邮湖受宝应湖华家滩五道引河泄水，由茅塘港王家港各水口入邵伯湖。通运引河分由湾头壁虎凤凰等桥东西湾金湾同归董家沟、芒稻河、廖家沟、石羊沟下江。是年，高斌面奉圣训，将邵伯以下入江之路勘议酌增，请于金湾

滚坝下东西湾地方，建滚水坝二。坝下深挑引河，复增挑仙女庙金湾对过之越河。及通江之石羊沟董家沟。其原有之金湾坝下并凤凰桥引河，及通江之廖家沟、秦家港、白塔河、百汊港各河道，均大加疏浚。并于各河头建立闸坝。每年视水势大小，相机启闭，俾高宝湖水足资宣泄。十二年九月，工部议准高斌等奏。柳园头另建三孔闸一座，开通湖引河。又于王家沟上游建九孔减水闸，亦开通湖引河，并将未建之驼车头曹家店马庄集港河头闸工料物，移为骆马湖建闸之用。二十二年五月十一日，上谕：“芒稻一闸，乃归江第一尾闸。向因淮南盐艘皆由湾头河转运，必须芒稻闸门下板，方可蓄水遄行，以致不能启放合宜。前据该督等奏，闸东有旧越河一道，应令盐船由越河直走金湾北闸，是泄水与运盐已分为两途，芒稻闸自可常年启放。夫蓄水运盐不过少省纤挽之劳，所费在富厚商人，而下河数州县之民生攸系。比其轻重，岂不较然耶。嗣后芒稻闸应永远不许再下闸板，俾得畅泄归江。则诸湖积水自可减退。遇伏秋大汛，亦足以资容纳。而下河一带得永蒙乐利之休矣。该督将此旨勒石闸畔，俾知所遵守焉。”二十四年正月，江督尹继善等奏：“江南常镇一属徒阳运河扬州东关及桃源砂礪等处运道淤浅，宜预备章程，以垂永久。”得旨允行。二十七年四月初六日，上谕行在内阁：“江南濒临河湖沮洳之区，南则高宝甘泉，北则宿清海流，各属最称洼下，每遇伏秋大汛，霖潦堪虞。而下游蓄泄机宜，惟洪泽一湖尤为橐钥关键。昨驻蹕苏城时，先命大学士会同督抚河臣，将归江归海各路详勘标志。朕回銮取道按阅。其在高宝一带应宣导归江者，自邵伯以下如湾头闸、壁虎桥、凤凰桥等处，河身宽展，足资分泄，惟金湾滚坝宽五十丈，而新挑引河仅宽十五丈，底宽八丈，未能畅达，应再为展宽，以河底十丈为率。迤下地势稍仰，并一律挑濬深通，俾成建瓴之势。又东湾滚坝，前年已改落低三尺，而西湾坝尚仍其旧。诸臣议请一体落低三尺。朕量该处泄水情形，至为便捷，应将西湾坝再加落一尺，共低四尺。则平日已有尺水入江，循序而进，庶可预减暴涨之势。其河头亦加挑深宽，以资利导。设遇落水过多，运河间有浅涩，即宜将浅处深挖。以视小小切埂淤淤从事于河中者不犹愈乎。其金湾六闸，应折去中二闸添建石坝，接筑土堤，并量挑引渠以备盛涨。湖水自无阏壅之患，然此节节措置，特为三湖旁疏曲引起见耳。若其溯源絮要，为釜底抽薪之计，则莫如广疏清口，乃及今第一义。现在测验洪湖高堰五坝高于水面七尺，及七尺五寸不等，清口口门现宽二十丈，当即此酌定成算，将来俟两坝之水如再增长三尺，清口不必议展，仍存其蓄清之说。如由三尺长至四尺，即将清口拆宽十丈。湖水以次递长，则清口以次递宽。总以上坝增一尺之水，下口加开十丈之门为准。其或入夏后水势一时不常，旋长旋落，则不必以口门既展，急事堵塞，以过秋汛为定。逐渐收束清口，仍至二十丈或十数丈。如此则全湖势畅，以视求助于分支别派者，其功奚啻倍蓰哉。脱以清口拆堵费工，而鳃鳃过虑，独不思全湖漫溢下流，所费更当何似。以彼絮此其门轻重大小，不待握算而知也。至骆马湖水由永济桥东注为六。塘河源流既远；所受支河甚多。河中淤埂，阻滞溜势，一遇暴涨，猝难容泄，田庐易淹，应视两岸中间窄狭者，再加宽展。切去中河淤埂，俾游波宽缓，不至出槽，堤身残缺单薄者，量为修补，以资捍御。其塘河尾闸，横经盐河，由东岸武障等河下泄入海。原设条石滚坝，为过水之准，其旁并设草坝，水小则蓄水运盐，水涨则拆坝消水，商利蓄而民利消，彼

此各争其便。当每年权其缓急利害，立定期限，以时启闭，庶于渠政有裨。其草坝以下各有引河。六塘河北岸之丁家沟，南岸之马家河、鲍营河，形势纡曲阻塞者，均如诸臣所勘估挑办，务使通流以达于海。第六塘河修防事宜，向无专设之员，即盐河各坝，亦非盐务微员所能相机经理。该督抚可于通省事简同知通判缺内议移一员，驻高家沟适中地方，仍应选能胜此任者奏闻补授。俾专司水利及修防启闭之事，地方水利各员听其调遣，仍归淮徐海道总辖，亦听总河节制，务令宣防无误。蓄泄合宜，此皆朕目击深维，集众议而取裁，定制如此。地方大吏其善体朕意，实力奉行。所有应添石坝土堤，及一切挑挖疏浚各工，该抚河臣会同盐政确估覆议以闻。刀二十八年江苏巡抚庄有恭言：“太湖之水由三江归海，经流苏松太所属之吴江震泽十二州县境内。查吴江之十八港十七桥，吴县之鲇鱼口大缺口，为湖水穿运入江要道，不无浅阻。又入吴淞之庞山湖等处，向称宽阔，迩来民间图利，遍植菱菱，圈筑鱼荡，亦多所侵占。刘河形势大非昔比，舟楫来往，必舣舟待潮。昆山外濠为娄江正道，浅狭特甚，苏州娄门外河为江源出运咽喉，河面仅宽三四丈不等。应自运河以西，凡太湖出水之口，就其有港可通有桥可泄之处，为之清厘占塞，务使分流迅速。其运河以东吴淞江自庞山湖以下，娄江自娄门以下，凡有浅狭阻滞处所，疏浚宽深，一切植芦插籬及冒占水面之区，尽数铲除，严为之禁。”疏入得旨报可。二十九年九月，尹继善等奏：“酌借公帑挑浚孟渎、德胜两河，德胜河工长六千六百余丈。孟渎河旁旧有小河一道，潮退尽由小河泄泻，正河水缓沙停易淤。于小河分流处，添建石闸，依时启闭，使潮退全归正河，以免停壅。又借帑挑浚丹阳之九曲河，工长九千五百余丈。内有桥闸坍塌，一律修整。”三十一年，尚书裘日修会勘江省水利河道挖浚淤垫事宜。三十五年，江督高晋、江抚萨载题准兴挑海州境内河道，兼修江浦沟洫圩岸。(按自二十二年大修水利，议定章程，责令道府直隶州率同州县秋冬水落，勘有淤浅，督民挑浚。至是高晋等疏称：“海州春夏大潮，由涟河贯注，挟沙涌入各河。又值上游清河源弱，冲刷不力。水退沙停，致州境蔷薇王宫口下坊口王家沟淤垫，计四河应挑工段长一万二千一百余丈。各筑拦潮柴坝一道。工费浩繁，民力不胜。请照三江孟渎河例，借帑兴挑，分征还款。又江宁府江浦地方，有和尚圩一道，滨河堤身单薄，一遇河水稍大，即致漫淹冲决，居民不谙作法，办不如式。应调委谙练河弁督修，并拨河工券礮兵夫备带器具到工，合力攢筑。”)四十年三月，高晋浚丹徒境运河。四十二年八月，上谕：“闻淮扬运河久未挑浚，河身逐渐淤高，不特有碍漕船，或遇水大之年，河淤则易致泛溢，所系甚大。著传谕高晋、萨载，即速将淮扬运河逐段查勘测量。有应行挑浚者，迅即确实勘估。一面择日兴工，一面奏闻。不可稍存惜费之见，致有延误。务使河身一律宽深，期于运道河防均有裨益。”四十七年，萨载等奏：“开放潘家屯及展宽骆马湖五道引河。”十二月，萨载李奉翰奏挑涟河引渠。四十八年正月，李奉翰奏：补培邳州宿桃运河中河纤堤。五十年十月，阿桂奏准疏浚运河，暨酌立戽水限制。五十二年八月，黄水倒漾，清口淤阻，开放祥符五瑞二闸，以济空运。五十三年五月，李奉翰题挑挖骆马湖三道引渠。六月，李奉翰题加帮骆马湖五坝。李奉翰又题捞浚王母山等处工程。是年，河督李奉翰奏铜沛厅茅家堤闸口鑿石开河以济运行。五十四年十二月，书麟奏准借帑兴挑运河澄河，高邮南澄子河工长一千一百五十丈，运盐

官河工长三千二百一十丈，新河接连北关河工长三千一百九十三丈。五十五年十二月孙士毅奏准借帑兴挑顺堤食城等河，沛县顺堤河工长一万六百九十丈，食城河沛县境工长五千八百五十丈，铜山县境工长四千四百七十丈。

嘉庆十年四月，铁保徐端奏加筑运河厅宿迁汛濬流石闸。闰六月，铁保徐端奏：“清口河身淤高，洪湖仁义等五坝坝底多坏，经风浪冲掀，泄水太猛，下游州县被淹，须于秋汛后赶紧修理。十一月，保宁等奏淮南河应修闸坝各工，将惠济越闸、通济正闸、清江正越闸先行修砌。至各闸向有两闸分流，今所修之闸，皆筑坝拦截水势全归一闸。明春重运北上，应在惠济正越两闸中北裹头地方，及通济闸上东岸张王庙旧涵洞处，另开越河，俾闸门之水稍平，仍层层筑坝收束，不使过于分泄。十二年四月，铁保修筑江都县运河东西两岸民堰。十三年，铁保徐端那彦成奏：“洪湖盛涨，抢护平稳。”是年六月，江苏荷花塘运河及七里沟运河溢。十四年二月，铁保等奏荷花塘合龙稳固。十六年正月，陈凤翔奏勘明里河扬河扬粮各厅工程，分别急办次办，列条陈览。十二月，奉上谕：“百龄奏通筹黄运河湖利病拟借善后一折，河工关系重大，当师古而不泥古，须参核今昔情形，相机筹办，始能动出万全。该督与陈凤翔吴徽等悉心筹画，意见相同。再详晰奏请兴办，逐条开列覆奏。”二十年四月，百龄、张师诚、黎世序奏准借帑兴修山阳运河东岸石闸，并接挑闸下泾河。二十一年二月，巡漕给事中陶澍奏请修复镇江湖闸。奏入，奉上谕：“著百龄勘明核议具奏。”二十二年七月，奉上谕：“孙玉庭奏，查明镇江运河应办各工请借项挑修摊捐还款一折，镇江府属徒阳运河，为江浙漕船所必由之路。江潮灌注，易致停淤。前给事中陶澍条奏浚治修建事宜，发交该省确勘。今据该督勘明，分别应缓应修详议具奏。其应办各工，著即照所议办理。”二十三年三月，孙玉庭、黎世序奏“里河惠济正闸金门水势高下三十余寸，湍溜倍常，帮船提挽未能迅速，督率道厅复于闸上添建钗水坝一道，以平闸门溜势。并于钗水坝上添筑升关坝一道，以便安关提挽帮船。扬河厅西岸圯水汛风水涵堤工长二百四十余丈。高邮汛三元阁对过石工长二百三十余丈。二处西面临湖，水势宽阔，犯风最甚，土石各工易致掣塌。议用碎石，于临湖一面砌筑坦坡，以御风浪，而资稳固。”

道光元年六月，扬河扬粮两厅属西岸宋家寨崇家沟地方抛填碎石。二年十一月，筑义礼两河石坝，修昭关石坝。四年四月，添建六安沟清水潭石闸等。十一月，堰圩要工溃决，下注之水入高邮宝应诸湖。六年，修扬粮厅甘泉汛东西两岸塌卸砖工。七月，启放昭关坝等。十月，昭关坝及拦河坝等均堵合。七年五月，琦善奏修归江诸水之金湾等。八年，增挑瓦窑铺新河。九年二月，蒋攸鋐等奏筹浚练湖。原奏略曰：“丹阳县练湖在运河西岸，收纳长骊诸山八十四汉之水，周围一百六十里。康熙年间，始将上练一百二十里改为民田升科，下练湖亦逐渐就湮。百十年来，湖存无几，闸堰亦俱坏阙，收水无多。臣陶澍道光七年冬，因挑河之便，亲履勘，始知练湖居高临下，正得泻水济运之宜，本可无须挑浚，但当加筑堤埂，方能多蓄。其湖身正北之黄金闸，地近庄前河，上承马陵桥来水，下连范家沟入运，尤为咽喉，必须修复。其泻水入运之范家沟，在丹阳县上游二十五里，切近黄泥闸地方。应将

黄泥闸移建，移南五里之张官渡。其地在范家沟下游，系练湖东北角。旧有涵洞，遇紧急时，将闸板坚闭，或从黄金闸放水，或从滨湖涵洞放水，均可回激北上，源源接济，应即择要赶办。惟采置新石有需时日，据镇江府赵光禄查得下练湖东堤旧有四闸，地势稍高，未能放水入运，久或虚设。酌留其一以存旧迹，其余三闸石料，即可全行拆运，为修建黄金闸及张官渡新闻之用。”三月十一，谕照所请。十年四月，修新南中三坝耳闸，浚市河、北关河、新河、运盐河、头闸五处引河。闰四月，允张井奏：拆除扬粮厅境内芒稻河东西两闸，增宽河面。挑挖金湾四坝淤滩。十一年六月十八日，扬河厅求安汛马棚迤南及十四堡无工处所漫溢。七月初三日，陶澍等奏扬河厅马棚湾及十四堡等处运河漫溢。七月初八，江苏巡抚程祖洛奏：臣漏夜赶至高邮河马棚湾以南及十四堡无工处所，漫缺处所，约有二百数十丈。七月张井奏：山盱厅智信两坝之间林家西地方漫溢。八月二十四，十四堡决口合龙。十二年四月十日，马棚湾运河决口合龙。陶澍原奏略曰：河营参将张兆栋会同营厅稟，马棚湾工已坚。择于本月初十日启放正河。臣陶澍自省所赴清江，是日行抵马棚湾，即亲飭后，除两头拦坝，刨挖深通，挽河归正，溜势直趋，即提漕船由故道行，极为畅顺。十一月，陶澍等奏：“山盱两坝堵合后，旋据报五里中坝于十月初五日堵合。南关大坝、南关新坝及车逻坝于初八、十五、二十一日堵合，扬粮厅昭关坝先绪堵合，下河田亩，均经涸出，不致有误。春耕仁礼两河于初十及二十六日先后堵闭。义字河接手赶堵。”十三年四月陶澍等奏：堰盱石工倒塌数百丈。十五年林则徐奏：筹办通漕要道练湖堵坝，劝谕民修，运河闸工，由官捐办。原奏略曰：十四年四月，陶澍阅兵，过彼履勘，意见相同，定议筹办。飭常镇道李章在该湖顶冲之黄金坝及东冈一带，先筑两重蓄水坝，加培圩埂，使山水皆得入湖。又于湖之东堤添建减水石坝两坐。如遇暴涨，有所分泄。其通入运河之处，勘得有念七家古涵，较旧浚之范家沟，机势更须修复，以作水门。并就近建设济运石闸一坐，于运送军船时，放水接济。漕过之后，用土填筑，留一涵洞，以灌堤外民田。臣即飭道督县劝谕得霑水利之业佃，或出力，或筹资，令举董经理，官为督率。舆情咸知利益，踊跃急公。自夏至冬，陆续报竣。是冬丹徒水涸回空，全进横闸。臣林则徐亲驻镇江，督催堤挽试放济运。新闻由二十七家古涵引水，而竟能倒漾上行，至数十里之远。运放数次，军船得以衔尾南行，其效颇为显著。复查下游张官渡为漕船经过要津。二十二年二月，改江苏扬州府总捕同知为粮捕同知，通州粮河通判为运河通判。二十三年正月，修徒阳运河。是月，堵合山盱各坝工竣。二十五年六月，江苏中河厅桃源汛河溢。八月二十，潘锡恩奏：中河挑挖越河堵筑口门各工完竣。九月十一，以潘锡恩奏中河利运等工限前报竣，降调淮海道周寿，仍留本任。十二月，浚徒阳运河。二十六年正月六日，允潘锡恩修运河中河纤堤。二月，李星沅奏验收徒阳运河。十一月八日，除靖江县坍地赋。(允潘锡恩奏拨中河厅建滚水坝银十一万两)。二十七年十二月，修沛县夏镇运河寨子民堰。二十八年七月，李星沅奏。里河厅属之张王庙缺口堵合复溢。是月二十九，张王庙缺口合龙。七月，李星沅奏，初三启放林家西坝，仍消不敌长。接启义河，水始见消。又将扬运厅昭关坝启放，水势消动，得保无虞。八月二十三，以里河运口汛漫口赔修完，因开复淮海道周寿，摘顶处分。十月，堵合义河直坝。十二月初一，李星沅奏。山盱智信两坝堵筑

二坝及礼字河早经堵闭，仁字河亦早断流。初十又奏：山盱义河越坝厢筑工竣。二十九年正月，修徒阳运河。六月二十，杨以增奏：洪湖及运河水势积涨，酌筹分减。七月七日，裁扬州府扬运通判，改扬州府江防同知为江运同知。十一月二十，以运河受淤漕船羁阻，杨以增准扬道查文经暂革，勒限赶办。二十一，杨以增会奏现挑引河即可放水归漕。三十年二月，浚徒阳运河。四月四日，陆建瀛杨以增奏：挑挖天然引河见已如式完竣。补筑淮扬西堤，勒限四月初旬办结。七月十三，陆建瀛杨以增奏：“淮扬水势有盈无绌，无庸议挑。”允之。十二月二十三，陆建瀛杨以增奏：“海口坍塌，系在两岸河渚，碍难逼溜平水。惠济通济福兴三闸，不可议废。”允之。八月二十四，堡漫口合龙。十一月，马棚湾漫口合龙。

咸丰十年七月，高邮露筋镇至金湾一带漫溢。十一月，晏端书王梦龄奏：“高邮甘泉团湾金湾等处缺口次第补还，邵伯镇迤南漫口一律堵合。”十一年二月初九日，小六堡工于初九十四等日先后堵合。

同治五年六月，湖水盛涨，高邮汛清水潭迤南二闸漫溢。八月，清水潭补还东堤善后工程竣。浚上游马棚湾、下游四港泌二马桥、越河港、邵家湾等处通湖港口。是年九月初七，署两江总督李鸿章奏筑清水潭二闸漫口。原奏略曰：“本年夏间雨水过多，湖河漫溢，清水潭二闸决口，江北高邮、兴化、宝应、泰州、盐城、山阳、阜宁各属悉被淹没。当经派员往勘，挪款抚恤。一面飭令江宁藩司预筹堵筑巨款。兹据藩司李宗羲详称，堵筑漫口须东西两堤并举。盖西堤为东堤之屏障，西堤不筑，则东堤毫无收束。东堤口门刷宽已将三百丈，迟堵一月，明年春汛湖水复多，不但春花无望，并秋禾亦不能种。此堤工万不可缓者。如于今冬水落之时并力赶堵，则费半功倍。约须银二十余万两。”十一月，李鸿章、张之万奏订扬军厅属五坝等启放之期。原奏：“扬军厅属建设五坝，道光八年前河臣张、并潘锡恩酌：高邮志桩长至一丈二尺八寸，启放车逻坝。每长四寸，再递放南中新三坝。嗣于道光十二年，复又酌定。七月中旬以前，仍照原奏办理。查从前六月初一日，即有启放之案。是七月中旬以前，未必专指七月而言。然坝下农民皆不愿早放，若不明定章程，恐缓急无可遵循。兹拟立秋前高邮汛志桩长至一丈四尺，启放车逻坝。仍每加四寸，递行接放南中新坝。如逾立秋，则照一丈二尺八寸照章启放，报闻。”十二月初九，清水潭漫口合龙。上下拦河坝于十一日同时堵合。六年，漕运总督张之万浚旧黄河及张福碎石等河。(光绪十年二月，左宗棠会勘引淮入海河道奏有曰：“前漕臣张之万抽挑旧黄河及张福碎石等河，实为导淮权舆。”又曰：“同治六年抽挑以后，又经择挑数次，渐疏渐远，河底甚宽，断不能挑。至老滩又有飞陷沙、间有稀淤，水小之时易于阻塞。”)七年七月，永安汛马棚湾一带加帮东堤土工、西堤土工。补临湖一面碎石坦坡工竣。十二月，两江总督马新贻奏修筑运河东堤。原奏：“臣莅任时，沿途履勘，所有小罗堡等处，水势甚大，急切未能施工。惟有先将东堤择要兴办，以资保障。上从宝应汛起，下至甘江汛止，堤长二百余里，应修之工计有七十余段。业已妥员核实估计，克日兴工。并另派大员督催稽查，以免草率偷减之弊。又汜永两汛西堤内有一千四百余丈，亦属最险之工，现已赶办碎石，一律兴修

。此外尚有宝应县所属子婴闸一座，向系民捐民办。现在情形危险，若等候集资，恐致误事。亦由臣发款先行垫办，并于运堤上下堆积土方物料，为未雨绸缪之计。总期于今冬明春水涸之时，先将各工修筑完竣。惟需用之款为数甚巨，现在谆飭藩运两司设法筹措，断不敢畏难惜费，贻误地方。”八年六月，修筑运河东西堤土工及碎石坦坡。(东堤上从宝应汛起，下至甘江汛止。)又汜水安定两汛西堤修筑土工，并临湖一面补还碎石坦坡。又白露筋祠起，至小六堡北坝头止，应补还西堤土工，临湖一面碎石坦坡。(附。七年七月，曾国藩、张之万、丁日昌等奏：“里下湖居民以运河两堤为命脉。本年春间，将最险之马棚湾一段修整。九月间续修小六堡，并二三年内将东西两堤全行修筑。臣等以为堤工加一分，则里下河受一分之益。若徒争开坝之尺寸，较时日之早迟，则放坝之际，浩瀚奔注，立成泽国。虽比溃决之祸稍轻，而伤农田则一。五年奏定之案，未便更张。该举人蔡则沅云呈，请改定志桩之处，应毋庸议。”)九年四月，马新贻奏勘验小罗堡各工。原奏略曰：“三月三十日行抵工次，漕臣张之万亦同日赶到。查小罗堡西堤工程，上自露筋祠起，下至越坝北坝头至南坝头止，计长一千三百六十余丈。越坝缺口，上自北坝起，下至南坝头止，计长二百四十余丈。现在土工一律完竣。逐段锥试，尚属饱满。惟所购碎石，因河水浅滞，尚未运齐。已严飭各委员赶紧趲催随到随砌，以期迅速蒧事。”十三年六月，文彬奏浚河筑堤工程紧要，请续拨经费。原奏略曰：“两次覆勘各工除专案奏办之惠济正闸堰盱石工，现查高邮界首河道浅狭异常，既有碍于漕行，恐更易于漫溢。同治十年前漕臣张兆栋任内曾经估挑，需钱一万八千余两。嗣因无款未办，扬河西堤虽已择要修理，仍继续不齐，运口各坝均未复旧规。大汛经临，堤闸吃重。扬属利农四闸已修其二，尚有南关大挑二闸未修。是皆不可缓之工，仰恳敕下部臣，从本年起，每年续拨银四万两，俾常年修防不致停工待款，浚河筑堤等事得以次第经营，于漕运农田实有裨益。”)

光绪元年九月，漕运总督文彬奏水势盛涨择办各工。原奏：“江北运河及洪泽湖上年已交冬令，仍以致水大。本年入秋以后，来源愈旺，拍岸盈堤，日久不退。所有徐属运河两岸长堤纷纷溃塌，脱坡窰潮渗水。安汛盐河旧埽，亦将平漫运口各坝将见蛰塌，尤为吃重。清江以下两岸土埽各工，多有蛰矮脱坡之处。扬属东西两堤，为里下河民命所系。臣于三月间亲赴该处察看情形，将永安高邮甘江土埽各工，择要酌修。并将南关耳闸一律修竣。其铁中湾等处，亦由两江总督刘坤一派员修理。惟是工段太长，现值湖河并涨，所有未修之处，高邮汛之琵琶闸陈家港泗汉港新坝车逻坝中坝北拦坝各处护埽，甘江汛之二闸大王庙两处埽工，犯浪顶冲，直塌卑矮，其至平水入水。若不及早兴修，必成大患。堰盱未修石工后身槽土塌缺多处。以上各工该管道厅先后稟请发办。臣核实勘减，随时飭办。并飭严守下游各坝保里下河秋成，省将来堵筑之费。”三年二月，文彬奏：“河成汇泽利运萦流四闸修竣。接修亨济闸。是月，常州挑浚运河，自七里桥下，至小陵口，工长二千三百三十六丈。按陵口镇一带地泉涌出，源源不绝，极难施工。四年二月，濬武进县超瓢港河工长五千八百十四丈。是年九月，沈葆楨奏修扬属运河东堤，兼将西堤择要兴工。原奏：“运河东西两堤，为淮扬各属民田保障。西堤御高宝诸湖之水，东堤御运河

上游之水。同一吃重，然非东堤完固，则沂泗来源骤发，里下河民田已岌岌可危。非西堤加高培宽，重关屹立，则湖河联成一片，西风当令，骇浪横击，东堤亦独立难支。前督臣曾国藩、马新贻叠议按年匀修，而经费竭予外输，更无余力顾及根本，两堤坍塌，日甚一日。东堤虽险工林立，形迹尚存。西堤则问段在水中央，并无可寻基址。本年盛涨，淮扬海道庞际云驻工抢险，坚持十数昼夜。俾里下河农民将半熟之早稻抢割，乃次第开坝。西风不起，赖以保全。江北出米，里下河独多，丰歉关全省元气。堤工失险，将颗粒俱付波涛。办工最要者数端，日集夫，日购石，日取土。以为夫役不足，可以兵勇济之。土石不足，可以重价招之。数百万生灵性命所关，何敢锱铢计较。所独难者巨帑，淮扬海道庞际云条陈三策，通盘计划，需四十余万两，两次需二十余万两。如专顾明年万不可缓之工，亦需十五万两。臣函商漕臣文彬，准覆称经费如此艰难，请臣移西堤财力先办东堤。其宝应上讷徐州，则漕臣任之。飭藩司孙衣言竭力筹款，仅得三万五千金。责成运司欧阳正墉，无论何款，照筹三万五千两，合成七万。照漕臣所议，先办东堤。自宝应以南一百六十余里，卑者高之，薄者厚之。渗水窞潮者，搜其根而坚筑之，为坦坡以护之。候补道张富年熟习河工，心精力果。飭令会同淮扬海道庞际云亲历勘估。并将石料先期采购。此后如再有款可筹，即将西堤最不可缓之邵家沟一带千余丈，先行营建。如东堤有可节省，亦必并入西堤。以后再递年节节为之，庶捍御有资。”五年九月，沈葆楨奏修车逻坝。原奏略曰：“高邮四坝以备盛涨减水之用。曰中坝，曰南关新坝，曰车逻坝，中坝久已填闭，现存者三。向章启坝，必先车逻，故受病最深。连岁多旱，仅于同治九年启放一次。上年江淮并涨，淮扬海道庞际云力保早稻，坚守至一丈五尺八寸始行启放。而水力汹涌，坝底已坏之处，冲刷愈甚。未坏之处，亦暗蛰内腐。非启拆到底，重新兴工，修与不修等。大修则先事购料，非万金无以为权舆。据委办堤工道员程国熙、张富年、庞际云等会禀、请示，臣以为该坝非但关系河务农田，里下河数十万生灵身家性命以之。当飭江宁藩司、两淮运司、军需局，无论何款，勉力合筹银六万两，交程国熙等派员分购条石巨木，妥速兴办。如有不敷，再行筹凑。兹据呈报各料陆续运到，节逾寒露，水势较小，择于二十六日兴工。”五年十一月，文彬奏：徐州兰家山坝堵闭工竣。为拦花微山湖，水小则闭，大则开。是月，挑丹徒运河工，长三千二百五十八丈。六年九月，署漕运总督谭钧培奏伏秋汛内，各工修守平稳。原奏：“为伏秋汛各工修守平稳，恭折具陈，仰祈圣鉴事：窃照江北运河绵长七百余里，北受濮泗来源，西连洪湖巨浸，每交伏秋大汛，浩瀚奔腾，沛然莫御。节宣则资闸坝，捍卫则赖堤工。修守机宜，极关紧要。本年夏至以后，上游山泉骤发，洪湖亦加长不已。来源既旺，长河水势日增。自邳宿以至扬州，除倏长倏消不计外，积存涨水，自五六尺至四尺不等。其间长消太骤、之间，搜掣之力尤大。查邳宿运河中河两岸长堤，纷纷溃塌脱坡，且有害潮之处。安汛盐河旧埽，刷蛰塌卸，里运河运口各坝柳圆头小舟庄盛家庄小二堡等处埽工，均被冲刷蛰塌，两岸长堤，亦多溃塌脱坡。堰圩长堤风掣未砌段落石，后槽土被浪刷损多处。均经前漕臣文彬确切查明，飭所分别于护加厢填筑坚整。扬河永高二十三汛救生港对河小六堡昭关耳坝各埽，及该三汛之张家沟高邮南拦坝露筋祠等处，土工损坏较甚。亦经前漕臣文彬于汛水初长之时，发款兴修，足御盛涨。至该所

防汛事宜，即归两江督臣新设河工局办理，以免两歧。臣赴任时，由扬至浦，已将所过各工顺道查勘。其上游邳宿各工，臣前署徐州道篆，悉其情形。即以所汛历报水势较核所报险工，均属应办。仍系一切部署略定，再往查阅。立秋以后，水势本已渐平。近日复稍增涨，谨当督率道厅慎重修防固，不敢惜费以误工。尤不敢滥支以糜帑。”是年，浚扬庄以下旧黄河。七年，刘坤一勘运河堤工。奏有曰：“白杨庄以下旧黄河淤平，则山东昭阳微山等湖之水，由中运河直趋南运河。夏秋之间，三闸更形吃重。”又曰：“上年挑通旧黄河，分减中运河水已六七成。其入南运河者不过十之三四。洪泽湖之水虽增，与前水之浅深大略相等。将来即遇大水，有旧黄河可以分消，亦不至专出三闸。目前可泻中运河之水，即可分泻洪泽湖之水十年。”左宗棠勘导淮工奏曰：“同治十三年所挑杨庄河头三百余丈，至光绪六年已经淤高数尺。惟光绪七年所挑河身，适逢连年大水，冲刷得力，自杨庄至安东佃湖一带，尚属通畅，可以行舟。泗沂之水赖以分泄。八九两年非常汛涨，犹得从容启坝，以保里下河秋成者，未始不由于此。”七年四月，重修京口大闸。是年两江总督刘坤一奏勘运河堤工。原奏：“臣于前月二十五日带印出省。二十七日由扬州履勘运河堤工。所奏明自浦口以下由臣衙门承办者，东堤已一律告成。其中如昭关坝、车逻坝，及上年所修新坝南关大坝等处，工程甚为结实。西堤则现修至高邮之杨家堤，堤身宽厚巩固。临湖一面加镶斜坡，密铺碎石。杨家坞以上，惟马家湾一千六百丈，堤身尚属完全，碎石多有脱落，该处在高邮州境内。与清水潭对岸，内系运河之腹，外当湖水之冲，不可不及时补葺。杨家坞以下间有已修之段。其余势难较缓，不可不接续兴办，以竟全局。业经豫储碎石九千余方，西堤等处计足敷用。此后每年霜降后巡察一次，有缺即填，有漏即塞，似可以保无虞。三十日行抵清江浦，同淮扬道桂嵩庆现署徐州道之江安粮道张富年等于九月初一前赴扬州。测度中运河及新挑旧黄河南岸，至吴城七堡及碎石河地势亦高，清漪一线约深二三尺至四五尺不等。由碎石河至张福河，地势渐低，水深丈余。张福口至运口以及三闸，则地势益低，洪荒奔泻，水深二丈七八尺及三丈二三尺。此系里河厅所辖。各处柴埽石工，尚属如法。初二日由里河厅交界之堰盱厅循洪泽湖石堤至高家堰高梁涧。于黄堰寺照刻定尺寸测量湖水，约深八尺。随逾智信林蒋四坝至仁义礼三河为洪泽湖尾间。仁义两河已废，仅余礼字一河，系全湖关键。上年新筑越坝，挺入河心，极为著力，于水势所留，测量深二丈有奇。坝外尚须镶铺斜坡碎石，以资捍御沿湖石堤，徐坝十六堡已经修竣。堰涧十八堡甫修就。臣察看惟十六、十五、十四、十三四堡尚须大修。其余堤外已经淤高只须量行黏补。上下尚须多用旧石易于收功。”八年四月，挑镇江丹徒运河，由镇江西门桥至丹徒横闸，共工长三千二百五十余丈。九年，左宗棠奏修运河民埝。原奏略曰：“查山东山水下注，先入邳境，武沂两河交流该处。王家口、草桥圩缺口二道，尤为紧要。已于上年十月内经徐州道程国熙先行垫款堵塞。一面督饬将各处民埝分别勘估，计自山东交界黄林庄起，至邳汛猫儿窝起运河两岸民堰缺口水沟及残缺卑薄之处，共四十段。城乡民堰及武河沂河缺口共十七段。皆保护城郭田庐要工。其中并有应行补还旧石帮岸及迎溜厢埽之处，又有艾山河一道，在运河承受东省来源，积淤甚宽，必须大加展挑。现将该河之朱龙口、祁家口二处筑做草土坝，截住来源，以便勘办。其城内文曲沟城外玉带河，

亦须逐一清厘，以通脉络。宿迁六塘河民堰周长八十余里，积年淤垫，河身已高，长堤坍塌几尽，上年大水骤至，防不及防，遂至漫溢愈广。兹按上年水志，择最要者共二十五段，先为堵筑，以卫田畴。以上各工，官督民办，于正月初十日分别兴工。俾附近灾民得以自食其力，悉照河工成法，层坯层砌以期坚实耐久。十一年十一月，挑丹徒丹阳运河，自马桥运河口至东门迎春桥止。又：八里桥西至七里桥止。地藏庵前至小城河口止，又有淤滩数段，共长九千九百九十八丈。十二年二月竣工。十二年十一月，曾国荃奏邳宿济漕各工择要赶办。原奏略曰：“江北运河淤垫，邳宿最甚。上年宿迁五花桥以南，择挑六千余丈，现仍通畅。惟五花桥以北至荷林庄，久未挑修，浅阻日甚。惟有收蓄底水，节束来源，实为切要之务。上年徐州道段喆挑溶荆山河，赶筑拦坝，以蓄上游之水，并集夫挑挖河身。其下游之潘家河尾刘家山竹笼河后河尾黄道人桥各水口，亦经派员分别查勘拦截，俾增水一分，即漕运受一分之益。邳宿一带旧设河清、河定、河成、汇泽、利运、亨济、洪流七闸，光绪二年修补六坐，惟河定闸未修。该闸上距河清，下距河成，各二十里，中无收束，即恐抬蓄无力，浮送难资。其光绪二年所修大闸，本系抵补。至三年三月工竣启用，亦逾年例之限，除汇泽、利运、亨济、洪流四闸，现在完整外，其河清、河成二闸，首先当冲，因被堤水漫没，墙底等处皆有损坏。既经逾期，亦应拨款修整。所有各闸均应照案次第堵闭，酌量加高。河定闸向走越河，不待回空过竣。先行兴修河清、河成二闸，向走正河。俟空船悉过，即可估办。臣曾国荃查照成案，动拨江安粮道库存江兴两卫口粮银二万两，以济急需。其河清、河成二闸及高宝淤浅，一俟回空过竣，即行勘估酌办，应用之款臣崧骏再于苏松粮酌拨。倘两处协济之外，所短无多，仍由臣卢士杰以当年工需济用。”十三年九月，曾国荃奏决河入湖，急筹宣泄。原奏略曰：“治水不外宣防二策。而宣之为用尤多。洪湖出路本有二处，一由东清坝而达清江，一由礼字河而趋高宝诸湖。然皆由运河以入江。倘宣泄不及，则递启高邮各坝，由下河逶迤入海，惟是入江固患顶托，入海又恐港窄。今者大患特至，不能不予湖之上游多筹出路，分支宣泄。据徐州道段喆称：桃源县有成子河一道，南接洪湖，北至旧黄河，又北为空地，又北为中运河。若成子河大加挑挖，通于旧黄河，再于空地接挑河身，使之直达中运河。两岸各筑一堤，即可引所漫之水，由杨庄旧黄河至云梯闸关入海。臣等现已议定派段喆办理，勘估兴工。又据署淮扬海道刘钟灵称，清河县境有碎石河一道，西接湖滨之张福口引河，东达旧黄河。同治七年，前漕臣张之万曾经挑浚，以分湖水。若将碎石河大加挑挖，亦可引所漫之水，由旧黄河出海。此湖下面新辟一去路。臣等即派刘钟灵、徐文达办理，勘估兴工。一俟两河挑有头绪，即须堵闭顺清河，使湖水不致拦入运口，以顺其东出杨庄之势。至于修守旧费，已甚巨。而别筹分泄用款更多。只以事机至迫，淮南北千里民间之性命身家，所关太大。正宜趁此九、十、十一三个月内，昼夜赶办，速引宣泄之路。臣等一面会奏，一面在于江苏司局各库，无论何款，提拨银二十万。并在于司局，无论何款，提拨银十五万两，以应修堤挖河之急。”十一月，曾国荃等奏开浚下河张福河。原奏略曰：“下河入海河道，以新阳射阳西河为最，斗龙港次之。现经张富年查明，兴化所属之大周闸及丁溪场所属之古河口小海三河，均极淤浅，一遇水大之年，来源多而迅速，出路少而行迟，农灶均受其害。疏

浚以各该处皆紧对漕堤。如果高邮开坝，可冀水皆顺轨，由新阳等河归海。其闸门窄狭，过水不畅者，另于挖越河，俾得滔滔直注。已估工兴办，约需钱十数万串。惟统高邮三闸口门，共宽一百九十六丈。若全河之水合黄并注，其势不能容纳。虽臣等于张福口等处兴办大工，为未放坝以前之绸缪。复于下游入海要津，为已开坝之补救。惟冀郑州早日合龙。则大局幸甚。”十二月曾国荃等奏浚杨庄以下旧黄河。原奏略曰：“臣等会奏请挑成子河碎石河。旋经测量地势，北高南下，工费亦甚浩繁，未敢虚掷巨款。现就杨庄以下旧黄河二百余里，一律挑浚，以分沂泗之水，腾出中运河预备洪湖盛涨，挟黄北下堪以容纳。”十四年四月，漕运总督卢士杰奏修整河清等闸。五月张福口河工完竣。是月，下河工程完竣。七月，堤工告竣。十五年十月，曾国荃等奏修运河堤工。十九年十月，刘坤一奏光绪十七、十八等年修过运河东西堤等项工程用过经费。原奏：“查光绪十七、十八等年，江苏候补道丁葆元、莫绳孙经修之东西两堤等工及拆建涵洞修补砖工等项工程，内计高邮汛拆砌东岸临河石工，应销银一万一千八百九十五两有奇；又宝应汛拆建涵洞，应销银五千七百五十四两有奇；又甘江汛邵伯镇一带砖工，应销银七千八百五十七两有奇；又宝应、汜水、永安、高邮、甘江五汛修筑东堤，应销银一万五千六百七十六两有奇；宝应五汛补镶旧护埽，应销银三万五千七百四十八两有奇；宝应五汛抢厢防风，应销银一万二千二百九十七两有奇；又永安高邮二汛修补石堤临湖碎石坦坡，应销银一万九百一十六两有奇。统共请销银十一万八千七百八十九两有奇。”二十八年七月，陈夔龙奏浚扬州界首子婴闸。原奏略曰：“淮扬运河为民船往来要道，比年以来，河堤日加培厚，河底日益垫高，淤浅之处较多，而子婴闸为尤甚。盖因运河上承蒙沂诸水，奔腾直注，经过各涵洞，逐渐分泄，水势已弱，至宝应之子婴闸，则河流高下悬殊，运河之底高出闸底，水形就下，略同吸川，长河溜势旁趋。由子婴闸而入下河者十之六七，由运河南下者十之三四。水缓河停受淤实由于此。加以下游之马棚湾，有出湖救生港一道。湖水入运，一遇盛涨，势必河流顶托，向北逆流数十里，全行淤垫。冬令水涸之时，虽轻载高船，亦不免有阻滞。非设挑淤难以畅行。现经飭委勘估，自子婴闸上游七里闸起，至马棚湾止，一切挖引河湖淤挑口门筑坝等，并委员薪水各项，约需银六万两。拟由两淮运司拨银一万两，江安江苏两粮道各拨银一万五千两。其余二万两，商之淮安关监督世纲，该监督以该处为商贾冲途，于税务极有关系，允于关库核减二成经费。及节省一成，养廉项下，凑拨银二万两，以济工用。此项工程，查有现办扬属运河堤工局江苏候补道堪以委令兼办。一俟霜清水落，即行开工。”十一月，漕运总督恩寿奏浚徒阳运河工竣。原奏略曰：“镇江府属丹徒丹阳运河，为南北往来要道，且农田灌溉所依。自光绪十九年挑浚后，历时既久，江潮挟沙冲积，河身日渐淤滞，舟楫行走，有艰行之患，田畴鲜蓄泄之资。去冬经抚臣聂缉槩察酌情形，飭司筹款，派特用道，沈俭督办疏浚事宜。当将筹办缘由具奏。据沈俭禀，于是年十一月初十日开工，自丹徒之大闸口起，至丹阳之二闸板止，此一百余里，节节淤塞，非筑坝下埽，大加挑挖，难期通畅。因客秋各洲灾民众多，该道以工代赈，招集人夫一万余名。督在工各员逐日赶挑，适蒙恩调授，莅任后即飭沈俭务将沙底挑挖，一律深广。迨本年三月，奉命简讨军实，乘轮至镇，赴工次，详加察看。间有未能挑筑如式之处，经酌度形势，

飭将河面稍狭者一律开拓宽展，河岸积低者，一律培厚加高。于阅伍回署，复迭次扎催赶浚。即于六月据报，已于五月二十八日通工告竣。”二十九年正月，漕运总督陈夔龙奏，南河同知通判闸官各缺，毋庸裁撤，以重修防。原奏略曰：“江北运河上自邳州黄林庄，下至扬州江口，绵长约七百余里之遥。又洪泽湖堰圩石工百有余里。每届大汛，沂泗山水下注淮水，由湖东趋，浩瀚奔腾，加以江湖顶托积涨不消，拍岸平堤，处处危险。设或一息偶疏，在清江以上，则海流等处及淮北盐场受其害。在清江以下，则里下河各邑及淮南盐场受其害，洪泽湖堤若有溃溢，淮扬两府均受其害。每年自交汛以后，各厅员皆亲驻河干，上下奔驰，巡防守护。至惠济、通济、福兴、清江四闸，为淮沂诸水入里运河之门户，极为吃重，溜势甚急。船只过闸，必须熟手闸夫，帮同提挽。其余石碇、白驹、草堰、横越四闸，节宣潮水，亦关紧要。所以从前裁去徐属二闸官时留此八缺。且南河厅闸各缺，纵或全裁河工修防之费，仍不能少。设其间稍有疏忽，其堵筑漫口经费，以及抚恤灾民，蠲免钱粮，至少亦不下数十万金。转非裕国便民之道。奉硃批该部知道。”三十三年五月，两江总督端方等奏，以工代赈修筑运河堤岸残缺各工。原奏略曰：“上年大水，运河堤岸冲刷残缺者甚多。瞬届伏汛，必须预为修筑，以御盛涨。业飭杨文鼎派员确切勘估，自上游宿迁下迄江都瓜埠一带，择要加培，迎溜顶湾，添镶埽坝。其扬城南新三坝工程，则飭堤工局道员亮标修整完固。六塘河经宿迁、安东、桃源、清河、沭阳、海州各属宣泄要区，年久失修，一遇盛涨，泛滥为害。飭派在籍绅士前东昌府知府魏家骅会同杨文鼎分段估修办理，甚为核实。海州沭阳赣榆各河工，亦派员会同地方官绅董择要挑疏。并在籍士绅安徽候补道许鼎霖为总查，俾致周妥。徐属境内民埝工程，由袁世廉派员办理。又江宁省城水西门外过觅渡桥至汉西门止，河道淤浅，派委朱思绂督率委员开浚深通。此外如山阳、清河、安东等处支河，关系农田水利，均经酌给津贴，并动用积款挑办。不敷之款由地方官劝谕绅商捐资济用。并由华洋义赈会捐面粉在工平糶，亦可为赈务之费。现据禀报运河堤工六塘河工次第完竣。业经派员验收。伏秋大汛，各资抵御，其余各工均已一律完竣。”

第四卷 运河下

运河经宿迁县东北，其东分一派为盐河，经沭阳县入硕项湖，至海州入于海。运河又东经宿迁县城北，折而南，经城东，又东南经仰化集西北。其东分一派为盐河。东北至沭阳县东南境入硕项湖。东至海州东南境入海。

盐河。有北有南，北盐河受运河水于宿迁县东南之仰化集西，东流经集北。又东分为二支，一支东北流，折而北而东。一支东南流，经王家集南折而北，流经里仁集东，又北复合，折而东流入硕项湖，经安东县北境。南盐河受运河水于清河县东，曰大坝。东北流经王家营北。又东北经安东县城西北，又东北至新安镇西，与硕项湖水会，东北分二口入海，即出河港，灌河口也。

淮安府六塘河。上承骆马湖，南通刘老涧，由桃源县经清河、安东，分为南北两股，并趋串场河，注北潮河入海。正流至板浦趋涟河入海。乾隆八年，加筑子堰。十一年、十三年于南北两岸并筑砖堤，挑浚河身。二十七年，皇上南巡，命疏河身下游，以通淤塞。海州六塘河，上自桃源县，经清河、安东、沭阳，分为南北两股，沿洶至海州境。一泄沭河之水入盐河，归武障河入海。一泄陵沟十字桥诸河之水入盐河，归项家冲入海。乾隆八年，疏通淤塞，并修堤堰。二十二年，复加疏筑。二十七年，南六塘河修筑北堰。北六塘河修筑南堰。三十年，复修北岸丁家沟等处堤工。三十八年，又修汤家道口等工。六塘河，原以宣泄骆马湖水，自宿迁永济桥东行，迳桃源、清河、安东境内，至沭阳钱家集分支。南六塘河，由高家沟东入场河，出武障河归海。北六塘河会汤家沟、丁家沟，亦东入场河，出龙沟河归海。当两六塘河之中，有硕项湖。康熙中，靳文襄公筑有屯堤。而六塘河未分支以上皆有子堰。其后惟南股筑堰，北股至乾隆初，州牧卫哲治，请亦筑堰。专设六塘同知董其事。自二十二年后，水有统束，民乐安堵。三十一年，高文端公以六塘河绵亘六州县地，虽设同知专管，而堤河修防，临汛保护，须佐杂分司，移海州惠泽司巡检驻张家店，沭阳县县丞驻钱家集。伏秋大汛，会同地方官购料集夫，加谨抢护。迨四十六七年，黄水冲溃，堤岸倾圯，无可措手。于是六塘同知废，仍归中河通判兼理矣。

官河。长一百三十里，阔八尺。盐课所经，官舫估泊，帆樯相望，故曰官河，即今场河。上通清河之盐河闸，下通板浦，为淮北三场盐课通道。西受六塘河诸水，东有武障、项冲、义泽、六里、东门、牛墩六河，以泄其泛涨。皆有石坝草坝，惟牛墩滚坝，无关蓄泄。其五河坝脊，皆低。民田一尺，高河底五尺，水溢于石坝，则开草坝，使水平坝而出。旧有志桩，立龙沟河岸，即项冲坝也。厥后河底淤高，石坝颓泐，秋冬运盐，筑草堰以蓄水，非复志桩旧式。西岸庖下，为水所浸。土民辄往夺坝。嘉庆九年，转运使出数万金以浚之。无如六塘无堤，泛而易涸。引黄济运，水退沙停，计今河身几与坝脊相埒。苟非束六塘清水，藉其力以敌黄刷荡，虽岁岁挑河修坝无益也。

包家河。在清河县西。上自桃邑遥堤竹络坝起，及清邑永丰、金城等镇。民田积水，由包家河闸，趋注达海。乾隆二十三年浚。

民便河，在清河县西。上承桃邑民便河水，趋安邑南股六塘河达海。又西北小民便河，亦宣泄清桃二邑民田积水，注响水河，归包家河，下注南六塘河达海。俱于乾隆九年浚。二十三年又浚。

屠家河。在清河县西。宣泄桃邑陇沟一带民田积水，至响水河入包家河，下注南六塘河达海。乾隆二十三年浚。

周家河。在清河县西北，接泄桃邑民便河之水，至响水河入包家河汇注六塘河达海。乾隆二十三年浚。

鲍营引河。在清河县南鲍家营。康熙四十二年，圣祖南巡，命于王家营迤下鲍家营疏引河，泄黄河涨水，由张家集范家河、三岔口，历硕项湖，入五丈河、下潮河入海。两岸筑堤，于河口建坝，以时宣泄。乾隆八年、二十七年屡浚。

《徐州府志》：“宿迁县茅家河，在县东南五十里。为夏秋雨水汇归处，上接西宁桥，下迳仰化集、桃源、清河、安东诸县。分二支，一自安东入潮河达海，一自安东入海州，达板浦大伊山入海。”刘老涧在县东南四十里。泄中河水，下至仰化集，与茅家河水合。宿迁县连支河，在县北。康熙中，总河靳辅，既开中河，又于河之两岸别开六塘河，以泄黄河骆马湖之水，建桥以上总名连支河。《宿迁县志》：“连支河即十字河，在县北六里。康熙中，总河靳辅开中河，又别开六塘，设尾间五坝，以泄骆马湖之水。”《桃源县志》：“六塘河，在治北三十里。现今疏浚内有香子庄一段卑洼。历年水浸河北王家集一带，田禾受淹。雍正十年，知县陆文焕详奉河院勘准。会同桃源厅胡绍芬、中河厅王机筑堰。”《淮安府志》：“桃源县六塘河，分泄骆马湖刘老涧泛涨之水，至清河界止。长一万六千一百三十五丈。又至朱家庄，分为南北两股，经安东，南股由武障河入海，北股由陇沟口入海。河在县北五十里。乾隆八年筑南岸子堰，长一万二百九十三丈。北岸子堰，长一万二千三十二丈，顶宽八尺，底宽三丈，高六尺。十一年修筑堰工。北岸自永济桥起，至北股河止，工长三万五千余丈。南岸亦自桥下起，至南股河止，长二万四千一百余丈，顶宽一丈二尺至一丈五尺，底宽四五六丈，高八尺至一丈二尺，建闸坝涵洞数十处，以资宣泄。又清河县六塘河，自宿迁经桃源至清河。分南北二股，北股由沭邑之钱家集、沈家集、谢家庄、杨家庄，绕安东硕项湖北之汤家庄、丁家庄，由海州龙沟出义泽河入潮海归海。河共长一万八千七百四十二丈。南股河，由清邑之刘家庄、韩家庄，历安邑之古寨、华家口、苏家荡，至沭邑之孟家渡、武障河潮河入海。河共长一万六千四百五十八丈。雍正九年，挑浚。两河浅狭。北股河间挑六千七百九十四丈，南股河间，挑六千八十七丈。乾隆八年，奏请加筑两岸子堰。南股河北堰长三千九百十二丈，南堰长三千四百八十八丈。十年浚。两股河培南堰，工

长一万九千二百余丈。北股河北堰，长一万八千二百余丈。皆顶宽一丈二尺，至一丈五尺，底宽五六丈，高八尺至一丈二尺。建闸座涵洞，以资宣泄。《运河厅册》：宿迁县境内六塘河堤，起永济桥下，至桃源界止。北长一万四百九十一丈五尺，南长九千一百九十三丈五尺。派宿迁中河县丞管。每年由司库发岁修防工银三百两。并按年金，报堰长，至今遵办。桃源县《古城巡检册》：六塘河，向无堤堰，俱系民间自筑圩堰，以御汎水。乾隆八年，大兴水利，准士民呈请动帑。六塘河两岸，添筑土堰两道。桃源自刘老涧交界起，至清邑砖井工交界止。南岸堰长一万三百九十三丈，北岸堰长一万二千三十二丈，宽三丈，高六七尺。十七年，北岸开筑展堤一道，长八千七百四十二丈，宽六丈，高六七尺。每年遇有水沟浪窝残缺之处，由县拨民修筑。十三年，奉行六塘河堤，系动帑建筑，无专员管理，每年在河效力人员内，遴选二员，派令巡防。并于两岸居民内，金报堰长四十四名。每一名管堰二里半。内南岸二十一名。北岸二十三名。二十三年奏定六塘河，每年酌拨司库银数百两。遇有险要工程，随时购料抢护，事竣报销。桃源汎岁请三百两。二十七年，经钦差查勘动帑，将两岸堤工加帮加高。于北岸张家庄、费家庄、徐家庄、卢家庄，加筑越堤四道，共长一千三百十七丈。又添设六塘河同知，为六塘河经由六州县之总。将桃源境内之堰河，派令古城司巡检专管。五十二年，裁汰六塘厅后，未奉续发岁修银两，亦未奉飭仍旧兼管。其每年金派堰长。于嘉庆十一年，详由桃源县飭派。《中河厅册》：清河县境内，六塘河自桃清交界止。王家庄起，至小房子分岔止，河长四千九百七十二丈五尺。两岸子堰，北长二千二百八十六丈。南长四千九百七十二丈五尺。内有王家庄、蒋家庄、于家庄涵洞各一座。又包家河，乾隆十二年建顺堤石闸一座，皆泄积水，入六塘河。现均淤塞坍废。南六塘河，自分岔起至清安界止，河长三千六百十一丈五尺。堰同河身。北六塘河，自分岔起，至清流界钱家集止。河长四百七十丈。堰同河身。南北两河中间圈堰，长四千八十一丈五尺。乾隆十二年民筑。自清安交界起，至安海交界止。南六塘堤河，各长九千四百九十四丈。内上段安流两境，犬牙相错。堤河各长三千三百四十丈，间段犬牙相错。下段在安邑境内，堤河各长六千一百五十四丈。内岔庙之上，有张家河水，自西南来会，接前入海州境，至运盐场河止，堤河各长三千四百七十丈。南岸有朱家闸一座，年久损坏。又北六塘河，自清流交界起，至安邑界张家庄止。沭邑境内堤河各长三千九百八十丈，接前至沭邑界沈家集止。安邑境内堤河各长三千一百二十丈，接前至海州界丁家沟止。又属沭邑境内，堤河各长四千九百三十丈。接前入海州境。至运盐场河止。堤河各长三千六百二十一丈。两岸河堰皆设堰长，并未裁汰。清河县境内堤河，每年由司库发岁修银五百两，给清汎主簿领办。沭阳县六塘河，雍正八年开。乾隆七年，因淮徐海三属，濒临黄运两河，士民呈请浚河筑堤，奏请次第兴挑。八年，邑令袁枚领帑银四千八百两有奇，承挑前山河下游淤浅官沟口。嗣因东流下保居民，呈称不便，即将此银抵办六塘河子堰工程。然十二年四月总河檄称，沭阳县境内八九两年承办急缓水利工程，并上年续兴补水利工程，皆有未领书工银两，照例给发。盖八、九、十、十一等年，均有浚筑，特卷牒无存耳。又十一年，沭阳典史沈应蛟承筑官庄子堰缺口。是年，安东县民王琚等，请开港河，以杀六塘河之水。而沭阳士民周谧等呈称，港河一开，利于宿桃清安，大不利于沭

。经邑令魏廷会申请，以业准部覆，何能停止。惟议挑河之土即筑河岸，可资抵御。如开河而不筑堤，则六塘河流河子堰，均为虚设矣。民华吕怀等复以节帑止疏为请。十二年春，制府批飭妥议。然港河浚筑，册卷均无明文。而六塘河流河子堰之工兴焉。是年流邑委员承办两河堰工，共五十六分。宿流二邑，总流河子堰残缺工段别为一分。前流河龙王庙南北两岸共二分。前流河南岸子堰共十四分。前流河北岸共十二分。后流河南岸堰工共三分。后流河北岸堰工共四分。六塘河南岸堰工自第二十七分起至三十七分止，共十一分。六塘河北岸堰工，自第二十六分起，至二十九分，又自三十分，至三十九分，共十分。均派委佐贰效力人员，于正二三月开工，四五六等月完竣。是年冬，制府檄淮徐海道会同淮扬道赴工履勘，将六流两河子堰受冲险要及次冲与洼处分别培厚加高。确估造册，乘时兴工。十三年春，续办两河加帮工程，又颁发善后事宜六条。此案册卷烦多，略举梗概，以备考核云。

太湖。即硕项湖，一名硕濩湖，在州治南一百四十五里。其界安东流阳共得三分之一，海州得三分之二。南冈镇居湖西，新安镇居湖东南，湖坊镇居湖北，惟西南一角，安东流阳共之。康熙十六七年，黄河决，湖地稍淤。二十四年，总河靳辅将湖地丈入兴屯案内，增湖粮二百九十二顷。后又加一百五顷，派入各里。连岁地卑苦涝，民纳空粮，贻累无穷，湖广一万五千余顷。康熙中，靳文襄公于兴屯案内加地粮六百三十顷。又筹饷案内加地粮二百四十顷。又踏勘案内升粮一百三十二顷。凡一千余二顷。然湖底积水，淹没靡常。四十七年，圣驾南巡，命总河张鹏翮察看得实，改为下则。湖田每亩科银二厘八毫，民累得宽矣。今按湖粮即改下则，又改一麦，若遇麦熟秋晴，岂惟无累。靳文襄公兴屯时，筑有屯堤，故耕作无虞，两税可供。今湖堤与六塘堤皆废，虽一麦亦不可恃也。流河即古流水，亦曰術水。源出沂水县西北之沂山，东南流绕宝山北。又东折而南，凡二百数十里。经莒州城东，又南折而西南流。有小水自东来注之，又折而南。经大兴镇西，入江南赣榆县西北界。又西南经郯城县东北境马陵山东。又西南经县东南，南至红花埠，东南入江南界，经邳州东境，沭阳县西北境，至司吾驿南。折而东流，至县西。分为二派，东经城北。又分为二支，一支东北注青伊湖，一支东注硕项湖。其南派东经城南，又东南入硕项湖、青伊湖。自沭阳县东北，受流水支津汇为湖。周围四五十里。南有二渠，南注硕项湖，又西北受流水二支津。西受盐河北派水，东南六十里，襟安东县北境，广大倍青伊湖。其北流一支渠东行，又受盐河支渠北流，至大伊镇东折，东经南山麓。又东受盐河支渠北汇，为出河港，入于海。硕项湖东南会南来之盐河于新安镇西。又北分为二派，北派见前，东北派流六十余里。又分二支，一支北流见前，一支东流入海，俗曰淮河口。

沂州府流水。源出沂水县北，东南流径莒州东，又西南径兰山县东，又南径郯城东，又东南流入江南沭阳县界。海州流水，自山东莒州南流，入经赣榆县西北境。又南自郯城县界流入，经沭阳西南，歧为前后二支。一绕城北，一趋城南，俱东入硕濩湖。城北又分一支，东北入桑墟湖，亦南与硕濩湖会。自湖东北出，经州境东南入海。旧志：水自郯城合马脊固诸涧水，折而东，入沭阳县界。至县西北分为新挑

河。又东至县西五里张家沟，分为后河。又东径县南目前河。又东至上市镇分为上市河，折而东南入大湖。乾隆八年，修筑南岸堰工。二十二年前沅河加筑南北两岸堰工，后沅河加筑东西两岸堰工。沅水，自州西北来，行数百里绕出西南入沅阳境，为总沅河。分为分水沙河，北合青伊湖。其经流至沅阳城西分为二。出城南者为前沅河。出城北者为后沅河。前沅东北流宿迁之凌沟口，沙疆河注之。径韩山东，后沅径其西，合于州境之湖东口，入涟河归海。与酈注所称两渚，及至胸入游水。千余年犹如故也。惟涟河旋淤。夏秋雨涨，两沅与青伊泛滥，大为州境西南患。所当急谋宣泄者矣。后沅河，自张家沟分流而北，至王家庄镇二里许，为陈村河，又北为札下河，又东为汉坊河，又东北入于海。为邑之主河。前沅河即马坊河。自张家沟分流东下，由城南折入东南，会老鸛汀大湖，冬春则涸。于张家沟筑堰使支流不入后河，而舟楫可通，官民便之。右二河为沅水经流。新挑河，自太平桥分流庙头镇，径仪凤荡，通汉坊湖下桑墟湖入海。蔡家庄河，自汉坊河分流，经桑墟湖通海州。右二河分沅水之上流。上寺镇河自沅湖分流而东，通下埠桥入大湖。冬春则涸。十字河、蒲沟河，二河俱自南河分流，东入大湖。今塞。右三河分沅水之下流。

砂疆河。由宿迁经桃源县，入沅阳县张开河口，归前沅河，达涟河入海。系分泄六塘河之于河。乾隆二十二年浚。

青伊湖。赵志：州西南九十里，其源自马岭山西而来，沅河由桑墟湖流注此湖。夏日山水暴涨，为西南诸乡之害。近湖淤塞，水无所泄，为害更甚。所望良有司疏通之。按旧志有桑墟湖，盖由桑墟灌浸而成，势更大于桑墟。在沅阳境，故别系之沅阳也。青伊之害，乾隆间司牧尝请洒澹之，开涟河，疏蔷薇河，皆为泄青伊计。二河旋淤，青伊亦泛，涟河靡费累万，竟成平陆。蔷薇尚可修浚。蔷薇治，则西南水患可渐弭矣。

涟水。即沅水之下流也。旧志：自沅阳县北桑墟湖东北，流经州南二十里之石湫镇，又经州东南三十里之黑土湾渡入海。按：涟水，即游水也。《水经注》：淮水自淮浦县枝分。北为游水，历朐县与沅合。又经朐山西，又北经利城东。又北经羽山西，又北经祝其城西，又左经即邱城西，又东北经赣榆县北，又东北经鄆城南，入海。今涟止自海南入海，则古今异流矣。

《水经注》：“游水为淮支津，所经赣榆海州。”类今所指涟河，然人不知有游水，而涟河亦为潮所淤。运河经桃源县北，又经清河县北，其东又分一派，经安东县北，会硕项湖入于海。运河又南折而东，经集之西南及古城驿之北，又东南经桃源县北境之众兴集南，又东南至清河县城北渔沟集南。又东分一派，东北经安东县北，会硕项湖。而东北入海者为盐河。中河，乾隆四年修筑中河堤岸。八年大浚淤塞，并建涵洞十座。十一年，修筑竹络坝口门，引黄入运。十六年，疏浚闸下引河。二十三年，修筑清河县盐河石闸，以资蓄泄。旧志：自清河县杨庄运口起，至桃源

县交界三岔止，计一十七里，安清中河通判所辖。自桃清交界三岔起，至宿迁境内张庄运口止，计一百四十里有奇，宿桃中河通判所辖。

盐河有二，一在清河县中河北岸。康熙二十六年开浚，分中河水。东北历山阳县朱元庄，至安东县界，毗连海州，趋串场河，达苇荡入海。每年六七月开放。建筑大堤，以卫田畴。遇有阻塞，随时疏浚，以济盐运。

海流向不为黄水所经，惟中河自骆马湖入运河，至盐河闸，为王营减坝，与黄水相接。每岁漕运既竣，启坝，减黄水入盐河，至州境之莞渚入海。场盐则由场河至武障河溯盐河而南，至永丰坝登岸。其苇荡营柴运，亦由盐河而行。往时境内场河疏畅，六塘清水足资浮运，黄水由莞渚归海，不入场河。近则清水不足，仰藉黄流，直达大伊以北，而场河易淤，盐运维艰。年来黄河盛涨，清口浅阻，亦不待漕艘全行，已有减坝泄黄之举矣。且闻云梯关外海道高仰。议者欲引全河由响水口入海。经两河总督会勘，察其形势不便，寝其议。

清汛盐河内新王营减坝，迤下拦河，格堤一道，南起外北越堤，北抵遥堤，长二百三十五丈。中留河泓八丈，以通盐闸下注之水。如遇启放减坝，黄水上漾，即为堵截。安汛盐河南岸护城堤一道，自县西大关山安缕堤起，至平旺河止，长九千四百五十九丈。康熙二十六年筑。盐河两岸逢湾迎溜之处，现有南岸大关高家庄徐家庄蔡家庄北岸老堤头周家庄陶家马头朱家湾黄家湾朱家庄等处，埽工每年酌量镶修，并无一定长丈。嘉庆二十一年，备启减坝，两岸堤埽通行加培修整。平旺河两岸子堤，均系民修民守。南堤自护城堤尾起，至武障坝止，长六千六百二丈。北堤自遥堤尾起，至南股河尾止，长六千二十丈。每年启放盐闸，由淮海道檄行该管州县，飭民修守。莞渚坝，为河下达莞渚河至北潮河关键。每年启放盐闸，进水无多，必须紧守该坝。令盐河之水，由武障义泽等坝河下达。如遇启放减坝，始可折展畅达坝下。莞渚河至三岔口止，长七千四百二十五丈。乾隆八年水利案内疏通。二十八年以旧河湾曲，在单家港取直挑河，长一千九百二十丈。莞渚坝以北，河势由南转北，即淮北引盐出运场河。西岸无堤，乃六塘河及宿迁沭阳诸河下达水口。东岸有堰排列，曰武障，曰项冲，曰义泽，曰六里，曰东门，曰白蚬，曰牛墩。各石坝，坝下各有河。道旁各有草筑越坝。越河分达北潮河归海。每届伏秋诸水长发，汇注场河西岸。民田防其涨浸，利早启坝，而淮商又虞胶舟。乾隆二十九年，盐政吉庆奏定水志于武障坝：惟武障坝紧接盐河尾间，如每年西水下注不多，武障坝切宜缓启。以蓄上游河水而利盐柴重船，场河启闭各坝，乃海州分司经理，事属淮海道所管。随时查办，志之以俟考证。六坝之北，又有车轴河，为苇左营南北两汛荡柴出运要津。上承场河分流，下达五图河尾入海。荡尾入五图河之处，筑有底堰，以杜偷漏。

运河。即于清河县东南入黄河。其西南即清口，淮黄交会处也。运河水东合河淮，东北至云梯关入于海。运河分淮水一支东流，折东北，经清江浦前。东南流，经淮

安府城西。其东岸泄水支河口为涧河，为射阳湖。又南流东岸为泾河，为广洋湖。又南经宝应湖口北东岸，又泄水支河入广洋湖。自淮以南引支渠，因古邗沟南注大江。以通漕舟者运河，为大运河。西岸即宝应高邮二湖，东岸泄水，为盐运串场诸河。北至盐城阜宁，南至通泰。港汶纵横，今记其略。运河于清口黄淮交汇之南，分淮水一支东流，出御示闸，折东北流，分为二支，以节水势，经清江浦前出龙王闸，折向南而东南流出板闸。又南流经淮安府城西稍南。东岸有泄水子河口，又南流东岸有泾河闸，又东西岸为宝应湖北口。有黄浦闸，东岸有支河，以竹络坝捍之，泄湖口水。淮安府运河在府城西，自扬州府宝应县北，至府城南六十里黄浦，入山阳县。又北至府城西清江浦，折西北入清河县界。达清口，逾黄河。由县东入杨家庄口为中河。在府城南者，即古邗沟，亦名山阳渎。明初以来之旧运河也。自清江浦达淮入黄河者，明永乐中平江伯陈瑄所开，名清江浦。即宋沙河故道也。乾隆二年，于运河南岸天妃闸以下，开新河一千余丈，中建正闸二座，迤南开月河一道，建月闸二座。将旧运河南堤，改作北岸。另开南堤，展宽地基。三年，大浚运河，并建运口挑水坝。四年，加培桃源县运河东西堤岸。七年，于山阳县护城堤尾接筑遥堤，下建涵洞，以资蓄泄。十年十一年，疏文华寺闸引河。又筑清河、桃源运河东西两岸堤工。十六年，大修运河堤岸，自漂母祠迤北石马头至北角楼，建石工四百五十丈。二十二年，皇上南巡，亲示机宜。于运口头坝外，建筑拦黄坝一道。二十三年，挑浚桃源县运河。二十七年，修筑惠济通济福兴正越六闸，以泄洪湖清水。《河防志》：运河，自山阳县黄浦起，北至甘露城迤西山清外河交界清口止，九十六里有奇。自黄浦至季家浅，八十一里有奇，系山阳县境。自季家浅至甘露城迤西十五里有奇，系清河县境。其汛三，曰里河上汛，里河下汛，运口汛。属淮安里河同知管辖。

清口大小清河。即泗水之末流，源出泰安府。经徐邳至县西北三汉口分流，一由治东北入淮为大清河，今久淤塞。一由治东南入淮为小清河，即今河道。但旧以泗流清于淮，故名清河。宏治初，黄河入小清河，其水遂浊，至今犹名清口。南坝上磨盘墩一座，乾隆四年，大学士鄂尔泰奏定。

运口。明平江伯凿清江浦河通淮达黄，以济漕运，其运口在三里沟。百余年后为黄所淤。乃别开三里新河移运口。万历六年，潘季驯为总河，迁运口于甘罗城南，然距黄淮交会处不过二百余丈。阻塞时告。康熙十年，以天妃闸塞，乃于清河县东腰浦界内支河之达张福口者，疏浚通舟。十九年，总河靳辅又移于烂泥浅之上。北岸旧运河，在惠济正闸之下，张王庙前，乃雍正年间运道。乾隆二年，于旧河迤南开挑新河，建造通济福兴正越四闸。四年，经大学士鄂尔泰总河高斌奏定，春初水缓，将新河各闸坚闭，重运仍由旧河行走。重运过竣，将旧河堵闭，船只均由福兴通济二闸行走。三十六年，停走旧河，筑坝拦截。三十九年，于堤东建进水涵洞一座。今废。南岸济运坝，原建于康熙四十一年。引三岔河之水，由文华寺河入运河。迨后河水渐高，皆由运口分入，随做砖工。惟乾隆十五年奏开泄水济运，旋即堵闭。

。

护城河。自文华寺闸下起至青荡湖，长一万四千八百九十三丈五尺，两岸俱有堤工，万历十年开。天启三年，浚以通漕。康熙三十八年建板工八百余丈，以障湖水。雍正八年，浚河四千余丈，培堤一万六千余丈。乾隆十年，又浚河头。护城河，起山清交界文华寺，袤八十余里，注入白马湖。康熙年间开挑，分泄运河异涨，嗣缘民田数千顷，岁被淹没。经河督高斌改挑运河口时，于闸外筑堤堵闭，民以为便。乾隆九年，复建双孔涵洞，遇异涨方开。惟是清水入运，建有四闸，重重关锁，不致泛涨。有竹络等坝，足资宣泄。自有此洞，往往并非异涨，递行开放，漂没田禾。知县金秉祚详请遵循原议，非异涨不开。

范公河，清江浦有古河，宋乾道时所挑，其迹湮矣。明末，凤泗流寇炽甚，淮安戒严。船政同知范鸣珂，循故迹挑河划守，土人感之，因以名。河绕普应寺前，抵寺西南杨家庙。康熙十六年后，因河口水势大盛，欲减水保堤。乃从文华寺下建五孔桥减水坝一座，坝内挑河二道，一达杨家庙，一抵清江浦船厂运河。范公堤，皆范公河故迹。然运河底高，水不能出。又南阻永济河，宜于永济建闸，开浚洋信港，引水下白马湖，以免泛滥。里河南岸，兵三堡上首，旧有文泉洞一座，分泄运河水，由文渠沟达玉带河。五孔桥石闸一座，康熙三十五年建。上自五孔桥起，下至云县坝运堤止，名玉带河。五孔桥西石涵洞一座，康熙五十九年民建。引运河之水，灌溉民田。其水由护城河下达此洞，久经闭塞。

永济河。一名新河，治西南二里，自运河西岸杨家庙起，达武家墩。明万历九年漕抚凌云翼开挑。以备清江浦黄河啮堤之虞。未几清江堤瓷石运艘，仍由正河行。此河徒费民力无用。而湖西民田水不得出，终岁淹没。经前邑令孙肇兴建伏龙洞以泄之。即地洞口是也。久之亦湮。康熙二十五年，续题河工善后事宜，复循故道增挑，以运高堰大工物料。此河既不可废，宜于西南接洋信港故道，开浚建闸，以备蓄泄。蓄则闭闸，以运工料。泄则开闸放水，由洋信港入白马湖。而引五孔桥新挑河之水入于永济河，亦建闸以备蓄泄。两边多设涵洞，以时启闭，则百余年之害可除，而此一隅之水利可兴也。

伏龙洞。明运河以西田皆膏腴。自开永济新河，由杨家庙达河口，东西筑堤，积水无所泄，田沈釜底。邑令孙肇兴乘挑河之隙，穿漕河底，使漕堤以西之水，从涧河东泄于海。遂为木洞，中空，高广各三尺，长三十五丈，横掘漕而瘞之，名曰伏龙洞。西出西堤以吞，东出堤以吐。洞上甃石，石上皆土。穿漕渠底，浚堤东为渠。引水入宝带河，达涧河，于是湖西千顷之畴，复为良田。

运河西岸状元墩草闸一座。嘉庆十五年春，总河吴璥副总河徐端奏建。备泄运涨，即十四年漫工堵合大坝，改为钳口坝。以二坝改为草闸，随时启闭。十九年堵塞闸下，挑河筑堰，引草闸所泄之水入护城河，下达白马湖。运河西岸涵洞五座。

白马湖。治南六十五里。《南河志略》云；“去宝应北十五里，与山阳接境。昔受

洋信港之水，今高堰减坝水下。若高邮车逻等坝不多开放入下河，则高宝湖逆涨入白马湖，而西乡岔河一带，田亩尽被淹没。”

东河永利闸盐河，本名故沙河，今名乌沙河。起闸口，分运河水运盐，由渔滨河入马家荡，故沙河讹乌沙河。《南河志略》云：“在郡城西通智信二坝，以备车盘货物入外河。久湮废。盖由东至北转西达于运河，其故迹也。今乌沙在郡城西，引运河之水，从永利闸进水，北至利济桥西。分一支西北去，达三坝，曰盐河。一支东去，径利济桥石桥，抵三孔石涵洞，曰乌沙河。犹故沙河遗迹。此河之西岸，有山子湖，霪雨积潦，亦藉此河宣泄。乾隆八年，奉旨挑浚，起自永利闸下至三孔石涵洞，长一千一百七十二丈，面阔六七八丈，底宽二丈五尺、三丈不等。闸座重拆建，用银三千六百六十九两零。”

盐河。治北大河故道也。明宏治后，河淮交会，下清江浦，冲相家湾西桥，绕过新城北门外，径仁义礼智信五坝，有啮堤薄城之患。万历四年兵备副使舒应龙建议：由草湾开河以杀其势。屡塞屡开，行三十里复与正河会。厥后南滩水缓沙停，逼大流尽归草湾新河，去城甚远，于是故道悉淤。三城恃以无恐，河滩变为盐厂。尚有旧河形如沟，长二十余里。自钵池山后，抵新城北门外东坝止。为今日盐薪要道，土人呼为盐河。本来无坝，因蓄水，运盐而设。乾隆八年，因奉旨挑浚乌沙河鱼滨河，灌溉民田，而盐河底仰走水，盐船难行。于是汇入水利工程，南自乌沙河分流处，西北至草湾三坝，曰盐河，长二千五百丈。浚河面宽六丈，底宽三丈，深八九尺不等，用帑九千三百八十一两零。

鱼变河，俗讹鱼滨河。在郡北运河东岸，有永利闸引运河之水入乌沙河东，为鱼变河。经凤谷村达青沟夹河，注马家荡，长百里。前明两岸皆稻田，号为膏腴。自盐分司移驻河北掣盐，于是从乌沙河尾西北凿河一道，抵草湾三坝，名曰盐河，以运盐艘。缘盐河底，高于鱼变河三尺，难以蓄水。商人于鱼变河头，砌石涵洞三孔。盐河无水，则将三孔堵塞，灌满盐河。开三孔放水，奈洞流微细，鱼变河渐淤填浅狭，两岸无活水。乾隆八年，据士民浦之玫等呈请题准挑浚。自乌沙河三孔石涵洞起，至马家荡，长一万八千三百二十五丈六尺。两次用帑银十二万两零。永利闸亦重拆建。十一年，三孔石涵洞建裕民闸一座，下板三层蓄水入盐河，余水从板上滚下入鱼变河，灌溉民田，长川开放。十三年，府卫通详长川开放，河院批：“山邑永利裕民二闸，每岁重运经临，即便堵闭。尾帮完浚，启板放水。勒石闸旁，永定章程。不必预定期限，令里河主簿专司启闭，毋得后时。淮扬河道转飭遵照。”

市河。上承旧城西门兴文下闸，分运河一线之水，贯文渠，经南市桥八字通便等桥，兼泄城南积潦。出北门，转东绕夹城内。出阜城关明代下涧河，通城外市河，蜿蜒东去七八十里。下注马家荡，入射阳湖。乾隆八年，知县金秉祚详请开挑。起东门阜城关，至马家荡，长一万四千五百七十八丈，面宽四丈至六丈，底宽一丈五尺至二丈，深三尺五寸至一丈五尺。建木桥三，跨河上，用帑二万二千八百七十七两

零。十年，又详请于小河口建石闸一座。因涧河堤高，开放之时，水涌溜急，碍难启闭。将南门外太平小石闸修建开放，分泄涧河之水。由护城濠河会入阜城关市河，得以灌溉。

宝带河。明万历间邑绅张世才请开浚城南宝带河，形如环带，三折回抱。起自杨家庙兴文闸，承运河分流之水，至巽方转北行。又往西，过小吊桥马福桥北行。转东过大吊桥龙王闸，抵龙光阁下长流。北骛过韩家桥，至联城东门外接涧河。

涧河。相传宋时所开，古名菊花沟。上承诸闸洞之水，由新城东关至北涧南涧经卡塘，至黄浦之涧河。下接寿河出泾口，归射阳湖入海，此古涧河也。自淮黄冲决，赦道堙淤。明嘉隆间漕抚王公宗沐环城筑堤，甃石岸四十余里，以防再决。而郡城内外积水，不能宣泄，乃另辟涧河。起联城门外龙王庙东，尽于寿河寺，长三十里，阔六丈，深一丈，直下寿河，名曰大涧河，即今涧河也。又建闸于郭家舍，以备蓄泄。后因范家口决，河复湮汨，万历二十一年总漕李公戴委知府马化龙浚治，深阔如前。未数年，知府刘大文重加挑浚。天启四年，知府宋祖舜复浚。国朝初年，深通如故。自黄流分入涧河淤高，反闭水关，以防倒灌。康熙三十二年，漕督兴永朝大挑涧河。工甫半，公蒙召还，其工中辍。三十九年，奉旨挑浚。六十年，起民夫挑浚此河，上承城南杨家庙兴文闸，引运河之水经宝带河，下接联城东门外涧河，经车桥至流均沟，下马家荡。蜿蜒百里，两岸支渠无数，皆股引涧河之水以溉田。旧有龙王闸，以泄三城积水，入涧河。乾隆八年，挑浚市河，深通涧河，身反仰龙王闸泄涧河之水十之七。乾隆十年十一年，知府卫哲治知县金秉祚力持坚闭龙王闸之议，东乡频年大稔。

故城河。古寿河也。唐楚州山阳境东有寿河，景福初杨行密遣将张训李德诚败徐州兵于寿河，遂取楚州，即此。旧在治东南五十里。西南接黄浦涧河之水，东入射阳湖。明宏治间，尝挑浚以达兴盐高宝等处。万历二十一年，漕抚李公戴浚涧河。次年，复自寿河寺下接车家桥，东至射阳湖，计长二十里。开浚深阔如前。今车家桥以南，有小涧河一道，分流溉田，以达于湖，亦寿河支派。昔泾口淤浅，涧河几至断流，水曾从小涧河而去。

涵洞河。运河东岸，旧有头浅涵洞六座，二浅涵洞二座，三浅涵洞五座，又风水涵洞二座。每洞下有渠一道，引运河之水，从溪河入射阳湖。但需水时，即粮艘过尽犹闭洞。声言刷河雨潦暴涨开洞，称为泄运涨。沧州陈公为河督，飭十三涵洞分上下，截五日，开五日，上下递互，著为例。洞下各渠，向例数年一浚。近数十年不浚，渠身浅窄，旱则水不足溉，潦则易溢。北溪河，上承各涵洞之水，过高坝桥七孔桥，东骛下荡，入于射阳湖，淤浅已久。一遇霖潦，水难骤泄。前知府朱奎扬详请起民夫挑浚。但七孔桥以上田皆上腴两熟，利于浚溪河。七孔桥以下多圩田，另有泄水河，不用此溪泄水。十一年，知府卫哲治，复加疏浚。详请“十年一大挑，五年一捞浅”为例云。

泾河。运河东岸有闸，分运水通塔儿头金吾庄，趋射阳湖东北入海，杀运涨，溉田亩。长八千二百五十丈，面宽五丈，底二丈五尺，深六尺。明正统五年，修泾河坝，以通舟楫。景泰初，知府邱陵建闸，置仓，交兑盐城诸县漕粮。久之，仓废闸存。厥后时塞时开。万历二十二年。河漕都御史徙建双闸。南河郎中李之藻重修。康熙同知王同春改建一闸，其工极坚。后因运河淤垫，每闭闸蓄水济运。及夏秋运河泛涨，则闸板尽启，水势弥漫可患。二十八九年间，因闸圯暂闭，水不行者十年。三十九年，总河张鹏翮奉旨挑浚，河成闸亦另建。乾隆五年发帑兴浚。

南溪河。即黄浦溪，在泾河闸南十里，为山阳宝应交界。原无溪，明时高家堰溃决，此地当其冲，屡塞屡坏。万历七年，总河潘季驯既筑高堰而坝，黄浦水竭根见。一夕雷雨，忽见穴，有首骨齿角，金日龙也，遂名其地为蛻龙潭。后于堤上建双闸，以泄运河异涨，属宝应县管。溪之为河，半属宝应，半属山阳。自黄流淤垫，河心日高。曲防加堤，争讼不已。康熙三十六年，运河水涨，闸倾溪河不能容。三十七年，将闸永闭，而溪河浅狭难泄田中积水。后复修闸，以备运河宣泄。近则闸圯河淤。乾隆八年，估勘入缓工未浚，运水涨，则开运河西岸竹络坝。西乡民田多付波臣。运河又经宝应县西，西岸滨宝应湖，东岸皆有泄水支河，又南经高邮州城西。又东南流经宝应县城西，有支河东入城。又南流有支河，东入广洋湖，又南流西岸滨湖，有朱马湾闸支河口。又南有小九甸闸支河口。又南有狼几闸支河口，即泥水镇也。又南有越河闸支河口。又南有永安闸，有七里闸，俱有支河。又南东岸为界首镇。又南西岸滨高邮湖东岸，有支河东出，为三王沟。又滨湖而南，经永安工，西有二闸支河。又南有头闸支河。又南经高邮州城西，折而东，经城西南，稍与湖隔。东岸有支河口二，又南为火姚闸支河。

扬州府运河。即古邗沟水，旧日官河。北自淮安府山阳县界南流入，经宝应县、高邮州西。康熙五十九年，修筑高宝江都三邑西堤石工。雍正五年，总河齐苏勒加筑江都、宝应东西二堤。九年，总河嵇曾筠修筑高宝江都东西二堤，土工各数千丈。乾隆三年，总河高斌请帑疏浚，并筑堤工，上自河口，下至瓜洲闸，长三万七千八百八十六丈。五年，重修东堤，自高宝至邵伯，计二百余里。十年，大浚高邮官河。二十一年，东堤添建石坝。历加修筑。

运堤西岸。自淮安里河厅与扬河厅交界处，南为叶云洞，又南为叶云双闸，又南为竹络坝，又南为王簏洞，水通白马湖，在县北十五里，东西长十五里，南北阔三里。西连三角村，北接黄浦，北出有温山沟。又西有河名护城河，北入盐河。又西有鱼篮闸。又稍西当湖之尾，有浚河水，亦入盐河。县西五里，又有蒲塘沟，接白马湖。三里沟在县西三里，又接焉。县西北十里有张大夫沟，白马与青荡湖汇为一。又东为秤饲湾运堤。又南为北宏济大闸，又南为南宏济大闸，即瓦甸闸。又南为通湖小闸。又南为减水坝，堤外为清水湖，在县之南，东西长十二里，南北阔十八里。南连泛光湖，湖在县西十五里，东西长三十里，南北阔十里。东北连青水湖，南会津湖，西通晒火湖，湖在县南四十里。西通衡阳湖，湖在县西南六十里。西抵衡

阳镇。东入晒火湖，有金钗涧，由县南七十里入焉。有忠心涧，自县南八十里入焉。其南则高邮界矣。此涧南接安宜溪，东北入泛光湖。有赤水涧，自县西南七十里入焉。有鱼池涧自县西南八十里入焉。津湖在县西南六十里，东通运河，西北会泛光湖，南接高邮界，此湖《三国志》作精湖。《蒋济传》：“黄初六年车驾即发，还到精湖。水稍尽，尽留船付济。船本历适数百里中，济更凿地作四五道。蹴船，令聚。豫作脉遏断湖水，皆引后船。一时开遏入淮中。”即此处也。凡此诸湖，统名宝应湖。由草子河西北接高堰，又迤南行有南北束水堤，上承五坝。又通洪泽湖蒋家坝河。诸湖之西有阴鹭河，明万历十九年知县耿随龙所开。以灌西北高家坝、闸头桥等处高阜之田，并使舟行者不复由湖免风涛之险。白水塘，更在诸湖之西。（顾祖禹《方輿纪要》云：“在县西北十五里，阔二百五十里。北接山阳，西南接泗洲盱眙县界。亦曰白水陂。”）魏邓艾所作。与盱眙破釜塘相连。开八水门，立屯，溉田万二千顷。宋元嘉末尝决此塘以灌北魏军。大业末，破釜塘坏，水北入淮，于是塘亦涸。唐证圣中始修，开置屯田。长庆中复修。今县西南有徐州泾、青州泾。西南五十里，有大府泾。盖是发青徐扬三州民凿泾灌塘，因名。大府，谓扬州也。又县治西四里，有竹子泾，亦长庆中所开。广顺三年，南唐楚州刺史田敬洙请修塘溉田以实边，不果成。宋嘉定六年，献议于朝者，谓白水塘，东至浮图庄，南至褚庙冈脊大堰，废而不治。今脊犹在，若复之，宝应高邮诸湖相接，游波所及，如衡阳阜三角村等处，皆浸淫至城。形势日张，札本州委官相度，司法尤焞议未及行。又有羨塘，亦在县西南，与白水塘合。（《唐会要》：证圣中，开置白水塘、羨塘，屯田是也。）运堤，又南至界首西岸，入高邮州境。又南为通湖闸，又南为通湖港，二十有二。其石港曰万家塘，口门五丈五尺。曰杭家嘴，口门十二丈。曰通和桥，口门十二丈。曰夏家桥，口门一丈六尺。曰姚港口，口门十六丈。其土港曰越河头港，长六丈。曰施家港，长十三丈。曰思贤港，长十二丈。曰柳园港，长三十四丈。曰贾家港，长十二丈。曰陈家港，长二十丈。曰何家港，长二十丈。曰四汉港，长二十五丈。曰孙家港，长六丈。曰车逻港，长三十丈。曰旧越河港，长十二丈。曰新越河港，长十七丈。曰水庙子港，长十三丈。曰南陈家港，长十一丈。曰南孙家港，长六丈。曰薛家港，长六丈。曰秋子港，长八丈。以上土石各港，平时俱用草土实闭，湖水涨发始开，放入运河，以资宣泄。堤西为高邮诸湖，北连泛光白马，而通洪泽。凡天长以东诸水，尽汇此湖，长阔一百五十余里。湖之名目繁多，然皆无畔岸，莫可主名。今据旧志列其名目方向言之，盖当时犹未会为一也。曰新开湖，在州治西北三里。曰璧社湖，在州治西三十里。通鹅儿白湖，曰平阿湖，在州治西八十里。通天长县桐城河，曰珠湖，在州治西七十里。曰张良湖，在州治北二十里。通七里湖，曰石臼湖，在州治西北五十里。通璧社湖，曰姜里湖，在州治西五十里。通塘下湖，曰七里湖，在州治北十七里。西通鹅儿白湖，鹅儿白湖，在州治南二十里。通张良湖、武安湖，在州治西南三十里。通露筋河，曰塘下湖，在州治西四十里。通璧社湖，一名赤岸湖，其天长水道入湖之路，有秦兰河，在州治西六十里。自治山发源，入武安新开等湖，其河过天长县，至秦兰镇大桥。以北属高邮，有石梁山河，发大云山，过天长县入新开等湖。有三汉涧河，五汉涧河，皆自天长县北入新开等湖。其由高邮诸湖北通宝应诸湖水道，有华家滩。又东有相家涧，

又东有菜花港。其诸湖附近溪湾沟荡之可名者：曰石梁溪，在州治西北，自天长县发源，入新开湖。曰平阿溪，在州治西，亦自天长县发源入湖。曰樊良溪，在州治北，自天长县流入珠湖，即古之樊良湖也。樊良湖，见徐坚《初学记》云：“山阳县有樊良湖，射阳湖、津湖。”今樊良在高邮，射阳半属宝应，津湖在宝应，其初则俱属山阳也。曰曹庄湾，在州治西南十五里。康熙六十一年曾浚之。曰父子湾，在州治西五十里。通珠湖，曰落帆湾，在州治北十五里。曰柳沟，在州治西北。通平阿溪，曰观沟，在州治西北四十里。东接聂里黄林诸荡，曰拗沟，在州西北十三里。南入新开湖，曰展沟。在州治西北九十里，南属高邮，北属宝应。曰新沟，在州治西十里，东南抵运河，西接塘下湖。曰夹沟，在州治西二十里，昔人开筑，以避武安湖、曹庄嘴风浪之险者。又有北夹沟，在黄林中村镇，西属泗州卫，东属高邮。曰马湾荡，在州治西北三十里黄林村，东通新开湖。曰黄林荡，在州治西北三十五里，东通马家荡。曰聶里荡，在州治西三十里沛城村，南通七里湖，东至新开湖。曰三里荡，在城西七里。曰汉儿荡，在城西七里。曰烧香港，在州治西北十里，通鹅儿白湖。盖宋南渡后，画淮为守，烧香者不得之泰，皆至高邮东岳行宫，故名。曰茅塘港，在州治西十五里。雍正二年曾浚。曰罗家港，在城西二里。曰杨丝港，在州治西十七里。曰洋洋港，在州治西。曰四汉港，在州治西南十里。曰王家港，在州治西南五里，引高邮各湖之水，入邵伯湖，乾隆元年浚。

运河东岸。黄浦闸二座，在黄浦镇南。金门各阔一丈二尺，水入黄浦溪。东入浚溪，又东入黄昏荡，汇为马家九里等荡。由九里沟、李家沟西逮冈河，东至盐城县北串场。出范堤，由石磁天妃等闸入海。运堤又南有徐家小闸，今废。运堤又南有李家涵洞，有儒学涵洞，运堤又南有孙家小闸。此闸明闸暗洞，金门阔二尺四寸。运堤又南有七里沟，在县北七里，首受运河水，东入黄昏荡。运堤又南有跃龙闸，原系木涵洞，改建石闸，金门阔一尺八寸，水入城南门下望直港，入章思荡，通蚬墟火盆诸荡，亦入九里荡。出九里河，经盐城北串场河。出范堤天妃石磁等闸，入海。运堤又南有朱马湾闸，金门阔六尺六寸。水入章思火盆诸荡，汇入大纵湖。出东塘、西塘等河，经盐城县北串场河，出范堤天妃石磁等闸入海。运堤又南有杜阳涵洞。运堤又南有狼儿闸，金门阔六尺六寸，水入广洋湖。有长沙沟，水亦入广洋湖。经平望湖，入大纵湖。出西官河，经盐城县南串场河，出石磁闸入海。运堤又南有邱家涵洞，有范家涵洞，有从家涵洞，有

汜水闸，金门阔六尺六寸。又南有永安闸，金门阔三尺五寸。水入郭正湖，北汇广洋湖。经平望湖入大纵湖。出西官河，经盐城县南串场河，出石磁闸入海。运堤又南有成张涵洞，有成家涵洞。又南有减水石闸，内设矾心二座。计三门，每门阔二丈。有乔家涵洞、王家涵洞、军河涵洞、张家涵洞、王家涵洞。又南有子婴闸二座，在县南六十里。子婴铺北水入子婴沟，经时堡镇入护金荡。蜈蚣湖，出东官河，由纪家港归串场河，出范堤，由青龙、八灶、大团等闸入海。护金荡者，在兴化县北，合蜈蚣湖、大纵湖、九里荡等湖，汇为一。其东北出虾须沟，经阜宁县，出射阳湖口入海。从虾须沟迤南，如西建冈河、李家沟、九里河、东西塘河、东西官河

、兴盐界河、海沟河、白涂河，皆其通串场河。各按水道出范堤，自南至北，由丁溪、小海、草堰、苇子、白驹、一里墩、青龙、八灶、大团等闸入海。其自丁溪闸出海者，由王家港海口；小海草堰闸出海者，由斗龙港海口；苇子、白驹、一里墩、青龙、八灶、大团等闸出海者，由野潮洋海口。运堤又南至高邮州界，有界首闸，在界首镇，金门宽四尺六寸。水下马霓河，亦入护金荡。运堤又南有看花涵洞，宽一尺八寸，水下郭家大河，时家荡等处。运堤又南为陆漫镇闸。又南为庆丰涵洞。口门宽高一尺八寸。又南为清水潭。又南为二浅闸，金门宽四尺八寸。水下洋马荡，东汇马庄荡、董家荡，入护金荡。出海沟河、白涂河，归串场河，出范堤，由草堰闸入海。运堤又南为一浅闸，金门宽四尺八寸。水入北官河，下洋马荡，与二闸水道同。运堤又南为拦河金门闸，金门宽六丈五尺。又南为通湖桥涵洞，口门宽高一尺八寸。旧系通湖闸，改建。水下运盐河。又南为南水关涵洞，口门宽高一尺八寸。水由南水关入市河，出北水关，流入通湖桥引河，汇入运盐河。又南为琵琶闸涵洞，口门宽高一尺二寸。水下城濠，入通湖桥引河，汇入运盐河。又南为南关旧大坝，长六十六丈。系草坝，康熙十九年建，乾隆二十年永闭。又南为南关大坝，即旧五里滚水坝，长六十六丈。系石坝。康熙四十一年建。乾隆十一年加高。底石一层，墙高石脊七尺五寸。水下南澄子河，归总澄子河，经棋盘荡，出梓新车路诸河，归串场河，出范堤，由丁溪闸入海。运堤又南为南关新坝，长六十六丈，系石坝。乾隆二十二年建。墙高石脊一丈一尺。水入南关大坝引河。此坝地势最卑，坝底较诸坝亦为独深，尤不可轻易开放。其引河亦入澄子河，与南关大坝同。又南为柏家墩，旧大坝长五十四丈，系草坝，康熙二十年建。乾隆二十年永闭。又南为车逻大坝，长六十四丈，系石坝，康熙四十一年建，乾隆十年加高，底石一层，墙高石脊七尺七寸。水下菱丝沟，由澄子河与南关大坝同。又南为车逻耳闸，金门宽一丈二尺，乾隆五年建，水入车逻坝引河，又南为火姚闸，金门宽四尺八寸，水入淶洋湖。又南为三十里铺。又南经邵伯湖东。又南东岸并有泄水支河。又东南与湖连岸为露筋祠闸支河口。又南为稽家闸支河口。其西邵伯湖也。又东南至金湾。东岸有支河口四，经邵伯镇西。又南为三闸。东派为八字河。又南至湾头镇西北，有支河口。又南有夏家沟口。

运堤西岸。又南入甘泉县界有小河口。又有露筋闸外为邵伯湖。旧谓此湖东接艾陵，西接白茆，南通新城，北接甓社。自筑运堤之后，邵伯湖在上河，艾陵乃在下河矣。邵伯湖与黄子等湖通。黄子湖在府城北六十里，东通邵伯湖。赤岸湖又在黄子湖西。朱家湖在府城北五十里。其湖与邵伯湖相连之处，名汤家绊。新城湖，在府城西北四十五里。白茆湖，在府城东北四十五里。《万历志》云：“此六湖皆在官河上岸，水相接连。”邵伯湖西南有杨寿坝，大仪等处之水入焉。又西南庇丰庵有支河，甘泉山后老坝桥诸处之水入焉。运堤又南为荷花塘。今决口堵筑处也。又南为三沟闸。又南为鳅鱼港，为菜花港，为庙港，为陈家港，为木排港，为红桥港，为铁牛港，为梁家港，为母家港。自母家港以次而北诸港，俱汇为后河。北接邵伯湖后河。又西南汇为董家湖。西北则入朱家湖。朱家湖之南口，南流为王家河。西有梅家庄，阎家庄田沟。东有胥家庄田沟。王家河又南流至孔家桥，与董家湖水合

。东南行为尤家洼引河，流入尤家洼王家河。又于尤家洼引河稍西，分一支河，亦西南行。有钱家庄、葛家庄、谢家坟、卜家嘴西、卜家嘴东、田沟五处，与尤家洼俱入越河。越河在运河西北，对东岸金湾北闸起，由运河分出，迤南与东岸西湾坝相对止，归入运河。运堤又南有怀子河，汇小新塘上下雷塘之水，达槐家河入焉。雷塘在府城西北十五里。上塘旧长广六里余，下塘长广七里，即雷坡，其名始见江都王传。小新塘在上雷塘之东北，水注上雷塘，转注下雷塘，旧长广二里余。南宋赵范殪巨贼李全处。此三塘与句城塘及仪征县境陈公塘，号为扬州五塘。阅千余年，修筑疏浚，因时制宜，各有成效。逮明嘉靖中，五塘为豪权占废。国朝雍正六年议复。不可复成。止令将乌塔沟接句塘口，计长二千八百七丈。槐子河接小新上下雷塘口，计长一千八百四十五丈挑浚。其仪征县带子沟至陈公塘，见今接连运河，毋庸挑浚。

运堤东岸。南接甘泉界为露筋镇。又南为荷花塘。又南为昭关坝，在邵伯镇北五里。乾隆二十二年，与高邮州南关新坝同时建。合南关大坝、五里中坝、车逻大坝定为运河五坝。上与高堰五坝较准尺寸，相为表里。此坝下开支河，流入苻丝湖。北入淶洋湖，经总澄子河，东入棋盘荡，由梓新河归入串场河。出范堤，由丁溪闸入海。串场河者，南自泰州海安，首受运盐河水。东北至通远桥少折而西北。淤溪秦潼之水，上自泰州城北来，汇经东台县。北行直抵盐城县，为南串场河。又北抵阜宁县，为北串场河。所受之水，自兴化以南，如梓新车白涂诸河。兴化以北，大纵湖以东，各支河皆受焉。又南为二闸、三闸，俱有引河归入苻丝湖。又南为邵伯镇，又南为毛家桥支河，闵家桥支河，汇入南塘，归艾陵湖。艾陵湖在邵伯镇东。阮昇之记云：“齐高宗建武五年，遏艾陵湖水，立裘塘屯，即此处也。”其水正东出者，直至泰州以北，入淤溪秦潼，归串场河。其东南出者，经仙女庙，入运盐河。其东北出者，分为二支。一为宗村河，稍南入官河。一为小纪河，经淶洋湖东入总澄子河。运堤又南为北闸。又南为中闸。又南为金湾新坝，与南中二闸水，俱汇为金湾新坝河。至人字河头，分为越河。俱穿运盐河，南出江都县境之芒稻河、东西闸，归江。运堤又南为金湾旧坝，其水亦穿运盐河。南出江都县境之董家沟，会芒稻河，归江。运堤又南为东湾坝。又南为西湾坝。两坝水汇为东西湾坝河，穿运盐河，南出江都县境之石洋沟，会廖家沟入江。运堤又南为凤凰桥河，亦穿运盐河。南出江都县境之廖家沟，会石洋沟入江。运堤又南为壁虎桥河，亦穿运盐河。南出江都县境之廖家沟石洋沟入江。运堤又南为湾头闸，闸下水东行为运盐河，传为吴王濞所开，通海陵仓，自湾头闸起，东行七十里至斗门，入泰州境。又东过姜堰、海安入通州如皋境，东抵通属各场。自湾头闸下起，其北岸来水、壁虎桥水、东西湾坝水、金湾新旧坝水，及江都境之高家坝、孔家涵、徐家涵、杨家渡、顾家圩、五里庙、景铁沟、宜陵涵、龙耳河，以次而东诸水，皆通焉。其南岸则廖家沟、石洋沟、董家沟、芒稻河、秦塘河、白塔河，或分或合，皆入江之路。

折西南经扬州府城东，分二派。一南流，又分支津，先后由瓜洲入江。一西南流，经仪征县东北，又经城南，西南流入于江。稍折西南流，经扬州府城东，折而西南

，于城南南流，分为二派。曰三岔河。一南流经头闸，又分支津，东南经瓜洲城南入江。其正派稍西南，经四闸南入江为运河口。一西南流数十里，有带子沟。北自陈公塘来注之。又西南经仪征县城东北为响水闸。又南经城东为通济闸。稍南为罗口闸。经城南而西南入江。

又南经府城而南，至扬子桥、三汉口，分为二支。一支西南流，经仪征县东。又分为二，一南流至旧江口入江。一西南流至下江口入江，为上江运粮入河之口。一支南流即伊娄河，至瓜洲镇西南入江，为江南粮运入河之口。

运河西岸又南至高桥，桥以外有坝桥，以内为柴河，亦名草河。西南出长春桥，合保障河。保障河北至属冈下。又南有廿四桥水来注之。又南出红桥，经砚池口，至南门外二道沟入运河。《方輿纪要》云：“保障河，在府西四里，城北三里。旧有柴河。东连官河，西接市河入城。而城西一望平原，别无濠堑。崇祯十年，始自柴河口引城东运河，绕西郭，复折而西南，接城南二里之宝带河，仍合运河。延袤十六里。时又于近河东岸缘垒为城，上为敌台，因名保障焉。”运堤又南有黄金坝水。西行过邗沟庙，经迎恩桥，又南行至郡城北水关，与北城濠水合流，亦入保障河。运堤又南至郡城东北隅便益门，有城濠首接运河。濠口亦有坝，坝内水西经便益门，又西经广储门，又西经拱宸门，又西经北门，折而南过西门，又折而东过南门，入运河。其穿城市河，一自新城拱宸门水关入，南经大东门吊桥，又南经小东门吊桥，至挹江门、水门，出针桥接运河。此新城未建以前，城东面之濠河也。一自旧城北门水关入，至南水关出响水桥入运河。运堤又南至对岸文峰塔前，北折而西，名宝带河。明万历间浚，以挽河直流。运堤又西南为新河，亦明万历间浚，自南门二里桥入，西折而南，又折而东。运堤又西南至乌塔沟，句城塘水从此出焉。此沟与江都县分界。运堤又西南行，有戴子港、陈公塘，水从此出焉。运堤又西南行至仪征县，经四闸入于江。

东岸运堤。又南经郡城东关对岸有沙坝河入江。运堤又稍折而西。南有扬子桥水入江。又西南至三岔河南行。其对岸亦循高旻寺南行，经头闸，此河遂分支津。东南经瓜洲城南入江。其正派稍西南，经四闸南入江，是为瓜洲运河口。又三岔河西南行，经仪征县响水闸等四闸，西南入江，是为仪征县江口。

淮安以下，运河东岸至湾头闸，各闸坝泄下之水归海河道，山阳境内头洞起，至李宅洞止，水达北溪河，入马家荡，由射阳湖入海。迤南宝应境内黄浦闸水，入黄浦溪，东入凌溪黄昏荡，达九里荡，由九里沟西建冈河东至盐城县北串场河，出范堤，由石磁、天妃等闸入海。迤南乔家洞、学洞、孙家洞水入蚬墟荡，达马家荡，同前入海。县南跃龙闸水下望直港，入獐狮荡，由火盆蚬墟荡，达马家荡，同入海。獐狮荡之东亦有河道，北通马家荡，迤南汤问洞、朱马湾闸，从家洞郎儿闸各水，下獐狮火盆诸荡，汇入大纵湖，出东塘、西塘等河，由北串场河同前入海。迤南张成洞、胡成洞、永安闸、军民洞水，下广洋湖，达平望湖，北入蜈蚣大纵湖，出西

官河，经盐城县南串场河，出石磁闸入海。亦可由大纵湖之东，达兴盐界河，以出范堤青龙八灶二闸入海。迤南子婴闸，水下子婴沟，经时堡镇达护金荡蜈蚣湖，出东官河，由纪家港归南串场河，出范堤青龙、八灶、大团等闸入海。亦可由护金荡达北官河，分入越河兴盐界河，出范堤之前三闸入海。迤南高邮境内界首闸，庆丰洞二闸，头闸通湖桥诸水，下洋马荡、沙母荡、马奔庄荡，入护金荡，出海沟河、白涂河，归串场河。出范堤，由草堰闸入海。迤南南水关涵洞，琵琶洞水下运盐河，达棋盘荡，同下三坝之水，并入于海。又南南关大坝，南关新坝，五里中坝水，南澄子河，归总澄子河，经棋盘荡，出梓新、车路诸河，归串场河，出范堤由丁溪闸入海。亦可由棋盘荡向北通得胜湖，东经白涂河，出范堤小海闸入海。又南车逻坝闸，水下新泰兴港，达棋盘荡，同前入海。又南火姚闸，水下淶洋湖，达棋盘荡，又南甘泉县境邵伯以北昭关坝、三闸、二闸诸水，下苻丝湖，北入淶洋湖，经总澄子河，东入棋盘荡，由梓新河，同前入海。以上各闸坝下注之水，出范堤各闸，入海者列下：

下河各州县境内，上承下达河道：山阳县境，泾河、涵洞河、北溪河、南溪河，盐城县境，新官河、东西界河、南串场河。以上新官河出天妃口，东界河南串场河俱出石磁。而县境内西南一带之支河，又俱入此三河。东官河、纪家港河、西官河、射阳湖、北串场河、东塘河、西塘河、马家荡、西盐河。以上三河一荡，俱入射阳湖下海。而县境内西北一带之支河，又俱入此三河一荡。廖家港、草堰河，旧名院道港。新洋港。以上两港一河，皆范堤之东，为入海之路。阜宁县境，串场河。宝应县境，黄浦溪、蚬墟荡、火盆荡、獐狮荡、广洋湖、三王沟、子婴沟，高邮州境、洋马荡，即清水潭之上游。沙母荡、马奔荡、运盐河、澄子河、茭丝沟、泰兴港、淶洋湖、海陵溪河，甘泉县境，葑塞湖、艾陵湖、山阳河，兴化县境，大纵湖、平望湖、护金荡、棋盘荡、东塘港、西塘港、串场河，以上皆兴化县之经河南北横亘者。以下皆东西河，上承西来之水，东出范堤，以入于海者。兴盐界河、白涂河、东路河、梓新河、蚌沿河、泰州境、运盐河、东台县境，梓新河、蚌蜒河、运盐河、串场河。

范公堤。即捍海堰。起自阜宁县之庙湾，射阳湖南，经盐城、东台折向东南，沿如皋、通州至吕四场天后宫止。延袤六百一十一里有奇。内自庙湾至丁溪场堤，长一百九十二里八分。自丁溪至富安场堤，长九十九里二分。自富安至吕四场堤长一百五十三里零。

盐城县境，北草堰闸、上冈闸、天妃闸、天妃越闸、石鞑闸。兴化县境，大团闸、八灶闸、青龙闸、一里墩闸、白驹北闸、白驹中闸、白驹南闸。东台县境，草堰越闸、亦名苇子港闸、草堰正闸、小海越闸、小海正闸、丁溪闸。

运河自镇江府丹徒县西北之京口，经府城西南，有支港，入于大江。又东南经练湖东，经丹阳县西北分绕城之左右。而南分一支入于大江。又南有南运河，自溧阳金

坛合长荡湖支津及太平河来会。又南有丁义河，白鹤溪，自金坛县来会。

江南运河。自镇江府治丹徒县西北之京口，南经府城西稍南入闸，折而东，经城南。又东十余里，经丹徒镇南。又东折而东南，有支港北流，至大江。又东南经新丰镇西、上下练湖之东，至丹阳县城西北。分络城之左右而南。其东经城北者，东北分一支，为九曲河。东北至包港镇，北入大江。运河至城南有南运河。南自溧阳、金坛，北流会长荡湖，支河及太平河来会。又东南流，会南运河。东北出之支津。又南数十里会南来之丁义河。又东南会南来之白鹤溪。镇江府运河，自常州府武进县界西北流入，经丹阳县城南。又西北流经丹徒县西。又北逾大江入扬州府江都县界。雍正三年，诏发帑修浚运河闸坝，自江口至奔牛闸一百六十里。其岁修则以江浙原编修河银协济。乾隆七年，抚臣陈大受奏请每岁捞浅，责之丹阳、丹徒二县县丞，六年大挑，专责镇粮厅承办，以为定例。

漕渠。旧志不载渠所自始，今谨按王志而参考之。秦凿丹徒曲阿，齐通吴会。随大业六年，敕穿江南河，自京口至余杭八百余里，广十余丈，使可通龙舟。宋大圣中开新河。庆历中疏蒜山河，治平中，修夹冈河道。政和中开西旧河，乾道中自丹阳浚至夹冈，自利涉门浚至江岸。淳熙中自京口闸浚至江口，嘉定中自江口浚至城南门。元至元、大德间，屡募淘浅。泰定间复加浚治。明洪武初，京口闸废，东南漕运转新河。江阴二港以出江，多为风涛所阻。镇江府刘辰，乃于京口至吕城百二十里作坝修闸，运道乃通。永乐间浚镇江京口新港及甘露三港，以达于江。漕舟自奔牛溯京口，水涸，则改从孟渎右趋瓜洲，抵白塔，以为常。永乐二年，浚丹徒通湖旧河。景泰元年，筑丹阳甘露等坝。天顺中重浚，复凿社稷坛西隙地，以通濠埕，达于漕河。正德二年，复浚白塔河，及江口四闸，自镇江里河开浚。漕舟出甘露新港，径渡瓜洲。而白塔北新，皆以江路险远，舍而不由矣。崇祯间，张国维巡抚江南。十一年筑镇江漕渠，报竣。崇祯初，知县石确重浚漕河，极其宽广。此后民得休息二十余年。本朝顺治九年开浚，康熙六年重浚。

漕渠，在丹徒界者，四十五里，在丹阳界者，九十里。地势如建瓴，上置京口闸，下置吕城闸。每冬闭闸蓄水，以济漕艘。不足则以湖水助之。又去吕城十八里，设奔牛闸。水利官亲临闸上，俟漕艘毕入，先闭奔牛闸，后启吕城闸，以防泄。嘉靖之季，此制渐弛。各运河水浅阻，辄驱百姓开濬。随濬随淤，岁以为常。知府吴搢谦、曹一鹏、范世美，始修复旧制。徒阳两邑民，挑京口一带运河岁竭财力。至雍正二年，特谕督抚漕河四臣悉心筹画。或令地方官支用地丁钱粮，或令河员专司其事，于河帑内开销。再浙省苏松向有协济之例，或令六郡共襄工费，以济运道。妥议以闻，是年会议大挑，物料人工，动用国帑。其岁修仍令六郡协济，而责之徒阳二邑。疏上，敕部议报可。其浚河人夫，比照淮河之例，官为雇募，豁除徒阳民累。至每年捞浚，动支乐生洲租息。

元天历二年，重建漕河分渠，通江各建石闸，以引蓄江水。

练湖。在县北周回四十里。《舆地志》：晋时陈敏为乱，据有江东，务修耕织。令弟诣遏马林溪，以溉云阳，号曲阿后湖。《世说新语》：谢中郎经曲阿后湖，曰故当渊，注停著，纳而不流。即此。一日练湖，一日练塘，在县治北一百二十步。唐时近湖居民筑堤横截，一十四里，取湖下地作田，遂分上下二湖。永泰中，转运使刘晏、刺史韦损状请重开下湖。南唐昇元中浚治之，复作陡门，以通灌溉。宋绍圣中苏京重浚。绍兴七年向子湮增二斗门，一石磁。淳熙中增置陡门磁函。景定中修筑岸埂，元初居民占租为田。至元三十一年仍浚为湖。大德九年重修。泰定元年复加修筑。明洪武辛巳，知府刘辰、知县董复重修埂闸。正统辛酉，知县陈谊，令耆民督役筑埂植柳，及修东埂二陡门。景泰中巡抚都御史周来学又加修治。成化初知县蔡实召民修筑坍塌，加修陡门函管。宏治中知县高谦复修筑之。万历十三年知府吴橐谦重立湖禁。

九曲河。在丹阳县北首，起漕渠尾距江口委折七十余里。又东南分一支，曰孟河，入大江。至常州府西北，分二支，曰桥河，曰新园河，入大江。有长荡河支津，自宜兴县来会，分一支经江阴县入于大江。又东分一支曰漕港河，通江阴、常熟、昆山、太仓诸境运河，经无锡县西北，分一支经江阴会诸水入大江。又南有湖埭镇，水自溧阳、宜兴、金坛来会，经无锡县城。又南分一支为二派，通常熟昆山诸境。又东经吕城镇，又东南经奔牛镇。稍东南分一支，曰孟河，北流百余里入大江。又东至常州府西北，分一支曰桥河，即得胜港，东北流九十里入大江。又东至府城西北隅，分一支曰新园河，东北流百里入大江。运河分为二派，其一经城西而南，有直塘河，西自金塘城东来会，折而东经城南，有长荡湖，东北出之支津，自南经旧塔镇，北流来会，即宜兴城北之运港也。其一东经府城北而东，分一支为山塘河，通江阴县南诸河。又分为二，一北于君山入大河，一东曰横河，东入大江。其南经府城东，会城西南水，东南流。又东分一支，曰曹港河。东至四河坝，北达江阴，东通常熟，东南连昆山、太仓者也。又东南经横林镇西。又东南至无锡县西北境。东分一支北流，曰亭塘河。东北会诸渠于四河坝，以北达江阴。东流汇为闻庄崇村西坪三荡。北会黄泥港、泰和塘二河及岩塘河。东北至杨舍镇，东入大江。而东南支渠曰长泾白湖，直接常熟运河。又南有湖埭镇北一水，自西接溧阳，西南接宜兴，西北接金坛，东流来会。又东南至无锡县城，分络左右。而南有太湖北口，于城西南相会。运河自城之东南，东南流经荡口镇西南。东分一支为二派，北曰荡口河，东北会白湖水。东南曰白渎河，东北会昆城湖于常熟之南。东会元和塘水及新河塘湖于昆山之北者也。

常州府运河。自苏州府吴县界西北流入。经无锡县城东，又西北流。径武进县城南，又西北流入镇江府丹阳县界。《通志》：运河，在府南。自望亭入无锡界。流经郡治西北。抵奔牛镇。达于孟河。行百七十余里。吴夫差所凿。随大业中，自京口穿河至余杭，拟通龙舟。此其故道也。自唐武德后累浚，遂为江南之水驿云。《河渠志》：望亭北，为常州府无锡县境。又北二十里曰新安。又北三十里，经县城南，引而西北，十里至高桥，合江阴县运河。又北二十里经洛社。又北二十里经横林

，为武进县境。又引而东北，十里经戚墅堰，十里经丁堰，二十里达常州府城。

江阴运河。自邑南迎无锡五渎之水，过青旸崇市，会于九里河，屈曲面北，抵朝宗门南水关，入城。宜兴荆溪运河，由庆源门抵钟溪六十里为武进界。

剩银河。在县西北六十里。南通得胜新河，北流十八里，入扬子江。明洪武二十五年疏凿。临江置闸，永乐九年堙塞。闸官傅文达以闻，命廷臣按视，谓非要道，闸与官俱废。

洞子河。在县西十里。南枕运河，北入澡子港。

得胜新河，旧名烈塘，在县西十八里，连江桥，南枕运河。北行四十三里入扬子江。宋绍熙间，郡守李嘉言尝浚。临江置闸，即魏村闸。明洪武二十四年重浚，深二丈，广十二丈，改今名。孟渎河，即古孟渎。在县西三十里奔牛镇东，南枕运河。北流六十里入扬子江。《风土记云》：“七里井有孟渎，汉光武初尝潜宿井旁，民为指途达江浒。即位，命开此渎。唐元和中，刺史孟简浚。延袤四十一里，溉田四千余顷。南唐保大初修水门。宋庆历三年，令杨珣谕民疏治，复通江流。《祥符图经》引巴州刺史羊士谔记云：此渎以近孟城山得名。或云孟嘉侨寓之地。又云：孟简初浚，未详孰是。明洪武二十七年重浚，止通轻舟。闸官裴让陈江南漕运之利。永乐四年，命通政赵居任等率常苏松三府丁夫浚导，仅十昼夜讫工。比旧倍加深广。宏治八年复淤。命工部侍郎徐贯疏濬，浹月告成。嘉靖初，跨孟渎筑城备寇，河复淤。二十五年，知县杨巍丞吴文泮重浚。万历五年御史林应训募夫再浚深广，并及支河。国朝顺治十六年议沿江列戍，凡通江支河，悉闭塞，西北诸乡屡告旱灾。康熙二十年，巡抚慕天颜疏请重浚，募夫挑堰。三月复故道，江潮灌输，水利之大益也。又南经浒墅关，有光福河，自太湖来会。又东南至苏州府城，分络左右，而南有木渎河，自太湖合石湖诸渠来会。城东南北三面支港纵横，属县并达。

运河，又东南经浒墅关，有光福河，西自太湖，东流经木渎镇北，而东来会。又东南分为数汉。正派东南经虎邱山麓。又东南至苏州府城西北。分络左右而南。于城之西南有大渎河，西自太湖，东流经金墅镇，北合石湖诸渠来会。城东南北三面支渠纵横，属县并达。运河于府城南稍东而南，又有太湖诸水，支汉相接。又南至吴江县北，又南经城东有太湖支津，东南流为吴淞江。又东南并太湖经八拆镇。又东南有松江府河，自东南来会。又南经平望，又南经梅堰。有溪河，即湖州府运道也。西南经震泽镇，东北流来会。

苏州府运河。自嘉兴府秀水县流经震泽县南平望镇，曰南塘河，亦曰上塘河。与荻塘河合流，曰官塘河。西北行四十里，至吴江县城东，曰北塘河，亦曰古塘。凡三十里，至夹浦入长洲县界。又西北入吴县界为胥江，为南濠。又北绕白公堤，出望亭，入无锡县界。《明一统志》：“运河在府城西十里，南连嘉兴，北接无锡。又

有新开河，在府西三里南濠，其水由阊门运河转西北入枫桥运河。”

吴县、长洲、元和三县运河，在府城西。《漕渠考》：“自吴江县南平望镇，接嘉兴府界。引而北，四十里抵吴江县。又北五十里，经府城西。又北三十里，达浒墅西。又十五里至望亭，接无锡县界。”水利书云：“运河自嘉兴石塘，由平望而北，绕府城为胥江，为南濠。至阊门，无锡北来水，自望亭而南，经浒墅枫桥东出渡僧桥，交会于阊门，绝湾湍急，故钓桥为第一洪。”昆山，新阳二县运河，曰至和塘，在城南，旧名昆山塘。北纳昆城湖，南吐松江，风涛驰突，为舟楫田庐患。宋至和二年，县主簿邱与权修筑堤防，横绝巨浸，积土为塘，因以纪年为名。自是相继修浚。今自府城娄门而东北二十里经沙湖。又东经唯亭，及真义浦，至县治以南，绕城为濠，东行转北。一北行而东，横贯城中，又东入太仓州界。常熟、昭文二县运河，在县城南，又南十五里，历华荡。又南二十五里，为吴塔，与长洲接界。又南为永仓敌楼，经蠡口陆墓，抵郡城齐门，凡九十里。折而西，合于枫桥运河，旧名元和塘。唐元和三年郡守李素所开，今呼为常熟塘。

经吴江县北，而东贯吴淞江，又东南有松江府河来会。

吴江震泽二县运河，在城东。自嘉兴府王江泾而北，凡三十三里。至县境之平望镇者，曰南塘河，亦曰上塘河。自湖州府南浔镇而东，凡五十三里。至平望，经茑脰湖与南塘河合者，曰西塘河，亦曰获塘河。二河既合，曰官塘河。西北行四十里，至城东，又引而西北，曰北塘河，亦曰古塘河。凡二十里至夹浦，入元和县界。

吴淞江。古名笠泽，亦曰松陵江。自太湖分流，出吴江县城东南之长桥，东北流，合庞山湖。又东北经唐浦折东南流十余里为角直浦。又东南流经淀山湖，入松江府境。合赵屯大盈顾会崧子盘龙五大浦，流入上海县西北境之宋家桥。又东南流至县东北三十六里，与黄浦合。又迤邐为吴淞口入于海。

松江。旧名吴淞江，后以水灾去水从松，亦曰松陵江。自吴江长桥东流至尹山，北流至甫里，东北流至淀山。北合赵屯浦，又东合大盈浦，又东合顾会浦，又东合嵩子浦盘龙浦，凡五大浦，至宋家桥，转东南流与黄浦会而入海。

黄浦。在郡南境，或称春申浦。其首日横潦泾，受黄桥斜塘及秀州塘水东流至詹家汇，为瓜泾塘，演迤而东。凡南北两涯之水，皆入焉。至邹家寺折而北流，趋上海县。东西两汇之水皆入焉。明洪武间 吴淞江淤塞。永乐元年浚江通海，引流直接黄浦，遂名黄浦江。今横阔六七里，折东北入海。

娄江。今日刘家河。自太湖分流于吴江县西北十八里之鲇鱼口。北流至苏州府城西三十里之木渎口。由胥门外日晖桥入运河。经城东为娄门湖。又东至渎墅湖，又东为陈湖。又东受阳城、巴城二湖之水，经昆山县城南。又东四十里，经太仓州城南

，自州西南诸水悉会。又东稍南七十里曰刘家口，入于海。七鸭浦，在太仓州北三十六里，本娄江之别支。自昆山至和塘而北，合常熟诸水为七浦，经州西之直塘市。又东三十里经沙头市涂松镇，至七鸭口，入于海。

薛淀湖。一名淀山湖，在府西北七十二里。南接三泖东山大盈浦，北由赵屯浦以泄于松江。三泖曰圆泖，曰大泖，曰长泖。烂路港，长十八里，界大小连湖之间。北接薛淀，南通泖湖。为华亭奉贤娄县金山青浦五县粮艘入湖运道。水势宽深，湖口近起沙带。粮艘自泖来者多由清水港，转入烂路港。娄江西受震泽，东径苏州府娄门东下。又东至昆山，为至和塘。又东至太仓州境为太仓塘。太仓塘自昆山县治东三十六里，至太仓州城。入大西门出东水门闸。吴淞江，西受震泽，东径夏驾浦。又东至嘉定，又东迤北至宝山。

太湖。即古震泽，亦名具区，又名笠泽五湖。环二省，常州、苏州、湖州三府，宜兴、荆溪、武进、阳湖、无锡、金匮、吴县、长洲、吴江、震泽、长兴、乌程、归安十三县地，下流入海。最大者曰吴淞江，曰娄江。太湖周三万六千顷，在江南常州府城东南百里，苏州府

城西南三十里，浙江湖州府城北二十八里。湖之上源，在西曰宜兴百渎，在西南曰吴兴苕霅诸溪。宜兴荆溪，在县城南。其在城西曰西溪，东曰东溪。凡广德、溧阳、金坛及县西诸水，俱汇流于西溪。贯城绕郭而东，是为东溪。又东北四十五里入太湖，曰百渎。又有竹山港，在县东北六十五里。

运河厅汛

扬河厅

扬州府，河务通判一员，守备一员。所管上接里河山宝交界起，下至露筋扬粮厅界止，计一百七十里。内宝应汜水二汛地界，属宝应，永安、高邮二汛地界，属高邮。为汛四：曰宝应，曰

汜水，曰永安，曰高邮。东堤一道，长二万五千九百二十八丈九尺。临湖西堤一道，长二万四千九百九十丈。

宝应汛，县丞一员，把总一员，协防一员，管堡夫四十名，兵一百五十名。汛地上自里河平桥汛界起，至汜水汛界止，计四十里。东堤一道，长六千五百八十六丈五尺。西堤一道，长六千五百八十四丈五尺。东岸黄浦闸一座，康熙十二年建。金门原宽一丈二尺六寸，砌石十三层。乾隆二十四年复修。嘉庆六年拆修。将金门收窄三尺，存宽九尺六寸，加石二层，共石十五层。分泄运河涨水入黄浦溪，经凌溪黄昏荡，由九里李家沟西建冈河东至盐城县北串场河，出范堤，由石达天妃闸归海。乔

家洞口门宽高各一尺二寸。明嘉靖三年建。水由黄浦闸河下达。学洞口门宽高各一尺二寸。明嘉靖三年建。水由獐狮荡归海。孙家洞，口门宽各一尺八寸。明万历三十九年建。水入獐狮荡归海。护城砖工，自太平庵起，至洪济闸止。长七百八十六丈，高八尺四寸至一丈四尺四寸。乾隆二十四年建。跃龙关石洞，口门宽高各一尺八寸六分。康熙二十五年民建。水由城内市河入广洋湖，达盐城天妃闸归海。砖工尾旧有拦河洪济石闸。明季所建。乾隆四十三年拆去西墙，展宽河面，现存东墙长二十四丈。汤问洞口宽一尺六寸。明嘉靖三年民建溉田，水入獐狮荡归海。以上东岸堤闸，临运堤工迎溜之处，随时镶护，并无一定。西岸叶云洞，口门宽高各一尺六寸。康熙五十五年民建溉田。水入宝应湖。叶云双孔石闸一座，金门每孔各宽一丈，高一丈二尺，计石十二层。乾隆四十三年建。减运河涨水入竹络坝下引河，由白马湖归宝应湖。竹络草坝金门宽八丈，雍正九年移建。减运河涨水入宝应湖。嘉庆二十四年堵塞。王鼐洞，口门宽高各一尺六寸。康熙四十九年民建溉田，水入宝应湖。梁淮洞，口门宽高各一尺六寸。康熙五十一年民建溉田，水入宝应湖。通湖闸一座，金门宽一丈二尺，计石十三层。乾隆五十年民建溉田，水入宝应湖。龙亭南窑双孔石闸二座，金门每孔各宽一丈二尺，计石十五层。嘉庆十八年建，减泄运河涨水，均入宝应湖。临湖越堤一道，长一千九百六十三丈五尺。内白田铺对岸砖工，长二百二十八丈，高一丈。康熙三十八年建。秤钩湾起，至宋家尖止，石工长一千六百三十六丈五尺，计石十层。明万历四年建。接下石工长六十七丈，计石十层。康熙三十八年建。又接下砖工长三十二丈。乾隆十一年建。石工之外，嘉庆二十五年在宋家尖抛碎石坦坡六十八丈。以上西岸工程临运堤工，遇有溜之处，随时镶护，并无一定。

汜水汛，主簿一员，千总一员，协防一员，管堡夫四十名，兵八十六名。汛地上自宝应汛交界起，下至永安汛界止，计四十里。东堤长五千六百六十一丈九尺。西堤长五千一百四十五丈七尺。东岸朱马湾石工长一百二十丈，计石十层。康熙十八年建。朱马湾闸，金门宽六丈六尺，原石十三层。明天启元年建。嘉庆十六年拆修，加高二层。从家洞，口门宽高各一尺二寸。明嘉靖三年民建溉田。郎儿闸口门宽六尺六寸，计石十三层。明嘉靖三年民建溉田。张成洞，口门宽高各一尺二寸。明嘉靖三年民建溉田。胡成洞，口门宽高各一尺二寸。明嘉靖三年民建。永安闸，金门宽三尺六寸，计石十三层。康熙十一年建。军民洞，口门宽高各一尺二寸。明嘉靖三年民建溉田。风水洞，口门宽高各一尺二寸。顺治十四年民建溉田。七里闸，裹头石工长二十四丈。明末原建系拦河石闸。乾隆年间，拆闸，改为石裹头。子婴滚坝一座计三圈。每圈各宽二丈，矾心二，各宽一丈。墙高一丈二尺。康熙十九年建。久废不开。子婴南闸，金门宽一丈一尺，计石十二层。康熙十年建。减运河涨水。以上各闸洞泄下之水。由各支河入广洋沙沟等湖，入盐城串场河，出范堤天妃闸归海。迎恩楼石工，长三十五丈，计石十二层。乾隆四年改建。以上东岸闸洞，其临运堤工迎溜之处，随时镶护，并无一定。西岸减水双孔石闸一座，名瓦甸闸，金门各宽一丈，矾心宽一丈，石高十二层。乾隆四十三年建。减运河涨水入

汜光湖。子婴西闸一座，金门宽一丈一尺，石高十二层。嘉庆二十二年，拆东岸北闸移建西岸，水入界首湖。海台庵迎湖砖工，长二百四十丈，砖石高一丈八寸。乾隆十三年建。柳园头迎河旧石工长十丈，石高十二层，明末建。柳园头迎湖砖工，长七十丈，砖石高一丈八寸。乾隆二十六年建。又石工长二百二十丈，石高十二层。乾隆三年建。又接下石工长八十丈，石高十二层。康熙三十八年建。风水洞对岸临湖石工外，嘉庆二十四年抛护碎石坦坡，长二百四十丈。

汜光湖，上接宝应湖，下达界首湖。其上接宝应湖处有小新河，长一千一百五十余丈。迤西又有大新河，长一千八百余丈。再西又有庙基港，长五百九十余丈。再西有涂家沟长一千余丈。迤南复有金钗涧河长一千九百余丈，则自宝应湖，径达界首湖者。其

汜光湖下达界首湖处名大旧河，长十里。以上西岸工程，其临运一面迎溜之处，随时镶护，并无一定。

永安汛，州判一员，千总一员，协防一员，管堡夫四十名，兵六十四名。汛地上自汜水汛界起，至高邮汛界止，河长四十里。东堤一道，长五千一百九十七丈九尺。西堤一道，长五千一百十二丈六尺。东岸界首闸一座，金门宽四尺六寸，石高十三层。顺治十年建。水入沙沟湖，由兴化青龙闸归海。看花洞，口门宽高各一尺八寸。明嘉靖三年民建溉田。水达大纵湖归海。庆丰洞，口门宽高各一尺八寸。明嘉靖三年民建溉田。水达沙沟湖归海。西岸迎湖界首起，至七里闸止，石工长一千七十五丈七尺，石高十层至十三层。康熙三十八年建。七里闸起至六满闸止，石工长一千六百二十五丈五尺，石高十一层。四十一年建。六满闸起至北裹头止，石工长一千四百四十一丈四尺，石高十一层，明末建。北裹头起至南裹头止，石工长九百七十丈，石高十二层。康熙四十一年建。界首湖上接

汜水湖尾，下连高邮湖，南北长一百余里，东西宽八十余里。以上永安汛两岸工程，其临运一面迎溜之处，随时镶护，并无一定。

高邮汛，州同一员，把总一员，协防二员，管堡夫五十名，兵九十五名。汛地北自永安汛交界起，南至扬粮厅甘泉汛界止，计五十里。东堤一道，长八千一百五十八丈五尺。西堤一道，长八千一百四十七丈二尺。东岸二浅闸一座，金门宽五尺三寸，石高十二层。明嘉靖三年建。乾隆十九年改金门宽四尺八寸。嘉庆十九年修，加石二层。泄运河涨水，由洋马荡与盐界河入青龙闸归海。头浅闸一座，金门宽五尺三寸，石高一丈一尺。明嘉靖三年建。乾隆十九年改金门宽四尺八寸。泄运河涨水，入北官河，由洋马荡入丁溪闸归海。护城砖工长一千六百八十八丈五尺，砖高十五六层。康熙六十一年建。乾隆五年加高三四五层。嘉庆十四年又间段加高二层。拦河金闸一座，明季建。康熙二十三年改金门，宽六丈五尺。通湖桥洞，口宽高各一尺八寸。本通湖闸，康熙三十五年改建。嘉庆十四年修。南水关洞，口宽高各一

尺八寸。康熙四十六年建。水由市河出北水关。琵琶洞，口门宽高各一尺二寸。康熙五十年建。嘉庆十四年修。前三洞皆系官办。水由市河入高邮运盐官河，经丁溪等闸归海。南关旧坝，长六十六丈。康熙三十八年建，系土底。乾隆二十年奏定永闭。南关大坝，即旧五里滚坝。长六十六丈。康熙四十一年建。乾隆十一年加高底石一层，墙高石底七尺五寸。奏准与车逻坝脊皆高运河底一丈。过此即令自行过水泄运河涨水，由坝下引河达澄子河，经棋盘荡出梓新车路诸河归串场河，出范堤丁溪闸归海。南关新坝，长六十六丈。乾隆二十二年建。墙高石底一丈一尺。泄运河涨水，由坝下引河汇入南关大坝河归海。坝上有碑亭，恭镌高宗纯皇帝谕旨。南车二坝过水三尺五寸，开放五里中坝。如南车二坝过水至五尺，再启南关新坝。五里中坝，即旧八里铺滚水坝，长五十丈。康熙四十七年建。墙高石底一丈二尺，因南车二坝不敷宣泄，故添此坝。水由坝下引河汇入南关大坝河内归海。此坝，坝底较诸坝独矮，向不轻启。柏家墩旧坝，长五十丈，系草坝。康熙二十年建。乾隆二十年奏明永闭。八里铺涵洞，口门宽高各二尺五寸。明嘉靖三年民建溉田。车逻镇砖工长七十三丈。乾隆二十六年建。车逻闸一座，金门宽一丈二尺，石高十层。乾隆五年建。嘉庆二十一年拆修，加高二层。泄运河涨水，由车逻坝下引河达丁溪归海。车逻大坝一座，长六十四丈。康熙四十一年建。乾隆十年加高石底一层，墙高石底七尺七寸。泄运河涨水，由坝下引河达澄子河，与南关之水同至兴化，入丁溪闸归海。火姚闸，金门宽五尺六寸，高一丈。明嘉靖三年建。水入淶洋湖归海。三十里铺砖工，长二百二十二丈，砖高十二层。乾隆八年建。二十三年加砖四层，面石一层。西岸临湖石工，上接永安界，下至窑港迤下止，长三千四百四十八丈六尺，石高十二层。明末建。临湖砖工长二百九十五丈六尺。明末建。康熙三十六年加高。乾隆八年复加。共计砖石十三层。通湖港，二十二处，内万家塘石港长五丈五尺，墙高一丈一尺。康熙十八年建。杭家嘴石港长十二丈，墙高九尺五寸。又通湖闸石港长十二丈，墙高一丈二尺。皆康熙十九年建。夏家桥石港，长一丈一尺，墙高一丈一尺。明永乐七年建。窑港口石港长十六丈，墙高一丈三尺。顺治七年建。越河港长六丈。康熙二十三年闭。施家港长十三丈。思贤港长十二丈。柳园港长三十四丈。贾家港长三十四丈。陈家港长二十丈。四汊港长二十五丈。孙家港长六丈。车逻港长三十丈。皆康熙十九年开。旧越河港长十二丈。康熙二十三年开。新越河港长十七丈。四十年开。水庙子港长十三丈。南陈家港十一丈。南孙家港长六丈。薛家港长六丈。秋子港长八丈。皆康熙十九年开。高邮湖，与界首湖南相连。窑港口迤南为高邮湖尾。自高邮下达邵伯之处，中隔民田。有河三道以通之。西日越河，长三千一百余丈。施家港以下各港，通湖入运之水皆由此达。再西日王家港，长一千七百四十余丈。再西日新茆塘港，长一千一百余丈。旧茆塘港，一千八百余丈。二港北分二口。上承高邮湖南汇一河，下达邵伯湖。以上高邮汛两岸堤坝闸洞，其临运溜处，随时镶护，并无一定。

</p><div class="indent">

<p class="wxz6">常镇通道属扬粮厅

扬州府扬粮下河，通判一员，守备一员，主簿一员，把总一员，协防一员。管理甘泉县境运河堤埝闸坝工程，上自扬河厅属高邮汛界露筋起，下至江都县境江防厅界湾头闸止，河长四十七里有奇。额设堡夫五十四名，兵六十一名，芒稻闸夫二十名。所属汛一，曰甘泉。专管运河。其下河水利，则有泰州州同、通州州判、如皋县丞、兴化县丞、安丰司巡检、白驹闸官、东台县丞、富安司巡检、海堰闸闸官、江都县芒稻闸闸官。东堤一道，长八千五百八丈四尺。西堤至三沟闸止，长三千五百八十丈。三沟闸下至湾头闸交界止，长五千九十丈，系湖滩高冈，并无堤工。

东岸自露筋镇交界起，石工一段，长三百三十丈。砌石五层。明季建。内北首一段，长一百三十丈。乾隆二十三年加石二层。居家田头至旧闸止，石工长孟十四丈。明季建。现损。露筋拦河闸一座，金门宽八丈。明季建。乾隆二年拆除。夏家直越堤一道，长一百三十七丈。嘉庆十五年筑。崇家湾，嘉庆十一年漫溢堵闭。筑埝工长一百五十四丈。仲家庄，乾隆五十二年浅溢堵闭。涵子口，乾隆二十六年漫溢堵闭。四堡，乾隆五十二年漫溢堵闭。腰铺石工一段长四十四丈。内二十六丈，明季建。内又长十八丈，康熙四十一年建。乾隆二十六年漫溢冲废，长三十六丈。孙家门首至马家门首，有明季所建旧石工三百八十二丈五尺，石高六尺。蔡家潭嘉庆十三年漫溢。越筑埝坝，一百五十九丈六尺。二十年取直补筑纤堤，长一百三十六丈，外镶护埝。荷花塘，乾隆二十六年漫溢堵闭。工后筑越堤，长二百六十丈。嘉庆十一年漫溢堵闭。筑坝，长三百七丈。十三年迤南堤工复又漫溢。越避深塘向里圈堵。筑坝，长四百九十六丈。十八年补还临河纤堤，外镶护埝。旧有越堤，历冲无存。竹林寺石工，长五十二丈，高四尺二寸。明季建。现损。三沟闸拦河石闸一座，金门宽七尺五寸。明季建。乾隆六年拆除，两岸改筑埝工。三沟闸，南至昭关坝北墙止，石工一段长九十丈三尺，石高六尺五寸。明季建。乾隆五年加砖高二尺。嘉庆十八年又加砖二层。昭关坝，乾隆二十二年南巡，高宗纯皇帝再莅，命大学士傅恒等，与都督尹继善、侍郎嵇璜等议南河河务。傅恒等言：“洪湖五坝，过水既多，而下游承受仅高邮车逻三坝，未免来多去少。应在昭关地方，复设滚坝，下开支河，更将南关旧坝，改建滚水石坝，使与高堰五坝相应，旋经总河白钟山嵇璜议覆应办。嵇璜查勘下河请将伍佑场之沿洼口、蔡家港，各建五孔石闸，金湾滚坝，刨低一尺。东湾坝改低二尺五寸，添宽十二丈，金湾北闸改低一尺。旋又奏定，后放水志。山盱五坝，过水较多，后放南关车逻二坝。俟二坝过水三尺五寸，再后放五里中坝。如车逻南关二坝过水五尺，再后新建石坝。随建昭关石滚坝，金门宽二十四丈，墙高一丈二尺，由身直长五丈。二十六年，督河诸臣以时议下河常被水患，或谓通江不畅，或谓海水顶阻，二说皆非。其故由车逻南关等坝，并无限制。欲使下河减灾，惟有节其来水。欲节来水，惟节南关车逻等坝。仍照刘统勋奏，封土三尺，俟水势长至三尺外，方许启坝。再不能容，方启五里中坝、昭关坝。嘉庆十二年，酌定志桩长一丈六尺七寸，开坝。十三年，后放冲跌照旧修整。坝下河长四百六十三丈，接入苻丝湖，由漾洋湖至淤溪等河，达兴化境得胜湖，经梓新车路等

河，出范堤、丁溪、小海各闸入海。坝外木桥一座，长二十九丈七尺，宽一丈二尺。嘉庆十年冲倒未修。滚坝南墙起石工一段，长十二丈七尺，高六尺五寸。明季建。乾隆五年加砖一层，以后用土加高。接下至鳅鱼嘴石工长一百二丈，计九层，明季建，内雍正五年改砌砖工九十一丈。昭关旧坝北砖工，长一百六十三丈，计七层。康熙四十五年建。嘉庆二十年加砖二三层。昭关旧坝，金门宽十丈。康熙三十八年建。乾隆五年奏明永闭。嗣因山圩古沟告溃，复启冲塌镶埽堵闭。减水三闸北砖工长一百十丈，计石七层。康熙三十八年建。嘉庆十八年加砖二三层。减水三闸一座，金门宽六丈，墙高一丈五尺六寸，由身长五丈。康熙三十八年建。乾隆二十二年拆修。改金门宽八尺，由身长十丈五尺，设重板启闭。现堵闸。下河长四百三十三丈。水由苻丝绿洋等湖达兴化境。出丁溪小海各闸入海。闸南起，至二闸止，砖工长一百三十三丈，高九尺六寸。雍正五年改建。乾隆五年加砖高二尺五寸。二闸一座，金门宽六尺。康熙三十八年建。乾隆七年改金门宽一丈八尺。十八年启放冲倒，用柴堵闭。邵伯马头北止砖工长三百十八丈，计十二层。乾隆五年建。马头起至庙巷口止，石工，长三百九十六丈。计十层。康熙五十三年建。乾隆八年加高二层。铁牛湾砖工长一百三十六丈，计十层。乾隆五年建。黑鱼塘砖工长五十五丈。乾隆五年建。石工长一百四十五丈。明季建。乾隆二十六年漫缺堵闭，仍砌砖工。五十二年复漫缺镶埽堵闭。接下砖工，长四十六丈，计十层。乾隆五年建。南首石工，长八十七丈，计石十四层。明季建。金湾北闸一座，计二门。每门各宽二丈二尺。中立砥心，直长三丈，宽八尺，高一丈八尺。明季建。乾隆二十三年拆造。落低二尺四寸。北闸至中闸中间石工，长二十丈，计十四层。明季建。金湾中闸计二门，金门各宽一丈六尺。中立砥心直长三丈，宽八尺，高一丈五尺。明季建。闸下河长三千八百丈。合北闸之水，达仙女庙，出芒稻闸，由李墅河十八里下八港口归江。闸南至新滚坝止，石工长十四丈，计十二层。明季建。金湾新坝，乾隆二十七年三次南巡，命大学士刘统勋、兆惠，会同高晋、陈宏谋往勘高宝甘泉运河，相机疏泄。刘统勋等覆奏：运河归江之路，邵伯以下，有湾头闸、壁虎桥、凤凰桥、西湾坝、东湾坝、金湾滚坝、金湾六闸，俱系宣泄湖水。由盐河归廖家沟、石洋沟、董家沟、芒稻闸四河分流下注，兹细加查勘。将金湾坝新挑引河展宽，河底以十丈为率。金湾六闸，向设南北中各一闸。河头筑堤分为三路，汇归一处。其北闸二门，为运盐要津。南中二闸，闸底较高，应自中间迤南添建石坝三十丈。闸下酌挑引渠，下注之水既与盐运无妨，而盛涨时，湖水得以畅达。西湾滚坝照东湾落低三尺，并于西湾河头酌挑宽深，立标以俟。旋经圣驾回銮，按阅指示。令将西湾坝加落一尺，共低四尺，则平日已有尺水入江，循序而进，可减暴涨。其金湾六闸，应拆去南二闸，添建石坝，接筑土堤，量挑引渠，以备盛涨。湖水自无淤塞之患。遵将金湾南闸拆除，改建石坝一座，金门宽三十丈，墙高一丈四尺四寸，计石十二层。上建木桥，长三十八丈，宽一丈二尺。闸下挑河，长二百丈。汇入北闸，引河出芒稻闸下达归江。新坝南起，至旧坝北止，石工长二十一丈，计十二层。乾隆二十七年建。金湾，旧三合土滚坝一座，金门原宽四十丈，南北砖裹头各长一丈，高七尺五寸。康熙二十五年建。乾隆二十五年展宽金门十丈，共宽五十丈。两墙砖裹头，上长六丈，下长七丈，高一丈二尺。上建木桥一座，长五十一丈，宽一丈二尺。坝

下河长二千六百五十三丈。直注董家沟，由朱公桥出八港口归江。东湾三合土滚坝一座，金门原宽二十四丈，墙高一丈二尺。乾隆十年建。二十三年侍郎嵇璜奏请展宽十二丈，共宽三十二丈。又将坝底低落二尺四寸。两墙石裹头各长九尺五寸。由身各长六丈八尺。上建木桥一座，长三十七丈，宽一丈二尺。坝下河长二千六百三十五丈。穿湾头闸盐河，由石羊沟归江。西湾三合土滚坝一座，金门宽二十四丈，由身各长六丈八尺。两墙石裹头各长九丈五尺，高一丈二尺。乾隆十年建。二十七年将坝底落低四尺。上建木桥一座，长二十五丈，宽一丈二尺。坝下河长二百五十丈，汇入东坝河内下达归江。凤凰北木桥一座，金门原宽六丈。康熙三十八年建。乾隆二十一年展宽四丈，共宽十丈。四十四年将两墙加砌砖裹头，上长五丈五尺，下长八丈五尺，高一丈二尺。上建木桥一座，长十二丈，宽一丈二尺。凤凰砖桥一座，圈门宽一丈二尺六寸，桥身长六丈，宽一丈六尺。明季建。凤凰南桥一座，金门宽十一丈。两边柴裹头。康熙三十八年建。乾隆四十四年改砌砖裹头。上长五丈五尺，下长八丈，高一丈二尺。上建木桥，长十一丈，宽一丈二尺。南北中三桥之下共为一河，长一千五百八十四丈。经盐河达廖家沟，入桥子沟河，下达归江。壁虎北木桥一座，金门宽二十丈。本柴裹头。乾隆二十三年建。四十四年改砌砖裹头。上长五丈，下长六丈，高一丈二尺。上建木桥，长二十丈，宽一丈二尺。桥下河长八十六丈，汇入中砖二桥引河。壁虎中木桥一座，金门原宽二丈。乾隆四年建。二十一年展宽八丈，共宽十丈。四十四年改砌裹头，上长五丈五尺，下长七丈五尺，高一丈二尺。上建木桥，长十丈，宽一丈二尺。桥下河长十七丈，汇入南桥引河。壁虎砖石南桥一座，计二门。每门各宽一丈。桥身长九丈，宽一丈五尺。明季建。桥下河长一百五十六丈，入盐河，出廖家沟归江。桥南石工长五十二丈，计十二层。明季建。湾头石闸一座，金门宽二丈四尺，南墙长三十丈，北墙长二十三丈七尺，高一丈八尺。明季建。闸下运盐河至泰州斗门交界，长一万五百十二丈七尺。两岸悉系民田，并无修防堤堰，土埽工程。此闸为淮南引盐由场入运要津，闸河凡有损坏淤浅，向由盐务经理。运河西岸，自露筋至三沟闸通湖港止，以下无堤。小河口港一道，长十丈。通湖河，长八十五丈。旧筑柴坝。乾隆二十六年堵闭停修。露筋镇起，至崇家湾止，临湖石工，长七百二十丈，计九层。明季建。崇家湾，乾隆十一年冲缺，镶埽堵闭。临河越湾，嘉庆二十四年取直。补筑纤堤，长三百二十丈。崇家湾至瓮家营止，临湖石工长九百二十三丈，计九层。明季建。临河越湾，嘉庆二十三年取直。补筑纤堤长二百八十四丈。瓮家营，嘉庆十一十三年两次漫缺。越堵坝长一百八十一丈。二十年临湖抛碎石，长一百七十三丈。临河越湾二十二年取直，补筑纤堤。上自石工头起，至荷花塘堤头止，工长二百八十丈。瓮家营工尾起至荷花塘止，临湖石工长一百六十六丈，计九层。明季建。荷花塘，乾隆五十二年漫溢堵闭。嘉庆十一十三年两次漫溢堵闭，共坝长三百二十一丈。二十二年全抛碎石，并将临河越湾取直，补筑纤堤。下接石工头止，堤长二百四十丈。接下至三沟闸通湖港止，石工长六百六十五丈，计九层。明季建。三沟闸外通湖港一道，宽十丈，长五百十丈。鳅鱼港一道，宽十丈。河绕隐棠七截桥至梁家港入运，计长一千二十六丈。乾隆四年挑浚，以利商贾舟楫。菜花港一道，宽六丈，长八十丈。奶奶庙港一道，宽六丈，长一百十丈。陈家港一道宽六丈，长七十八丈。三港皆乾

隆二十二年濬深。红桥港一道，宽三丈，长八十五丈。小石桥港一道，宽一丈五尺，长七十五丈。铁牛港一道，宽十四丈，长九十五丈。梁家港一道，宽十二丈，长二百七十四丈。母家港一道，宽四丈，长一百四十丈。金湾六闸对岸越河长一千丈。乾隆八年开挑宽深，河越金湾闸坝东西湾滚坝至八塔铺入运河，以避开坝行船被掣之虞。十一年，又挑支河，长三十六丈。以上运河西岸工程，两岸临河堤身，遇有溜逼堤行，及迎溜顶冲之处，随时镶埽塘护，并无一定。西堤之西，又有旧有湖邵伯湖、黄子湖，东通邵伯湖。赤岸湖，在黄子湖西。朱家湖，北通邵伯湖，有河一道曰汤家汊。南通王家河，历五孔桥河。下与越河通，东通二河，达鳊鱼港。董家湖在后河之西，王家河之东，北达朱家湖。东河，南达王家河。二河上通邵伯湖，下抵母家港入运。邵伯迤北各港之水，皆由二河分注，由港入运。乾隆二十二年，侍郎嵇璜言：邵伯诸湖递注之引河，多有浅阻。每致停蓄积水，盈满湖中。请将黄子湖通连朱家湖之汤家汊引河，改向西南疏浚宽深。再朱家湖通连董家湖之王家庄，开挑新河，引水直注董家湖，以达孔家桥。形势湾曲，请于东首另挑引河入尤家洼，下接挑新河，由茳城墩后引入越河。再挑越河，加挑宽深，节节引导诸湖积水，湍流入运。由凤凰壁虎二桥，出廖家沟等河归江。淮子河，长七百四十丈，宽八丈五尺。人字河，上承金湾北中新三坝，下注之水，汇为一河。至芒稻闸，北达运盐河。以两河相接，如人字形，故名。河穿运盐河，入芒稻闸，正越两闸至闸下。再南有董家沟河水注入，同达于江。自闸至江，河长三千二百四十丈。芒稻东西二闸，建自前明。康熙至乾隆初年，叠辟归江之路。于邵伯以南，增建闸坝，分泄山盱各坝，下注之水，不使多归下河入海。以护高宝兴盐诸邑低洼民田。乾隆二十二年，总督尹继善总河白钟山及嵇璜高晋奏：芒稻闸，为河湖归江第一尾间，若长年启放，俾诸湖积水畅泄归江。冬春水落，早为腾空，备伏秋容纳之地，则南关车逻二坝自然过水无多，下河可免淹漫。无如芒稻河，乃盐船必由之路，当河防急需泄水之时，正盐船盛行之候。若将闸板彻底启放，则溜势湍急，盐船难以纤挽。若因此闭闸，则湖河水无去路，必致壅积成灾。芒稻闸河，自西北直趋东南。湾头河，则自西南至东北，横亘其间。所有金湾、东湾、凤凰、壁虎、湾头等闸坝，减水，皆直趋是闸，及董家沟、石羊沟、廖家沟各滚坝归江。盐船，由湾头河行走，须闸门下板，方资浮送。所以芒稻闸坝不能启闭合宜。臣等酌筹，闸东有旧越河，应令盐船由越河直走金湾北闸，不绕芒稻闸出湾头，则泄水盐运，分为两途，是闸可长年启放，泄水归江。但越河甚淤浅，应一律挑深五六尺。再金湾北闸底高，应改低以便盐船挽运。旋嵇璜又奏办理芒稻河闸情形。钦奉谕旨，嗣后芒稻闸永远不许下板。俾得畅泄归江，则诸河积水，自可减退。遇伏秋大汛，亦足容纳。下河一带，得蒙乐利之休。该督等将此旨泐石闸畔，俾后来司事者，知所遵守焉。芒稻西闸一座，明万历六年建，泄水通江。原建二闸，六门。底与盐运河平。天启六年，增底高六尺。康熙元年，于北岸挑河一道，落矮闸底二尺五寸。十二年。复展西墙改建七门。雍正十年，移上三丈，以迎溜势。今仍七门，每门各宽二丈，由身各长五丈。石墙各高一丈三尺五寸，长二十六丈。矶心六座，每座各长四丈，闸一丈六尺，闸底由身直长十五丈。乾隆九年复修。芒稻东闸一座，三门。每门宽二丈，由身各直长四丈，石墙各高一丈。西墙长三十一丈二尺，东墙长三十四丈五尺五寸。

矾心二座，每座长三丈八尺，宽一丈三尺五寸，闸底由身直长十丈。明季建。雍正十三年重建。乾隆九年补修。越闸迤东褚家坝运盐河内拦河坝一道，长十四丈。乾隆二十三年筑。永堵，以截湾头河水入江，令盐船由越河直走金湾北闸。雍正十年，设芒稻闸官一员，闸夫二十二名，专司两闸。乾隆三十八年，奏明兼管孔家涵闸。董家沟河，上承金湾旧坝下注之水，穿运盐河，下至朱公桥，长六百二十丈，入芒稻河归江。乾隆八年，大学士等陈奏：高宝诸湖之水归入运河，自邵伯以上，向从高邮南关五里车逻及昭关各坝，分注下河入海。自邵伯以下，向从金湾三闸凤凰壁虎桥湾头闸各路分注。一走芒稻河，一趋泰州河入江。查运河入江，较入海为近。而运河之水高于江面，通流顺势，消纳亦速。从兴盐等县入海，路既遥远，且兴盐一带形如釜底。运河下水稍大，必先淹遍内地，然后归海。臣等议于邵伯以南之东西湾地方，添建滚水坝二座。坝下挑浚引河，分引湖水入于盐河。对岸湾头之下董家沟之上，加挑石羊沟引河，河头建滚坝，以应东西湾二坝，并将凤凰桥下引河壁虎桥下廖家沟俱挑浚深通，归石羊河达江。其董家沟原归芒稻河，河形短促，不足宣泄。应将河尾加长接挑，自为一河，直注于江。再于芒稻闸以下仙女庙以上之泰州河挑挖越河，接入金溪河内。再于金湾闸上，添建宽大石闸，并修纤道，俾盐船从此绕出，实为利便。泰州河内旧有秦塘港、白塔河、百泼河三路旁趋入江。因防私盐堵塞，今应将土坝改建闸门，以时启闭。乃挑朱公桥以下新河，长一千四百八十三丈，自为一河达于江。董家沟河头三合土滚坝一座，口门原宽十八丈，底直长五丈五尺，东西两石墙各长九丈五尺，高九尺。乾隆二年建。二十五年将坝底落低三尺，展宽十二丈，共宽三十丈，两墙砌石十二层，高深一丈四尺四寸。两裹头，各长六丈。年久冲塌，河尾淤塞，仍入芒稻河下达。河头建木桥一座，计三十排，向由江都县详归盐务修理。石羊沟河，上承东西湾坝下注之水，穿运盐河。乾隆八年，由盐河对岸挑河，长三千三百六十七丈。导引至沙河港入江。河头三合土滚坝一座，长三十二丈。两墙耳闸二座。金门各宽一丈二尺，西墙长十丈，东墙长二十丈。矾心二座。十三年建。二十五年将坝底落低，以董家沟为准，拆除两耳闸，矾心改三合土。底展口门，共宽三十七丈六尺。东西两墙用柴镶做裹头，各长二丈。年久冲塌，河头马桥一座，长三十八排。向由江都县详归盐务修理。廖家沟河，上承凤凰、壁虎各桥下注之水，穿运盐河下达。河长九百三十丈，汇入石羊沟河达于江。河头滚坝一座，金门宽十六丈，两墙各高九尺六寸。乾隆十三年建。二十五年就冲宽坝门改宽四十四丈。两墙砌石高一丈四尺四寸。三合土底，东柴裹头长十四丈，西柴裹头长四丈。皆年久冲塌。河头木桥一座，计四十四排。向由江都县详归盐务修理。秦塘河，长四千四百四十丈。乾隆八年疏通。分泄金湾闸，注入运盐河之水，下达于家桥、张网沟镇万寿桥归江。河头石闸一座，金门宽一丈，两墙各长六丈，高一丈八寸，计石九层。乾隆九年建。现损。白塔河长五千四百丈。分泄湾头闸运盐河涨水，下达刚王庄焦家荡大桥镇归江。河头石闸一座，金门宽一丈，两墙各长六丈，高一丈八寸，计石九层。乾隆九年建。百汶河长三千三百四十五丈五尺。分泄运盐河涨水，下达吴家桥，至泰坝，汇入白河，归江。河头石闸一座，金门宽一丈。两墙各高一丈八寸，长六丈。计石九层。乾隆九年建。以上归江引河七道，皆在运盐河南。其运盐河之北，又有仙女庙越河、孔家涵河。仙女庙越河自

盐河北起，长六百六十三丈五尺。至邓家渡入金湾引河。乾隆五年挑。二十三年复挑宽深，令盐船由此行走，出金湾北闸。孔家涵河，乃盐城、阜宁、兴化三县，并各上下舟楫通行要津，历次挑浚宽深。乾隆三十八年，总督高晋题建石闸一座于河身之南附近盐河之处。金门宽二丈二尺，两墙各高一丈二尺。以时启闭，蓄运盐河之水，不令多泄。工系商办。闸归芒稻闸官管理，所属下河各汛经管河道。

泰州州同，经管上运盐河。自江都县界起，东至如皋通州止，河长一百四十五里。下运盐河，自州境赵公桥起，至东台县秦潼镇界止，河长六十里。附河有堰一道，名杨公堰，起止同河。残塌未修。斜丰港，自高邮界入州境樊镇，长二十八里。滕家坝，在州城南门外南，通泰兴达江。鲍家工坝，在州城东门。徐家坝在州城正东隅海安镇。

兴化县丞，经管高兴交界溪河，自高邮河口镇起，至兴邑西门外护金荡止，长三十里。南官河自陵亭镇泰州界起，至兴邑南门止，长三十六里。吟墩河，自兴邑十里亭起，至芦洲止，长二十里。梓新河，自兴邑芦洲至东台县河垛场串场河止，长九十里。车路河自兴邑东门起，至丁溪场串场河止，长一百三十里。白涂河自县东起，至东塘港止，长六十里。北官河，自兴邑北门起，至兴盐界河止，长五十四里。

兴化县安丰司巡检，经管白涂河，自塘港起东至串场河止，长四十六里。唐家港，自兴盐界河起，东至串场河止，长四十里。海沟河，自黄庄西七里庙起，东至串场河止，长五十四里。自驹起，至刘庄场河道，长十八里。

兴化自驹闸官，经管自驹南北中三闸各一座，一里墩闸一座。管范公堤北自刘庄场界起，至白驹止，长九百丈。自白驹起南至草堰场界止，长二千七百丈，计二十里。

东台县丞，经管十八里河，自西镇向东南至梁垛场串场河止，长十八里。大尖河，自青蒲阁起至安丰场串场河止，长六十里。下官河，自泰州界小杨庄起，至河垛场串场河止，长八十里。串场河，自泰州界仇湖河起，向北至兴化县界止，长一百三十里。梓新河，自兴化狄垛庄界起，至蚌蜒河止，长六十里。蚌蜒河，自泰州唐家庄界起，至海道口串场河止，长九十里。头运盐河纤堤一道，自泰州赵公桥起，至秦潼止，长一百二十里。

东台县富安司巡检，经管运盐河，自秦潼至李家港止，长七十里。串场河自李家港起，至富安通远桥止，长三千四百二十丈。民河自通远桥至海安徐家坝止，长五千四百丈。管范公堤自安丰李家北岸起，东至耕茶黄沙洋止，堤长二万六千八百二十丈，计一百四十九里。

东台县海堰闸闸官，经管丁溪闸一座，小海正越闸二座，草堰正越闸二座。管范公

堤，自丁溪闸起，至草堰闸苇子港止，长一千六百一十一丈七尺五寸，计九里。

通州州判，经管漕运河，自仓闸起至白蒲镇通如界止，长六十里。漕河东岸离城十八里支河，至石港场止，长四十里。又离城三里支河一道，至刘桥止，长三十里。支河一道，自北门外护城河三元桥起，至狼山港出江长十五里，又自易家桥分支，由卢潭港出江，长十五里。盐河一道，自城东龙王桥起，至沙洪桥，四十里。又自龙王桥起，至姜关王庙入镇场路止，长四十里。又由东北至阚家庵东止，长二十四里。管范公堤，自如皋县马塘起，至吕四场堤尾止，长一百六十里。

如皋县丞，经管东北运盐内河，由境起一百三十里，至范公堤为止。堤外即系东海，河水不通。西窑子河，久经淤滞，水势不能通流。因无关田禾，是以历久未经兴挑。计由州境起至七十里下接泰州分界。南龙游河，其河身浅窄，河道迂回，非大水不能通行。因无关田禾，未经详请兴挑。计由邑境起，至九十里下接靖江分界。北河，由境起三十五里，至立发桥向北五里海安镇与泰州分界。东北水流接淮，由立发桥向北至泰州海安镇，即与下河毗连。立发桥向南与下河迴隔。淮水从茱萸湾分流，东南一百二十里至泰州。由泰州一百二十里至海安牙桥。又四里至立发桥入境，此乃上水来源。淮水自茱萸湾分流，东南由泰州至立发桥入境。从如邑向东南七十里白蒲镇中板桥，入通州境，此乃下达去尾。

</p><p class="wxz6">江防厅

扬州府江防同知一员，守备一员。管理江北江都仪征两县境内运河江防工程，上自扬粮厅属甘泉汛湾头闸，南至瓜洲江口止，河长一万三百十四丈，两岸无堤，亦无砖石工程。又自三议河迤西至沙漫洲大江口止，河长一万二千九百六十丈，两岸并无工程，计七十二里。为汛二：一日江防汛，乾隆五十五年，裁汰镇江府水利通判，以其事归江防厅营管理。一日京口汛。

江防汛，江都县丞一员，仪征县丞一员，仪征清江闸官一员，瓜洲司巡检一员，把总一员，管江工兵三十名。江都县县丞分管汛地，自扬粮厅属甘泉汛界湾头闸南起，至三汉河迤西石人头镇仪征县界止，河长七千七百四十丈，计四十三里。东岸纤道，自五台山起，至扬子桥止，从前概修板工。雍正八年，起逐渐改易埽工。现在每岁抢修，埽长二千一百余丈。沙坝石工一座。宋季建。乾隆五年修。金门宽一丈六尺，高一丈四尺。闸下河长四千五百五十丈。每年大汛启放，减泄涨水，由沙河港入江。石闸一座，明季建。乾隆五年修。金门宽一丈，高一丈二尺。闸下河长二千二百三丈。每年大汛，启放，泄水至深港入江。瓜洲巡检司，分管运河。上自三汉河起，至瓜洲花园港一带江口止，河长八千三百七十余丈。乃运河达江正派。计二十四里三分。管江工堡夫二十名，闸夫十二名。瓜洲闸河，由瓜洲通惠广惠二闸

至江口。康熙五十四年因江流北徙，将广惠闸堵闭，另浚绕城河通漕。后因花园港坍卸，绕城河运口难以行漕。雍正六年，闭绕城河，仍开闸河。船由旧闸行走。乾隆十一年，将广惠闸堵闭，仍开由闸上之青莲庵旧越河行走。原设闸官一员。二十一年移驻丹徒县，专管横越二闸。裁存闸夫十二名，交瓜洲巡检董率。瓜洲越河，在广惠闸上，雍正八年因闸河水无关蓄，自青莲庵起，至尤家碾止开越河，长三百六十七丈。九年，又于瓜洲西南真人洲，另开引河长六百四十一丈，五公滩开支河，长三百六丈。夹江内筑贴心坝，长一百五十丈五尺。又南北两头接筑拦水土坝。瓜洲临江工程，息浪庵前，埽工长二百七丈。弥勒殿自西山转角起，至马头东转角止，长十二丈。马头东转角石墙长五丈。大观楼起，至息浪庵西山止，沿江筑堤长一百五丈。息浪庵，东山石马头下首起至东堤上首止，沿江筑护城堤，长八十五丈。花园港，三官殿后起至四闸下刘家涵洞止，护滩堤一道，长一百八十丈。瓜洲城，自北水关起，至西北城转角下首止，石工长三百一丈。渡军桥至北水关止，河长二百二十六丈。北水关起至埽工迤南止，河长三百二十五丈。埽工头南起，至南关坝止，河长二百四十丈。南关坝起，至基心桥止，河长二百四十丈。花园港埽工长五百三十丈。瓜洲西门城西越河一道，长二百丈。真人洲引河二道，一长五百五丈，一长五百二丈。花园港西邱家港挑水坝二座}雁翅包滩里戗共长一百八十五丈。旧四闸西龙王庙护埽工长一百三十八丈。皆康熙五十五年至六十一年节次浚筑。乾隆二十九年七月，江水长至一丈五尺八寸。瓜洲回澜坝，江滩坍陷入江九十余丈。水深四五丈，至六七丈。相连护城堤，距瓜洲城止，十一二丈，及三四丈。原有护崖埽坍塌成坑，总河高晋请就滩筑埽，签桩压实，并筑子堰为靠，埽外抛填碎石，奏奉谕旨办理。三十年，圣驾南巡，亲临阅视。三十二年春，谕总河高晋将迩年瓜洲潮汛堤工及护沙长落情形覆奏。高晋奏：“自二十九年抢护之后，三十年春銮輅巡幸，钦承圣训，每年霜降后，逐一勘估残缺旧埽，桃汛前修竣，两年来尚未长有沙滩，三十五年，钦奉谕旨，以江水东坍西涨，非人力所能强御，设或浸至城根，不若将南面城垣稍收向内，较水底施工无可考较，似为有力。”四十一年六月，查子港接连回澜坝殷家庄江工塌卸入江。越长一百十四丈，直长五十九丈，里宽七十一丈。瓜洲城西隅坍塌入江，直长四十一丈，难以修复。大学士总督高晋、总河李奉翰奏准，让进补还城垣长九十丈，其塌卸兜湾之处，补镶柴工，以作纤道，外护碎石。五十七年，回澜坝、迤下埽工坍陷入江，长一百十四丈。越长一百三十六丈，入里宽一百三丈。瓜洲旧城塌卸入江长十四丈。总督书麟、总河兰第锡奏准镶进六十丈，补还土城长七十丈。又工尾及小南门外滩嘴，用料裹护，靠崖修筑纤道，抛护碎石。现在每年岁抢修青莲庵东西两岸束水埽工、运口东西两岸埽工、查子港迤澜坝，并迤下裹头埽工，以上共工长七百余丈。仪征县丞分管汛地，自三汉河下石人头镇起，至响水闸止，河长七千二百丈，计四十里。两岸无堤，亦无泄水闸座。间有民建木涵洞，灌溉民田，不通大江水道。仪征清江闸官，管理响水、通济、罗泗、拦潮四闸，皆建于前明成化十年。康熙四十九年重修。闸河，上接仪征县丞所管河尾起，至江口止，长六百九十丈。额设四闸夫一百二十名，每名每年食银七两二钱，由藩库领。三岔河至仪征江口，昔为大江上游空重漕船要津。乾隆四十年后，河渐浅涩，漕船皆由瓜洲进口，此河惟为淮南盐船经由之道，凡浚河修闸钱粮皆

动运库。响水石闸一座，金门口宽二丈四尺，底宽二丈二尺，高一丈七尺四寸，计石十六层。雍正十三年重建。乾隆四十二年复修。嘉庆十一年补修。通济石闸一座，金门口宽二丈四尺，底宽二丈二尺，高一丈五尺六寸，计石十三层。乾隆三十一年、嘉庆四年重修。罗泗石闸一座，金门口宽二丈四尺，底宽二丈二尺，高一丈五尺六寸，计石三层。乾隆三十一年、嘉庆四年重修。拦潮石闸一座，金门口宽二丈二尺，高深一丈八尺，计石十五层。雍正十三年重修，乾隆二十五年、嘉庆七年重修。

京口汛，丹徒县丞一员，千总一员，协防一员，管兵四十名。武汛专管京口临江一带埽坝工程。文汛专管丹徒县境运河河道闸坝。汛内并无堡夫堡房、浚柳船只、及额采兵夫柳草积土等项。北岸临江大坝埽工，长一百四十八丈。乾隆年间建。接下大蓬湾，临江埽工，长二十七丈。乾隆年间建。接下徐家墙头临江埽工，长四十七丈。乾隆年间建。嘉庆二十二年改砌碎石工长四十丈。接下查家墙头临江埽工，长七十丈。嘉庆二十二年改砌碎石工，长五十丈。江神庙门首临运埽工，长二十丈。乾隆年间建。新河东岸临江埽工，长五十八丈。乾隆年间建。嘉庆二十二年下首改砌碎石工，长三十丈。工后至甘露港土堰，长三百四十七丈。南岸观音庵临江旧石工，长十三丈五尺。明季建。接下临江埽工，长三十五丈。接下临河埽工，长六十二丈。接下临运砖工，长六十丈。明季建。京口运河内西石闸一座，《丹徒县志》载：“在城西北京口港口，距江里许，莫究其所自。嘉庆二十二年重修，金门口宽二丈一尺，高二丈，砌石二十层。额设闸夫四名。”南石闸一座，在郡城南门外，《府志》：“即灭渡桥旧址。明天顺己卯浚漕河作闸，以杀水势。嘉庆二十二年重修。金门口宽二丈二尺，高一丈九尺五寸，砌石十七层。横闸一座，金门宽二丈二尺，高十丈六尺，计石十六层。”越闸一座，金门宽一丈六尺八寸，高一丈六尺六寸，计石十六层。《镇江府志》载。“丹徒县界内旧闸，以时置废，今本朝修置。仍因明季四闸，曰京口闸，曰小闸，在新河，曰新闸，今名南闸，曰丹徒镇闸。

丹阳县丞一员，专司丹阳县境运河闸坝，催攒漕船，汛内并无堡夫堡房。黄泥坝闸，在县北二十里，闸系拦河，已无启闭。金门宽二丈三尺，高二丈二尺。九曲支河陈家桥闸，在北门外。距城二十里，可达包港。金门宽一丈八尺，高一丈五尺，练湖四闸，乃泄湖水，以济运者。在西门外运河西岸，距城百二十步。头闸，金门宽三丈五尺，高一丈。内砥心一座，高七尺，长一丈，阔三尺五寸。二闸金门宽二丈五尺，高九尺，内砥心一座，高七尺五寸，长九尺，阔三尺二寸。三闸，金门宽四丈，高八尺，内砥心一座，高六尺，长一丈二尺，阔三尺二寸。四闸金门宽二丈，高六尺。

第五卷 江

江水自安徽当涂县界入江宁县西南境，(江中有徐草洲。)东北流四十里，径大胜关。(江中由东南有永定、孝德二洲。)又三十里径下关镇，秦淮注之。(秦淮源出溧水境石臼湖，自北口北流二十五里，径县城西。又北稍西流四十五里，径江宁县境秣陵镇。又北流三十里入府城上方门。又西北流十里入通济门水关。是为秦淮河水，环城南而西流五里许，出三山门北，沿汉西、清凉、定淮诸门，流十五里，至此入江。)北岸为江浦县东北境浦口镇。又十里径南岸观音门口。(江中有八卦洲。)又东流二十里，径北岸六合县东南境划子口，滁河注之。(滁河自安徽省滁州界陈家浅东流入江浦县境。东北流九十里径宋庄闸，为白毛河。又蜿蜒三十里，径六合县城，环西南东三门而南流。蜿蜒三十里，径瓜埠镇。又折而东北流五里径灵严山南。又南流十五里，至此入江。一水源出县西北境龙山，南流二十余里。径宋庄闸口，与滁河会合流入江。)又东北流二十里，径仪征县西境交界小河口。又东流二十里，径县城南泗源沟，扬州运河水入焉。(扬州运河，自江都县境扬子桥西分而西南流四十里，环县城东而南流五里余，至此入江。)南岸即句容县北境之罗丝沟也。(县境水自栖霞寺东而东北流五十里，至此入江。)又东流二十里，径丹徒县西境高资河。(江口有里世、征润、四一诸洲。县境水，自唐冈镇北流五里许，径高资镇。又西北流五里，至此入江。)又东流十里，径北岸江都县西南境瓜洲口，有扬州运河，即淮扬邗沟通江处。(运河见后篇。)又东流十五里，径南岸丹徒县城北。又十五里，径丹徒口，有京口运河。(运河见后篇。)又十五里径大港镇，至此江宽三十余里，江中洲屿星错。北岸则江都县南三江营口也。扬州运河水分泄入夹江。(扬州运河，自江都县境六闸河分而东南流十五里，径仙女庙镇，又二十里，径三笔荡入夹江。又二十里达三江营口。)江始折东南流，二十五里，径泰兴县西北境庙港，泰州盐河水入焉。(泰州盐河水，自州城南分而南稍西流四十余里，至此入江。)江中有太平洲，旧分隶江都、泰兴、丹阳、丹徒、武进诸县，后于此析置太平厅，至此江宽四十余里。江水又南流四十里，径泰兴县西南境王家港。(港水东北流二十里，径县城南，折而南流二十里，径毗罗市，入泰兴、靖江两县接壤之界河。又西南流二十里，径界港，复入江。)南岸为丹阳县东北境包港，县境运河水入焉。(丹阳运河自县城东北分而东流三十里，径访仙桥。又东北流二十五里，至此入江。)又东南流十五里，径武进县东北境交界大孟河口。由此以下，迄江阴县境之水，皆自常州运河分泄入焉。(常州运河，自奔牛镇分而北稍东流三十五里，贯孟河营。又东流十里，至此入江。)又东南流三十里，径江阴县交界桃花港。(常州运河，又自府城北分而北稍东流四十里，至此入江。)北岸即泰兴靖江两县境之界港也。又东流三十五里，径靖江县南境八圩港。(泰兴靖江之界港，自毗罗市东流二十五里，径靖江县境庙树港。又南流十五里，径县城西。又十五里，至此入江。)南岸，为江阴县城北黄田港。(常州运河，又自府城北分而东流三十五里，径阳湖县境石堰寺。又东北流二十五里，径县城南，环而西流五里，至此入江。)又东稍北流五十里，径段山港。北岸为靖江、如皋两县交界张黄港，如皋盐河水入焉。(如皋盐河，自城南隅南流三十五里，径土墩港。分为二，其一稍西南流，三十五里，径张黄港；其一稍东南流十里，径

大石圩。又南流十五里许，径周圩港。又自大石圩东南流三十里，径碾砣港，分流入江。详后淮东盐河篇。)又东流十里，径如皋县北境周圩港。(见上。)江心有两大沙。(北日常阴沙，南日寿星沙。)南沙有常熟县西北境之川港，港水南流十五里，复入大江。南岸为江阴县东境谷渚港。(县境水自城东隅，东南流四十里，径芝生桥，折而东北流五里许，至此入江。)又东流五里，径常熟县西北境界泾港，港东即海塘起处。又二十五里，径北岸通州西境天生港州境，盐河水入焉。(通州盐河，自唐闸分而西南流十五里，至此入江。)自此江流极阔，东西相望五十里。又东南流三十里，径狼山港，盐河水亦入焉。(盐河，又自州城东隅南稍西流二十里，至此入江。)南岸为常熟北境福山港，尚湖、昆城湖水注之。两港形势遥遥相峙，屹然为大江门户。(两湖见前大海篇。一东流，一北流，各五里许。自常熟县城东南隅迎春桥，合流为一。沿城东北五里，径北塘三里桥，而北流三十里，至此入江。)又二十五里，径昭文县东北境许浦口，两湖水亦自此入江。(湖北自北塘三里桥，分而东北流三十五里，至此入江。)又二十五里，径白茆口，为江海交会处。(县境流入白茆口水，见前大海篇。)又东流径太仓州西北境，北岸与白茆口相望者，为海门厅西境牛洪港。通州盐河水入焉。(通州盐河，自州东境分而南流三十里，至入江海交会处。)又东南流，包海门厅沙及崇明县全境，而渐入于海。

治江工程(附：吴淞江)

唐开元二十二年，润州刺史齐澣以州北隔江，舟行绕瓜步，回远六十里，多风涛，乃于京口埭下直趋渡江二十里，开伊娄河二十五里，渡扬子，立埭，舟不漂溺。(《唐书·地理志》)

宋崇宁元年，置提举淮浙澳闸司官一员，掌杭州至扬州瓜州澳闸通治之。(《宋史·河渠志》)

政和六年，诏镇江府旁临大江，无港澳以容舟楫，闻西有旧河，可避风涛，岁久堙废，宜令发运司浚治。(《宋史·河渠集》)

明永乐元年三月，修扬州府江都县河东等乡边江圩岸。二年十一月，修筑泰兴县沿江圩岸。(明《太宗实录》)泰兴县言：沿江圩岸，东至新河，西尽丹阳界，长六千六百五十丈，高一丈五尺。顷被江水冲决为民患，请发民丁修筑。从之。七年十二月，遣官相度，修筑扬州府泰兴县拦江堤岸，为风涛冲激沦入于江者三千九百余丈。又浚大港北自县河南出大江淤塞者四千五百余丈。

洪熙元年，浚仪征坝河。(《明史稿》)是后定制，仪征坝下黄泥滩、直河口、二港及瓜州二港，常州之孟渚河，皆三年一浚。

正统二年十二月，修通江桥东南一带江岸。五年六月，南京守备襄城伯李隆奏：积

雨坏南京中新河上新河堤，请俟水退，量拨丁夫修筑，从之。六年九月，修筑南京江岸。(明《英宗实录》)先是南京江岸累决，命工部侍郎吴政等修筑。政等言：水深未便工力，请于农隙时疏江中沙洲，以杀水势，然后开工。至是以兴役请。上命守备丰城侯李贤、太监刘宁同政提督，仍戒侵扰。七年七月，筑南京浦子口大胜关堤。(明《英宗实录》)先是江中有洲，激水横流决堤，丰城侯李贤请凿洲引水直流，则堤可固。上可之。会诏蠲天下徭役，遂不果凿，止令筑堤。景泰元年，南京风雨，江水泛涨，坏城垣官舍民居甚众。拔神营监树木二十余株，诏有司修理之。

成化六年十月，南京守备成国公奏：江水泛溢，冲塌上新河口岸。事下工部覆奏，移文南京工部会守备等官勘议。八年八月，修筑瓜州堤岸。十八年，扬州府同知李绂率泰兴县知县蔡暹筑县西南江堰，自保全乡至庙湾港长一万六千九百二十五丈，广三丈五尺，高一丈。二十二年十月，南京守备成国公奏：江口操演战船，请飭工部督军，修浚中下二新河。弘治十六年，江潮入望江门，浦口城圯。

嘉靖十二年，知泰兴县朱簏增筑江堰，自庙湾港至过船港，七千六百三十丈。

清康熙二十九年，修砌仪征县江口响水拦潮二闸。五十三年，重修江都县广惠通惠二闸。《江防厅册》：自石人头迤南至瓜洲江口，头闸曰广惠，四闸曰通惠。五十四年，江流北徙。五十五年，总河赵世显会同漕督疏请建筑江工。奉旨：“据赵世显奏称花园港地方及息浪庵前石工马头，俱被江水冲坍，屯艘之处狭窄，风浪可虞。题请挑挖月河等因，乃伊虑及河工之意。朕以普天之下生民为念，无处不预为筹划。倘江水日渐北流，冲刷不已，则瓜洲城垣必致危险。其荆州、杭州等处，俱有护城堤工，作何保护，不致危险，庶瓜洲一带地方，始得完固。奏，张杓为人明白，着九卿向伊问明，详加确议具奏。”又奉旨：“据赵世显奏称：江溜北徙，花园港地方被冲坍塌一百二丈，瓜州息浪庵前石马头，亦被冲刷坍塌等语，倘江流日渐北徙冲刷，瓜洲城垣必致危险。事关民生，若不预为筹划，修堤保护，断乎不可。着江南督抚总河总漕速行亲往详加察勘。作何修堤保护城垣，勿致危险之处，作速详议。一面动帑修筑，一面奏闻。督抚河漕四院同诣瓜洲察勘，会议修筑挑浚之处，一切丈尺工程，并设文武官河兵住工，每年入岁抢修案内修防。”奉旨依议。(附，赵世显奏略：瓜洲河道自四闸起至江口止，计长二百九十七丈，统名花园港。渡江船只，赖以屯泊。上年六月内江流北徙，将四闸之下运河南岸淤芦田亩中间倒塌一百二丈，以致屯船无多。臣相度情形，应于四闸之旁，运河北岸，挑挖月河一道，以为屯船之地。倘来年江流北徙，逼近四闸，则预将四闸石块锭铜拆起存储。临期细勘，另行酌议。再照瓜洲之息浪庵前石马头已坍塌去十分之六。庙宇因逼近，拆去两层，拆后地遂坍塌，盖因江潮浪涌大溜北趋所致。臣谨会同总漕施世纶具题，令阿达哈哈番张杓奏。)是年建筑息浪庵前护城堤岸埽工。(长二百七丈。)白花园港三官殿起，至四闸下刘家涵洞护滩堤。(长一百八十丈。)花园港埽工，(长三百一丈)绕城河间段开挑宽深。(长一千三十一丈。)(《江防厅册》)以上俱于五十五年工竣。建筑花园港越堤埽工。(长五百三十丈，以作重门保障。)挑瓜洲西门城西

月河。(长三百丈。)(《厅册》)俱于五十七年工竣。开挑瓜洲正入洲引河二道。(第一道长五百五丈。第二道长五百二丈。)(《厅册》)五十八年工竣。重修仪征县江口通济罗泗二闸。六十一年，允署总河陈鹏年请，建筑花园港西丘家巷挑水坝二座，并雁翅包滩里戽工。(共长一百八十五丈。)又建筑旧四闸西龙王庙护埽工。(长一百三十八丈。)

雍正二年，奉旨：从河督齐苏勒请，建瓜洲胡家觔东岸护口埽工。(长一百十八丈。)又建唐家庄束水草坝一座。(两岸各长二十丈。)八年，奉旨：从河督孔毓均请，挑瓜洲月河。自青莲庵起至尤家碾。(共长三百六十七丈。)并于月河头建筑束水坝一座。九年，奉旨：淮河督嵇曾筠敬筹大江形势一疏，于瓜洲正入洲挑引河。(长六百四十一丈。)五公滩开挑支河。(长三百六丈。)夹江内建筑贴心坝一座。(长一百五十丈五尺。)又两首接筑拦水土坝。(长二百五十八丈。)是年十二月，总河嵇曾筠奏：保守江岸，需用石块工料。(附，嵇曾筠奏略：江南瓜洲滨江要工，经臣奏明于对江挑挖引河，拦筑夹坝，分溜南注。而北岸花园港等处酌用桩埽，相机建筑挑水坝以御外溜。仿照前人保守江海塘岸之法，用高大木柜装载石块深埋地底，俾江溜不致搜刷，以护崖岸。其所需工料，于来年岁抢钱粮内通融计处。)十二年，江溜南趋，刷去京口迤北谈家洲，直逼京口。抛填碎石，下埽，固护。十三年四月，总河嵇曾筠奏：镇江京口迤下新河口临江崖岸坍塌，查勘抚恤。(附，嵇曾筠奏略：据委员并江防同知等禀称，新河口江崖坍去横长一里有余，进深八九十丈不等，沿江民房塌卸三百余间。臣查所坍之崖距镇江府城尚远，无关运河要道。惟河口内向建新闻一座，蓄泄水势，以便民船。移咨督抚臣转饬地方印官相机料理，并确查塌房民居分别抚恤。)

乾隆八年，重修仪征江口通济、罗泗等闸，以利运行。二十九年七月，河督高晋奏：江岸坍塌，逼近瓜洲，酌定办法。奉旨：“只可如此。与河争地已难，况与江乎。”(附，高晋奏略：据江防营禀报：七月六日，风潮回澜，江滩两头并后身裂缝，登时坍陷入江，长九十余丈。测量水深四五丈至六七丈，与护城河相连。距瓜洲城十一二丈及三四丈不等。连日并未续坍，溜势已渐开行。向来江坍一昼夜必定。就目下情形而论，与城垣无碍。查大江两岸地势本高，水由地中，向无堤岸。其江滩坍涨靡常，潮汐随时长落，原无冲漫民田之患。从前滩势宽阔，离城数百丈至一二千丈不等，迨后渐次坍塌逼近。臣历查从前办过江工成案，并广询从前办过成法，缘江水近海，潮汐往来，是以修防抢护，与黄运湖河情形不同，签桩下埽，水深莫测，既不可行。曩有用木柜盛石沉入水中者，又用竹篓沉石者，并有以大舟载石凿漏沉水者，更有在对岸开挖引河及筑坝挑溜者，倍费工力，均无成效。惟有紧靠边滩，抛填碎石，以实其底，修做防风，以护其滩，虽不能保其永远不坍，然历年照此办理，尚属有益。但正当坍江之时，以数十丈宽之急溜深坑，即使多觅船只，多运石块，齐力抛填，而石随浪淌，江水甚深，滩坡甚远，前石尚未抛足，后段又复坍塌，虚应故事，动则需银数万两，徒启工员冒销之端。再四斟酌，必须于江势坍定，相机施工。该处江滩，目下虽未续塌，而本月十七八九等日，秋汛大潮过此，

始能势定。臣随一面督率道参厅营将现在两头未塌之滩，用埽接护，以御风浪汕刷，护城河，亦即煞坝堵截，以防其通流掣溜。并于沿滩接做草坝，以通纤路。一面酌拨银两，采办石块料土，堆贮无碍近地，以备临时应用。)三十二年三月，奉上谕：乾隆二十七年七月内，据高晋奏：江防厅澜坝江滩塌陷，议将新修埽工，签桩压实，并筑子堰为靠。及于埽外抛填碎石，以资巩固。旋据奏报工竣。惟于瓜洲城逼近处所，恐岸或续坍，即不得不筹及避让溜势，收筑城垣，为一劳永逸计。著传谕高晋，将近年潮汛堤工，及现在护沙长落情形据实覆奏。(附，高晋覆奏折略：查澜坝工，自乾隆二十九年秋汛江滩塌卸，抢护平稳。后每年霜降后，将旧埽卑矮残缺处所，逐一勘估，次年桃汛前，将应修之工，用柴加镶，厚压重土，以御风浪。埽外所下碎石，历经大汛，潮汐往来，风浪汕刷，不无掣卸空虚之处。复多加填碎石，以固根基。两年来夏秋潮汛，均庆安澜。该处埽石工程平稳，形势如旧。但碎石外，旧有坑塘，仍未淤平。是以尚未长有沙滩。拟本年多加碎石，俾坑塘逐见填平，如果长有沙滩，堪资外护，即可毋庸收小城垣，让地与水矣。)三十五年八月，李宏奏：西南风暴甚大。旧子堰接连查子港埽工，风浪冲掣，本月十二三等日，塌去八十余丈，崖外水深七八丈。查该处离瓜洲城尚远，并无妨碍。已督饬该管道厅营弁将沿江子堰照旧补筑。四十年六月，奉上谕：“据吴嗣爵奏称，瓜洲城外回澜坝，及大庄等处，从前抛填碎石，抵御江潮。现在石块拥护埽根，甚为稳固，毋庸再为添办”等语，此项碎石工程，前经谕询高晋，查其是否有益。据实覆奏。每岁抛填碎石，藉以拥护城根，相沿已久。是以仍听其照旧办理。今据吴嗣爵以埽根稳固，已有成效。奏请嗣后无庸添办，不知何所见而云然。或系未悉从前立法之由，遂欲省工惜费。轻议更张，万一停止之后，江潮复有冲啮，渐致侵及城根，又不免将来另办。是每年所省者少，而日后所费者大，殊为非计。著传谕高晋，将此项抛填碎石工程，详加察核。每岁有无开销，于瓜洲城岸有无裨益，及是否可停，并应照旧例办理之处，逐一查明，据实覆奏。(附，高晋覆奏折略：“查回澜坝，自乾隆三十二年及三十五年节经查明每岁抛填碎石，并未续坍，工程稳固。此后应酌看情形办理，毋庸每岁添抛。近年有稍为添补者，有并未加培者，其抛填碎石工段，亦不止回澜坝一处。如附近之江安坝、查子港大庄盖坝、并水利厅属之查家墙头等处，均有碎石工程。上年及本年因江水安澜，各工所抛碎石，甚为稳固，是以未曾添办，原非永行停止。兹臣亲赴江岸回澜坝及大庄等处，详加查勘，节年抛填碎石，俱一律稳固。第江岸坍涨靡常，工多逼近城垣居民，设有坍塌，自应随时保护。今若不再添办，万一江潮复有冲啮，渐致侵及城根民舍，诚不免将来另办，所费更大。是江工抛填碎石，原系补偏救弊之良法，自不便轻议停止。惟有随时察勘，如果形势照旧，自无庸岁岁添办，或砖工日久倾陷，或另有新生工段，则仍当勘估办理。”)

四十一年六月，高晋萨载奏：“瓜洲城外江岸坍陷入江，西南城墙塌去四十余丈，将城量为收进，让地与江。”(附，高晋等奏略：“瓜洲城垣围环，计长一千五百四十三丈九尺。城之东北隅及西门东门俱有街市，民居稠密。城之西南隅，地势高洼不平。目下坍塌处所，城内尚有隙地，自西城根斜至南城根止，长一百一十余丈。自外至内宽五六十丈，可以让出。靠后即有民人居住，不能多让。应即在此处补还城垣。但江滩涨坍奠定，终难保其不再坍进。再四思维，即就坍缺之城，拟做土

城一道，礮筑坚实。上面仍加砌女墙雉堞，与原城一律相平。则需费无多，即可分别内外，亦足以资拦御。城内居民，更可有恃无恐。至塌去之殷家庄、上下坝工，原系江浙重运粮艘渡江进口绎路。今坝工坍塌，两头城墙陡立，无路可通。应将所坍塌城墙两头，各拆去数丈，以顺其势。将隍土摊平，因沿江靠崖一带，筑成土坝，仍用碎石铺底，以资稳固，以通纤路。又可为土城之外护，亦甚有益。其拆下所坍塌城砖，即为土城加砌女墙之用。”是月，上谕军机大臣等：“高晋等奏称，瓜洲外查子港工迤下殷家庄接连回澜坝江岸裂缝坍塌入江，现在水势已平，两头坝工业经裹护稳固。请将瓜洲城量为收进，让地与江，并于沿江靠岸一带，筑成土坝，以通纤路等语。止可如此办理。从来水行无事，难与争地。河流尚且不可，况江势浩瀚，岂人力所能抵御，朕从前巡幸江南亲阅瓜洲一带江工，恐江溜奔注，侵至城根，欲将城墙稍收，以让水势。嗣后谕令高晋勘阅。筹办，高晋以溜已开行，江岸平稳，遂未办及。惟照旧抛填碎石，为补苴无益之计。今果如朕所料，使早将城垣收进，何至猝为江溜所冲颓。则数年来抛石之费，不归于虚掷乎。着传谕高晋，当以前事为鉴，妥善经理，以资巩固。并谕萨载知之。”五十七年六月，奉上谕：“书麟等奏称‘瓜洲城外迴澜坝，迤下江岸裂缝坍塌，侵至城根，将四十一年收进之土城，塌卸十四丈。现将回澜坝塌卸工尾，暨南门外滩嘴处所，用料裹护，并将土城让进五六十丈，补还城垣，以复旧观等语’，瓜洲城外江滩，因江流北徙，冲刷滩崖，坍塌及土城，该督等以城内西南隅并无居民，现在坍塌之处，后身尚有隙地，拟让进五六十丈，照旧补还土城。亦只可如此办理。但该处城垣，于四十一年业经收进五六十丈。此后又复让进，若不另筹挑护之法，则江流冲刷靡常，难保不再行塌进。岂有屡将城垣向内收进之理，因阅图内现做裹头处所，自属顶冲，何不于该处接靠坝根，建筑石矶，挑溜向东南下趋，俾瓜洲城外滩岸，不致冲刷塌卸，城垣可资保护。但此一带系柴坝，江流甚深，溜势湍急，若于坝根接做石矶，是否能生根巩固，以资挑护，着该督等悉心筹酌，据实具奏。”寻经覆奏，奉旨如议行。(附，书麟兰第锡覆奏略：瓜洲一带江流近海，潮汐往来，水势汹涌，与上游江面情形不同。测量江岸坍塌处所，靠崖水深二丈，离崖三四丈外，水深三四丈至八九丈不等。西首新做裹头，本系回澜旧坝，如能接靠坝根，建筑石矶，挑溜下趋，洵可保护滩岸，为一劳永逸之举。惟该处系柴坝，江流甚深，溜势湍急，若做石矶，根底必致外游，不能存立。是江势浩瀚难以生根，已邀圣明洞察，且漕船经由要道，若矶嘴挺出，水激浪涌，溯流挽曳，亦多未便。臣等再四筹酌，查江岸工程，原有下填碎石，上加护埽之法。现在回澜坝外试探，尚有碎石拥护坝根，似属有益。今按现在形势，拟于裹头外硃笔指示之处抛填碎石，护住埽根，可以藉资挑护。自裹头至坍塌旧城处所，共长七十三丈，靠崖纤道之外，一律抛填碎石，再于上面镶做护埽，以御风浪。嗣后每年察看情形，逐渐抛填，可期溜势渐远城垣得以保护。)

嘉庆四年四月，江南河道总督康基田奏修仪征县临江运口通济等四闸。原奏略曰：“仪征县境内，临江、运口，上承淮水，下接江潮，为淮南盐运及漕船经由要道。向设通济、罗泗、拦潮、响水四闸，启闭、节宣，甚关紧要。今通济罗泗二闸，金门及雁翅燕尾上下裹头均属坍塌，闸底关石等桩，亦已朽烂。万年枋并皆碎损。急

应照旧估修，以济盐漕运行。现批运司发银兴修。”十年五月，两江总督铁保等奏：“自高邮至扬州一带，江潮旺大，水势顶托，前后车逻一坝，尚不足以资分减，拟于日内再将南关大坝启放。”是年八月，江南河道总督徐端奏：“江防厅属江防厅瓜洲城外之回澜坝，因秋汛江潮旺大，临江埽段蛰坍，当飭抛填碎石偎护。已一律稳固。”十一年二月，铁保等奏浚归江各河，原奏略曰：“湾头闸壁虎、凤凰桥，由廖家沟出江，东西湾坝由石羊沟出江。金湾旧坝，由董家沟汇入芒稻河出江，金湾新坝、金湾中闸、北闸，由人字河分而为二。一由仙女庙入运盐河出江。一由芒稻闸出江。各闸坝河道淤填，厚薄不等。并有河身淤填。口门垫塞，致上游宣注不畅，逐段丈估，展宽挑深，并挑砌滩嘴。筑柴草土坝两道。现在桃汛已届，未便耽延。即飭督率委员渠夫僭办。务赶盛涨前，一律深通，以备引水下注，保全淮扬地方。”十二年，靖江县知县李廷芳浚其县通江之蔡家港等五大港。十九年，两江总督百龄等奏修靖江县江堤。原奏略曰：“臣吴墩、臣百龄，遵即驰赴靖江，臣朱里亦由苏前来。当即率同原委勘估之文武员弁等，亲诣江干，详加履勘。该县东西南三面临江，江之南岸山势接连，排如屏障。其北岸即系县城，向有土崖护。近因江面之东南之虾蟆山及长山一带涨有阴沙，挺入江心，逼溜北趋，该处系江海水汇之区，江流之西而东，海则由东南向西北斜驶，两根冲激，其溜直抵县南之苏家港，涌起潮头，一路向要撞击，距该县南城根仅四十三丈。当此春汛未发，潮汐往来北岸，尚曰有刷卸之处，一经伏秋大汛，势必侵及城垣，更形危险，亟筑塘抵御。臣等共同筹商，该委员等原议估办碎石坦坡，于情形尚属合宜。现在酌定，自澜港口起至苏家港止，内有四段，最为顶冲着重。所修坦坡顶底，收分丈尺，略为宽厚。其余工段情形稍轻，丈尺亦稍减。惟该紧靠滩崖，先筑土坡，外包碎石。今覆行妥议，土坡应多做一丈，石坡应少做一丈。将土坡加以夯碓，则与老崖交县凝结而石坡得此后靠，更觉坚巩。计所需工料，共八万五千九百两零。据该县士民，愿捐堤二万两，盐臣札称淮商捐助银三万两。其余三万五千九百余两，请先于苏州藩库内暂行借款兴办，价照前次挑浚太仓刘河之例。于靖江县按田摊征，分作六年还款。如蒙俞允，臣百龄、臣朱理，即派令该县张友柏领银承修。勒限于春汛前一律告竣。责令保固二年，以免草率偷减。”硃批议依办理。工部知道。

道光三年，江涨，复将瓜洲城外临江坝纤道塌。又镶埽加抛碎石，并估筑盖坝，挑溜保护。（《同治扬州府志》）七年十二月，张井等奏，江防厅瓜洲城外回澜坝以下工段，复又塌陷。原奏略曰：“江防厅瓜洲城外临江埽坝纤道，乾隆年间屡次塌陷入江，并塌及城垣。当时止将坍塌处镶埽抛石护崖通纤，并将塌缺城垣向内收进，补筑土城。本年六月，因江潮盛涨，回澜坝迤下工段，复又坍塌，切近城垣。臣等查江势浩瀚，加以近海，潮汐往来，江流迁徙，此坍彼长，固非人力所能强御。如瓜洲临江坝二，数十年来，已屡修屡塌。检查成案，乾隆二十九年，河臣高晋因回澜摊议，以碎石抛填，用埽防护。迨四十年、四十七年，江工复塌。其时督臣均将城垣收进，让地与江。非徒惜费，盖深知与江水力争，徒费无益。今旧挑坝塌入江中，费巨而难于修复。瓜洲城无关保障，其临江西南一面，本系旷地，并无居民，仅可仿照从前收进城墙之案。于来岁春融后，照旧接筑土城，让出纤道，计费无

几。惟该处重运渡江，纤挽所经，目下自当先以通纤为急。现已饬江厅相机妥办无误。”(同治续纂《扬州府志》)八年三月，蒋攸锯陶澍奏挑浚吴淞江验明如式完竣。原奏略

曰：“臣陶澍亲往验收，于二月初七日在苏启行，由白茆等处一路查勘，顺抵吴淞江，亲赴各工，按照估册，逐段勘量。自青浦县头坝起，至上海拦潮大坝止，通共计长一万八百八十九丈有零。细加覆勘，悉与原估宽深丈尺有赢无绌。内有太仓、新阳、上海、嘉定、吴江、镇洋、青浦、宝山等州县，均于原估丈尺外，加工挑挖，其宽深多至三尺及六七尺不等，均系捐资办理。臣复以拦潮大坝，为新开河道尾间。若坝基未能启除净尽，即于全河大有阻碍。遂亲至工所，督饬该道府及各员弁竭五昼夜之力，赶紧将拦潮大坝柴草坚埽及下创积土逐层启除净尽，定限于十七日丑刻，先将青浦上游头坝开放。目击水势畅出，汹涌如雷，坝外淤泥，立时冲散。未刻海潮大至，水势抬高，外内刮刷。臣即乘潮回省，沿途按段测量水深，均有一丈九尺至二丈不等。实为一律深通，毫无浅滞。询访沿途耆庶，盛称百余年来未有如此开挖深通之工。逐段验收，欢声载道。即如各县所挑工段内，起出沉溺粮船海船等多年陈物，堙埋江底，为从前开浚所未及者。其为深通甚于往时，已有明证。所有通工挑河筑坝，共银二十九万九千一百八十七两零。仰恳俯准将平糶缓漕米价银二十六万五千七百三十二两零，即为挑浚吴淞江经费，就款开销。感戴圣恩，益无既极，仍饬令照数造报。此外不敷银三万三千余两，以及兴工后因遇雨雪车戽一切费用增多，并各州县于原估之外加挑宽深，所需工费，皆在外自行捐助。仍钦遵谕旨。免其报销。”十年九月，陶澍奏沿江新涨沙洲吕佃输租。十一年三月，张升奏：江防厅瓜洲运口东岸，频年江流北趋，历被冲塌多处。自老鹳嘴起，至查子港以上，筑纤堤一道。临江镶做防风埽工，以利漕船行走。六月，两江总督陶澍等奏上元等县沿江被水。七月陶澍奏：“本年各省水发，同时并涨。长江千里，几与淮连。上元、江宁、句容、高淳、六合、江浦、江都、仪征等县，沿江被水各处，一片汪洋，仅存屋脊，树梢荡漾于波涛万顷之中。续报之丹阳、丹徒滨江田庐被淹亦多，瓜洲一带衙署亦在水中，百姓流离颠沛，惨目伤心。”十一月，除江苏靖江坍没田赋。十二月，命江苏等省，查禁占垦江湖涨滩壅遏水道。谕陶澍等详勘。无碍水道者，方准居民认垦。十三年二月，陶澍等奏：六合县双城果盒二圩冲决，借司库银凑办，分年摊还。原奏：“六合县境双城果盒二圩堤埂，为附近各圩保障。上年夏间，江潮发涨，冲决二十余段。自应及时兴筑，俾资捍御。据该县查明，此项工程，本应民间集资修办。惟灾歉之后，生计维艰，恳请借项凑办。谕照所请，准在于司库银款动拨。及此春初水涸，饬令赶紧修办，以卫田庐。所借银两，自道光十四年为始，在于粮田项下，分作三年按亩摊征还款。此项圩埂借项凑办，民借民还，不经官吏之手。免其造册报销，工竣委员验收，仍取造摊征细册咨部查核。”四月，陶澍奏：江宁省城河工完竣。是年，陶澍等奏：沿江之上元、江宁、句容、江浦、六合、江都、仪征、丹徒等县潮汐泛涨，多被冲破圩园，漫过堤埂。原奏：“上元县稟：‘该县北乡沿江各圩，潮水冲溃，东南乡沿河一带圩田，值江潮加涨淹没殆尽。’江宁县稟：‘西乡圩田均系贴近大江，前已被淹。七月中旬以后，连

遭大雨，江水盛涨，附近江圩之处，一片汪洋，’句容县禀报：‘八月初三四等日，风雨连绵，江潮汹涌，前此未破之圩，水浸日久，堤脚已松，风潮荡激，遂致溃决。或因圩身塌铑过水，人力难施，田禾漂没。’江浦县禀报：‘低田圩岸，先被江潮冲缺，禾苗均在水中。七月二十五六等日，潮水加长，地势略高之腹内各圩亦冲破。’仪征县禀：‘东乡沿江一带外圩田亩，前因风潮陡发，于六月十三等日先后被淹。八月初一二日，来源涌急，水势更大，兼值初三日大汛之期，江水漫溢，复将西乡接壤六合之内圩田亩，及南乡未淹里圩俱经淹没。’丹徒县禀报：‘七月初二、十八九、及八月初二、三等日大汛期内，风雨交加，以霪雨东风连宵达旦，兼之江北各路，水势骤注，潮汐更大，圩岸冲破。’”十五年六月，减江苏丹徒县滨江被水芦田额赋。二十年六月，上元等县水江溢。七月，上元等县被水江溢。二十四年，江溢。十二月，除坍没田赋。二十六年四月，赛尚阿等奏江苏沿江炮堤添设土档土墩各事宜。二十八年六月，江苏仪征江溢，水入城。二十九年六月，上元等县大水江溢。陆建瀛奏省城居民房屋淹没，劝捐抚恤。

咸丰七年，江苏巡抚赵德辙奏：道光八年以后，充公官田一律改为承买原佃，每亩缴价八钱，以充军饷。

同治四年，江阴县董事曹毓琇等凿新南套河，疏通各港入江之路。《江阴县志》：“新南套河在后塍之北，寿兴沙之南。咸丰年间，沿江复涨，南北毗连各港水道不通。四年，董事曹毓琇等于新沙中间韩家港对峙，疏凿是套，迤西十有余里。分为二支，一折北穿海坝达江口，与北套合流入江。一绕西南，循故套旧址，达巫山港入江。正月，江苏巡抚李鸿章奏：挑濬吴淞江。原奏略曰：“吴淞江居太湖下游，为苏省三江之一。西受苏郡诸水，东会黄浦江，以达于海。苏松太三府州属，田畴灌溉，宣泄所资，商民往来，舟楫所必经。同治元二年间，驻军上海，该处年久未浚，海潮淹塞，日以淤浅，旱则蓄水无多，潦则泛滥不定，于农田水利，关系尤重。当经飭令署臬司刘郇膏，督同补候知府汪有勋、署上海县知县王宗濂、暨委员绅董等，筹款挑浚。计自上海曹家渡野鸡墩，至黄渡为吴淞江正河。又申纪港江桥南翔各支河并坝外娄浦口捞浚稀淤，五逆湾取直开挖新河，总共九千二百余丈，逐段挑挖，核给夫工钱，十四万五千余串。臣亲往验收工程，均尚核实，河身一律疏通。再此项经费出自本地捐款，请免造册报销”。十二年九月江苏巡抚张树声奏：疏浚太湖等处河港，并修桥梁水窦各工，一律告竣。原奏略

曰：“震泽县境之七十二港，紧承浙省，来源为苏省太湖。首宜宣导之处，各港通塞不一。惟胡淞、薛港、丁家港、吴淞、张港、叶港、蒋家港、双板石桥港、西丘庙徐杨港、南盛港、大庙港、鸿雁港等十三港，最为淤浅。震泽县境之十八港，为太湖腹胁出水要道。除吴家南潏、中潏、陆家四港，现经通畅。梅里、石里等港，量加捞挖外，计应挑南仁、唐家、马家西港、湖墓等五港，吴江县境之长桥内外横直六港，及上元圩港沿塘夹河，并吴江震泽境内之烧香河，均多淤塞，此濒湖各港之亟应择要挑浚者。由此以东，则泖湖吴淞江上承各湖荡之水，以入黄浦，为分泄

湖水之要道。泖湖自东泖进口之拦路港起，至小独圩港止；吴淞自西口起，至黄渡以上止，淤浅甚多。该二处河面极宽，无从筑坝，当用机器捞挖。其吴淞江黄渡以东，至曹家渡以西十里，河身淤垫，高于上游。从前旋开旋淤，实因曹家渡以东、上游新闸以西二十里，为吴淞入黄浦之下口，河底尤形高仰，必须一律加挑，下游庶能上驶。太仓州境之七浦河道长五十余里，西泄太湖、巴城、阳城诸湖之水，东出七鸦口以入于海。同治五年曾经方开浚。迄今数载，沙泥停积，日形淤浅。昭文县境之徐六泾河，与泄湖之白茆河，相为表里。河身淤塞，几成平陆，均应开浚深通。此太湖下游宣泄水口，以及出海河道之亟应择挑浚者。至沿湖沿塘运河各岸桥窰，均为宣泄湖水要日。如江震元和境内大小桥梁五十余座，沿塘环平水窰一百余座，又苏省盘门外之吴门桥，为胥江尾汇之入运河之路，溧阳县之南渡桥，为东坝诸水汇入太湖之咽喉，皆因历年久远，兵燹残毁，坍塌填积，阻塞水道。以及无锡境内沿塘坍塌桥梁二十三座，均应分别捞清，拆修重建，以资巩固，而利宣泄。以上各工撙节估计陆续估现已一律完竣。均系如式宽深，工坚料实，各属自应筹办之处。据报随时疏浚，以佐正工所未及，亦已到处深通。所用经费共银二十九万五千余两。除六泾河工用款，系藩库垫发，归白茆河工经费案内，照章分派，得沾水利，各州县摊捐归款。其余均以苏沪二局厘捐银两通筹济用，并未动支正项钱粮，邀免造册报销。”

光绪九年八月，左宗棠奏泰兴等县沿江圩岸破溃。原奏略曰：“据各州县禀报，泰兴县冲决圩岸多处，淹毙七十余人。靖江县冲漫岸八十余里，淹没田禾三十余图。武进县冲塌圩岸数十处。丹徒县冲倒江岸八九十丈，淹没田亩二十余村。丹阳县沿江圩岸冲破者不下数十处。”光绪九年，两江总督左宗棠奏：兴修运河，上游民埝以工代赈。原奏略曰：“东省山水下注，先入邳境。武沂两河交流，该处三家口草桥圩缺口二道，尤为紧要。已于上年十月内，经徐州道程国熙先行垫款堵塞，俾涸出民田，补种二麦。一面督飭印委各员，将各处民堰分别勘估，计自山东交界之黄林庄起，至邳汛猫儿窝止，运河两岸民堰缺口水沟及残缺卑薄之处，共四十段。城乡民堰及武河沂河缺口，共十七段。皆系保护城郭田庐要工。其中并有应行补还旧石帮岸及迎溜厢埽之处，又有艾山河一道，在运河东岸，承受东首来源，积淤甚宽，必须大加展挑。现将该河之朱龙口、祁家日二处，筑草土坝，截住来源。以便勘办。其城内文曲沟，城外玉带河，亦须逐一清厘，以通脉络。以下民堰情形，宿迁六塘河民堰，周长八十余里，积年淤垫，河身已高，长堤坍塌几尽。往时水势稍缓，民筑子堰，尤可支持。上年大水骤至，防不及防，遂至漫溢愈广。兹按上年水志，择最要者二十五段，先为堵筑，以卫田畴。以上各工，官督民办，于正月初十日分别兴工，俾附近灾民，得以自食其力。悉按河工成法，层坯层碓，以期坚实耐久。事竣之后，查照历年另案办工章程，由徐州道核实、造册，详送两江总督衙门，核实报销。”光绪九年，左宗棠奏七月沿江圩岸风潮破溃。原奏略曰：“七月二十二日，暴雨烈风，连宵达旦，发屋拔木，平地成渠。沿江圩风潮所过，吸溜当冲，各处庐舍家具，尽付波臣。人民困苦流离，且有一家仅存数口者。据绅士盛宣怀等禀，江南北如江都、仪征、六合、泰兴、丹徒等县洲围，南以受冲而破，北以受漫

而溃。现据各州县先后禀报泰兴县冲决圩岸云云。”十年二月，左宗棠奏朱家河达江等水利工程一律告成。原奏略曰：“各前督臣议开朱家山河以兴水利，均因工大费巨而止。嗣督臣檄升任广东提督吴长庆率勇开办，为时两年，甫有端倪。又因该提督移防而辍。缘朱家山段石，须挖深二十余丈，方能通水。而石根内蟠，坚凝如铁，连成一片，锥凿之力两穷，故议开朱家山者，咸苦此处之最难措手。加以下游宣化桥泄水之处，庐墓相杂。一经施工，节节阻碍。经臣饬派营中善于攻石之勇丁，先从石工入手，以棉花火药凿管通山，层层轰揭，并于下游新开一河，自马家桥历晒布场，以至浦江康山圩止，而达于江，让出宣化桥一带庐墓。赤山湖，先于九年二月完工。朱家山自开工以来，两易寒暑，乃得告竣。不惟沿江圩田。(江浦六合)平时均受其利，即山水陡至，亦可免淹没人畜之患，而粮艘货船可由内河而行，不必再犯大江风涛，尤属农商两便。此外通济门内外桥闸，为秦淮附郭正流。金川门内外河道，为港汊入江去路。他如带子洲沿江之圩堤，江宁镇濒江之闸坝，均大半冲塌残缺，并省城之道路沟渠，亦皆年久失修，均为先后分别动工，以慰绅民喁喁之请。共用银三十六万六千七百八十余两有奇。而设局之费，动工之费，兵勇米折赏犒之费，民夫乡夫哨勇石匠口粮之费，木石各料价值之费，以及此外散碎各费，统算在内，非撙节动用核实支销，未易及此。”十二年六月曾国荃奏，江河漫溢，上元县低洼圩田被淹，暨加筑江都之瓜洲教场圩子堤。原奏略曰：“五月大雨，连日经宵，滂沱不止。上游山洪大发，下游顶托难消。遂致江河漫溢，下向江宁城厢内外，沿江近河各处，均为水淹。据上元、江宁、江浦、六合、句容、高淳、溧水、江都、甘泉、兴化、仪征、金坛、溧阳等先后禀报，低洼圩田多遭淹浸。沿江滨湖圩岸风潮冲击，已有决溢之处。江都所属之瓜洲地方，江潮泛滥，江岸屡被冲坍，该处有教场圩堤一道，系数万民田之保障。江潮已直逼堤前，该营火药局，及瓜洲镇游击衙门，亦均逼近。已由臣札饬新湘新兵各营就近派拨营勇，驰赴该堤，会同勘明扼要，加筑子堤堵御。并令驻扎沿江各营，各率弁兵，就各处将堤岸勤加梭巡，妥慎防护，力图保全。”十六年，瓜洲城坍没。十七年三月，江苏巡抚刚毅奏勘视开浚吴淞江工程。原奏略

曰：“吴淞江河道，自道光六年前抚臣陶澍饬挑，以后同治四年略加修治，今又六十余岁，淤垫日甚。前年秋雨连绵，河湖泛滥，积潦既无销路，涸复更自稽时。近来灾歉频仍，若再因循坐误，年复一年，积淤愈厚，需费愈多，办理愈形棘手。舆情急迫，询谋僉同。上年春间奏挑蕴藻河，原为此江导先路。嗣经臣督同苏州藩司黄彭年通盘计算，挹彼注兹，查有历年解存司库之各属摊征河工本款，及赈捐余款，积谷生息项下，所存生息银两，可以尽数凑用，此外别难借拨。但核与原估数目，尚自悬殊。即使设法变通，逐层节省，仍不能不借助防营勇丁，以补经费之不足。再四熟筹，甫能定义。臣与原任督臣曾国荃往返函商，乃于去年十月派委干练之员候补知府周莲等驻工开办。并调拨营勇，协同民夫，分任工段，通力合作。臣随时轻装减从，屡赴工次，躬自履勘。经冬及春，营段将次完毕，民工亦过大半，虽人夫云集河干，不下万余，而群力兵民相安，同戴皇仁，众心尤形踊跃，沾体涂足，畚钟勤施。臣舟輿所至，目击各员弁及董事人等，皆能认真督率严催，不辞劳瘁

，查阅河身，一律较旧槽加倍深通，便于宣泄，均无草率偷减情弊。统计工程，袤延七十八里，所有应挑土方，若从此天气晴爽，工作无少间阻，约于三月底即可全行告竣。届时臣仍当亲临复验，臣复查光绪年间，民风敦朴，物价廉平，前抚臣撙节从事，犹需费至三十四万余两之多。今则百物腾贵，迥异昔时，此江既系万不可缓之工，人情又处迫不可支之境，而经费仅用三分之二，非臣初意所及，其能济事，全在借助营勇，节省经费。各员弁力任其难，始克收兹实效。”三月，署两江总督沈秉成等奏：会筹节制洪湖起办应先工程。原奏略曰：“一修复三坝，一修整束水堤，一展挑张福口。查林家西坝，建于道光年间，智坝建于乾隆年间。乃林西一坝，于道光十九年启放冲损，后仅施堵闭，而石底残坏，石舌下渐跌深塘至二丈余。智信二坝，石舌下三合土并石桩均甚残损。智坝石底，亦多桩朽石陷。日久更必倾圯废弃，湖水不得由三坝分泄，则礼河终难节制。是以亟须修复，以资遵守。其三坝以下，南北束水坝，筑于康熙年间，绵亘百余里，失修太久，溃塌不堪。设遇启坝放水，势必随处漫溢。亟应将缺口择要补修，筑至张福口。引河，向分潮流，又为盐船入运经行最要之区，既欲节制湖水，不使归礼河自泻，先当大辟此途，以分其势，口门尤须宽深。昔年办导淮，近年办防黄，皆曾展挑宽深，惟黄水挟沙，所至淤垫，向无岁修之款，以频浚之。上年冬令，湖水消耗太骤，盐船壅泊其处竟至胶阁难行。若不急求深浚，于盐务大有窒碍。应再为加展宽深，俾盐船通行无阻。且盛涨分泄，亦可藉以愈畅其路，湖防盐路均甚获益。尤为目前可收实效之工。臣秉成等会商，拟由臣松椿督同道厅乘此水小，尚易施工，早为撙办，大汛前务期一律告竣。计三项工程，约需银不过数万两，可以集事。即在原任督臣曾国荃先拨之五万两内动用办理，如有不敷，臣松椿当仿照当年工程之案，设法凑济。事竣核实报销。”奏，殊批：“著照所请该部知道。”十七年江苏巡抚刚毅奏验收吴淞江全工完竣。原奏：“吴淞江河道，急需开浚。曾将历勘情形奏报。兹据禀，三月初十挑工完竣。当经臣亲赴工次按段验收。自四江口迤东之横口起，至新闸大王庙止，工长一万二千五百余丈。原估面宽十丈，坦坡二丈五尺，底宽平，水面浚深六丈一尺，共实挑土八十五万九千三百七十五方有零，河身倍见宽阔，坡岸一律坦平。均系如式通利。即于三月二十六日开启各坝，以便舟楫，而资灌溉。统计土方夫工营勇犒赏以及筑坝戽水工料等项，共用银一十六万九千余两。一切经费，在于赈捐余款积谷息银，暨各属摊征岁修项下支用，未敢轻动国帑。自可邀免造册报销。”

宣统二年五月，两江总督张人骏奏修海属河道。原奏略曰：“海属河道，岁久未修。河身淤垫日高，水难宣泄，以致川壅为患，非亟图疏浚不可。先经派员前往勘明，旋飭道员督同该管州县妥修。嗣据陆续禀报，州境内之五龙潮、文高桥等河，赣榆境内之阎家掘头、民皂、朱稽、孙家、卢家等河，沭阳境内之万公河，及贤官亭、乾下镇、高流镇等处圩堤，均经一律修竣。飭令洪燦亲往各工复勘。河流业已通畅，圩堤亦属坚固，足收捍卫之效。所需工料银两或酌拨官款，或就地筹捐，或由义赈绅董承办，由官协助。海州尚有塘河堤亦已兴修。又蔷薇河，因春水大涨，未能施工，拟俟秋后水涸，再行挑挖。又赣榆境内之霑口镇，亦由义绅筹款开挑长河，俾水得疏通。此外各属圩堤，并经次第修筑。所有河堤工程，悉令灾民力修，以

工代賑。”

第六卷 淮

淮水出河南南阳府桐柏县西南之桐柏山。东南流经湖北随州北界。又折而北，经桐柏县东折东流经信阳市北，正阳县南，罗山县北。有淝河自信阳市来会，经息县南有小黄河自罗山县来会。又东分二派，合于光州西北，又东经固始县西北，有南汝水来会，南有光山县水来会，又东北有曲河自商城县，史河自固始县来会，又东北入江南界，经颍州府阜阳县南，南汝水支津来会。东南流经霍邱县北、颍上县南，有沔河来会。又东南有淝河自霍山县，经六安州来会，折东北经寿州西，有沙河合汝水、颍水来会。又东北有东肥河来会。又东北有芍陂沿河水来会。又东北有庐州府北水来会。经怀远县南有涡河，亦名西肥河，自河南太康县，鹿邑县，经江南亳州分二支。一经太和县、颍上县至寿州来会。一经柘城县、鹿邑县，过亳州、蒙城县、怀远县来会。又东北有北肥河，自宿州来会。又东有龙子河自凤阳府凤阳县来会。又东经凤阳府北，又经五河县南，有浍河水自河南永城县分支经宿州来会。又东有沱河、自羊城湖来会。分二支：一东北为潼河。一东流复合。有池河自定远来会。又东经盱眙县北泗州南。东北汇为洪泽湖。湖之西北有濉河，自碭山、萧县、宿州、灵璧、睢宁来注之。其西北为桃源县境。南岸迤东北为高家堰。自睢口东南折而西北六十七里，又折而东。而东北经桃源县南境，有小水四自北来注之。南自老子山南岸，迤东北百五十余里为高家堰。

高家堰城西南四十里，汉广陵太守陈登筑。《三国志》注：登曾任典农校尉，乃巡土地之宜，尽灌溉之利。堰宜是时所筑。《宋史》李孟传：孟传为楚州司户参军，修复陈公塘，有灌溉之利。陈公塘即高家堰也。自韩信城五里至青墩二十里，至武家墩又南至管家庄，堰西为阜陵泥墩诸湖。西为准，本不相通，当日筑堰以利灌溉，非以捍水患也。自河与淮合，河淮并高，于是淮水东浸诸湖并而为一。洪水直抵堰下冲荡激射，堰始危险加高增厚，屹若长城。明世堰圯，七邑罹灾。隆庆六年，漕抚王宗沐、知府陈文烛始议修筑，郡人丁侍郎士美为文记之。国朝康熙初又决。二十二年，靳辅大加修治，历数十年不坏。雍正八年，发帑金百万重修，高广坚固防守倍严。康熙四十二年，命于山盱汛建南北中滚水石坝三座。其天然北坝一座仍前设立，至乾隆十六年，复命增二坝，以前三坝为仁义礼，新增二坝为智信，定为五坝。并钦定开放机宜，必俟湖水十分涨盛，始于礼义仁三坝，酌开一坝，以次相度情形酌开。俟仁、义、礼三坝过水三尺五寸，则开智坝，水势不减，乃次及于信，其天然坝立石永禁开放。

乾隆七年六七月，大雨，河淮涨溢，淮决，高堰之古沟千里渺然巨浸，郡属田禾沉没，人畜漂溺无算。

北界为清河县境，为全湖之委。其北岸即清河县南之御坝，始为全湖之委，北流至清口，黄河自西来会。北流至清口，黄河西自清河县城南来会。

淮河在清河县南，自泗州流入汇为洪泽湖，至县西南清口，黄河自西北来会之，又折东北，经山阳、安东、阜宁三县境入于海。其下流今通谓之黄河。《乐史》《太平寰宇记》淮水，在淮阴县西二百步，又《汉志》云：至淮陵入海，淮陵故城在今盱眙西北八十五里，此地计距海甚遥，淮何得于县界入海，淮陵乃淮阴之讹也。《清河县志》淮水，自盱眙县龟山，益折而北，又二十余里，而洪泽、阜陵、泥墩，万家诸湖环汇于东岸，又东北至县东南五里为运河口，折而北五里，合大河为黄淮交会之冲。河自北而来，河身比淮为高，故易以遏淮。淮自西而

来，淮之势比清江浦又高，故易以啮运，病淮必至于病运者，莫如河。御黄，即所以利运者，莫如淮。黄、运两河之枢机，实皆自淮操之。

与河合东北流，东分支渠，南为运道，东北并流入于海。东北经清江浦淮安府山阳县，阜宁县北境，安东县南境，又东北经北沙镇北，又东北至云梯关入于海。

淮肇源桐柏，经信阳罗山息县，光州，新蔡，固始，霍邱，挟豫皖上游山水，至正阳关与汝水合。又经寿州与肥水合。历怀远、临淮与涡水合，至五河与潼、漂、沱、濬合。始由浮山饶石之间，入泗州境，过盱眙，下至龟山，北汇归洪泽湖，与睢汴二水合。又经古淮阴县西出清口，历山阳，安东，云梯关归海。淮固自有淮之道，未尝与河合流也。邱浚曰：“周以前河势自西而东而北，汉以后河势自西而北，而东。宋以后则自西而东，而南矣。”据此则旧志所称，自朱仙镇而东，南经留城，趋徐、邳，挟洗、沂直下，乃元明以来河入海之道。故淮运两河从清口来与河会，而河遂与淮同趋，断自有明始。《河防志》云：“汉元光河溢入淮。宋太平兴国八年、咸平三年、天禧三年、熙宁十年，河凡四入淮，然旋复故道，淮自淮而黄自黄也。元泰定初，河始离故道，南与淮合，然亦时有通阻。自贾鲁力捍入淮，而河不复北。明洪武四年，河决原武，南由项颍至寿州正阳镇，全入于淮。正统十三年，河决荥阳，北冲张秋入海，南至怀远东北入淮。”又《泗州

旧志》云：“国朝康熙五年，河决归仁堤，水势冲突，直逼泗境，与高堰平，此河决入淮之本末也。而其淤清口，则自明隆庆始。”考隆庆六年河水涨，挟沙阑入清口，逼淮水不得直下，沙随波停，清口淤塞，所谓门限沙者是也。后运口亦淤，梗运道者数年。万历二十三年，河大溢，清口久淤，淮倒灌泗城，至国朝康熙十九年，城竟沦陷。三十八年五月，淫雨，黄淮交涨，溃高堰，淀清口。淮水东注高宝，运河堤岸多坏，此黄夺淮趋病淮即以病运之端委也。淮虽挟七十二山河之水到海不及二千里，其源短。河来自万里，控引百川，其源长。长则强，短则弱。其势常虞不敌。明之治河也，疏浚塞兼用之，始未尝不善，而后陵夷也。故清口通塞不常，及隆万之际，大坏总河。潘季驯谓河未易，以人力导，惟以水治水。则导河即所以浚海也，治淮即所以导河也，故筑高堰，诸决口而淮遂出，久之复坏。杨一魁主分黄导淮之说，而淮亦出，久之愈坏。康熙三十年至四十二年，大司马遂宁张公秉承庙算总理河务，筑高堰，闭六坝，辟清口，开七引河，凡所为扬清抑浊者。视季驯

加密，而淮遂大出，此蓄淮所以刷黄济运之由来也。

淮水厅汛

外南厅

吴城缕堤。自高家湾界起至张福口止，长三千五百五十八丈五尺。(北临黄河南临洪湖。)乾隆四十四年，河南仪德漫工，黄水由亳州、怀远达涡河，归洪泽湖。湖水盛涨，在旧三堡迤下开堤，宽二十丈，宣泄湖水入黄。两头用料裹护，中以竹篓铺底，旋亲补缺还堤。嘉庆十年，于北面堤尾斜至归西坝，筑堤长五百六十丈，堤南旧四堡至七堡。乾隆十二年，协办大学士高斌，总河顾琮勘建砖工长一千丈。十八年，又自昭七堡至十堡接建砖工，长一千二百二十丈，俱高八尺四寸。嘉庆十年，间段加高一二三层，经历年久，砖多酥碎。十三年，湖水异涨，间有撞塌。十四年，于砖工外首阙段包筑五段淤土坦坡，仍存砖工一段，长三百六十三丈，砖工尾。嘉庆十年，接筑碎石坦坡，工长二百八十丈。十二年，又接上至夫九堡，筑碎石坦坡，长六十二丈。吴城七堡埽工，长三百十六丈五尺。嘉庆十一年后，历年接建，埽外间段，抛护碎石。工尾下首碎石土坝，嘉庆二十三年筑。

张福口缕堤尾起，至旧西坝止。(在风神庙前对岸)临清堤一道，长五百二十八丈。康熙三十七年筑。接下自旧西坝根起至新河南岸堤尾止，乾隆四十四年筑。

临清束水堤一道，长六百九十二丈。嘉庆九年，又于前堤之东，自旧西坝起至河尾止，重筑临清束水堤一道，长一千五十丈。(《外南厅册》)

里河厅

运口之南，向有引河七道，上承洪湖来源，下至运口外张家庄前会流。三分入口济运，七分东注敌黄，天赐烂泥浅引河二道，久经淤闭，现存张福口引河一道，长一千二百三十五丈。张家庄引河一道，长一千六百七十丈。天然引河一道，长一千九百三十八丈。裴家场引河一道，长一千七百六十丈。三岔(今名太平)引河一道，长一千六百四十丈。以上引河历经淤浅疏浚。乾隆五十三年奏准，每冬令湖水消落，于各河内筑坝拦截收湖水或酌留口门或径行堵塞，随时察勘办理。

临湖堤一道，自运口头拦坝起至济运坝止，长一千四百七十八丈，乾隆八年筑。又于二十四年，自济运坝东临湖撑堤头起，至高堰交界止，堤长七百七十丈。临湖一面建砖工，长七百五十丈，高一丈八寸。又于二十七年自济运坝西起至太平庄止。翠华南幸临视，谕令接筑砖工，长五百九十八丈，高一丈八寸，又于三十六年自砖工尾起，西接筑砖工，长九十三丈，嘉庆九年奏明于卑矮砖工之上，间段加砌，长八百五十三丈并普律加高二层，与高堰石工一律相平。十三年六月初三日，砖工三

坝后掣通两段，长四十余丈，奏准与临湖一面镶筑柴圈，堰长四百七丈，外抛碎石坦坡偎护，连砖工头共长五百八丈。二十一二年及二十五年，又接前，南至里堰交界止，北至束清坝尾于砖工外抛砌碎石坦坡共长一千六十四丈。

束清坝，乾隆四十六年，筑在运口北，本名兜水坝，使湖水多入运口济运，东坝长四十三丈，西坝长四十一丈，中留口门十二丈，每年大汛拆展以泄湖水。冬初接筑蓄水济运，五十年改名束清坝。每年收束应留口门。大学士阿桂，两江总督萨载，总河李奉翰奏明：“如湖水消存三尺，酌留口门十二丈，湖水消存二尺，酌留口门八丈。”五十七年奏准，移建于里外交界处所。嘉庆十年，又移建于运口之南，挑浚坝之外，湖水会出之处，筑东坝长七十一丈，西坝长七十九丈，中留口门宽十二丈，每年相机展束西坝，并无一定丈尺，因东坝逼近头坝，不行折展以为盖护。二十一年，于东坝临湖一面抛护碎石，长五十丈，以御风浪。（《里河厅册》）

高堰厅

管清河、山阳两县境内洪湖、高堰堤工，北自清河县里河厅属运口汛界武家墩起，南至山盱厅属高良涧禹王庙前止，堤长九千九丈一尺八寸，乾隆十六年后，一律帮培顶宽十丈。嘉庆十年，复加帮原建临湖砖石工，长八千九百二十五丈二尺，于乾隆四十六年在二号工内越湾砖工外首取直建筑石。工长七十五丈（计圈进砖工长一百十二丈）附堤临湖石，工长八千八百八十八丈二尺。为汛一汛半，曰：高堰汛，曰：高涧汛。二堤一道，自武家墩南接盐河堤起，至高良涧山盱界止，长八千四十五丈。内七堡堤后高堰迤南涵洞一座，宽、高各三尺六寸，乾隆十二年民建。

运料河（俗名二河）一道，北起武家墩后与盐河通，南至周桥。在高堰境内长八千三百九十七丈。《淮安府志》载：在大堤之东，二堤之西，自武家墩而南，至山盱周桥，共长一万一千六百余丈。二厅运料船只，悉由杨家庙进口，直抵工所可免洪湖之险。康熙二十五年总河靳辅题请挑浚，四十一年总河张鹏翮率河工大小臣工捐挑，六十一年又挑，乾隆十九年复浚。

旧运盐河（《淮安府志》载，接运料河在武家墩之东，水出单阳口。）盐坝一道。在武家墩大堤东坡，以石铺成。（《淮安府志》载：康熙三十四年商建。）

高堰汛，汛地北自里河运口汛界武家墩北起，南至十四堡高涧汛小黄庄界止，堤长六千三百八十五丈，临湖附堤石工，长六千三百九十七丈六尺。自里堰交界至二堡显王庙戏楼后止，堤长四百八十五丈，属清河县境。自显王庙戏楼后至高涧汛，堤长八千五百二十四丈二尺，属山阳县境。

按堰盱临湖大堤，明季建石无多，康熙三十九年，总河张鹏翮题：建石工高堰自武家墩南首起至小黄庄止，长五千八百四十七丈四尺。山盱古沟至唐埂一带间段建石

工，长一千三百五十五丈三尺三寸。雍正七年，钦奉谕旨加修石工，始于九年正月，至十年六月告成。又按雍正七年修建堰盱石工起止段落地名丈尺成案，府志皆未载明，惟成案载十年御制高堰石工告成，碑文内有六千三百四十余丈之语，今照厅册核计，高堰所属自小黄庄下高涧汛，接康熙年间所建石工尾起，至禹王庙止，工长二千四百九十丈六尺。接下入山盱境徐坝汛七堡内第一段止，工长三千八百十八丈六尺七寸，计创筑石工共长六千三百九丈二尺七寸，比碑载之数几少四十丈，自系年久，或由越湾取直之处，致有不符。乾隆十九年及二十五年，又自石工头往北至里堰交界，旧有埽工之处，改筑砖石工，长四百三十八丈，于是高堰厅临湖大堤，并无土堤矣。

一号石工，长二百九十一丈。乾隆二十五年，改埽工为砖工，高一丈二尺。四十五年改砖为石。又加石二层，共十二层。嘉庆十一年，配平砖工，高八寸至一尺七寸，十四年改砖为石。堤后东堤一道，长二百五十八丈七尺。（《淮安府志》载系明季运口东堤。）山清交界大堤至东堤，中有拦河坝一道，长四十丈，康熙三十六年筑。

二号石工，长四百六十八丈，内一段长一百四十七丈，乾隆九年建。砖工一丈二尺，四十六年砖改石工，加石一二层，一段长三百二十一丈，康熙三十九年砌石十三层，乾隆四十五年加石一层，工长二百十六丈，加石二层，工长四十丈。嘉庆十年，又加石一二层，长三十丈。十一年配平砖工，高八寸至一尺七寸，十四年改砖为石一二层。二十四年加石一层，工长四十丈九尺。

三号石工，长五百二十六丈四尺，康熙三十九年建。石高十三层。乾隆二十三年加砖二层。四十五年改砖为石，又工长二百六十五丈加石二层，又工长八十丈加石三层。四十六年改砖为石，工长一百七十一丈。嘉庆十一年，配平砖工，高八寸至二尺。十四年改砖为石一二层。

四号石工，长五百丈。康熙三十九年建，石高十三层。乾隆二十三年加砖二层。四十五年改砖为石，又工长三百九十四丈，加石二层。四十六年改砖为石，工长九十六丈。嘉庆十年加石二层，工长四十二丈。十一年配平砖工，高八寸至二尺。十四年改砖为石一二层。二十四年加石一层，工长十五丈九尺。

五号石工，长四百七十丈，康熙三十九年建。石高十三层，乾隆七年加砖二三层。四十六年改砖为石，工长三百九十二丈九尺，又加石一层，工长七十七丈。嘉庆十年加石一层，工长四十五丈。十一年配平砖工，高八寸至一尺四寸。十四年改砖为石一层。二十四年加石一层，工长三十八丈。

六号石工，长四百六十五丈，康熙三十九年建。石高十三层。乾隆七年、二十三年砖加二三四层。四十五年改砖为石，又工长一百十丈，又加石一层，四十六年加石一层，工长一百九十九丈七尺。嘉庆十年间加石工一层，工长一百四十八丈。十一

年配平砖工，高八寸至二尺二寸。十四年改砖为石一二层。

七号石工，长四百七十丈，康熙三十九年建，石高十三层。乾隆二十三年加砖二三层。四十五六年改砖为石，又工长二百八丈，加石一层。嘉庆十年间加石工一层。工长三十四丈。十一年配平砖工，高八寸至一尺八寸。十四年改砖为石一二层。二十四年加石二层工长二十四丈。堤后高堰里越坝一道，长一百四十九丈二尺，康熙三十四年建。西面建石十三层，砖八层，乾隆十九年修砌，改砖为石共十九层。(此项越堤石工，亦在大堤石工数内。)高堰大坝外越埽工，长一百九十四丈，乾隆三十七年停修。高堰关帝庙前志桩，原高一丈八尺八寸，嘉庆十一年增高一尺二寸，现高二丈。(查正阳关水报于乾隆二十八年定式，水势长发时，由正阳关巡检随时填单通报，其所管之凤台县寿州亦一体填报，单内言正阳关淮河水势。乾隆二十八年十月内三官庙石岸前奉立大志桩高一丈七尺，与石岸相平，又于河边立小志桩，高七尺，与大志桩根底相平，此时中泓水深二丈，共高深四丈四尺)。

八号石工，长五百丈，康熙三十九年建，石高十三层。乾隆二十三年加砖一二层，四十五六年改砖为石，又工长七十六丈八尺，加石一层。嘉庆十一年配平砖工，高八寸至二尺四寸，十四年改砖为石一二层。

九号石工，长四百七十丈，康熙三十九年建。石高十三层，乾隆四十五六年改砖为石。又工长八十三丈五尺，加石一层，又工长五十丈，加石三层。嘉庆十年间加石工二段：一长二十五丈加石一层；一长六十五丈加石二层。十一年配平砖工，高八寸至二尺四寸。十四年改砖为石一二层。二十四年加石一层，工长三十丈。

十号石工，长四百七十丈，康熙三十九年建。石高十三层，乾隆十二年加砖一二层。四十五六年改砖为石，又工长八十三丈三尺，加石一层。嘉庆十年加高二段：一长八十一丈，加石一层；一长二十六丈加石二层。十一年配平砖工，高八寸至二尺四寸。十四年改砖为石一二层。二十四年加石一层，工长十四丈五尺。堤后侯二门越堤一道，长一百二十八丈，乾隆六十年筑。

十一号石工，长四百九十丈，康熙三十九年建。石高十三层。乾隆十二年加砖二三层。四十五六年改砖为石，又工长七十一丈七尺，加石一层。嘉庆十年间加一层，工长三十丈。十一年配平砖工，高八寸至一尺八寸。十四年改砖为石一二层。二十四年加石一层，工长二十四丈。

十二号石工，长四百八十丈，康熙三十九年建。石高十三层。乾隆七年，加砖二三层。四十五年改砖为石，又工长一百丈八尺，加石一层。嘉庆十一年配平砖工，高八寸至一尺五寸。十四年改石一层。二十四年加石一层，工长二十二丈。

十三号石工，长四百七十丈。康熙三十九年建。石高十五层。乾隆四十六年，加石

一层，长八十二丈。嘉庆十一年配平砖工，高八寸至一尺七寸。十四年改砖为石一、二层。

十四号石工，长二百十丈，康熙三十九年建。石高十五层。乾隆四十六年加石一层，工长八十七丈八尺。嘉庆十一年配平砖工，高八寸，十四年改石一层。

高涧汛，汛地自高堰汛界小黄庄十四堡尾起，至高良涧禹王庙山盱厅界止，堤长二千四百七十四丈九尺八寸，附堤临湖石工，长二千四百九十丈六尺，属山阳县境。

十五号(接堰汛并计)石工，长六百六十丈，雍正九年建。石高十五层。嘉庆十年间加二段：一长六十丈加石一层；一长四十五丈加石二层。十一年配平砖工，高八寸至二尺四寸。十四年改砖为石一、二层。

十六号石工，长六百二十丈，雍正九年建，石高十五层。嘉庆十年加二段；一长一百十丈加石一层，一长八十丈加石二层。十一年配平砖工，高八寸至二尺四寸。十四年改石一、二层。

十七号石工，长五百九十丈六尺。雍正九年建。石高十五层。乾隆四十五年加石一层，工长一百十丈。嘉庆十年加石二层，工长三十丈。十一年配平砖工，高一尺二寸至二尺。十四年改石一、二层。

十八号石工，长五百五十丈。雍正九年建。石高十五层。嘉庆六年，露桩落低一层，工长七丈八尺，上又加石一层，共十六层。十年加石一层，工长六十丈。十一年配平砖工，高八寸至二尺四寸。十四年改石一、二层。二十四年加石一层，工长八十丈七尺。

十九号石工，长七十丈。雍正九年建。石高十五层。禹王庙后里越石堤，上首接至大堤，乾隆六十年筑。越堤一道，长九十九丈。

乾隆三十五年编堰字一号至十九号造册咨部有案。

堰涧两汛，康熙四十七年，仰蒙圣祖仁皇帝如天之仁，令沿堤建设救生桩，在江宁、苏州、杭州三织造各解交河库银五百两，分发高堰、山盱两厅，购木签钉以广救济，岁以为常。雍正八年将应解银两改归上下江藩库，各在耗羡项下动支应用。乾隆十一年七月，高宗纯皇帝谕旨：“朕闻洪泽湖周围宽广五百余里，一遇风起浪涌，船只每有漂溺之患。康熙年间，蒙圣祖仁皇帝特设救生桩，钉于石工之外，使被溺之人得以攀援而上，全活甚多，今夏家桥地方有旧苇坝一座，并高堰迤南有顺水坝一座，俱有口门，为遭风船只躲避之所，于行舟甚属有益，著再于高堰厅属之老堤头，山盱厅之高涧坝迤南，又徐家湾、周桥等四处，各添设护堤救生坝，俾沿河

一带人船恃以安全，该部即行知河道总督顾琮，令其遵照妥协办理。钦此。”遵建高堰救生桩，计七堡、八堡、九堡、六安沟坝、左右十堡至十七堡，共十三处。嘉庆十二年后，湖水蓄高，柴坝木桩难于存立，至今未办。（《高堰厅册》）

山盱厅

管山阳、盱眙两县境内洪泽湖高堰堤坝工程。北自高堰厅属高涧禹王庙交界起，南至盱眙县境蒋坝止。临湖堤长八千三百五十五丈二尺，乾隆十六年后一律帮培，顶宽十丈，嘉庆十年复加高帮宽，西面附堤石工，长七千九百八十七丈六尺。为汛一汛半（高涧一汛与高堰厅分管），曰高涧汛，曰徐坝汛。

按山盱堤工，原管至秦家高冈而止，迤南至蒋家坝，地势高阜，未创堤工。雍正以后湖面渐高，因就冈为堤，直抵蒋家坝，而山盱之汛地亦随加长矣。涧徐两汛，康熙年间石工之外。如高涧坝、龙门坝、清水潭、古沟、茆家圩、头坝、茆家圩二坝、夏家桥、唐埂等处，各有外越埽坝，节年抢修，至嘉庆十一年裁减停修。

又按山盱临湖大堤，明季建石无多。康熙年间，历次建徐坝汛古沟至唐埂一带石工，长一千三百五十余丈，雍正八年钦奉谕旨，特发内帑修建堰盱石工。山盱自高涧头堡起至七堡徐坝汛第一段止，建石工，长三千八百十八丈六尺七寸。乾隆十六年，圣驾亲临阅视，允总河高斌之请将堰盱土堤一律帮宽十丈，特颁谕旨，添建智信两坝，仍加封浮土五坝以仁义礼智信为次，坝底高矮维均，以高堰志桩水深八尺五寸平脊，俟仁义礼三坝过水三尺五寸，以次启放智信二坝，信坝以北砖改石工，信坝以南石基砖甃，于十七年完工。计改建接筑共长一千八百九十二丈五尺。北起礼坝，南迤蒋家闸，并建工尾蒋家闸上钳口石坝一座。

高涧汛，汛地自高堰厅禹王庙界分管起，至徐坝汛周桥界止，堤长兰千五百九十五丈，内临湖石工，长三千三百六十二丈。头堡石工，长五百五十六丈八尺，内一段长三百六十九丈二尺，砌石十五层。雍正八年建。乾隆四十五六年加石二层，一段长一百八十七丈六尺，砌石十五层，砖四层，雍正八年建。乾隆十八年倒卸补修，长一百七十七丈一尺。（内有外越埽工改直补筑石工，长一百八丈。）改砖为石，余长十丈五尺。乾隆四十五年改砖为石。嘉庆十一年加砖配平，高八寸至一尺。十四年改砖为石。二十四年加石二层，长四十九丈。（龙门坝一段堤长一百五十四丈，堤顶宽四丈。）（按道光二年又加石二层，长一百四丈。）

头堡内高涧里越石工，长二百三十三丈，砌石十三层。雍正八年建。乾隆四十五年加砖四层，又自高涧坝南起，至龙门坝止。以下建龙门坝里越石工，长一百八十六丈五尺，计石十五层。十九年改建，加石四层，外越埽工，二百三十三丈，乾隆十六年停修。

二堡石工，长五百五十三丈，砌石十五层，雍正八年建。乾隆四十五年，加石二层，长八十三丈。嘉庆十年间加卑矮工，长一百七丈，加石一层。十一年加砖配平，高一尺五寸至二尺四寸，十四年改砖为石。二十四年加卑矮工，长二十七丈五尺，计石二层。(按道光二年又加石二层，长三十五丈。)

三堡石工，长五百七十二丈，砌石十五层，雍正八年建。乾隆四十六年加卑矮工，长一百六丈，计石二层。嘉庆十年间加卑矮工，长一百一十一丈，计石一层，又长四十八丈，计石二层。十一年配平砖工，高一二尺。十四年改砖为石。二十四年又加卑矮工十丈，计石一层。

四堡石工，长五百七十三丈，砌石十五层，雍正八年建。乾隆四十五年加卑矮工，长一百二十丈，计石二层。嘉庆十年间加卑矮工，长四十五丈，计石一层。十一年配平砖工，高八寸至二尺四寸。十四年改砖为石。二十四年加卑矮工，长七十二丈，计石一二层。

五堡石工，长六百二十四丈二尺，石砌十五层，雍正八年建。乾隆四十六年加卑矮工，长三十八丈，计石二层。嘉庆十一年配平砖工，高一尺至二尺四寸。十四年改砖为石。(按道光二年又加卑矮工，石二层，长一百八丈。)

六堡石工，长四百八十三丈，(已抵周桥汛尾)砌石十五层，雍正八年建。乾隆四十五年加卑矮工，长九十七丈，计石二层。嘉庆十一年配平砖工，高一二尺。十四年改砖为石。大堤东二堤一道，上接高堰界起，下至周桥止，长三千二百二十丈，康熙二十五年筑。大二堤之中运料河一道，长三千二百丈五尺，康熙二十五年挑，乾隆十九年复浚。浔河一道，长五千四百丈(在高良涧东，即昔年高良涧闸水下注河道，现通料河水入岔河归白马湖以达宝应湖。)周桥迤东顺水堤一道，长一万二百五丈。上自周桥二堤起，下至万家集止。(按《行水金鉴》载：周桥顺水堤至仁和集西止，长四千八百九十五丈，康熙三十九年建。《淮安府志》载长万余丈。

)堤南草泽河一道，长五千五百四十二丈，水达宝应湖。(《淮安府志》载：明嘉靖间水淹泗陵，于周桥建闸，以泄湖水，康熙十九年改建减水坝，二十九年总河张鹏翮闭坝堤，补建石工，草泽河即周桥闸下之河，乾隆九年浚。)高涧窑湾并周桥护堤救生坝工二处，乾隆十一年奉特旨建，现无。高涧坝南、龙门坝南、厉家西五坝，璩家湾、清水潭、救生桩五处，康熙四十七年奉旨建设，现停。

徐坝汛，汛地自高涧汛周桥界起，至蒋家坝止，临湖堤长四千七百六十丈二尺，西面附堤石，工长四千六百二十五丈六尺。(又智信两坝金门，长一百二十丈。)自周桥至智坝止，堤长二千一百七十六丈五尺，属山阳县。自智坝至堤尾，长二千五百八十三丈七尺，属盱眙县。大堤东运料河一道，北接涧汛河尾起，南至束水北堤止，长一千二百十七丈，乾隆十八年挑浚。

七堡石工，(接涧汛六堡顺计)长一千三十六丈八尺七寸，内一段长四百五十六丈六尺七寸，砌石十五层，雍正八年建。(雍正八年接建石工止此。)乾隆四十五年加高三十四丈，计石二层，又一段长八十一丈，计石二十一层，乾隆十九年改建。四十五年加石二层，又一段长三百三十四丈三尺，计石十五层，乾隆十九年改建，四十五年加高，长十一丈，计石二层。又一段长一百五丈六尺，计石九层及十一层，康熙三十九年建。乾隆四年加砖三四层，四十五年改砖为石。又一段长五十九丈三尺，计石八层至十一层，康熙四十二年建。乾隆十六年加砖四层，四十六年改砖为石。嘉庆十年间加卑矮工，长一百一丈，计石一二层。十一年配平砖工，高八寸至二尺四寸，十四年改砖为石。二十四年加高二十五丈，计石一层。

八堡石工，长三百七十五丈四尺，内一段长一百八十二丈二尺，计石九层至十一层，康熙三十九年建。乾隆四年加砖三四层。四十五六年改砖为石。又一段长七十六丈三尺，计石十二层至十五层。又一段长一百十六丈三尺，计石十二层，皆乾隆十九年建。嘉庆十年间加卑矮工，长二百四丈，计石一层。十一年配平砖工，高八寸至二尺四寸，十四年改砖为石。二十四年加高四十八丈，计石一层。束水北堤一道，长九千四百五十丈，康熙四十五年建。束各坝减下之水合流，长五千七百六十七丈八尺，至普利寺达

汜光湖入宝应湖，南注高邮诸湖，分入运河，由东岸闸坝，邵伯以南者归江，邵伯以北者归海。乾隆九年，复加筑。嘉庆十年又加筑仁坝(即北坝)。康熙三十九年建。雍正五年将坝底落矮一尺五寸。乾隆三十三年坝上加筑封土护埽。嘉庆十六年后放跌成深塘，堵闭后未能修复。二十三年奏明补还土堤。临湖建筑石工，长九十五丈八尺三寸，内北长四十六丈八尺三寸，砌石十六层，南长四十九丈，砌石二十四层，石后筑堤，长九十四丈，又于西面抛筑护桩碎石，长六十丈。

九堡石工，长三百六丈七尺，内一段长一百十六丈五尺，计石十一层，砖三四层，康熙四十二年建。乾隆四十五六年改砖为石。又一段长一百九十丈二尺，计石九层十层，康熙三十九年建。乾隆二十三年间加砖，高一二三層。四十五年改砖为石，又加高长八十五丈，计石二层。嘉庆十年间加卑矮工，长一百四十二丈，计石二层。又长九十一丈，加石一层。十一年配平砖工，高一尺二寸至二尺二寸。十四年改砖为石。二十四年又间段加高。一百十丈五尺，计石一层。(按道光加石二层，长一百十六丈。)义坝(即中坝)康熙三十九年建，雍正五年，将石底落矮一尺五寸。乾隆三十三年坝上加筑封土护埽，嘉庆十年十五年两次过水，跌成深塘，堵闭后未能修复。二十三年奏明，补还土堤，临湖建筑石工，长七十三丈五尺七寸，内南北长三十三丈五尺七寸，砌石十六层，中长四十丈，砌石二十层，石后筑堤，长七十丈，西面抛筑护桩碎石，长四十二丈。

十堡石工，长二百二十三丈五尺，石高九层至十一层，康熙三十九年建。乾隆二十三年加砖二三层。四十五年改砖为石。嘉庆十年间加卑矮工，长六十八丈，计石二

层。十一年配平砖工，高八寸至二尺。十四年改砖为石。二十四年加高三十四丈，计石一层。智坝一座，金门南北长六十丈，石底面宽二十丈四尺，墙高一丈二寸，乾隆十六年建。三十三年，坝上加筑封土护埽。嘉庆十五年将坝底加高四尺，每年堵闭，在坝脊上加筑埽戗。按堰圩境内，康熙初年湖水不能畅出，清口湖面渐高，十九年创筑伍家墩、高良涧、周家桥、古沟，东西夏家桥、唐埂等减水坝，是为六坝，屡经冲缺，泄水过多。三十九年，特命尚书范承谟等堵塞，而设南北中减水三石坝。(即仁、义、礼三坝)迨乾隆八年，总河高斌以三坝未足减涨，议请添建两坝，格于部议。十六年南巡，乃具南河紧要各工图说二十条呈阅，圣驾亲临阅视全堤，周览形势，特颁谕旨，添建智、信二坝。仍加封浮土，俟仁、义、礼三坝过水三尺五寸，始相机节宣。旧有之天然坝，则立石永禁启放，钦遵办理。垂六十年，遵守弗替，嘉庆十五年后，仁

、义、礼三坝冲成深塘，未能修复，于蒋家坝南山坡之地，以次创挑仁、义、礼三河筑成滚坝，一如旧制以操节宣，而将旧坝三处筑土石堤工。

十一堡石工，长四百七十六丈二尺三寸，内一段长一百七十七丈二尺三寸，砌石九层，康熙三十九年建。乾隆二十三年加砖二三层。四十五年改砖为石，又一段长一百四十二丈五尺，砌石十一层，康熙四十二年建。乾隆二十三年加砖三四层。四十六年改砖为石。又一段长一百五十六丈五尺，砌石九层，康熙三十九年建。乾隆二十三年加砖一二三层。四十六年改砖为石。(康熙时历次所筑石工止此。)嘉庆十年间加卑矮工，长二百六十八丈，计石一层。十一年配平砖工，高八寸至一尺九寸，十四年改砖为石。礼坝(即南坝)康熙三十九年建。雍正五年将坝底落矮一尺五寸。乾隆三十三年，坝上加筑封土护埽。嘉庆十五年，加高坝底三尺。十七八年启放，跌成深塘，未能修复。二十三年奏明补还土堤，建筑石工，退后圈越新石工，与南北两金刚墙下裹头相接，共长一百四十七丈，内中长五十三丈，砌石十九层。南北长四十四丈，砌石十七层。又两金刚墙旧石工，长四十八丈，亦作临湖石工，石后筑堤，长一百四十一丈。西面抛护桩碎石，长四十五丈。

十二堡石工，长四百四十丈，砌石九层。乾隆十六年建。(乾隆年间接长石工自此起。)四十六年加高十一丈，计石二层。嘉庆十年间加卑矮工，长五十五丈，计石二层。又长二十六丈，加石一层。十一年配平砖工，高八寸至一尺九寸。十四年改砖为石。二十四年加高。七十一丈，计石一层。信坝一座，金门南北长六十丈，坝底东西宽二十丈四尺，墙高一丈二寸，乾隆十六年建。三十三年坝上加筑封土护埽。嘉庆十七年加高坝底一尺，每年启放在坝底上筑做埽戗。

十三堡石工，长一千四百五十二丈五尺，乾隆十六年建。内一段长一百六十八丈，砌石九层。四十五年加高八十丈，计石二层。又一段长七百九十七丈，计砖五层，石三层。四十五年改砖为石，又底桩露脚，长二十三丈三尺，添加一二层。又一段长二百六十四丈，砌石十层。四十五年加高六十一丈，计石二层。又一段长二百二

十三丈五尺，砌砖四五层，石三层。十九年改砖为石。工长一百二十二丈二尺，计石七层。四十五年加高二段，一长六十九丈，计石二层。一长五十五丈，加石二层，底桩露脚添石二层。四十六年全改石工。嘉庆十年间加卑矮工，长四百十三丈，计石一层。又长十四丈加石二层。又长十六丈，加石三层。十一年配平砖工高八寸至二尺二寸。十四年改砖为石。二十四年加高二十二丈，计石二层。(按道光元年加石三层长五十六丈。)束水南堤一道，起十三堡，长一万二百六丈，康熙四十五年建，乾隆十九年复修。将谢家涵洞处开挖支河，以畅泄五坝下注之水，两岸建筑堰工，东长一千五十丈，西长九百八十丈，其水汇归宝应湖。二十一年，将口门建竹络坝，长五十丈。嘉庆十年又改建碎石坝，长八十丈，两头砌片石裹头。蒋家坝护街堰一道，长一百六十三丈，嘉庆二十四年筑。蒋家闸石闸一座，乾隆十一年建。蒋家坝临湖堤尾钳口石裹头，乾隆十六年，泄湖尾之水由蒋家民便河下达宝应湖，坝上筑有拦湖坝，年久未启，嘉庆二十四年，启放减涨，旋堵。仁字河减坝，嘉庆十八年挑河长七百六丈，以抵仁坝减泄湖涨，后恐刷深。二十二年，于河头创建滚水石坝一座，金门口宽六十丈，两墙各高八尺四寸，砌石七层，坝脊横宽十丈，以湖水长至一丈二尺以外过水。义字河减坝，嘉庆十八年，挑河长七百八丈，以抵义坝宣泄湖涨。(按道光三年，河头建滚水石坝，金门宽六十丈，两墙高九尺六寸，砌石八层，坝脊横宽十丈，以湖水长至一丈一尺以外过水。)礼字河一道，长八百丈。嘉庆二十一年挑浚，以抵礼坝宣泄湖涨，河头筑有拦坝，以时启闭。(十八年原奏，仁、义、礼三河并建滚坝，以符旧制，奏定礼坝以湖水长至一丈三尺以外过水，现尚未建。)新挑仁、义、礼三河泄下之水，汇入旧坝汉河内，统归高宝等湖东注。(《山盱厅册》)

治河治淮工程

道光元年春，奏修峰山闸及王家山闸下河堰。四月，黄强淮弱，暂堵御黄坝。夏。安东六塘河堤溃，倒灌硕项湖。六月。启放王家山天然闸，十八里屯滚坝，及龙虎滚坝，峰泰滚坝。六月。奏运口汛临湖砖工，一律包护碎石坦坡。河工防险抛填碎石。七月，启放山盱仁、义、礼三河。七月。泰州决鲍家坝。是年七月，以严娘为河东河道总督。道光二年春，加培江省邳睢以上黄河两岸堤工。明年春，又加培邳睢以下堤工。黄河漾清口。五六月，启放峰泰滚坝，龙虎滚坝，十八里屯滚坝，王家山天然闸。阜宁陈家浦人民偷挖黄河堤工。七月，启放山、盱、仁、义、礼三河智、信两坝。立秋后，次第启放车逻坝，南关坝，五里中坝，南关新坝。秋分后，启放昭关坝。秋，邳、兴、盐、阜等处水，泰州水不为灾。冬，建山盱义字河头滚水石坝。徐州护城石工间段加高。冬。筹挑峰山闸河取直，挑深二千四百十丈，培东西堰，添官修守。道光三年二月，奏修堰盱石工间段加高。二月。东省运河十五孔桥风暴，掣通湖水下注江境运河。夏、秋江水异涨，通州、如皋、靖江、仪征潮溢。掣卸江都扬子桥石闸。六月，启放王家山天然闸，峰泰滚坝。七月，启放山盱礼字河。七月，泰州决鲍家坝，下河禾稼被淹。移建祥符五瑞二闸。修洪湖周桥下草泽河及各涵洞。是年十二月，建山盱蒋坝镇字河头滚水石坝工竣。道光四年三月

，以张文浩为江南河道总督。七月，启放峰泰滚坝。闰七月，启放王家山天然闸，十八里屯滚坝，龙虎滚坝。闰七月，启放山盱仁河、义河两坝。九月，黄水大涨，启放祥符五瑞二闸。十一月，暴洪湖决十三堡周桥等处石工万一千余丈。运河日长水二三寸，掣卸迎湖石工三百四十一段，启放车下逻坝，南关坝，南关新坝，五里中坝，昭关坝，并堵清口御黄坝，以杜倒灌，水渐平定。十二月，塞决口及各坝。十一月，张文浩革任。枷号工次，调严娘为江南河道总督，以张井为河东河道总督。时清口黄水高清水丈许，筹备引黄济运。道光五年正月，挑五引河及里运河淤，又挑御黄坝至运口湾曲，以备引黄济运。二月，堵闭束清坝，启放御黄坝，黄水力猛，束清坝刷蛰过水，大溜直入洪湖，新挑五引河受淤，抢堵引河黄水入运，运河上下及金湾各口均受淤。五月初，夏至节届，堵闭御黄坝，别开济运坝，过水甚少。议自运口附近高坂头盘坝驳运，估费百万。是时运河底垫高一丈有奇，自清江浦至高邮二百余里，粮船衔尾停泊，陷泥淖中，不得已筑坝六道，蓄水养船。湖底淤水不能出，乃车水入坝以养之。即改从高邮驳运，秋议浚运河，旋因洪湖长水，刷涤淤沙浚之，议遂罢。又议明年江南漕由海运，余仍盘坝，并坚守御黄坝，以防倒灌。春，大修堰盱石工。建临清东西堰于御黄二坝之南，名临清堰。六月，启放王家山天然闸及峰泰滚坝。六月，睢宁大水，平地深一二尺。七月，启放十八里屯滚坝。秋，议黄河改道，由灌河入海，江督河督亲往查看，以为不便，遂止。道光六年正月，东河督张井赴江南会勘海口。三月，调张井为江南河道总督，调严娘为河道总督。以淮扬海道潘锡恩为江南副总河。三月，盘坝驳运，订海运章程，试行海运。春，接筑黄河海口大堤并裁湾取直。三月，张井议改河，自安东东门工迤下，以北堤为南堤，改筑新北堤。中挑引河，绕避高淤，傍旧河行走，至丝网滨下，仍归见在海口，旋又改议。以李工为河头，与江督琦善意左，格不行。五月，附奏。有人议改河自桃源高家湾，借用中河盐河，至李工或安东东门工仍归旧河，将清口下移，亦格不行。六月，洪湖盛涨，启放仁、义、礼三河，智、信二坝，又启放蒋家闸拦湖坝。六月，启放归江各坝，并启放向未开放之褚家山坝，沙河坝，启放车南中新四坝，并不得已又启放已坏之昭关坝。六、七月，范公堤归海，各闸坝全行启放。八月，黄淮并涨，启放王营减坝，拆展束清坝，御黄坝。十月，淮水又涨，仁、礼二坝既堵复开，又开智坝，又放吴城七堡。冬，增培堰盱大堤。冬，挑王营减坝迤下正黄河。是年八月，副总河潘锡恩试行戽水灌塘，送铜铅船过河，遂筑拦清土堰于临清堰之南，建草闸于御黄坝外之钳口坝，又于钳口坝外两边筑直堰，中筑拦堰，曰：临黄堰，船由塘河进出，为灌运新制。道光七年三月，启放御黄坝通运舟，适王营减坝合龙，黄水复涨，仍倒塘灌运，开塘河自河口草闸至临清堰，长五百八十八丈。九月，空回。是年四月，钦差蒋攸锬察看南河。五月，任江督。春，挑培王家山天然闸下河堰。五月，启放山盱仁、义、礼三河。闰五月，启放山盱智坝。闰五月，议疏淮运归江之路，并修范公堤及通海各闸座，旋议暂缓。道光八年春，清黄高低不一，御黄坝以时启闭，通行重运。九月，灌塘回空军船。二月，钦差英和江督蒋攸锬奏，加培宿桃以下黄河堤工，下迄海口。二月，奏加高堰盱石工一二三层不等，共长三千七百五十余丈。三月，奏挑培王家山天然闸下河堰。四月，启放山盱仁、义、礼三河。五月，启放淮水归江，人字河坝，褚家山坝，五

月底，启放山盱智坝。五月，张井、潘锡恩奏，改订高邮四坝水则。七月初，洪水涨，风掣石工一百数十段，启放信坝，同时掣通山盱龙门坝正堤两处抢护平稳。七月初，风暴掣通宝高运河西堤一千数百丈，河湖相连，启放车逻坝，又启放南中新三坝。道光九年正月，清水高于黄水尺许，启放御黄坝。三月，黄水高于清水尺许倒塘灌放，均通重运。十月，回空军船，渡黄灌放。十二月，挑浚塘河。春，加宽堰盱大堤，三载毕工。启放山盱仁、义、礼三河。五月，启放山盱信坝。秋，建山盱林家西滚水坝。阜宁县黄河南北岸，淤溢地亩五千余顷，又射阳河南北岸淤溢地亩升科芦课七百七十余顷。道光十年春初，大挑塘河，开替河于口门之西，建新草闸以备互相灌放，又虑清黄相平，口门草闸底淤不能刷跌，乃于东岸御黄坝、御二坝之间，建泄清涵洞，以为泄清落水之计，又虑黄水过高不能启放，乃于东岸御黄坝临黄草闸之间，建引黄涵洞，以为引黄抬水之计，并随时添做马牙蟹钳等坝，以期周备。是年春，重运北上。九月回空。均倒塘灌放。春，张井查勘海口气势深畅，拦门沙不足虑，南河受病全在中段。五月，启放山盱仁、义、礼三河及信坝。盱眙等六州县卫水灾。七月，张井议增辟淮水归江河道，拆除芒稻河西废闸矾心闸底挑金湾等处淤滩。又议展宽壁虎北桥，明年工成。是年，落低高邮南关坝坝底，并添建南新两坝耳闸各一座。道光十一年三月，倒塘灌运，旋洪湖长水，清高于黄七寸，启放临清御黄两坝，通行重运。八月，挑塘河。十月，仍灌塘回空。三月，淮涨，启放山盱仁河。三月底，风掣堰盱石工四百余丈，启放信坝。四月，启放归江坝，凤凰桥一带吸溜甚大，漕挽艰难。六月，洪湖异涨，启放义礼二河及智坝。六月中旬，高邮运河漫决，马棚湾及迤北张家沟两处过水，共三百余丈，水深三四尺，启放车逻坝。夏、秋，通州至江浦一带江潮大溢。十月，洪湖又涨，复开礼、义二河。是年十月，以林则徐为河东河道总督。道光十二年，是年二月，以吴邦庆为河东河道总督。是年三月，循例倒塘灌运。春，移建山盱信坝于智坝之北，照旧坝升高坝脊一尺。张井奏订扬州归江坝水则。张井再订高邮归海坝水则。四月，启放山盱礼河、义河。六月，启放山盱仁河及智坝林家西坝，又启放高邮车南新三坝耳闸泄水。七月底，次第启放高邮车中南新四坝。八月朔，启放甘泉汛昭关坝。八月，桃源县民陈端谋淤地亩，偷挖于家湾黄河南堤掣动大溜水入洪湖。拆展束清御黄等坝，启放顺清河吴城七堡，明年正月，于工塞。八月，于家湾既决，桃源以上黄河暴涨，启放王家天然闸。闰九月，挑黄河自于家湾至吴城七堡，吴城七堡以下正河日渐刷深。十月，尚书朱世彦奏述严娘改河之策，议自桃源北岸顾工起，改黄河斜穿遥堤，跨过中河盐河行经遥堤之北，创立新堤至安东萧工仍归正河，即移清口于萧工，可以鬯出，不果行。道光十三年三月，清高于黄一尺余寸，军漕船入塘，启放坝闸飞渡。六月，黄水涨发，倒塘济运。九月回空。仍照旧灌放。春，修黄运湖河各工三月。风掣堰盱石工，启放礼河。六月，启放山盱仁河、义河及智坝。八月，启放林家西坝。七月底，启放高邮车逻坝。八月，启放南关坝五里中坝。秋，通州大风潮溢，仪征江溢，圩埂尽坏，成灾。是年，以麟庆为江南河道总督。道光十四年秋，通州及如皋大水。是后黄河及洪湖各坝，仍按章启放。道光十五年五月，以栗毓美为河东河道总督。东台县潮涨，河垛场商偷挖范公堤过水，有碍农田，旋申禁如故。阜宁县大旱，卤水倒灌入马家荡。是年，豫省河防试用砖工。道光

十六年，淮运河水涨，兴化县知县徐林春领请缓开邮坝。适农民挖拆人字河坝，泄归江水，跌三尺，遂中止启放车逻坝。道光十七年夏，仪征江潮涨溢，城内民居半浸水中，重建临黄堰草闸。道光十八年，建山盱礼字河坝，石底奏请归河人字河坝随时启除，每年重运过完后，酌启淮水归江之路，腾空河面。六月，通州泰兴江潮涨溢。道光十九年七月，启放高邮车逻坝。八月，启放新中南三坝。是年，栗毓美奏河防仍参用砖工。道光二十年二月，以文冲为东河道总督。七月，次第启放高邮车新中南四坝。道光二十一年六月，河决祥符撼城，淤惠济河，下注凤颍夺淮，文冲革任，枷号河干，命大学士王鼎、通政使慧成督办大工。明年春塞。七月，次第启放山盱义礼智信各坝，又启放高邮车新中南四坝。是年八月，以朱襄为河东河道总督。道光二十二年六月，河溢桃源县北岸，崔镇汛杨工漫水，冲一大泓，由涵洞入六塘河，六塘河溢，倒灌硕项湖。徐州河涨，启放王家山天然闸、十八里屯滚坝。是年九月，以慧成为河东河道总督。十一月，以潘锡恩为江南河道总督。道光二十三年，改建山盱仁字河坝，升高坝脊。建吴城七堡碎石坝八道。挑萧县天然闸河，修堰河。六月，河决中牟九堡，夺贾鲁河，下注凤颍入淮。河督慧成革任，枷号河干。特遣大臣查勘，又命尚书廖鸿荃、麟魁督办大工。明年冬塞。闰七月，次第启放高邮车中南新四坝。冬，中牟坝工筑复蛰。是年闰七月，以钟祥为河东河道总督。道光二十四年春，中牟坝工屡蛰，各钦差均革职留工，旋撤回京。秋，宿迁运河决张家窑，水入城。九月，高邮七颗柳漫溢，启放车中新三坝。道光二十五年夏，河再决桃源杨工口，安东西乡被灾。六月，邳州、宿迁大水，沂运两河决口数十，河湖合为一。道光二十六年，盱眙县修张公堤七百余丈，御淮水，又淮学宫淮岸筑堤一百三十余丈。夏，大雨，中河六塘河漫溢。七月，次第启放高邮车中新三坝。道光二十七年夏，清河县黄河大涨，吴城堤将溃，民情汹惧，七堡工泄水入湖，遂获无恙。道光二十八年六月，洪湖溢，林家西坝运河水涨，启放车新中三坝，又启放南关坝。七月下旬，启放昭关坝。六月，通州、如皋、靖江、泰兴、仪征、六合、江浦等处江潮暴溢，平地深数尺。是年九月，以杨以增为江南河道总督。道光二十九年闰四月，以颜以燠为河东河道总督。夏，河决阜宁北岸五套，太平河淤。六月黄河大涨，剧吴城兵六堡迤下大堤，泄黄水入洪泽湖，五引河淤。六月，启放高邮车中二坝。七月，启放南新二坝。秋，扬州江湖并溢。奏定高甘五坝启放时限。道光三十年，凤阳五河及高邮水灾。山盱仁字河坝冲损以后闭堵。两江总督陆建瀛奏添建王营缕堤滚水石坝一座。江督陆建瀛，钦使福济接筑扬州运河三沟闸迤下西堤，自通湖港南至梁家港一千七百余丈，以障邵伯民居。

咸丰元年，宿州、泗洲、五河县均大水，启放山盱礼河坝，坝底冲损未修。七月，启放高邮车逻坝。八月，启放中坝。八月黄河决丰北厅蟠龙集，食城河淤，大溜冲为大沙河，北出四支达昭阳湖，南出三支达微山湖，水势东溢运中河、骆马六塘河，江督陆建瀛塞东台。角斜场海潮涨溢，决范公堤。咸丰二年六月，以慧成为河东河道总督。正月，丰工塞，复决。徐州、宿迁、睢宁等处大水，六塘河漫溢。六月，启放高邮车逻坝中坝。宿州及五河县大水。七月，如皋县海潮直入内河。九月，命勘办洪泽湖仁坝工程。是年十二月，以福济为河东河道总督。咸丰三年二月，粤

匪踞金陵。三月，以长臻为河东河道总督。春，丰工塞。五月，复决，时海内多故，议修筑未果。七月，宿迁、安东六塘河决。七月，启放高邮车新二坝。八月，启放南关坝中坝。咸丰四年，丰工未塞，徐州北境皆大水。夏、秋，宿迁、安东六塘河漫溢。十一月如皋海啸，淹毙多人。咸丰五年夏，宿迁大水，河湖尽溢。六月，黄河大决兰仪县铜瓦厢，溜分三股。一股由曹州赵王河东注，两股由东明县南北分注，至张秋穿运河复合，夺大清河入海，时军务繁兴不塞，遂徙。黄河北徙，蓄清济运之举废，山盱礼河口不闭，遂为洪泽湖最大之尾闾。七月，盱眙淮水暴涨，乘船入市。七月，宿迁安东六塘河漫溢，七月，如皋水啸。咸丰六年正月，以庚长为江南河道总督。八月，潮入兴化境。咸丰七年七八月，如皋县江海溢，决堤堰，靖江县大风潮。咸丰八年秋，如皋海溢。咸丰九年三月，以黄赞汤为河东河道总督。咸丰十年二月，皖捻陷清江浦。是年五月，漕督王梦龄兼署南河总督。宿州大水。七月，启放高邮车二坝，露筋镇至金湾一带间段漫塌。咸丰十一年八月，如皋海溢，坏范公堤。是年裁南河总督缺，以漕督兼管河务。十一月，以吴棠为漕运总督。

同治元年夏旱。阜宁卤潮倒灌。闰八月，启放高邮车逻坝。是年七月，以谭廷襄为河东河道总督。同治三年夏秋，盛涨，黄河一股直下开东范渚。一股旁穿定陶曹单等处，修补金堤。秋，靖江县风潮。是年，吴棠拆用河湖堤岸砖石，建清河县城。是年七月，以郑敦谨为河东河道总督。同治四年正月，江督曾国藩奏复设淮扬及徐海河务兵备道。是年四月，以张之万为河东河道总督。宿迁大水。秋，睢宁大水。七月，启放高邮车新二坝。七月，河决郑州下汛十堡。秋，祥符河溜北趋大堤裂缝七十余丈。同治五年，黄水灌濮州北城，深丈余，新城在南亦受水，修北金堤，议修长垣太行堤与开州金陵接。夏，大霖雨，六塘河漫溢。夏，永城、宿州、泗州及寿州、凤阳、五河、盱眙等处大水灾，为从来所罕有。六月、洪湖盛涨，启放高邮、车南两坝。六月，运河决，清河潭东西岸皆漫塌。月杪，二闸漫场过水，下河平地水深丈余。冬、春堵筑修复高邮南关新坝，漕督吴棠改订高邮各坝水则。山阳丁显，阜宁裴荫森，宿迁蔡则沅等请复淮水故道，导淮议起，吴棠收束洪湖礼字河，疏挑张福口引河。是年八月，以苏廷魁为河东河道总督。同治六年，阜宁春旱。四月，卤潮内灌。江督曾国藩奏设导淮局。拟导淮或由成子河或由张福河依议未行。漕督张之万试办导淮，修砌洪期大堤，抽挑旧黄河及张福碎石等河。七月，启放高邮车南两坝。秋，如皋飓风，大潮坏堤堰，修筑之。同治七年四月，宿迁运沭诸河水溢。黄河决赵王河之红川口，郅城境被淹，大溜渐移安山，由安山北入大清河，运道受淤，红川口屡堵未就。六月，黄河决茌平县十堡，水入洪湖。冬、春堵塞。江苏举人蔡则沅等在都察院呈诉下河频年被淹，请照旧志保守邮坝，勿轻启放。同治九年，砀山、夏邑、永城、宿州、泗州等处大水。七月，启放高邮车逻坝。八月，如皋水啸。是年秋，曾国藩为两江总督。同治十年秋，黄河决郅城县侯家林民堰，南注昭阳湖、微山湖，运中漫入骆马湖、六塘河，明年二月堵合。冬，江督曾国藩挑淮水故道，自李工至卫滩，以资预备。是年八月，以乔松年为河东河道总督。同治十一年夏，泗州及扬州均大水。十二月，安东海暴涨，溺死人畜无算，阜宁海啸覆船。同治十二年五月，阜宁县卤潮大上，秋，泗州五河县及扬州均大水。秋，

黄河大决，直隶东明县石庄户决口。与张支门对冲，漫牛头河、南阳湖入运河。黄河溜分三股：一由石庄支门径下湖运为南溜；一由正河北折入郅寿为北溜；一由红川分入沮河为中溜。三溜以南溜为大，运河自临清至济宁，或涨或淤，自济宁至济迁两堤，冲刷殆尽，昭阳、微山湖等湖连成一片。黄水挤清，下注六塘河，由各水口放溢四出，徐海大灾。越二岁，决口乃塞。李鸿章奏将山东黄河侯家林上下民堰加培高厚，议自安山上至铜瓦厢一律接筑南堤，以障黄流。同治十三年，石庄户未堵，江督李宗羲派道员程国熙、庞际云、张富年等挑浚杨庄以下旧黄河三百余丈，并于杨庄及顺清河两处酌做裹头，以备溜至堵闭。泗州、五河水灾。夏，淮扬大水。八月，宿迁大水，运河、六塘河俱溢。

光绪元年二月，以曾国荃为河东河道总督。三月，荷泽县贾庄合龙，下游王老户张家支门均断流，黄河大溜仍归大清河故道。四月，东抚丁宝楨创筑东明以下黄河南堤二百五十里，修北岸古金堤。是年，江督刘坤一议导淮，赴杨庄履勘。光绪二年，阜宁春旱。卤潮内灌至乌家荡。是年八月，以李鹤年为河东河道总督。光绪三年二月，东抚李元华接筑黄河南堤，起东明经长垣至考城圈堤止，七十余里。又修筑东阿以上民堰，与开州民堰相接。光绪四年七月，次第启放高邮车、南、新三坝。光绪五年，拆修高邮车逻坝，议修南新二坝。淮扬海道庞际云于杨庄对岸直对黄河头作一挑水大坝，逼溜东趋。又于北面大滩挑川字形以顺溜势。淮安教职殷自芳上筹运篇，议引淮、泗由盐河莞渎河归海，江督檄司道筹议，以改道不便，议疏浚杨庄以下旧黄河为入手第一义。光绪六年，河决东明县南岸高村明春塞。军务肃清，江督吴元炳奏请导淮。山阳教职殷自芳上导淮六则。江督刘坤一奏请导淮，设导淮局。光绪七年三月刘坤一挑浚淮水故道，自杨庄至云梯关，底宽四尺，深以配平双闸志桩一丈九尺八寸为准。五月工竣。六月、八月盐城，阜宁等县海啸。西溢百余里，漂没无算。议增筑避潮墩。九月，刘坤一亲勘导淮工程，议修洪湖堤工。议浚张福河碎石河。是年八月，以梅启照为河东河道总督。光绪八年，高邮湖水盛涨，守坝未启，秋，阜宁海啸，是后山东黄河溃溢屡见，遂普筑两岸大堤，迄于海口。光绪九年二月，以庆裕为河东河道总督。泗州难湖并涨，五河大水。七月，启放高邮车、南两坝。江督左宗棠奏请复淮故道，飭淮扬海道徐文达，徐州道程国熙会勘，又以军务早竣，议将淮北盐厘全数提用。报可。江苏学政徐郅奏挑泗沂，为导淮先路。朱太和议于洪泽湖三河口建设滚水坝三百丈，不果行。是年十二月，以觉罗成孚为河东河道总督。光绪十年正月，开缺江督左宗棠议复淮，亲自履勘，奏陈办法，会商漕督杨昌浚设立复淮局于清江浦。光绪十一年十月，太常寺少卿徐致祥以汴省河务安澜，山东河患日亟，请移河东河道总督于山东以专责成，其汴省河务责成河南巡抚暂行兼管，不果行。光绪十二年，山东巡抚张曜议分黄河水入南河故道，江督曾国荃、漕督卢杰持不可。光绪十三年八月，黄河决郑州。大溜由贾溜河、颍河入淮。九月，五河大水。盱眙水长七八尺。十月，曾国荃挑旧黄河二百余里，堵顺清河，截宣沂泗，又创开陈家集窑河达顺清河。是年九月，以李鹤年为河东河道总督。是年十二月，命礼部尚书李鸿藻督办郑工。光绪十四年二月，奏修东明县上中下三汛南堤六十余里，并修开州全堤九十余里。大旱。盐城县盐潮逆灌。五

河县大水。六月，郑州坝工失事。十二月，郑工合龙。是年七月，以吴大澂为河东道总督。光绪十五年，吴大澂测绘豫直鲁三省黄河图，河决范县南岸民堰。五河县大水。光绪十六年二月，以许振祎为河东河道总督。山东河工，采用铁轨运土。是后豫省河防参用碎石工程。光绪十七年，议复山旺林智信坝。议建礼滚坝。盐城县卤水伤禾。光绪十八年五月，许振祎奏豫省河工加抛碎石，盐城县卤水伤禾。光绪十九年春，盐城县海口倒灌。夏，盐潮渡闸，淮扬道谢元福筑坝御之。光绪二十一年，或议山东河工资成河督经理。光绪二十二年正月，以任道镕为河东河道总督。三月，任道镕奏河移扎济宁，窒碍难行。山东河工厅仍归巡抚兼管，诏可。光绪二十三年八月，先后启放高邮车逻南关两坝，并预备启放新坝。光绪二十四年六月，山东黄河上游南岸黑虎庙浸溢，徐海水灾。沭阳县总沭河北决，塞之。是年七月，谕裁河东河道总督。九月复设。以任道镕仍为河东河道总督。是年九月，特派大学士李鸿章阅勘山东黄河。光绪二十五年春，大学士李鸿章阅勘山东省黄河，随带比国工程师卢法耳，估工三千二百万两。光绪二十七年四月，以锡良为河东河道总督。河溢，兰仪、考城二县成灾。光绪二十八年正月，裁撤河东河道总督缺，河工事务归巡抚兼管。光绪三十年冬，裁撤漕运总督缺，改为江淮巡抚，十二月，以恩海为江淮巡抚。光绪三十一年四月，裁撤江淮巡抚缺，致以淮扬镇总兵为江北提督，加兵部侍郎衔。江北镇道以下均归节制。光绪三十二年六月底，启放高邮车逻坝南关坝。七月底，启放南关新坝。淮北大水灾，北六塘河决口，水灌上滩。又扁担沟横堰冲决下滩，水灾亦重。通州张謇议复难浚河，标本兼治。光绪三十三年，设导淮局，实测黄河故道，自洪泽湖至杨庄，自杨庄至海口。

宣统元年六月，江北提督王士珍电奏江北入夏两河水涨溢。六月下旬，启放高邮车逻坝，南关坝。夏秋，淮北大水灾，北六塘河南堤，一决谢家庄，再决周家码头，滩民集资堵闭。秋，江苏谘议局议长张謇提议治淮，议设江淮水利公司。十月，江督张人骏奏：“江北各属被水成灾，扬州府一带湖河并涨，海州等处冲塌房屋，淹毙人口，毁坏圩堤，漂没田禾，不可胜计，请拨饷助赈”。夏秋。江皖大水灾，命盛宣怀，决煦查办赈务。北六塘河、周家码头南北并决。七月下旬，启放高邮车逻坝，奏重订高邮归海各坝水则。秋，翰林院侍读学士恽毓鼎奏政院议员周廷弼议导淮，由淮北盐河北潮河入海，海州绅民持不可。十二月，御陈善同以江、皖、豫水灾奇重，奏请推行工赈，大举治淮。宣统三年六七月，通州江潮异涨，漂没人畜庐舍。黄河决东明县南堤。徐州微山湖水涨，决兰家坝。是年，从张謇议，设江淮水利测量局于清江浦，为导淮之预备。

第七卷 海 海塘 太湖

大海·海塘

海水自山东日照县之荻水口入赣榆县东北境，南流六十里径青口，（青口县境水自山东兰山县界东南流六十里，至此入海。）又四十里，径海州北境新浦口，青伊湖、大沙河注之。

（湖水源出沭河，自湖东北尾东北流六十里，至此入海。大沙河自山东兰山、郯城两县界南流，折而东南九十里，径富安滩与湖水会，又东流十里入海。）又东北四十里过西墅，又东稍南流七十里，径东陬山河口，盐河水入焉。

（盐河始清河县境双金闸，详后淮北盐河篇，河水自州境板浦镇南十里龙王荡口东北流七十里，径秃龙港，合流入海。）又折而稍北流三十里，径阜宁东北境交界北潮河口，沭河注之。

（沭河即古涟水，自山东郯城县界入宿迁县境乔家塘，南流五十五里径峒嵒镇，又东流六十里，径沭阳县城西，岐为二，一东北流三十五里入青伊湖；一东南流二十里，又东流六十五里入海州境，又东流二十里径北塘河，又三十里径武漳河，又一里至此入海。

）运河水自西入焉。（运河详后淮北运河篇，河水自桃源县境界牌渡西十里，分而北流五里，又东南流四十里，为六塘河，又东北流四十里，岐为二：一东北流六十里至周家口，与沭河会，为北六塘河；一南流十里又东北流九十里，为南六塘河，过盐河为武漳河，又二十里与沭河水会，合流入海。

）又东南流一百里，径老黄河口为淮黄合流归海之故道，今淮水盛涨时入焉。（黄河淮水，皆见后篇。）又南流六十里，径北洋河口，（县境射阳河见下，河水自五新港分而东北流，蜿蜒五十里，又东南流四十里，至此入海。

）又三十五里径射阳河口，大纵湖注之。（湖东北口即射阳河，为盐城、阜宁两县境之界河，河水北流二十里，又东北流四十里，径阜宁县城南，又七十里径五新港，又折而南流二十里，径征洋港，串场河分流自西南来会。又东南流，蜿蜒六十里，径大王港，又东北流二十五里，至此入海。

）又西南流四十里，径盐城县东北境新洋港口。（射阳河水，自阜宁县城南分而东南流，为串场河，历三十五里入县境，又四十里径县城北天妃闸，又东北流，蜿蜒七十里，至此入海。

）又东南流二十五里，径东台县东北境交界斗龙港口，（盐城县境串场河，白天妃闸西环城西南，而东南流二十五里有奇，径伍佑场镇，又东流三十五里，径大篷港东尾，又东北流，蜿蜒四十里，至此入海。其在东台、兴化两县境内之串场河，皆自大篷港东尾入海。详后淮东盐河篇。

）又南流七十五里，径小洞港口。（东台县串场河，自县治所东隅闸口，东北流七十五里，径潮水坝，又蜿蜒三十里有奇，至此入海。）又一百二十里，径如皋县东北境交界处，又东南流一百二十里，径通州东北境交界处，又六十里，径海门厅东北境交界处界河水入焉，江水自此渐于海。

（界河起通州东南境三十里老洪港口，河水受自大江，东北流三十里，径新桥镇，又东流一百十里，至此入海。）又南流二十里为厅东境尽处，厅北为崇明县，全境悬居海中。（海中多沙，其大者北曰：惠安沙，青鱼沙，永安沙，永丰沙，永旺沙，永兴沙，日旺沙，连升沙。南曰：永寿沙，崇宝沙，皆属县境。

）县西南隔海，与太仓州东北境相望，其地为昭文县境交界处，曰白茆口。为南岸大江入海之始，尚湖、昆城湖水注之。（两湖西源远出太湖，北源近出虞山，自常熟县城东南隅通河桥，合而为一。湖水东南流十里，又东北流四十五里，全此入海。

）海水东南流四十里，径七丫口，阳城湖注之。（阳城三湖，源出太湖，自东湖下段路淩流里许，又东流十里，径新阳、常熟两县境界河，又二十里径州境直塘镇，又东北流四十里，至此入海。

）又十五里，径镇洋县东北境刘河口，新阳江注之。（新阳江源出吴淞江，自昆山境三江口，分而北流十五里，又东北流二十里，径州城西，环东南而至朝阳门外，又东稍北流二十里，径县境刘河，又十里，至此入海。

）又三十里，径宝山县城，又十里径胡巷口，即黄浦水入海处。（黄浦水源出太湖，自青浦县境淀山湖拦路口，东南流十五里，径东西二泖，又三十五里，径金山县境大泖港，又东流二十里，径华亭县境，始为黄浦。又二十五里径南汇县境闸港镇，又北流四十五里，径上海县城东北隅，又东北流二十里，径虹江口，始入县境。又北稍西流二十里，径黄浦口，至此入海。一水自浙江平湖县界入金山县境界河，东北流四十里，径大泖港，合流入海。

）吴淞江自西来会。（吴淞江源出太湖，自湖之东北口元和、吴江两县境交界处鲇鱼口，东北流七十里，径新阳县境周家港，又东流二十里，径金山县境三江口，又东南流三十五里，径四江口，又三十里，径章家泾入上海县境，又东流三十里，径吴淞港，与黄浦水会，合流入海。

）又三十五里，径川沙厅东境白龙港，又五里，径南汇县境交界处，又南流五十里，径奉贤县境交界处，又西南流五十里，径华亭县境交界处，又三十里，径金山县城南又西流十里，入浙江平湖县界。

捍海之范公堤，起阜宁县城南射阳河南岸，沿串场河而下，迤东南九十里，径盐城县东郭外，又四十里，径兴化县东北境大团镇，又南八十里径东台县治所东南隅，又东南九十里，径如皋县东北境李堡镇，其东仍入东台县境。又东二十里，径嵇公堤。又东南三十里再入如皋县境，又五十里径长沙镇，又西南六十里，径通州东北境骑岸镇南，又东南四十里径年丰闸，又东六十里，径三甲镇东海神庙止。江南海塘，起常熟县西北境，与江阴县接壤之界泾港口南，迤东南四十里，径昭文县北境交界处之耿泾口。又东三十里，径高浦口，又东南十里，径自茆口。又四十里，径太仓州东北境七丫口。又二十里径镇洋县东北境刘河口，又三十里，径宝山县城北为土塘。沿城东而东南五里，径炮台棋杆为石塘，又南不及五里，复为土塘。径胡巷口止。中跨黄浦水五里，越东岸起草庵渡，迤东二十五里，径川沙厅北境王家湾，南塘分为二：其内曰护塘。自王家湾南永宁桥东，迤南十五里，径川沙厅城北而东，又东南三十五里，径南汇县城东，又南稍西二十里，径涵水庙入奉贤县界。其外曰钦公塘。距内塘东西不及五里，自王家湾东南水洞桥东，迤东南并轨行七十里，又西五里亦径涵水庙，而合为一。又西十里径奉贤县城南，又西南二十五里，径华亭县境交界之外塘。至此复有内外二塘，西南二十里径南厍止，皆为土塘。以下复为石塘，迤西南十五里径金山县城南，又西二十里入浙江平湖县界。

晋永和中，吴国内史虞潭修沪渎垒。

（《吴郡志》：松江东泻海为沪，海亦曰沪渎，按沪渎垒，即今捍海塘，在吴淞江东老鹳嘴亘南北八十余里。唐开元元年所筑之捍海塘，即与沪渎垒接，为后来海塘之所自始。）

唐开元元年，筑捍海塘，起杭州盐官，抵吴淞江一百三十里，大历初淮南节度判官黜陟使李承式筑捍海塘，自楚州盐城南抵海陵，绵亘百里，障蔽潮汐，以卫民田。宋开宝中，增修扬州捍海堰。

天圣五年，范仲淹监西溪盐仓，建议更筑捍海塘。发运副使张纶上其事，且自请知泰州，以仲淹令兴化，董修筑之役，六年功成。因名范公堤。长一百四十三里有奇。基阔三丈，面一丈，高一丈五尺。

（《宋史·张纶传》）纶除江淮制置发运副使，泰州有捍海堰，延袤百五十里，久废不治，岁患海涛冒民田，纶方议修复。论者难之，以为涛患息而蓄潦之患兴矣。纶曰：“涛之患十九，而潦之患十一，获多而亡少，岂不可耶。”表三请，愿身自临役，命兼权知泰州，卒成堰。复逋户二千六百，州民为立祠。

（附范仲淹张公祠堂颂序：惟兹海陵，古有潮堰，旧功弗葺，惊涛荐至，盐其稼穡，偃其桑梓。此邦之人极乎其否，公坚请修复厥功，横议嚣然，懂使中废。公又与转运使胡公令仪，再列其状，朝廷可之。仍许兼领是郡，以观厥成，起基于天圣五载之秋，毕功于六载之春。）

至和中，海门知县沈起筑捍海堤，袤七十里。

绍兴二十九年，转运副使赵子潇、平江知府蒋灿，濬常熟、昆山诸浦塘。（子潇相视方略言，昔人于昆山之东，开一十二浦，分江流入海，又于民间私下泾港，因潮汐淤塞，民田漂没，今相紧切去处常熟昆山诸塘浦，总计役夫三百三十七万四千六百工，钱三十三万七千四百贯，米一十万一千五百石各有奇。

）三十年知华亭县刘侯缮海塘。

乾道二年，绍兴修秀州华亭县张泾闸。七年知秀州邱密修华亭濒海十八堰。

（附邱密奏筑捍海堰状：华亭县东南大海，古有十八堰，捍御卤潮，其十七久皆捺断，不通里河，独有新泾塘一所不曾筑，捺海水往来，遂害一县民田。缘新泾旧堰迫近大海，潮势湍急，其港面阔难以施工，设或筑捺，决不经久。运港在泾塘向里二十里，比之新泾水势稍缓，若就此筑堰，决可永久。堰外凡官民田皆无咸潮之患。其运港止可捺堰，不可置闸，不惟濒海土性虚燥，难以建置，兼一日两潮，通放盐运，不下数十百艘，先后不齐，比至通放尽绝，势必昼夜启而不闭，则咸潮无缘断绝。运港堰外别有港汊，大小十六，亦合兴修。若捍海塘堰既已毕工，地理阔远，全藉人力固护。乞令本县知佐兼带主管塘堰职事系衔，秩满视有无损坏以为殿，最仍令巡尉据地分巡察。）

附诸堰名：运港大堰，驪泾堰，黄姑泾堰，张恋泾堰，老儿泾堰，何家泾堰，善家泾堰，徐家泾堰，邵家泾堰，新开泾堰，招贤泾堰，管家泾堰，张泾堰，戚家泾堰，丫叉泾堰，吴塔泾堰，蒋家泾堰，竹冈堰，沙冈堰。

（按以上诸堰，皆当时增筑。《嘉禾志》：又有防海盐塘、石湖堤塘、咸堰、将军堰。通前志凡二十余所。自增筑海塘，诸堰皆废，今所存者惟张泾一堰一闸，故时港名亦多改不可考矣。

）十三年，两浙转运副使张叔献言：“新泾塘置闸，又于两旁贴筑成塘，徐浦塘筑堰，招贤港更置一石碣。”

淳熙三年，筑泰州月堰（《宋史·河渠志》）。诏筑泰州月堰，以遏潮水，从守臣张子正请也。八年提举淮南东路常平茶盐赵伯昌言：“通州楚州沿海旧有捍海堰，

东距大海，北接盐城，袤一百四十二里，始自唐，黜陟使李承实所建，遮护民田，屏蔽盐灶，其功甚大。历时既久，颓圯不存，至本朝天圣改元，范仲淹为泰州西溪盐官日，风潮泛滥，溷没田产，毁坏亭灶，有请于朝，调四万余夫，修筑三旬毕工，遂使海濒沮洳涡卤之地，化为良田，民得奠居，至今赖之。自后浸失修治，才遇风潮怒盛，即有冲决之患，自宣和绍兴以来，屡被其害，阡陌洗荡，庐舍漂流，每一修筑，必请朝廷，工役然后可办，望令淮东常平茶盐司，今后捍海堰如有塌损，随时修葺，务要坚固可以经久，从之。是年，待制张子正加修范公堤。四年，泰州修筑子河堰。

（附吕祖谦记，淳熙元年夏六月，泰州本部潮大，上败捍海堰，诏州与两使者参治。维堰初作于文正范公，首起海陵，尾属盐城，两县间百余里，及是半圯于水，有司缮筑，未几以訖工。闻独桑子河以南，径如皋境繚许氏庄后，皆范公规略所未及，春夏霖雨，海汐暴兴，田庐冒没，版籍日耗。诏以委今魏侯，不以造端立始，前无规机，而有所惮，悉搜悉讲，发命以四年十月乙酉，甫半月而堰成。其袤三十有五里，其纵寻有三尺，趾广二丈四尺，积工一十有七万，郡人拥府门欢贺，又走书蕲记，侯不能禁者。吴起引漳水以溉邺，追修西门豹之遗利，杜预将桥大河，或者以商所都历圣贤而不作，殆必难立，二者胥失也。斯民之生理无极，而陵陆川浸之势屡迁，颛守陈迹者，既不足与合变，至于因时建置，虽由已出，然前人仁心仁闻，亦有以起之。侯于是役，习于郡公先正之源委，一旦身履其迹，而手赋其功，用能先事不惑，已事不矜，以兴泰人之长利，终文正公之遗绪，助成圣天子实边之大计，后之为政者将于此乎。考侯名钦绪，历阳人，涖役者，海陵尉朱棣，督护者，知如皋县耿汉、知海陵县穆沂。）

元大德五年，筑华亭县捍海塘。（塘高一丈，面阔一丈，底二丈。）兴化令詹士龙大修捍海堰，凡十六月成。延袤三百余里。至正二年四月，都水庸田使司增筑华亭县捍海塘一千五百三丈八尺。

明洪武九年，敕工部遣官修筑海岸，南抵嘉定县界，北跨刘家河。三十二年，嘉定县老人朱六安奏海患，敕工部遣官修筑海塘。南抵嘉定县界，北跨刘家河，长一千八百七十丈，基广三丈，面广一丈。

永乐二年冬，命水官何傅督修海塘，高倍于前。十年，命平江伯陈瑄修筑海门县捍潮堤岸。成化八年，松江府知府白行中督华亭县知县戴冕筑海塘，自海盐抵上海县界，筑三万四千七百六十九丈，又为外堤，起戚滢至平湖县界五十三里。上海县知县王崇之自华亭抵嘉定界，筑一万七千七百四十八丈，又檄嘉定县知县白思明，自宝山北至刘家河，筑一千八百一十丈。三县所筑堤，并面阔二丈，址倍之，高一丈七尺。

成化中，御史雍泰修范公堤。巡抚毕亨增筑海塘及里护堤。（曹印儒《海塘考》）

海塘之制，本为捍御咸湖，以便耕稼。唐开元初名曰：“捍塘起杭之盐官，迄吴淞江，长一百五十里。”宋乾道中元至正初，皆修焉，起嘉定之老鹳嘴以南，抵海宁之澉浦以西，高于城垣，内外皆有塘沟相夹，国初信国公汤和经略海防，倚以为固，至成化中颓废，巡抚毕亨益增其旧及里护塘，兵农两济。

嘉靖四年，水利佥事蔡乾修海岸。二十二年，巡抚蔡克廉修捍海塘，檄太学生乔铤董其役，捐貲首倡，两月讫工，凡九十里。是年，太仓州知州冯汝弼修筑海塘，自刘家河北至常熟县界，九千二百八十七丈，刘家河南至嘉定县界一千八百五十六丈，增高五六尺。二十三年，嘉定县知县张重增筑捍海塘，自吴淞所南抵上海草荡。

万历三年，巡抚御史宋仪望、巡按御史邵陛、巡盐御史王藻、水利副使王叔杲檄松江知府王以修、华亭知县王瑞云，修筑捍海塘。（附徐阶记略：华亭县故有捍海塘。按志，塘筑于开元元年，县创于天宝十年，则塘固先县而筑矣。岂塘成之后，海水既不阑入，而江湖之水，又藉以停蓄，故耕者获其利，日富日蕃，而县因以建坎。万历三年夏五月晦，海大风，鼓浪山立，怒号而西注，败塘于滌阬，于白沙，漂没庐舍百十区。潮乘其缺日再入，流溢四境。潮味咸，所过禾麦豆蔬立槁。适岁旱，民不得灌溉。太守西蜀王侯以修檄知县事，南海杨君瑞云往视。杨君冒盛暑循海行二百里，具得其状以白侯。侯首议修筑，费巨无所给，或谓民可役也。巡按御史姚江邵公升曰：华亭人疲矣，吾奚忍益之，亟出赎金五百两，俾侯经始。巡抚中丞永丰宋公仪望闻之，出赎金三百，督盐侍御真定王公藻出赎金百，侯亦出赎金二百及河夫之直二百六十，召徒役，具器用，囊糗船粟，率杨君斋祷而从事。于是整飭兵备，东瓯王公叔杲为设禁令，陈赏罚，择典史林国惠，千户李国美，百户濮文卿使董厥功，畚筑日奋，塘亟告成。长八百五十丈有奇，高厚各一丈五尺，址加厚二丈。川原底宁，行其上者若坦途，耕于其内者若倚平冈，不复虞成潮之入也。

）八年，巡盐御史姜璧请塞石磁口，筑捍海故堤，命盐城县知县杨瑞云董其役，从之。（附胡希舜记：出盐城东门一里许，有石磁口，故有木桥，以便往来，久之海溢桥坏。万历丙子，盐城令杜君善教，以兴化钜公主义浚河建闸，河通潮大至，坏闸，水澎湃震荡，尽没民田，一时居民沦溺者无算。于是盐城父老子弟，鼓喙而争言塞石磁口矣。庚辰岁，杨令瑞云言之巡盐御史姜公璧。是年，题请塞石磁口，修宋丞相范文正捍海故堤，而命杨令董其役，自是海潮不得夺堤而上，盐人永无海患矣。乃邻县兴化岁被水籍籍，咎石磁口，塞之非便，请于当事者，因欲开石磁口。当事者屡遣诸县令率丁夫至石磁口，名为相视，实令遂开之。杨令以死拒之，曰：“盐城万民之命，皆悬石磁口，今悬诸君，诸君如遂开，变随手至矣，诸君何以谢盐城。”则又借箸画地形。曰：“夫地形若釜，兴化则釜腹也，盐地高如釜边，即张其口，安能泄釜腹中水哉。”诸令皆负空手而去。于是石磁口卒不开，杨令居恒语人曰：云令盐城数年去矣，顾如盐城百年何，盖不敢贾盐城以徇当事者，意欲盐城士民征余记述石磁口之始末，且以谕诸来者，示无改也。论曰：隆万以来，河淮南徙，淮扬诸郡县岁蒙水患，自顷筑高堰，障水不来，然非大开海口，莫能泄也

。孰知诸海口可开，石口则不可开，何者？石口薄城，所忧不独在田也。昔范堤之筑，本以捍海潮，今者塞石磁口，筑长堤，最符范公始谋，然范公堤外多民居，每受海患，杨公则迁其堤，包民居于堤内，功德巨矣。嗣来者幸无令盐人兴汝南之歌哉。

十年，总漕都御史凌云翼题，准修筑范公堤，建泄水涵洞水渠一十七处，石闸一座。十二年，松江筑外捍海塘，（《松江府志》）上海知县邓炳起工。越明年，松江府通判邹志学，知县颜洪范成之，长九千二百五十丈五尺。十六年，盐城令曹大咸修范公堤，

（附张试记略：盐城为淮郡属邑，其治距海一舍而近，其土沃可耕，第潮悍败田，御之在人，代有建画，志不尽志，惟宋范文正公监盐税时，尝请诸朝，筑堤于通泰州境，以卫民田，盐邑实居其间，故堤今尚蒙公姓。隆庆乙巳，黄淮两河水溢上堤，奔汇于盐，邻邑实与同患，有柄议开海口于盐治东泄水良便者，盐人习见水道县阻，徒捐力费无益，拒之不得。遂凿堤抵于洋涯，时万历乙亥也。既而邻患水如故，盐自是兼受潮贻患始益深矣。及庚辰春，前令南海杨公瑞云力控当路修复之。其有造于盐甚大，胡侍御为之碑，厥后丙戌夏，淮水复溢，啮范家口而下，盐害愈剧，前修复堤湍溃如谭者二。郭之东直广惠，北直大通，河海激荡，势即及郭，民情汹汹。明年夏江陵曹公至，议筑之。会岁寒不果。今年春，哺饥稍暇，乃列兴废利病状，上之院道若郡，皆报可。于是飭材庀工，乃湮乃筑。再旬而两溃堤告竣，复沿故堤，迤亘十里，所为之补断增单培薄，崇堤屹然，咸淡有截，广圻敷腴，自今以始，岁恒登矣。）

崇祯七年十一月，松江知府方岳贡、华亭知县张调鼎始于漂阙，建捍海石塘二百八十九丈。内患口一百十九丈，叠石十二层，高一丈四尺，东西两塘接连患口一百十七丈，叠石十一层，高一丈二尺八寸，东尽塘五十三丈，叠石十层，高一丈一尺六寸。八年十二月，工成。

（附钱龙锡石塘记略：漂阙者，吴郡渔舟入海采捕处也，其外渔船鳞次，并无护沙，渔人缘堤上下，如蚁附然。春夏百贾蜎集蹂躏无虚刻，宜此堤善溃矣。考志：万历初年曾溃，溃而筑，犹土堤也，费逾千金。崇祯六年，季夏望大溃，至中秋望，季冬朔再溃。七年元旦与六月几望又连溃。海潮汹涌与河内合，沿河数百千顷禾多淹没，邦人大恐。适郡侯禹修方公自覲归，偕邑侯张公博谋于众，金谓今堤必以石，如盐官。设仍以土是岁以千金抵海也。或又谓海势不可与争，宜徙而之内。侯熟计海趋沙狭河益横，即内徙，何能支。且腴壤沦而赋不办，非守臣所敢任也。定义，塘必以石，必仍外贯。顾石费十倍土力，请上台赎醵及风商民好义者，得六千余缗，又度官册业户膏腴者，一体劝输，所得二万有奇。金具矣，复请孝廉纯如吴君董其役，浹岁而石塘成。

）十三年，知府方岳贡复建石塘二百六十三丈有奇，举人何刚董其役。

清顺治三年，修筑濬阡捍海石塘。七年，松江捍海塘圯，知府廖文元缮完之。十一年，塘溃，松江知府李正华修筑土塘并石塘。

康熙六年，塘大溃。巡抚韩世琦，松守张羽明，别驾安承启集绅耆，修塘一千二百丈有奇。七年，提督梁化凤修筑松江捍海塘圯缺者，共二千二百丈有奇。九年，修筑范公堤，建刘河大闸。

（附黄与坚记：太湖诸水，从苏松以入海，松之吴淞江，苏之刘家河，入海要道也。其患在潮与汐逆而上，淀积浑沙，日以淤塞，几十年间必其溶之，而兴大工，役大众，不可以数举，于是当事者与其士大夫思诸口受噎之处，如何而可以引清水，捍浊水，蓄泄之宜。如何而旱可以潴水，涝可以泻水，使岁岁无大恐，则惟闸是问。古之治水者，浚河置闸，尝先后行之，然有行之无甚效，因其不效而寝废者，以置乎内不置乎外也。闸以拒浊，水之至，若置于内，而水道纡且折，其来急，其去缓，一日之间，潮将下而汐又至，是清水无出口荡涤之时，而沙土之停留于内者，日有其再，此致塞之由也。宋三十六浦闸，至政和中，庆安、福山仅存其二。范仲淹、叶清臣开茜泾等浦，皆置闸，不久颓坏，至明时多设堰闸，皆属内地，为虚设。自古以来数数然，不能尽其道，卒无功以致废。康熙庚戌，大浚刘河，随度天妃宫地址，距海十一里，议建闸有三，虑庠薄不可久，乃一之。始辛亥六月，迄壬子三月，工以竣。于是州之父老过而欺曰：“嘻、善矣哉”。刘河有三大湾曰：相见；日半泾；日公塘，水势皆回旋纡折，濒海而遥，至天妃宫迫于海，其势弩矢直矣。于兹置闸也，有五利焉：潮上则闭，潮下则启，杨泾以南，得以乘水势涤浮沙，一利也。淤泥不淀于闸内，使治漕至盐铁，永无壅塞患，二利也。旱涝有所恃，三利也。闸与海近，即有淤淀易淘浚，四利也。海舶无民船往来，不烦启放，并筑月河于其旁，五利也。从此以往严职守，时启闭，岁功以成，民获宁息，非苏同知师公佐暨州萧公应聘，无以董若成，非布政使慕公天颜无以创兹议，贻利于数十世，非巡抚马公祐无以咨諏入告，邀朝廷浩荡恩，至于一闸之细，并加区画，后之人其尚念创始之艰，飭而举之，共为永利矣哉。闸长一十有六丈，阔五丈，水门三，中阔二丈有四尺，旁杀之埽阔二丈有八尺，墩杀之四隅，筑石实土以护闸，凡二十丈，其吴淞江大闸设于江口宋家桥者，率相仿云。

）十一年，总督麻勒吉，巡抚马祐檄，知府耿继训，水利通判周祚昌，华亭知县董士哲修筑捍海塘。十三年，水利通判董宏、华亭知县阎必崇修筑捍海石塘。十四年，巡抚马祐，布政使慕天颜檄筑捍海土塘。二十一年，华亭知县南梦班修王家村施家路溃塘。三十六年，华亭知县卫瑶修捍海塘。四十一年，娄县知县李遇陞修捍海塘。四十七年，上海知县许士贞修筑捍海塘土塘。

雍正二年三月，松江知府杨绍修内外捍海塘，（《松江府志》康熙六十一年，海滨

士民顾智，倪泰交等以护塘东开垦升科，近患盐潮淹没，列上府县愿自挑筑护塘。

）知府杨绍申布政司鄂尔泰定议，于盐芦界挑筑，至是年三月，府檄吴淞司巡检、青浦县主簿督视起工。至闰四月，一二三团工已半。七月十八日，海水挟飓风驾外塘，溢内塘，新筑客土未坚，势不复可支矣。九月，上谕江南、浙江督抚等，今岁七月中，飓风海潮泛溢，江南浙江省沿海县卫所堤岸多被冲塌，居民田庐漂没，朕轸念深切，已令江浙地方官亟行赈济抚绥，毋使灾黎失所，今被冲海塘，若不及时修筑，恐咸水久灌内河，有碍耕种，尔督抚等著即查明各处损坏塘工料估价值，动正项钱粮，作速兴工。至沿海失业居民，度日艰难，藉此佣役，俾自得工价以资糊口，是拯救穷民之法，即寓其中矣。务期实心遵旨速行，以副朕爱恤元元至意。十二月，上谕吏部尚书朱轼驰驿前往浙江查议，将作何修筑之处，交与法海等修筑。尔即至苏州，会同何天培、鄂尔泰查看江南海塘，将苏松塘工作何修筑之处，定义具奏。三年二月，尚书朱轼钦奉上谕疏覆，奉旨依议速行。

（附朱轼疏略：江南松江府之华娄上海等县，沿海二百五十余里，地势洼下，土脉松泛，捍海工较他郡尤为紧要，自金山卫城北十里起至华家角止，四十余里，土塘六千二百五十余丈，内最险工一段，自澡阙墩至东湾九百六十九丈六尺。缘大小金山耸峙洋面，山北壅积圆沙，潮由圆沙金山之间直冲漂阙。明时修造石塘三百余丈，日久侵啮，石塘孤露水中。康熙四十七年，另筑土塘，经去岁风潮，亦塌卸入海，此段工程实为通塘要害。又次险工四段，自金山墩至西新墩七百六十八丈，兵厂至张家舍二百八十八丈，倪家路至三岔墩三百六十丈，周公墩至花家角一千四百六十八丈八尺。此四处老岸久坍，新塘屡易，见在抢筑抄塘，潮水犹注塘下。以上最险次险工，共三千八百五十四丈四尺，所当易土为石，以资保障。其二千四百余丈塘脚，尚有淤沙，水势稍缓，坚筑土塘，高一丈五尺，阔三丈。用条石铺底砌边，外钉排桩，亦足捍御。自华家角至上海汛头墩十余里，塘外淤沙一二里不等，自头墩至嘉定交界一百二十里，旧有土塘二道，内为老塘，外为新塘，应将两塘俱坚筑高厚，外塘仍密钉排桩，以防冲溃。其余间有溃口，业经补筑。但塘身单薄，应令地方官于农隙时觅雇民夫加高加厚，沿塘栽种杂树，不但树根蟠结，可固塘身，亦于民间大有利益。臣等看别各塘，随传同松江府知府杨绍等酌议修筑石塘之法，应于地面开深二三尺，务见实土，乃用一丈长木桩四十根，钉没土内，桩间杵筑，使底土坚实，上铺条石，纵横相间，每石一块，长尺五，阔一尺，厚一尺五寸，下三层，每层用石二十块，三层以上，每层收进五寸，第四层用石十九块，第五层十八块，第六层至第九层，三面铺砌条石，中间填塞碎石，自基至顶砌石十层，盖顶一层，平铺条石十块。贴附土塘，宽二丈三四尺，高出石顶五尺。照时价确估，每塘一丈用石一百二十三块，共用银三十三两八钱二分五厘，桩木价银四两，碎石价银二两，土方石灰并杂费用银五两二钱五分。每塘一丈，共用银四十五两零七分五厘。三千八百五十四丈四尺，共用银一十七万三千七百三十七两八分。又二千四百丈，每丈用条石铺底十块，砌边十块，每一丈用石价银一两，工银一两，排桩二十根，用银二两，二千四百丈，共用银一万九千一百两，工共用银一十九万二千九百三

十七两八分。再据该府等禀称，修筑石塘必须办齐石料。始不耽误工夫，计算一年之内，方可办完兴工等语。应将现修土塘，照前估计速筑完固，一面采买石料，俟办齐动工修筑，至支发钱粮及督修大小官员，应听抚臣何天培另疏题报。

）三年三月初四日，上谕：“联想这海塘工程，所需钱粮必多，据看不过十万上下，即可足用。”发往海塘效力人员若干，谁往浙江海塘工程效力若干员足用。谁往松江工程效力，若干员足用之处，大学士等查明面奏。大学士等将浙江海塘工程，交与何顺、高泓建修，松江等处海塘工程，交与李馥、黄叔琳、金启复、李陈常之子建修，缮摺面奏，奉旨照议发往。是年五月，上谕：“江南浙江海塘，已差尚书朱轼会同江浙巡抚法海等查勘估议具奏，但沿海黎庶，全赖坚筑海塘，捍御潮汐，得以保全生聚，朕时刻在念，若塘工迟误，则海滨之人，未能安居乐业，所派效力人员虽经赴工，惟恐迁延时日，骤难告竣，亦未可定。著巡抚张楷法海等星速遴委干员，支动司库钱粮，立限坚筑，刻期报完，务使永保安澜，毋得因循延缓，亦不得草率塞责，贻误民生，所动钱粮，何顺等各照所认工程，如数补库。”五年九月，奉上谕：“海塘工程关系紧要，闻得新修堤工不甚坚固，未知此语确否，著范时绎、陈时夏、陈世倌、鄂礼悉心详察，筹画妥协，勿得丝毫隐饰，务为一劳永逸之计”。十二月，奉上谕：“吴淞石塘当日勘估之时，于海潮纾缓之处，酌量修筑土塘，盖因工程浩大，诸臣勘估，为节省钱粮起见，故如此定义，但东南财赋之区，灌溉田亩，保聚室庐，全赖海塘捍卫，朕思海势冲激，风涛旋转难定，土塘经历年久，未免可虑，不若一例尽修石塘，为百姓万年之利，似为一劳永逸。朕询问齐苏勒，亦云甚当，著陈时夏、陈世倌、鄂礼等将现在土塘改筑石塘之处，确行勘估，详悉定义具奏，不得惜费省工，苟且塞责，务须坚固，永垂久远，以副朕经理海疆、爱养民命之至意”。六月五日，奉旨：“松江新筑海塘工程，关系甚要，著交与浙江总督李卫查议具奏”。李卫查议奏覆，奉旨依议。

（附李卫疏略：江南松江海塘，初议建石三千八百五十四丈，今已筑完二千四百九十丈零，若尽议改拆，则人工尽弃，但令将来石塘，悉照海盐旧塘式样，选取物料，建筑坚固，将已成之工，鳞次栉比，夹在中间。新筑三千七百余丈，左右接续，即偶有一二段损伤，不难相机改补。至于加高加厚，即可保固之说，查勘新筑塘身，已不为矮，毋庸再为加高，若欲加厚，则必向外帮贴，新旧不相胶粘，徒致糜费无益。再查石塘之外，有贴筑土塘附于石塘之背，盖因石塘初筑，外当风潮，内则孤立，必筑土塘以护之。原宜一例高厚，无分彼此，至如土塘在石塘之外，目前潮水，全赖此塘捍御，延袤数十里，其间高底厚薄不同，应俟农隙之时，择其低薄断续处，量给饭食之资，令沿海居民，渐次培筑。以上一切工程，必得总理分任之员。督臣范时绎已经请委苏松太道魏观兼督。但魏观生长北方，于海塘非所素习，仰请皇上命以前经手塘工之升任京卿俞兆岳总司其事，以魏观往来会同稽查，再请敕下江南督抚，另于通省同知通判及水利效力各员内选择委任，管理分筑，仍令督抚藩司诸臣计议，确估稽察，则塘工可以永固矣。

）七年二月，江苏巡抚尹继善题请于府佐贰及府首领县佐贰官内选二十员，以四员采备物料，以十六员分督塘工四千二百三十余丈，总听通政司参议俞兆岳调度经理，奉旨允行。八年七月，浙江总督李卫，江南署总督史贻直，江苏巡抚尹继善，履勘条奏海塘事宜，奉旨允行。

（附李卫疏略：窃照松江海塘，荷蒙皇仁，不惜数万帑金，悉令易土为石，自上年开工，已及一载。臣等于七月十六日亲至工所，逐加履勘。东湾起自花家角，接续旧工。先筑塘工一千八百七十五丈，分为十号。勘其石料工程坚固结实，如法砌筑，较从前迥不相同，皆由总理通政司额外参议俞兆岳身任勤劳竭尽全力。先筑样塘六十丈，以为程式，是以在工各员俱不敢苟简草率。至通塘所需石料甚多，现在专委同知等员，于江浙两省各宕，分头开采，源源济运。抚臣尹继善就近督。约计三年之内，大工悉可告成。目前则漂阙迤西至倪家路一带，即当先委各员按段兴工，接续旧塘，以为保固。又花家角以东，添筑石塘二百丈，加桩土塘一百丈，金山嘴之西，先行添筑石塘二百丈，加桩土塘三百丈，两头俱直，与历来老土塘相接，则磐石之安，万年永奠，不敢尽行请动正项。查松郡华、奉、娄、金四县，向有民间每年随漕公输岁修海塘，钱每亩五文，约计一年，共有七千两之数，虽不能全行完纳，但外护土塘，业已筑竣，今复以之修补石工，各工缺陷渗漏，尚有所余，臣等酌议此项添筑石塘四百丈，计价银三万二千余两，土塘五百丈，计价银一千五百余两，两头各添开运石小河一道，约价银六百两，并前条所请增给凿石工价银两，除将候选运判朱荣椿先后二次愿捐银一万五千两抵用外，其余工费，请于藩库动支，逐年将所收岁修之钱，除抢护苦补各塘之外，悉以陆续归补，数年之间即可足额，则以公完公，地方民生实有裨益。

）（附尹继善疏略：松江石塘工程，其先筑之一千八百七十余丈，已经完工，臣等赴塘查勘逐工细验，俱能修筑如式，内总理塘工太仆寺卿俞兆岳所筑样塘，较别工尤为坚稳，非仅由于灰浆充足，盖因工内俱用铁笋铁销，臣等细心讲究，海水吞吐，为力甚大，倘一石移动欹斜则全身动摇，惟于两石层叠之处，凿一孔用铁笋穿合，则上下连结，于横石排石之处，各于头尾凿孔，用铁销关住，则左右贯穿，通身之石联络一片，虽有风浪冲激，不能撼摇，较之用铁锭搭钉浮面易于脱略者相去悬殊。今除已筑塘一千八百七十余丈外，尚有未筑塘工二千七百五十余丈，请将此未筑塘工外层纵横补砌之石，俱添用铁销铁笋。每丈前用铁销铁笋五十三个半，每个重二斤，每斤价银一分五厘，每个凿孔工银一分，共需笋销十五万七千六百二十六个，约需笋销连工银五千九百余两。所费无多，塘工大为得力。但石有长短，笋销或有增减，工竣核实报销。又土塘为石塘外护，关系最要，内有漂阙等处，离水甚近，为最险之工，常年于土塘外身，密钉排桩保护，而潮水冲刷，难以抵御，不时坍卸。臣等查土塘之外，有废石塘数百丈，久经坍入水中，原题请将坍卸水中之石，捞取配为新塘之用，今查看石料短小，不能配新工，请将此废石移为帮护土塘，纵横砌筑所有捞筑等项工费，即在岁修土塘捐钱内动用，实费省而功培也。

）十年，允布政使白钟山请，令沿海沙洲居民筑墩防水，并资守望。（附白钟山折奏略：窃见盐城县志内，前知县杨瑞云在大盘湾，令民筑巨墩，可容数千人。遇风潮时，令民上墩，咸保无恙。臣思沿海愚民，生长沙洲，罔知自卫，似宜仿照此法，令沿海各沙洲建筑土墩，每岁地方官于农隙之时，督令乡保，不分民灶，按户分筑。其墩高至二丈为度，阔以居民之多寡为定，四面皆如梯形，不必陡削，计一年之内，不过数日举手之劳，而日积日高，二三年间已成大墩，不但潮至可以趋避，兼可瞭望海洋，实于海隅民生，大有裨益。其沿海省分，凡有沙洲民居处所，宜一体举行。

）十一月大学士鄂尔泰、张廷玉、朱轼，都督尹继善议，准巡抚乔世臣疏请。于松江府之金山、华亭、奉贤、上海、南汇五县修筑捍海土塘，奉旨依议。（附乔世臣疏略：窃查松江府之金山、华亭、奉贤、上海、南汇五县沿海地方，西与浙省平湖交界，东至宝山县接壤之黄家湾，绵亘二百五十余里，俱旧有土塘，以捍潮汐，日久渐圯。雍正二年冬，荷蒙皇上念切民瘼，以江浙海塘均关紧要，特命大臣会勘。自金山卫城北十里起，至华家角止四十余里，工为最险，已另择塘基易土为石，兴筑石工，陆续告竣。工程坚固，亿万生灵，从此永获保护安全。其自华家角以东至黄家湾，议令地方官于农隙时，雇觅民夫，将旧土塘加高帮厚。惟是数年以来，石工紧要，不及兼顾，而地方官又以无专项可动，虽偶为修补，终无实济。本年七月十六七等日，飓风为患，海潮汹涌，其在金山、华亭界内者，缘石塘之外旧存土塘，先经动帑修筑完固，是以潮水掩至，即堪捍卫，不致冲漫。而华家角以东之旧土塘，则从前既属卑薄，又被风激浪撼，顿行坍塌，海潮因得直漫内地，禾棉庐舍人民多遭伤损。塘内系南汇地方较多，故被灾较重，次则上海奉贤。自潮灾后，即据各县纷纷以请筑海塘具详。臣于九月之杪，亲赴松郡沿海查勘，备悉金山觜至华家角一带，不特石塘为万世之利，即外护土塘亦甚属坚固。此番华金二邑之得免潮灾者，见赖土塘捍御之力。是土塘但能如式加高帮厚，自可永久保护。且查华家角以东，塘身因于七月内全被冲坍，至八月十八日，海潮又经涌入，内地水侵二三四尺不等。明岁秋汛，何能保其无虞，则此塘工之修筑，势不可缓。臣随委员用营造尺逐段丈量，每二十丈分为一号，按算土方多寡。其在奉贤者，由华家角石塘尽处起，至南汇县东界止，共丈见九千三百二十七丈六尺。其在南汇者，自奉贤县西界起至上海县东界止，共丈见一万五千四百六十四丈。其在上海者，自南汇县西界起至宝山界黄家湾止，共丈见一千二百二十三丈八尺，议以各塘俱底宽五丈，面宽二丈五尺，高一丈二尺；每丈应用小土方四十五方，内有旧留底工者，俱行扣减，有河洼缺陷者，俱行添补，其中存废不等，逐一核实牵算，计三县为塘共二万六千一十五丈四尺，共用土一百三十六万五千一百三十一方零。查现在修筑土塘，每方给银六分六厘，但向系挑至三尺，始行一砌，土性未能胶固。今定以一尺一砌，每方加夯筑银六厘，给银七分二厘，共需土方银九万八千三百五十四两零，又南汇之余角洼，老洪洼上海之二十二保地方，三处俱冲连海口，各应筑坝堵截，共需工料银三百八十八两零。其自头墩至黄家湾向有土塘二道，内为老塘，外为新塘。今经阅勘，外塘离海尚远，是以止议修筑外塘，而内塘之工即可从缓，惟近黄家湾东北一角

凸出顶冲，逼近海面，旧塘坍毁尤甚。今将此四百七十三丈移近半里，势并纾坦，至所筑塘根，皆有淤沙在外，均非陡险可比，无庸另施桩石，致滋多费。再黄家湾以北，至宝山城周家基宅后止，向有土塘一道，逼近海滨，久以坍废。前经原任山东抚臣陈世倌奏请修筑，仰邀俞允，尚未兴工。而今秋风潮从此涌入，是以宝邑被灾亦重，并宜增筑。今丈见四千二百二十八丈一尺有奇，其塘底亦宽五丈，面宽二丈五尺，惟地势较低，而又近海，须加高至一丈五尺，每丈计该小土方五十六方二分五厘，共用土二十三万七千七百三十二方零，共需土方银一万七千一百一十六两零，再此处沙土松浮，须用干枯茅草栽护，则久而根株盘结，草土纠缠，日就坚实，应每土高三尺，栽茅一带，自下至上，栽茅三带，计每塘一丈，应需买运工价银三钱，共用加栽茅草银一千二百六十八两零，又筑坝车水等项，共须银三百三十八两零，至取土窰废民田钱粮，统俟完工日查明请豁，至此等土塘岁修，并关紧要。应照华娄，奉金之例，令各该县于田亩内每亩捐钱五文，以为岁修之费。仍令解贮府库，每于冬春之间，督抚臣委员勘估督修，递年增培坚固，厘毫均归实用，工程自可经久，庶免地方官吏草率侵蚀贻误。其民间有潮汐冲缺，该县随时一面鸠工补筑，一面详明核实捐钱。如蒙俞允，于正月春和先动存公银两，渐次兴工，则沿海被灾贫民，并可藉营工资生，自必踊跃赶赴。来年秋汛得以有备无患，必长为泽国保障，永戴皇仁浩荡矣。

）是年，海潮泛涨，田庐皆淹。华亭令徐必昌通详，领帑二万六千六百两零，修筑土石二塘，东至五墩涵水庙，西至华家角，绵长五十五里，计长九千四百七十六丈，面宽二丈五尺，底宽五丈，高一丈二尺。十一年正月十一日，奉上谕：“江南范公堤为沿海之藩篱，盐场之保障，原系商人捐修工程，闻现在残缺甚多，急应修筑坚圃。现据署两江总督魏廷珍委员确勘料估，著即一面具题，一面乘二三月间作速兴工，使沿海穷民得以佣工糊口。但工程绵远，需大员董理，著交与协理河务西柱即行督率料估，悉心查办。”修筑范公堤，又于堤内建筑越堤一道。十二年，两江总督赵弘恩疏奏：查办海塘事宜，请于紧贴石塘之外，再筑土塘一层，上宽五尺，下宽二丈，高一丈余，庶内外包裹帮扶，愈可经久。

（附赵弘恩疏：窃臣亲勘松江一带海塘，绵亘数十里，巍然屹立，保卫数府田舍，仰见圣主爱养黎元，万世永赖之利。臣逐细巡视，查外护土塘俱属完固，又金山嘴一段土功，地基原低，前估一丈二尺，与各工塘面高低不一，已饬加筑平齐。新建石塘内，有东新墩一带七段，现在赶修，八九月可竣。戚家墩一带七段，现在催运石料，明夏方能修完。其余已修石塘，如式坚固。总理塘工等臣俞兆岳及承修各员，俱实心经理。至添筑贴石内土塘，现在夯碣务期坚稳。臣于工员匠役，逐一劝勉奖赏，无不仰体皇仁，踊跃出力。再查石塘长至七千余丈，面宽五尺，底宽一丈。以臣愚见，尚觉单薄，其外护土塘，相离石塘有十余丈及数十丈之远，新筑贴石内土塘，系紧贴石塘里面，而石塘外面，看去虑少帮扶，诚恐日久潮侵雨淋，剥落擦损。似应仿照贴石内土塘之法，紧贴石塘之外，再筑土塘一层，上宽五尺，下宽二丈，高一丈余。庶内外俱有包裹帮扶，愈可经久。其漂阙为第一险工，石塘系首

先建筑。不及续修之工程坚稳，则外筑贴石土塘，更需加倍宽厚，方为周密。又查石塘以外、原筑之外护土塘以内隙地原广，雨水颇多积注。寺臣俞兆岳欲于石塘开洞三四个，以消积水。前督臣范时绎、尹继善俱以恐伤塘根阻止。但现据百姓群吁疏泄，臣愚以为积水不消，浸泡塘根，亦有干系。若开挖数洞，实恐有伤塘身。商之俞兆岳并细询工员匠民，欲于隙地中间，酌开小河一道，围绕石塘之外，仍不致逼近塘根。于石塘尾与土塘交接之处，开砌石洞三个引水以入石塘之内。新河塘工民田，均有裨益。而开河之土，即可以筑贴石之外土塘。约计共费二万之内。暂动司库耗羨料理。俟塘工捐钱充足之时动补。是否有当，理合一并陈奏。恭候圣训遵行。又外护土塘以内隙地，开河之外犹多空间，宜酌种芦苇柳株，日久根深盘结，既可以固塘基，而枝叶畅发，又可以资民用，合并陈明。

）六月十二日，奉旨：“赵弘恩查勘海塘工程，既经亲身阅历，详细商酌。所奏紧贴石塘外筑土塘并酌开小河之处，俱着照所请行。十三年，海防同知冯翊督修金山觜加桩土塘，修蔡家马头短桩石片护堤，筑上段坦水坝，又于金山觜加桩护堤外，筑断石排桩。

乾隆元年，委员陈桂纪应迪承京等督筑金山头西新墩土塘，坦水坝，胡家厂石井小塘，金山觜坦水坝。金山知县王道修筑裴家路土塘。其明年，奏立善后岁修法。

（金山卫城南小官浦，旧与海通。明洪武中置卫于此。巡海四十艘，由此出入。自成化年修筑海塘。通海诸港日就湮塞，海沙渐积成洲，潮汐不复冲突。今自青龙港以西旧有沙滩，渐为海潮洗刷。至裴家路左右，潮势冲激尤甚。当伏秋大汛，洪涛直射塘身。乾隆元年，海防同知冯蒿尝履勘详宪，谓此属近年创见云。

）二年，县丞张乾筑捍海塘外坦坡。六年，委员张毓柯督筑金山觜坦水坝，福泉县丞王麟超督筑金山县捍海塘。（塘旧高七尺，底筑坦坡，宽五丈。是年海防道程梦瑛议于新筑坦坡之上，加筑四尺。高齐旧塘檄麟超督工兴筑高七尺，面阔三丈二尺五寸。

）七年，委员吴耀督筑金山觜、林家湾、胡家厂、漂阙、蔡家马头五处加高土塘。十二年，委员邹越阳、孙宏度督筑通塘，加高土塘。（是年复遇风潮，邻邑南汇被灾。华亭令刘啼泽领帑修筑土塘，加高二三四尺，以符部尺一丈二尺之高，塘面通准二丈。至十四年，邑令李治灏加筑完工。

）十三年，上海知县王倬领帑修筑土塘。十四年，南汇知县胡具体请帑修外塘。（面宽二丈，底五丈，高一丈二尺，计修一万三千六百三十四丈八尺，塘西留公地二十丈，塘东留公地三丈，以备起土修塘之用。

）是年，知县常琬加筑海塘。（先是十二年巡抚安宁奏请加筑，至是年琬承檄兴筑

，以沙土相杂，必不坚固，严禁挑取塘外淤沙。七阅月塘成，高一丈二尺，面阔二丈，与华亭高土塘高厚等。动帑三千三百两有奇。

）十七年，委员车策、孔传祖、陈筠督筑金山觜、林家觜、李家马头觜、胡家厂土石塘。十八年，上海知县李希舜修筑土塘。二十四年，筑长潮港塘。二十五年，筑随塘单坝。二十六年，筑横池塘。二十七年，筑楚城泾塘。是年，南汇知县孙耀德修筑凌家浜圩塘。二十八年，筑长潮港塘。二十九年，上海知县于方桂修筑土塘。三十年，筑临海塘坦坡。三十一年，筑长潮港坦坡。三十二年，筑长潮横池等塘。三十三年，复筑长潮港坦坡。三十四年，筑临海夹石坦坡。三十六年，筑楚城泾塘。四十二年，上海知县史尚确修筑土塘。四十四年，知府元克中、华亭知县林培由请帑修筑戚家墩、金山觜、林家觜、石坝。

（后历年多有修筑。）是年，筑楚城泾单坝。四十六年，筑长潮港楚璜泾单坝。四十七年，筑楚城泾长潮港单坝。四十九年，知府梁群英、华亭知县林培由请帑修筑林家觜、胡家厂、捍海土塘。五十一年，知府杨寿楠署华亭知县王梦文请帑修筑戚家墩、金山觜、胡家厂土石海塘。

（后二十年间，历事修筑。）

嘉庆六年，知府赵宜喜署知府康基田、华亭知县王劝详请借帑抢筑土塘。七年，知县郑人康协修华亭县土石塘。十年七月，奉上谕：“据汪志伊奏，松江、太仓二府州属之宝山、华亭等处各塘工，闰六月初间风潮，多有刷损。内崇明一县，因海潮漫溢入城，仓廩墙垣亦间有坍塌。著查明照例估办。”十一年，知府郑济焘、华亭知县李绍洛、奉贤知县艾荣松、南汇知县张昌运协筑戚家墩金山觜土石海塘。十六年，第十七段塘圯，同知周垣勘修。

（此处因有獾洞，故屡为风潮冲损。详明排钉木桥长三十八丈。）二十二年八月，塘又圯。同知刘文澈勘修。

道光十一年五月，第十三段塘圯，同知郑其志勘修。十五年，江苏巡抚林则徐勘修宝山海塘。原奏略曰：“宝山县三面环海，境内土塘一万五千余丈，石塘一千三百丈。石塘之内，仍加土。其沿塘迎险处所，外钉排桩，填砌块石。自靠塘一层至二三四五层不等。历年久远，潮汐激荡，桩石损缺之处，风浪遂及塘身。嘉庆四年十年，两次遭被风潮。叠经奏准动帑兴修，迄今又阅三十余年。每遇伏秋大汛，土石各工被潮泼损。责令择险随时抢修，权为保护。本年六月十四日，陡遇异常风潮，水势飞腾，高起数丈，沿海塘堤，率多冲塌。经臣陶澍先将大概情形，奏奉硃批查明据实核办。臣林则徐接据沿海各属禀报，当查风潮冲塌塘工，以宝山为最甚。复委查勘该县江西各段土塘，穿缺一千七十余丈，残损二千一百八十余丈。江东各段土塘，穿缺一千一百余丈，残损四十余丈。石塘冲裂六丈。其余亦多残损。急须大

加修筑。而国家经费有常，又值大修海塘之际，不敢复以江苏塘工请动帑项。因思该县士民，素尚好义急公，海塘为地方保障，尤期众力同擎。臣等即率同司道州县廉捐为倡，并劝谕城乡绅庶陆续书捐，至七月初间，已得十万有零之数。复据禀报七月初二日未刻，又有飓风突起，雨骤潮喧，彻夜震撼。至初三日未刻始息，宝山江西各段塘面所筑土戗，均被风潮漫溢，全行穿缺。江东各段新筑小圩，冲缺五百余丈。旧堤亦处处增坍。饬据太仓州知州李正鼎、督同宝山县知县毛正坦、暨委员候补知县龚润森、镇洋县知县孔昭显、坐补崇明县知县徐家槐等履勘，据禀复旧塘本嫌估直，收分过少，不足以柔潮势。今加筑新塘，拟用外面三收里面二收，底宽八丈，顶宽二丈，高至一丈二尺，将旧土一律铲平，以凸补凹，铺作塘底。拨水行砥，再以新土层层加筑，套砌饱锥，以期坚固。塘外签钉排桩，填砌石块，层数不等。其小沙背谈家浜一带，形势尤为顶冲。外面多加桩石，俾资保护外，并于里面加筑新塘，为重门保障。又该处旧有挑水坝二道，久经残废，今一并修复。仍于坝外双桩加石，以资挑溜。石塘冲裂残损各段，普律添购新石，砌筑完整。石塘尾段与土塘交接之处，加土裹护，并加石坝三层。统计银数须得二十万两有零。臣等复经采访众论，公同商榷。事关生民保障，不独宝山一县商绅耆庶，自卫身家，捐输已形踊跃。即贴近之嘉定上海二邑，亦皆唇齿相依，尚可互劝集捐，以期众擎易举。因令先将已捐之项，采购物料，赶运赴工。并于宝山绅耆中公举总董数人，散董数十人，分司其事。现在将近立冬，水势消落，应即择吉开工。”十六年，林则徐奏验明捐修宝山县海塘已完土石各项。原奏略曰：“臣于五月十九日由苏州前赴宝山，周历查验。所有江西、江东各土塘，量明高宽丈尺，较原估格外敷余，逐段锥试，均属十分饱满，砌筑实为认真。补砌石塘，面面方整，并用铁铜铁锭，逐层勾贯。新旧相合，灰浆坚结。盘头石坝三层，排桩紧密，填砌块石高与土石塘相平。塘外单双各石坝择险钉砌之处，桩密石厚，足资护塘挑坝。其随塘河道，挑深九尺至一丈不等。正届插秧之际，塘内数万农田，咸资灌溉。施港口右闸，业经砌至十三层。工已及半，砌法与石坝塘相同，甚为坚整。臣连日查看工段，绅士耆民扶老携幼，香花载道，无不欢忻鼓舞，感颂皇仁。就中有年近百岁及九十岁王七大、陆孔彰、杨世奇等，佥称曾经四见大修海塘，未有如此次之层土层砌、高宽坚固者。验工之时，适见伏汛潮汐正属盛旺，塘工大局告竣，已觉捍御堪资，再得通工桩石完全定足，以垂久远。又通州捐挑河道片，再江宁藩司所属之通州地方，濒江控海，负郭即为高阜，近沙皆属低区，因潮汐往来，沙港渐成淤垫，圩岸闸坝，亦多年久倾颓，旱涝每虞无备。饬据前任通州升任贵州遵义府知府平翰督率委员绅董劝谕捐修，当经奏明责令该员一手经理，旋据禀报。将通江引潮之姚港等二十七港，照业食佃力之例，开挑深通共出土五十六万二千四百余方。又白蒲镇六十里河道，半属浅塞，未能纳潮。内近田之三十里，亦照业食佃力挑办。其最浅之处，计长三十里，系平翰首先捐廉，劝谕绅董捐挑，一律挑深三尺。即以挑出之土，加培圩岸。又修复唐家闸盐仓坝正闸耳闸，以为蓄泄关键。并以工余之项修理该州试院，统共用银一万八十八两零，均由官绅筹捐兴办，次第完工。并将捐数用数榜示晓谕。又各乡董事或开挑柴南沙界河，加筑圩岸，或修筑余中头桥至四甲坝十余里河岸；或开挑六堆港民灶沙双鼻子港及紫琅书院公田旁各河道；或改建西三十里镇之翔凤桥

，亦俱一律告成，不在捐数之内。经委常镇道前往逐一验收，工程悉皆如式，实于地方有裨。除升任知州平翰自行稟明，不敢仰邀议叙外，其余捐输出力官绅飭司查明照例请奖。俟到再行汇办。合并附片具奏。”

同治七年三月，两江总督曾国藩、丁日昌奏修建华亭县石塘护坝。华亭石塘西十二段，自道光十七年广建护坝后，时有修葺。至同治初，强半残毁，塘石多露。五年，候补道孙士达承巡抚檄，建二段护坝二百四十丈，桩石二重。嗣遇风潮，石后土荡涤几尽，木桩亦多外散。七年，代理布政使杜文澜周履检按，分别险易，为程工次第，檄候补知县钱宝清董其役。一段至四段为兴工之始，是年四月起工，至八年九月而竣。凡修筑一段土坦坡石后土二十七丈七尺，护塘单坝一百九十三丈，挑水坝八十丈，旧坝增桩五十丈，二段土坦坡石后土四百四十丈，护塘坝二重者二百四十丈，三重者一百丈，四重者二十丈，又增旧单坝为三重者八十丈，拦水坝四百丈，卫坝桩三十六丈；三段土坦坡石后土二百丈，护塘坝四重者三十丈，三重者一百七十丈；四段土坦坡石后土二百二十五丈，护塘坝四重者一百二十八丈，五重者九十七丈，拦水坝三桩二石者一百丈，二桩一石者四十丈。八年二月，丁日昌奏准续修华亭县石塘，在华亭等二十一州县受益民田，摊征归款，候补知县钱宝清董其役。五段至八段，时列为最险者，是年十月兴作，至十年二月而竣。凡修筑五段土坦坡石后土二百二十丈，护塘坝四重者一百四十丈，三重者八十丈，拦水坝三桩二石者七十丈，二桩一石者三十丈。六段土坦坡石后土二百丈，护塘坝三重，其长如之七段，土坦桩石后土二百四十丈，护坡坝三重，其长如之，拦水坝三桩二石者五十丈，二桩一石者五十丈。十大桥路，续修华亭县石塘。候补知县钱宝清董其役。九段至十二段，时列为次险者，是年三月兴作，至十一年七月而竣。凡修筑九段土坦坡石后土六百三十丈，护塘坝三重者二百十丈，二重者四百二十丈，中段增内桩六十丈，拦水坝二十丈；十段土坦坡石后土一百六十八丈，护塘重坝二百二十丈，拦水坝四十丈；十一段土坦坡石后土及护塘重坝各二百六十五丈；十二段土坦坡石后土五十八丈，护塘坝二重者五十八丈，一重者十丈。合前二役都计木石土方物料价值夫工等项银二十四万三千五百十八两有奇。十年九月，培筑宝山县衣周塘等处土塘。县境海塘，道光十七年修筑后，间有缮葺，皆类补苴，至是危险杂出。是年九月，知县王鸿训陈状，先抢修土塘六处，十月工竣。凡培筑衣周塘十三丈，西塘顾隆墩十五丈，张家宅六丈，薛家滩六十四丈五尺，牛头泾二十一丈，北王庙十三丈，加桩木一百三十二丈五尺，都计土方木料价值夫工等项银二千二百三十一两有奇。十年十月，局檄候补直隶州知州曾广照修筑宝山海塘，度工集役，规画未定，择要以治。是年正月兴作，阅二月而讫。凡培筑土塘谈家浜十三丈二尺，陈华浜十六丈，顾隆墩八丈九尺，薛家滩四十一丈，石洞十一丈，曾增植桩木一重，又衣周塘顾隆墩补土各数丈，加桩各三十余株，都计木植土方物料价值夫工等项一千二百八十八两有奇。十一年正月，培筑宝山县谈家浜等处土塘。五月，培筑宝山县北王庙等处土塘。是月，烈风数日，怒潮薄塘，前修诸所桩木多坏，北王庙塘土亦患墜圯。代理县事曾广照集夫修筑。七月役竟。凡培石塘内护土三百八十方，修筑土塘陈家店十丈，陆奇塘十四丈二尺，张家宅六丈，薛家滩一百三十一丈五尺，牛头泾一

百八十丈八尺，北王庙一百一丈五尺，并植新旧桩木都计木植土方物料价值夫工等项银一千七百十八两有奇。

（以上二役皆抢工。）十一年六月，补筑昭文县野猫口、龙腮泾、计港口、塘外护滩。徐六泾以西外滩日蹙，其最甚者曰野猫口，曰计港口，曰龙腮泾。十年十一月，知县许子春，陈状，檄候补知府钱卿铎度工集役，以候补知县钱宝清副之。时方浚徐六泾，未克并举。明年六月，乃议兴作而木石未备，工费亦绌，先于伏滩植桩内覆以土，还滩之旧。

（内外相距可四五尺，野猫口内高七尺五寸，计港口内高七尺，龙腮泾内高一丈，外平桩皆五尺。）野猫口最险，复植桩于外以散潮势，俗所谓抢工是也。九月工竣。凡补筑野猫口余滩四十二丈，计港口余滩十一丈，龙腮泾余滩十丈，增野猫口外桩四十二丈，又浚运石河一千四十四丈，都计木石土方物料价值夫工等项银三千八百八十一两有奇。十一年十一月，补筑镇洋县杨林口南北土塘。自大厍口至杨林口旧塘，已沦于海。五年，议筑未果。大厍口南及杨林口北复圯五十余丈。十一年，署布政使应宝时、中书何慎修亲至检按。买民田二百数十亩，补筑新塘势越向外内。檄候补知县吴炳经董其役，编夫合作。自北而南，内开河以运木石，出土即用筑塘。是年十一月起工。明年四月成三百丈。农时罢役。八月复起工。至十三年二月始竣。是役也，以塘外留地率只数丈，风潮沦蚀，惧败塘基，先建桩石以护余地，后乃筑塘。凡补筑杨林口南土塘六百六十二丈，建口内石坦坡三十七丈七尺，分水坝二丈七尺五寸，护塘桩石第一重六百六十九丈八尺，二重六百七十六丈三尺，南分水坝二丈一尺，小石坝一丈二尺，陶家港石坝二十三丈，杨林口北土塘五十七丈，护塘桩石第一重二十四丈，二重二十七丈，小石坝二丈四尺，石坦坡六十二丈。又浚随塘河七百七十二丈。都计木石土方物料价值夫工等项银五万九千一百三十四两有奇。十二年正月，修筑宝山县谈家浜衣周塘土塘。候补知县裴大中领其役。十一年九月至县，规度全势，首浚随塘马路诸河，以运木石。其衣周塘一百十四丈，谈家浜塘三十三丈五尺，已濒危险者，先于是月兴作，六月役竣。十二年闰六月，修护宝山县顾隆墩等处土塘。候补知县裴大中董其役。七月工竣。凡计土木之工，属顾隆墩者三十九丈，属薛家滩者一百二十八丈五尺，属牛头泾者八十五丈四尺，属石洞者五十三丈五尺，属张家宅者四十五丈四尺，属陈华浜者八丈。合谈家浜衣周塘之役，都计木石土方物料价值夫工等项银一万一千五百九十二两有奇。十三年二月，修筑宝山县江西土塘。江西土塘，经始于十一年，按察使应宝时、中书何慎修一再履验。十二年，檄候补知县裴大中领其役，复以候补直隶州知州李庆云继之。明年二月，木石始备，程度缓急以次兴作。始顾隆墩、薛家滩、牛头泾炮台，次谈家浜，次陈华浜、张家宅，次小沙背、石洞、北王庙、内塘外滩，分别营护，补残葺溃，各视其宜。光绪二年五月，役乃全竟。凡修筑顾隆墩土塘四百丈，护塘桩石坝三重者二百六十一丈五尺，二重者一百二十三丈五尺，一重者十五丈，挑水坝六十丈，修筑薛家滩土塘一百七十丈，护塘坝四重者九丈，三重者一百二十三丈，二重者三十八丈，拦水坝一百八十一丈五尺，挑水坝八十八丈，修筑牛头泾土塘二

百三十五丈，护塘坝三重者二百九丈五尺，二重者二十五丈五尺，拦水坝七十九丈，修筑炮台土塘并三四重护塘坝四十九丈二尺，接石塘处筑盘头桩石四丈五尺，又护滩坝二十九丈，修筑谈家浜土塘三百十三丈五尺，护塘坝二重者二百八十一丈五尺，一重者三十二丈，护滩坝一百三十五丈五尺，又挑水坝十丈五尺，拦水坝二百六丈，修筑陈华浜土塘三百四十二丈五尺，护塘坝三重者三十三丈，二重者二百七十九丈五尺，一重者三十丈，护滩坝三十二丈五尺，修筑张家宅土塘一百二十九丈四尺，护塘坝三重者六十九丈四尺，二重者五十四丈，一重者六丈，拦水坝一百七十丈四尺，修筑小沙背土塘并护塘二重桩石坝各九丈，修筑石洞土塘二百八十二丈，护塘坝三重者一百三十五丈五尺，二重者一百三十九丈二尺，一重者七丈三尺，护滩坝七十一丈五尺，修筑北王庙土塘八十五丈五尺，护塘坝三重者四十九丈，二重者三十六丈五尺，都计木石土方物料价值夫工等项银十七万六千二百六十九两有奇。十三年十一月，补筑太仓州茜泾口土塘，增建镇洋县护塘坝。茜泾口北塘圯数十丈。十一年，议与镇洋同筑，以木石未备置之。其南旧塘亦待桩石营护。是年，署布政使应宝时亲至检按，檄知县刘步瀛领其役，木石兴作，自茜泾南始编役，筑塘则起于光绪元年正月，农时中息，至八月始成。凡补筑茜泾口土塘八十四丈，南接镇洋境。并建护塘桩石二重，石后筑土三百五十三丈，茜泾口增建第三重桩石一百四丈。

（北有小分水坝。）都计木石土方物料价值夫工等项银二万五千二百九十二两有奇。

光绪元年二月，修筑昭文县野猫口护滩拦水各坝。候补知府钱卿铄董其役。经始于同治十一年九月，以须木石，至是乃克兴工。东起龙腮泾，西止张家厍，析为八段。内建护滩桩石，一段至三段皆三重，四段至八段皆二重。桩后筑土，宽狭不等。

（逼近土塘者，即筑与相接。）外建拦水坝，四段五段三桩二石，他皆二桩一石。（自五段至八段，皆增护塘桩石一重。）二年九月工竣。凡建护滩桩石三百七十三丈四尺，拦水坝三百八十八丈八尺，都计木石土方物料价值夫工等项银五万五百五两有奇。十二月，修筑镇洋县阅兵台、杨林口土塘，建护塘拦水各坝。镇洋南塘，以阅兵台一带为最险，中有溃口可十余丈，久待湮塞。迤南塘土亦多圯陷。是年十月，按察使应宝时亲履勘核，檄候补知县刘步瀛董其役，先浚随塘河以运木石。明年二月，乃克兴工。至七月而竣。内百丈无二重桩石及南拦水坝有积沙处，增建石坦坡，其北塘大厍口、杨林口、闵家宅、陶家港、吴家港、林家港、茜泾口续增之役，均于十月告竣。凡补筑南塘溃口十二丈，外土坦坡二百二十余丈，石后土四十二丈，填筑塘面穴窟四十五所，建护塘坝二百七十九丈，内二重者七十八丈五尺，外拦水坝三百二十四丈二尺，内拦水坝三十丈，石坦坡二百四十七丈九尺，碎石坝二十四丈，补筑北塘石后土二百六十四丈，修葺旧桩石二百七十二丈五尺，增建石坦坡一百五丈，石坝三十丈，又浚随塘河八百六十四丈，都计木石土方物料价值夫工等项银二万九千一百六十一两有奇。二年正月，修筑宝山县江东土塘，增建护塘

坝。即用知县周孚裕领其役。元年度工时应修筑者，六段、四段、七段、十三段为最险，二段、三段、五段则为次险，嗣遇风潮，并成最险。一段亦续有坍塌。故次第兴作，至十二月乃竟。凡修筑土塘四百二十丈，增建单坝三百八十余丈，重坝九十二丈，补筑石后土四百八十丈，盘头石坦坡二十五丈六尺，都计木石土方物料价值夫工等项银二万四千二百两有奇。五月修筑宝山县吴木烽石塘护土，并建护塘拦水各坝。宝山石塘，旧析为三段，曰吴木烽，曰南石塘，曰北石塘。始建时外多庐舍，去海殊远，故其外不复护土。今皆濒海，塘基或虚，梅花桩有露朽者，内附之土亦多穿陷。同治十年度工，以土塘役急置之。光绪二年五月，乃克兴作，取土蒙石，制与华亭塘同。外基三丈，遍护桩石，卫以坦坡。又外三丈障以遥坝，水中力作，图始颇艰。故试筑自吴木烽及南石塘末段始。是役也，候补直隶州知州李庆云实始职之，继之者为知县冯寿镜，终之者为知府钱卿知县周孚裕。其功阅十六月，始成。凡筑护石土塘三百三丈，木石之工如之。二年九月，增建太仓州茜泾口塘外护滩桩坝。候补知县刘步瀛董其役。接茜泾前建石坝，北至袁家港口止，凡增桩木五十二丈，外作石坦坡，都计木石物料价值夫工等项银一千三两有奇。三年十月，续修筑宝山县北口塘护土，并建护塘拦水各坝。候补知府钱卿知县周孚裕会领其役。四年二月，钱卿权知苏州府事，复檄候补知县查以观代之。筑法与吴木烽同。其外有潭，南北四十三丈，中广数丈，下深数尺，运嘉定所集瓦砾实之。明年五月工竣。凡筑石土塘四百四十一丈，护塘桩石坦坡其长称是，拦水坝及坦坡各二百七十五丈，又小沙背拦水坝六十一丈，亦有石坦坡，合吴木烽工，都计木石土方物料价值夫工等项银十一万一百六十五两有奇。四年四月，修筑宝山县牛头泾土塘，增建石洞护坝。候补知县查以观、周孚裕会领其役。七月工竣。凡修筑牛头泾土塘二十三丈，增建石洞桩石十六丈，改穿随塘河三十八丈五尺，都计木石土方物料价值夫工等项银二千五十九两有奇。四年十月，修筑宝山县张家宅、薛家滩、牛头泾、谈家浜、陈华浜、顾隆墩土塘，并葺护塘坝。是年八月，烈风急雨，潮势益猛，西塘护坝多损，最甚者曰张家宅，薛家滩、牛头泾、陈华浜等处次之。檄阳湖马迹司巡检李弼度工集役，理植旧木培土增石，以需石故，至六年七月乃竟。都计木石土方物料价值夫工等项银三千一百十六两有奇。五年闰三月，修筑宝山县衣周土塘，并建护塘坡坝。衣周塘一段最险，二段次之。四年十一月，布政使勒方锜中书何慎修亲至检按，檄阳湖马迹司巡检李弼度工集役。明年闰月起工，阅七月而毕。凡修筑土塘一百十四丈，增建护塘桩石一百五十余丈，护塘石坦坡一百丈五尺，护滩石坦坡一百八十丈，都计木石土方物料价值夫工等项银六千七百四十一两有奇。五年五月，修筑宝山县南口塘护土，并建护塘拦水各坝。南石塘旧与吴木烽同时度工，以形势稍夷缓之。是年，乃檄马迹司巡检李弼兼领其役，筑法与吴木烽同。明年四月工竣。凡修筑护石土塘三百丈，护塘桩石其长称是，外建护滩石坝二百六十五丈，又南工首挑水坝一百九丈，都计木石土方物料价值夫工等项银二万六千六百两有奇。六年九月，修葺镇洋县杨林口南北护塘坝，并增护滩石坦坡。吴江县主簿李弼始领其役。补用巡检祝炳均继之。南至大厍口，北至州界，间段修筑，明年五月役竣。凡建桩石修石后土各三百四十七丈，作护滩石坦坡一百四十丈，都计木石土方物料价值夫工等项银四千九百七十五两有奇。七年五月，修筑宝山县五岳墩土塘，并

建护塘拦水各坝。五岳墩在北王庙之北，旧有桩石，择险而设。同治间修筑未及，以滩远塘固也。嗣滩日蹙，塘亦多损。是年，檄县主簿李弼鸠工修筑。十一月役竣。凡修土塘一百五十二丈，建护塘桩石一百四十二丈，垒石坦坡一百五十二丈，外筑拦水坝一百三十丈。七年十二月，修筑宝山县吴淞口土塘，并建护塘坝及护滩石坦坡。县主簿李弼职其役。本与五岳墩并议修筑，以五岳墩较险先之，至是乃继兴作。明年三月告成。凡建护塘桩石六十一丈，护塘石坝十五丈，修土塘七十二丈八尺，建护滩石坦坡四十四丈。合五岳墩之役，都计木石土方物料价值夫工等项银一万三千一百六十八两有奇。八年三月，续修镇洋县大厍口、杨林口护塘坝，并建石坦坡。宝山县主簿李弼领其役。起大厍口，北至太仓州界止。凡于护塘木石，者正之，敝者新之，散者整之，缺者补之，乖度者改作之，濒险者厚卫之。五阅月而毕。都计石料土方夫工等项银五千两有奇。八年七月，修护昭文县野猫口土塘，并增建护塘拦水各坝。野猫口护塘石桩及拦水坝，同治间所筑，凡三百余丈。伏滩日蹙，坝多倾敝，东西旧无桩石，寝亦危险。龙腮泾塘有圯者。七年七月，宝山县主簿李弼承檄度工。是年七月，别檄同知金彭董其役。明年九月工竣。凡修筑敝塘四十三丈三尺，增建护塘桩石一百六十八丈，拦水坝七十四丈五尺，护坝石坦坡二百七十四丈八尺，都计木石土方物料价值夫工等项银一万八千二百三十六两有奇。八年九月，增建宝山县江东爱字号土塘护坝及石坦坡。县主簿李弼领其役。未兴作之先，抛石卫险者再，嗣是择要修护，顾此失彼，以絀于经费，故不能规全势。必朝更暮易，颇苦经营，卒有余资，未尝遗迳尺也。明年四月工竣。凡建石坝二百五十一丈五尺，石坦坡一百三十五丈，筑石后土一十三丈，增建护塘桩石三十五丈，都计木石土方物料价值夫工等项银一万七千六百十九两有奇。十月，重修华亭县石塘护坝，并增建石坦坡。石塘护坝，同治间修筑后，复多残败。其未修诸所，嗣亦间成危险。七年九月，檄住塘候补从九金济度工，并饬参用宝山塘石坦坡之制。八年十月，别檄试用通判曾熙钧董其役。是月兴作，至九年五月而竣。凡建护塘石坦坡一千五百二十二丈，桩内垒石一百四十七丈，石后筑土一百三十六丈九尺，增建石坝二十七丈五尺，垒拦水坝护石九十丈，修葺旧坝二百四丈，都计木石土方物料价值夫工等项银三万九百三十一两有奇。九年五月，增建宝山县薛家滩牛头泾护滩石坝。知县王树棻、主簿李弼同领其役。七月工竣。凡建塘外护滩石坝积长一百丈，垒石六百五十二方，都计石料夫工等项银三千二百三十八两有奇。九年七月，增建太仓州钱泾口护滩石坝。候补同知金彭董其役。起东泾口，止施家泾。凡建护滩石坝七十丈，拦水坝十丈，八月工竟。都计木石物料价值夫工等项银一千二百八十七两有奇。九年十二月，增筑南汇县外土塘。七团经董分领其役，候补同知金彭承檄董之，是役成于署知县王椿荫。七团之民，实公其利，故愿贷积谷本息钱及善堂存资，以济工费。而徐税亩加息以偿，肇议于九年九月，季冬勾工，明年五月役竟。凡筑土塘一万一千三百八十八丈有奇，用土一十三万六千六百六十五方有奇，开随塘河出土如所用之数，填塞洪口三十有四，用土一千三百八十九方有奇，开浚支河二十。

（原二十一，蔣港业户自浚，故不列。）出土二万六千八百十一方有奇，建钦公塘

石洞六，都计用钱三万五百二十七千有奇。九年十月，建吴县胥口菱湖嘴等处石塘。吴县横泾镇，广袤各二十里，三面皆濒太湖。东南稍夷，其西最险，风涛鏖啮，田亩往往坍没。自胥口起，至黄墅港止，内洋河泾港、下淹港、寺前港、八车湾、冷水港五处，旧有石塘，捍卫颇固，余皆无之。光绪八年，举人柳商贤、贡生金兰等陈乞增建新塘，局檄候补从九品金济度工集役，仿陂陀塘式择要垒建。九年十月兴作，明年二月工竟。凡建陂陀塘积长一千六百八丈六尺，填筑菱湖嘴北断岸三十六丈，浚支港七，积长一百四十丈，造木桥六，工费详后。并归海塘摊征案内报销。十年二月，建吴县香山西庄石塘。候补从九品金济兼领其役，自南沙港迤西起，至王渎港北止。建石塘积长三百一丈五尺，四月工竣。从耆民马惠祥等之请也。合前役共计用银一万二百二十四两有奇。十年五月，修筑昭文县浒浦口土塘，并建护滩坝。浒浦口水势湍急，夹岸塘圯，外滩渐蹙，港内势曲，潮至排突，亦濒于危。邑人陈乞修护，愿增税货物以助工费。九年九月度工，明年五月兴作，候补知县钱维崧承檄，始终其役。六阅月而竣。凡补筑土塘二十丈，建护滩桩石二百三十八丈二尺，最要三重，次二重，又次一重，都计木石土方物料价值夫工等项银一万八千九百九十三两有奇。十年七月，修筑华亭县金山嘴杨公庙石塘护坝，并增设石坦坡。九年七月，风飙怒作，重以猛雨，潮势汹涌，五段金山嘴，十二段杨公庙二处护坝桩石，多有损坏。檄驻塘府照磨傅良佐度工。十年闰五月，别檄候补通判董法中职其役。七月兴作，至十月而竣。凡增建五段桩石一百三十六丈，较旧桩高二三尺，自段首起修整旧石五十六丈，筑石后土一百八十九丈，增建十二段桩石石后筑土，外设石坦坡各二十三丈，接垒石坝斜长三十八丈，旧无桩石，建以护滩，都计木石土方物料价值夫工等项银六千九百六十一两有奇。十年八月，增建镇洋县南塘第三段、北塘第六段护塘坝。苏州海防同知王恩晋领其役，四阅月而竣。凡增建南塘护塘桩石一百二丈，石坝五十丈，北塘桩石五十丈，都计木石土方物料价值夫工等项银九千一百九十七两有奇。十年九月，修筑宝山县吴淞口、谈家浜炮台、小沙背、顾隆墩、薛家滩、北王庙、五岳墩、楚城泾土塘，并增设石坦坡。九年七月，烈风时作，海潮狂突，西塘旧有护滩未建桩石之所，危险杂见，以五岳墩为尤剧，土塘就圯者凡十九丈。当由知县王树棻、主簿李弼鸠工营护。吴淞口等处，其险稍次，是别檄候补从九奏尔泰领其役。十二月工竣。凡垒护塘坝石坦坡积长二百七十六丈，都计木石土方物料价值夫工等项银四千八百八十三两有奇。十一年四月，修葺昭文县野猫口拦水坝。野猫口拦水坝复多残敝。十年六月，吴江县主簿李弼陈状，檄候补知县钱维崧领其役。明年四月兴作，七月工竣。凡排植旧桩四千二百七十九株，用银六百八十八两有奇。十一年五月，修筑宝山县江东育字号土塘，并增建护坝石坦坡。是年二月，风怒潮急，育字号塘旧无桩石，损及坦坡者三十余丈。四月，候补知府戴文佐承檄度工。五月，别檄候补知县钱维崧领其役。九月工竣。凡修复土塘六十一丈，建护塘单坝石坦坡一百五十丈，都计木石土方物料价值夫工等项银七千五百七十七两有奇。十一年七月，修筑宝山县衣周土塘，并增建护坝及石坦坡。衣周土塘一段最险，七段次之。九年，吴江县主簿李弼承檄度工。一段，拟筑备塘一百二十丈，其外水深沉石六船，以替护滩挑水诸坝。绌于工费，未克兴作。至是，塘圯益甚，乃檄候补同知金彭领其役，备塘不果筑，以地势窳下烦费，但复

旧塘二十余丈，移筑稍内外用巨艘十三实土沉卫。七八两段石工为多，再月而竟。凡补筑第一段土塘二十丈，建护塘桩石筑石后土各长二十七丈，叠盘头石坦坡三十二丈，卫坦坡石坝十二丈，垒七段护滩石坦坡二十丈，修筑八段土塘六十九丈，又增高七十五丈，建护塘石坦坡六十丈，护滩石坝三十六丈，又石坦坡八十六丈，又七八两段坦坡外护石一百四十二丈，都计木石土方物料价值夫工等项银四千六百三十八两有奇。十二年三月，修葺镇洋县吴家港等处护塘坝。候补知县刘德麟董其役。五阅月工竣。凡修筑护塘坝二百三十六丈，都计木石土方物料价值夫工等项银八千四百三十六两有奇。十二年四月，修筑太仓州荡茜口土塘，增垒袁家港、郁家宅护塘石坝。候补通判董法中领其役。四阅月而竣。凡修筑荡西口土塘十二丈，改穿随塘河三十丈，增建袁家港、郁家宅石坝三百八十丈，都计木石土方物料价值夫工等项银七千一百三十九两有奇。十二年四月，修筑宝山县江东爱字号护塘单坝。候补知州钱绳勋领其役。六月工竟。凡建护塘桩石及筑石后土各五十九丈。十二年六月，增建宝山县西塘顾隆墩护滩坝。候补知州钱绳勋领其役。八月工竟。凡建护滩桩石六十丈。合江东塘之役，都计用银四千八十两有奇。十三年八月，修筑宝山县江东育字号、衣同塘景字号土塘，并增建护塘护滩诸坝。十二年七月，大风雨数日，海潮盛涨，江东塘育字号险者二百五十八丈，衣同塘景字号险者九十丈。吴江县主簿李弼承檄度工。以育字号东数十余丈，岌岌将溃，先垒石以卫之。十三年二月，复增益高厚，以防伏汛。六月，乃檄候补知县童毓昌领其役。景字号复增应修者十二丈，八月起工，十二月次第告竣。凡修筑江东育字号土塘一百五十八丈，建护滩石坝一百丈，护塘桩石一百五十八丈，修筑衣周塘景字号土塘九十丈，外护桩石，其长如之，加植短桩十二丈。都计木石土方物料价值夫工等项银一万七千九百十三两有奇。

附奏疏

两江总督曾国荃、江苏巡抚嵩骏折。（光绪十四年正月）奏为前估太仓、镇洋、宝山三州县海塘及续办宝山县境江东、衣周两塘新出险工，一律完竣，恭折仰祈圣鉴事。窃照太仓、镇洋、宝山三州县海塘，叠被风潮冲损，所出险工，择要估需银一万九千六百余两。当经奏准于苏、松、太三属受益熟田项下加展一忙，摊征济用，先由司库筹垫，经水利局飭令印委各员赶紧购料集夫，开工兴办。当将太仓州境之第一段袁家港、第九段荡茜口、第十一段郁家宅，镇洋县境之北塘第五六两段，宝山县境之西塘顾隆墩拦水坝及江东第一段土塘桩石各工，一律修筑完固。并太仓荡西口段内填塞旧河，另开随塘新河。于光绪十二年七八九等月陆续竣工，验收如式。此前估太仓、镇洋、宝山各塘，已先告竣之情形也。光绪十二年七月十四至十八及十月初二、三、四等日，连次狂风猛雨，正值大汛，潮水暴涨，冲撼数昼夜，宝山各塘险工，又复间被冲损。节据印委各员先后禀报，当经水利局道员一再亲诣周历履勘，实勘得宝山县境江东塘第二段计长四百八丈内工首一百五十丈，前已筑有靠塘桩石，现尚完好。其迤东之二十丈叠遭风潮冲刷，坍至塘面，情形极险，应修复土塘，并加靠塘桩石一层。再东一百丈，塘外稍有余滩，而滩湓壁立，日见坍塌

，渐近塘基，应于滩渚之下叠砌石坝一道，以护余滩，而保土塘。又东一百三十八丈，塘外并余滩潮水直注土塘，致塘身间塌过半，势将穿决，岌岌可危，应修筑土塘，并加靠塘桩石一层，以资捍卫。又勘得衣周塘第一段工首十八丈，前已筑有靠塘桩石，惟桩外石坦坡，间有塌卸，应添石修护，并于坦坡外脚加钉马牙桩一排，工长十二丈。又迤南九十丈，塘外无滩，潮水直薄塘身，而浦东岸涨沙突出，逼溜西趋，塘基日受汕刷，致将塘身冲损，形势亦险，应修复土塘，并加靠塘桩石一层，俾资抵御。以上各工，撙节确估，共需经费银一万七千九百余两。值此司库及厘金同一支绌，需款无从筹措。而前项坍塌工程，危险难缓。因查历年摊征海塘工费，各属尚有欠解。除归还司关垫款外，约计勉可敷用，即经勒限追缴。仍一面由司暂垫，并飭令印委各员上紧购料，接续兴修。于光绪十三年十二月一律工竣，验收如式。此又续办宝山江东衣周两塘险工，即以摊征欠款抵用之情形也。惟是苏、松、太三属海塘，为民命田庐所系，遇有新出险工，自应及时保护，庶免漫决之虞。现在各工虽经修竣，而海塘地段延长，形势时有变迁。嗣后，如有续出险工，随时另请筹款兴修，以全要工而重民命。所有历年办过海塘工程，俟逐款清理，另行汇案造册报销等情。据署苏藩司福裕、署臬司陈钦铭，会同苏属水利总局详请具奏前来。臣等覆核无异。除飭将历年修筑海塘经费赶紧清理造报，并分咨户、工二部查照外，谨合词恭折具奏。奉旨该部知道。

两江总督曾国荃、江苏巡抚嵩骏折。（光绪十四年三月）奏为修筑华亭县境海塘用过工料银两，恭折奏销，仰祈圣鉴事。窃照苏松等属海塘，有关民命田庐，遇有坍塌，历经随时撙节勘估，奏请筹款兴修，以资保卫。曾将华亭县及太仓、镇洋、宝山、昭文四州县海塘，自同治七年份起，至光绪六年四月止，修竣各段丈尺并用过银两，经前抚臣卫荣光，附片会奏声明。尚有续修工程，请俟全工告竣，再行造报，嗣准部咨。催令将已经开单奏报之案，赶紧陆续造册送部等因，即经转行遵照在案。兹据署苏藩司福裕署臬司陈钦明会同苏署水利工程总局详称。前项修过海塘，工巨年久，款目繁多，自应赶紧分款造报以清积案。现将华亭县境自金山卫城东门外五里许起，西至距柘林城三十里之张家厍止，共分十二段。自同治七年四月开办，至十一年十二月，一律告竣，验收如式。共计工长三千一百二十丈，又加筑拦水坝五百八十八丈。所有木石土方价值夫工等项按款复算统共用过银二十四万三千五百一十八两九钱六分七厘。核与原估数目有减无增。此项银两奏准于苏州、松江、太仓三府州属受益熟田项下分忙每亩摊捐济用，委属实用实销，并无浮冒。应请作为第一案，先行造报，余俟次第接续办理等情，造册详请具奏前来。臣等覆核无异。除将原册咨部核销外，谨缮具清单合词恭摺具陈。伏乞皇太后皇上圣鉴。敕部查照。谨奏。奉旨该部知道。单并发。

两江总督曾国荃、江苏巡抚嵩骏折。（光绪十四年七月）奏为修筑太仓、镇洋、宝山、昭文四州县境海塘用过工料银两，恭摺奏销，仰祈圣鉴事。窃照苏松等属海塘，有关民命田庐，遇有坍塌，历经随时撙节估勘，奏请筹款兴修，以资保卫。曾将华亭县及太仓、镇洋、宝山、昭文四州海塘，自同治七年分起，至光绪六年四月止

，修竣各段丈尺并用过银两，经前抚臣卫荣光附片会奏声明，尚有续修工程，请俟全工告竣，再行造报，嗣准部咨。催令将已经开单奏报之案，赶紧陆续造册送部等因。业经将同治七年起，至十一年止，修筑华亭县境海塘工费，作为第一案，开缮清单恭折奏销在案。兹据苏藩司黄彭年、臬司张富年会同苏署水利工程总局详称，苏属太仓、镇洋、宝山、昭文四州县沿海土石塘工，前因风潮冲击，坍塌尤甚，当经分别勘估，先后奏准援案摊捐，并拨款兴修，于同治十一年十月开办起，至光绪二年十月一律告竣，验收如式。总计工长三千二百三十丈。所有木石土方价值夫工等项，连宝山、昭文两县海塘抢修各工，统共用过银三十三万二千九百二十二两六分。内除宝山县境海塘工费，援案于苏州、松江、太仓三府州属受益熟田项下加展两忙，摊捐济用外，其余银两，均在厘金项下随时拨用，委系实用实销，并无浮冒，应请作为第二案造报，余俟接续办理等情，分造清册详请具奏前来。臣等覆核无异。除将原册咨部核销外，理合分缮清单，合词恭折具陈。伏乞皇太后、皇上圣鉴。敕部查照。谨奏。奉旨该部知道。单并发。

两江总督曾国荃、江苏巡抚嵩骏折。（光绪十四年八月）奏为修筑镇洋县境南塘阅兵台及宝山县境江东塘吴木烽等处海塘用过工料银两恭折奏销仰祈圣鉴事。窃照苏松等属海塘，有关民命田庐，遇有坍塌，历经随时撙节勘估，奏请筹款兴修，以资保卫。曾将华亭县及太仓镇洋宝山昭文四州县海塘，自同治七年分起至光绪六年四月止，修竣各段丈尺，并用过银两，经前抚臣卫荣光附片会奏声明，尚有续修工程，请俟全工告竣，再行造报，嗣准部咨，催令将已经奏报之案，赶紧陆续造册送部等因，业经将修筑华亭县境并同治十一年估修太仓等四州县海塘工费，分作两案，先后开单奏销在案。兹据苏藩司黄彭年、署臬司田国俊，会同苏属水利工程总局详称，镇洋县境南塘阅兵台、宝山县境江东塘及吴木烽等处沿海土石塘工，前因风潮冲击坍塌，情形万分危险，当经分别勘估拨款兴修，于光绪元年估修开办起，至四年六月一律完竣，验收如式。总计工长一千五百二十三丈，所有木石土方价值夫工等项，共用过银一十六万三千五百二十七两五钱六分二厘。此项银两，奏准援案于厘金稍裕，提还归款。册开各项委系实用实销，并无浮冒，应请作为第三案造报，余俟接续办理等情，分造清册详请具奏前来。臣等覆核无异。除将原册咨部核销外，理合分缮清单，合词恭折具陈。伏乞皇太后，皇上圣鉴。敕部查照。谨奏。奉旨该部知道。单并发。

两江总督曾国荃、江苏巡抚嵩骏折。（光绪十四年十月）奏为修筑宝山县境南石衣周两塘并续修牛头泾等处海塘用过工料银两恭折奏销仰祈圣鉴事。窃照苏松等属海塘，有关民命田庐，遇有坍塌，历经随时撙节勘估，奏请筹款兴修，以资保卫。曾将华亭县及太仓镇洋宝山昭文四州县海塘，自同治七年分起，至光绪六年四月止，修竣各段丈尺并用过银两，经前抚臣卫荣光附片会奏声明，尚有续修工程，请俟全工告竣，再行造报，嗣准部咨，催令将已经奏报之案，赶紧陆续造册送部等因，业经将修筑华亭县境并太仓等四州县及镇洋阅兵台等处海塘工费分作三案，先后开单奏销在案，兹据苏藩司黄彭年，署臬司田国俊会同苏属水利工程总局详称，宝山县

南石衣周两塘木石各工，前因被潮汕刷坍圯，情形万分危险，当经分别勘估，拨款兴修，于光绪五年二月开办，至六年四月一律完竣，验收如式。共计工长六百五十丈，所有木石土方价值夫工等项，连续修宝山县境之牛头泾石洞谈家浜张家宅薛家滩等处土塘，总共用过银三万八千五百一十八两

一分三厘。此项银两，奏准于苏沪厘金项下照案添拨济用。册开各项工料，委系实用实销，并无浮冒，应请作为第四案造报，余俟接续办理等情，造册详请具奏前来。臣等覆核无异，除将原册咨部核销外，理合缮具清单，合词恭折具陈。伏乞皇太后、皇上圣鉴。敕部查照。谨奏。奉旨该部议奏。单并发。

两江总督曾国荃、江苏巡抚嵩骏折。（光绪十四年十一月）奏为光绪六年份起，至十年止，估修苏州、松江、太仓各府州属海塘等项工程用过银两，恭摺奏销，仰祈圣鉴事。窃照苏松等属海塘，有关民命田庐，遇有坍损，历经随时撙节勘估，奏请筹款兴修，以资保卫，业经将同治七年份起，至光绪五年止，估修华亭县境及太仓、镇洋、宝山、昭文四州县海塘各段丈尺及用过工费，分作四案，先后开单奏销在案。兹据苏藩司黄彭年、署臬司田国俊会同苏属水利工程总局详称，光绪六年估修宝山县境吴淞口、五岳墩及镇洋县境大厍口等处塘工，八年估修太仓、昭文、华亭、宝山四州县海塘新出险工，九年添办吴县沿湖石塘，十年估修宝山、镇洋、华亭、昭文四县海塘续出新工，总计工长七千八百余丈。自光绪六年九月起，次第兴工，至十一年九月一律完竣，验收如式。所有木石土方价值夫工等项，统共用过银一十六万三百二十八两六钱六分九厘。内光绪六年估修宝山、镇洋两塘用银二万三千余两，系于苏沪厘金项下筹拨。其余银两，均经奏明于苏州、松江、太仓三府州属受益熟田项下援案，分忙摊捐济用。册开各项工料，委悉实用实销，并无浮冒，应请作为第五案造报。余俟接续赶办等情，分造清册详请具奏前来。臣等覆核无异。除将原册咨部核销外，理合分缮清单，合词恭折具陈。伏乞皇太后、皇上圣鉴。敕部查照。谨奏。奉旨该部知道。单并发。

两江总督曾国荃、江苏巡抚嵩骏折。（光绪十四年十二月）奏为光绪十二、十三两年估修太仓、镇洋、宝山各州县海塘续出险工，并修宝山县境庙工等项用过银两，恭折奏销，仰祈圣鉴事。窃照苏松等属海塘，有关民命田庐，遇有坍损，历经随时撙节勘估，奏请筹款兴修，以资保卫，业经将同治七年分起，至光绪十年止，估修华亭县境及太仓、镇洋、宝山、昭文四州县海塘，并添办吴县沿湖石塘各段丈尺及用过工费，分作五案，先后开单奏销在案。兹据苏藩司黄彭年、署臬司田国俊会同苏属水利工程总局详称，光绪十二年，估修太仓、镇洋、宝山各塘，及十三年修筑宝山县境江东衣周两塘续出险工，总计工长一千一百余丈，于光绪十三年十二月一律完竣，验收如式。所有木石土方价值夫工等项，统共用过银三万七千五百六十九两三钱二分。此项银两，奏准于苏州、松江、太仓三属受益熟田项下援案加展一忙，并追缴各属历年摊征欠款抵用。至宝山县境塘工向有之海神庙宇，前因年久坍塌，经光绪五年奏修该县南石衣周两塘时，一并修葺完整，并移建塘工公所房屋所用

工料银两，统共用过银二千二百一十二两八分六厘，系在厘金项下拨用。册开各项工料，委系实用实销，并无浮冒，应作为第六案造报。至历年修筑各属海塘用过工费银两，截至此次止，已经遵限造报完结等情，分造清册详请具奏前来。臣等覆核无异，除将原册咨部核销外，理合分缮清单，合词恭折具陈。伏乞皇太后、皇上圣鉴。敕部查照。谨奏。奉旨该部议奏。单并发。

江苏巡抚奎俊奏太仓、昭文、宝山、镇洋四州县前次估修海塘完竣及续修原估缓工折。（光绪十九年十月）原奏略曰：太仓、昭文、宝、洋四州县海塘，叠遭风潮新出险工，前因需费较巨。其尚非十分急要者，暂从缓办。其万不可缓之工，共估需银九万五千六百两。经前抚臣刚毅于光绪十八年五月奏准，于受益熟田项下，每亩每忙摊征八十文，带征两忙。先由江海关、苏沪、厘局分成借拨济用。即经飭令印委赶紧购料兴修。业将太仓州境之新泾口海塘第十二段，昭文县境之第七、八两段，宝山县境之江东塘第二、第三、第六等段，西塘五岳墩、黄窑湾及江东草湾迤西丁家滨护滩工段，镇洋县境之南塘第二段，北塘等四、五两段，及杨林口北岸各段桩石土工，一律修整完固。其宝山东塘第二段内工尾七丈五尺，因与第三段新工毗连，故将旧有两层桩石，一并分别换钉新桩，排齐相接，添石修砌。原估工长第三段，原工尚属完好，毋庸修筑。又西塘五岳墩尾段并黄湾埭段工长一百六十六丈。原估垒砌护滩石坦坡一道，正连石筑砌，忽遇风潮汹涌，刷去塘外土坦坡高自三四尺至七八尺不等。该段土塘，向无桩石，迎溜顶冲易受损伤。与前勘形势略有变迁，因于护坦坡之外，加筑靠石坦坡一道，并修土塘，以护塘身。又于镇洋北塘第四段新工五十丈之南，加筑单桩石盘头五丈。又杨林口北随塘河迤西滩地，适当顶冲，风浪汕刷，形势危险，添砌护滩石坦坡一道，并筑石后土工长三十三丈。以上各工，于光绪十九年二月四月及五六等月先后报竣，验收如式。此前次择要估修各塘及增减工段丈尺，现已陆续告竣之情形。太镇昭文各塘原估缓办之工，彼时塘外稍有草滩，情形尚非至急。乃估工以来，又隔一载有余，塘外滩地愈塌，形势危险，与现办各工大略相同。复据印委各员稟请续修前来，即经该司道等亲诣履勘，实勘得太仓州海塘第一段茜泾口塘外已无余滩，潮湿日薄塘脚，本系极险之工，前于光绪元年兴筑护塘桥石，三层八十四丈，两层六十七丈，诂桩木年久渺朽，复遭风摧折过半，石块埙卸，石后土坍陷成槽，其势最险。镇洋县境杨林口北岸桩木，亦因年久枯烂，迭遭风潮，多被冲断，石块坍埙，应换钉新桩两层，添石修砌，并垒桩外石坦坡，筑平石后土。计工长一百五十一丈。桩内并桩外石坦坡，筑平石后土。昭文县境海塘第八段，东自新筑护滩坝工尾施家桥起，西至老人滨旧筑桩石坝止，工长二百十丈，向无桩石之工。近年历遭风潮，塘外滩地骤脱，逼近土塘，其情岌岌可危。应仿照旧工，接筑双桩夹石护湖坝一道，并垒砌桩外石坦坡。又华亭县境海塘第十二段旧有石坝历年既久，逐渐坍塌。前于旧工石坝以东，增筑纯石斜坝三十八丈。该处外塘尚有七十丈，实为正塘屏蔽，近年坍卸日甚，其最为险要者新工以东之四十余丈外，而土塘有形无质，一遇异常风汛，必致坍没无存。应于新工斜坝以接筑纯石斜坝四十六丈，保护滩濬。总计以上共估需银三万八千六百七十余两。此后估未办太镇文塘工及华亭第十二段外塘逐次接续修筑之情形。所需经费，

前案摊征两忙，因有吴淞江工费及上届塘工征收未清，尚未能一律接征。其已从上年下忙起带收各县，随正带收。各县现在解到，亦尚有限。目下司关厘局拨款浩繁，筹思至再，拟照前案。仍于苏松太三属受益熟田项下加展摊征一忙。先尽各属解到之款拨用。如有不敷，暂由司库设法凑借，购料接修。

刘坤一、奎俊奏江苏崇明东南海被潮冲啮逼近城垣应筹款堵筑折。（光绪二十年二月）原奏略曰：该县城外东南空地，自南门港起，至东门外青龙港河口止，沿滩丈量，直长计五百六十丈。由滩濬量至城根，不过五六十丈。大潮时一片汪洋，沿滩居民每值风潮，惊惶万状。近来日滩日近，势甚危险。拟仿照宝山、吴淞两处滨海工程，变通办理。在青龙港之东，设立外洋抄木空心敌水坝三道，以敌涨潮之急。又在青龙港之西，设立敌水坝一道，以敌落潮之回溜。涨落潮水，既以木坝敌住，其溜必缓，溜缓则沙沉，沙沉则滩涨。其自南门港起至青龙港止，设立外洋抄木桩一排外，加建木桩一排，共两层。内用抄木钉板钉贴桩身，再用铁地龙牵住桩脚。桩木之外，以石块堆砌坚固，方能敌住风潮。于东边深洪中，用船壳十只载石沉下。俾水缓沙积，兼护敌水坝桩脚。撙节估计，共需工费实银一十一万一千余两。饬由淮运司及江海镇江两关各筹拨银二万两，并于善后局先行供拨银三万，仍由苏沪两厘局分年筹款归还。其余不敷之银，由苏藩司库筹足支給。查有总办上海制造机器局事务刘麒祥堪以饬委，就近督同县委绅董购料兴工。

奎俊奏报销堵筑崇明东南一带海岸工料银两折。（光绪二十一年二月）原奏略曰：据署苏松太道刘麒祥详称，督同印委各员按照原估，参用西法，购料兴工，自光绪二十年二月间开办起，至八月初间一律工竣。共用过工料银一十一万三千七百六两零。

江苏巡抚赵舒翹奏宝山县境海塘新出险工请于受益熟田摊征折。（光绪二十二年三月）原奏略曰：宝山县境东塘，自黎字号一百八十丈起，至首字六十五丈五尺止，工长二百丈。除□字工尾尚有短桩石十七丈外，余无桩石。非惟草滩坍塌殆尽，即塘面塘脚坍去八九十丈，极为危险。应筑靠塘桩石一层，桩外垒砌石坦坡，修复土塘及石后土，并于塘外加钉双桩夹石拦水坝一道。又自爱字三百二十一丈六尺起，至三百八十一丈五尺止，工长六十丈；育字二百六十九丈六尺起，至三百九十丈止，工长一百二十丈，靠塘旧有桩石一层，历被风潮冲激，其桩脚之土，抽刷低洼，以致桩仰石矧，不能蔽护土塘，工情亦险。应于旧桩之里，加筑新桩石一层，将旧桩一律排低，作为二层。原砌土共需银四万六千四百一两。援案仍于苏松太三属受益熟田项下，每亩摊钱十文，带收一忙。并拟先由苏沪两局设法借垫，仍俟各州县收起解还归款。

江苏巡抚恩寿奏宝山县境西塘新出险工估需修费请于受益熟田项下摊征济用折。（光绪二十九年六月）原奏略曰：光绪二十八年七月间，潮挟风暴，骇浪奔腾，汹涌异常。宝山县东西各塘，凡坐当顶冲之处，均有报伤。一再派员履勘，实勘得宝山

县境西塘顾隆墩尾股自四百一丈起，至张家宅工首二丈止，工长九十七丈，靠塘向无石塘外，草滩坍塌已尽，坍及塘身，工情极险。应筑靠塘桩石一层，桩外垒砌石坦坡，修筑土塘及石后土。又勘得石洞土塘，工长三百二十五丈；北王庙土塘，工长八十五丈五尺

；五岳墩土塘，自一丈起至一百四十二丈止，工长一百四十二丈。靠塘所钉大桩，因历年过久，木质朽，历遭风潮，断缺者已十之七八，未断者均已枯细，不堪御浪，石块坍卸堙陷，坍及塘面，工情亦险。应于旧桩之里，添筑新桩石一层，桩外垒砌石坦坡。并修筑土塘石后土。共估需经费银四万二千四十一两零。现在所估只就宝山一县，华亭海塘亦须择要估修，亟应宽筹接济。援案仍于苏松太熟田项下，每亩摊钱二十文，分作两忙带收。并拟先由司库江海关设法借垫，以应急需。

恩寿奏验收西塘新出险工请拨款济用折。（光绪二十九年六月）奏为宝山县境西塘新出险工，估需修费，请于受益熟田项下摊征，以济工用，恭折仰祈圣鉴事。窃照苏松太三属海塘为民命田庐保障，亦即漕粮所关，遇有坍损，历经随时估修兴办在案。光绪二十八年七月间，陡起狂风，大雨如注，正值秋汛，潮挟风暴，骇浪奔腾，汹涌异常，宝山县东西各塘，凡坐当顶冲之处，均有报伤，而以西塘顾隆墩、张家宅、石洞、北王庙、五岳墩等五段情形，尤岌岌可危。节据印委各员禀报，当飭先行择要修补，暂资抵御，一再派员履勘。实勘得宝山县境西塘顾隆墩尾股，自四百一丈起至张家宅工首二丈止，工长九十七丈，靠塘向无桩石，塘外草滩坍塌已尽，坍及塘身，工情极险。应筑靠塘桩石一层，外垒砌石坦坡，修筑土塘及石后土。又勘得石洞土塘工长三百二十五丈，北王庙土塘工长八十五丈五尺，五岳墩土塘自一丈起，至一百四十二丈止，工长一百四十二丈，三共工长五百五十二丈五尺。靠塘所钉大桩，因历年过久，木质渺朽，历遭风潮，断缺者已十之七八，未断者均已枯细，不堪御浪，石块坍谢堙陷，坍及塘面，工情亦险。应于旧桩之里，添筑新桩石一层，桩外垒砌石坦坡，并修筑土塘石后土。以上各工，共估需经费银四万二千四十一两零。委系撙节核实，并无浮冒。所需经费，目下库藏万分支绌，筹款不易。而前项塘工紧要，势难从缓。且现在所估，祇就宝山一县，尚有华亭海塘，亦须择要估修。亟应宽筹接济，经该司等共同商酌，惟有援案仍于苏松太三属受益熟田项下，每亩摊征钱二十文，分作两忙带征。并拟先由司库江海关设法借垫，以应急需。仍俟各州县收起解还归垫等情。据藩臬两司兼办水利工程总局详请具奏前来。臣覆查宝山县西塘顾隆墩等段，上年被风潮冲损，新出要工，情形危险，自应赶紧兴修，庶免溃决。所需工费，司关各库现均无可措拨。再四筹商，惟有援照前办塘工成案。仍于苏松太三属受益熟田项下，每亩摊征钱二十文，分作两忙带收济用，以纾民田。并请由司库江海关先行筹垫以应急需。俾各属民命田庐，藉资保障，仍俟各州县带收解还归款。工竣之日照例核实造报，除飭令赶紧购料兴办，并将华亭海塘各工派员履勘切实勘估外，谨会同两江总督臣魏光燾恭折具陈。奉旨该部知道。

太湖

《禹贡》：“东南巨浸曰：震泽。”《周礼·职方氏》：“扬州藪曰具区。”即太湖是也。广三万六千顷，周五百余里，中包七十二山，四围滨湖、常、苏三郡之地。明王鏊《五湖记》云：露襟带三州，东南诸水皆归焉。一自宁国、建业等处入溧阳，迤邐至长塘湖，并润州、金坛、延陵、丹阳诸水以入。一自宣歙、天目诸山下，杭之临安、余杭，湖之安吉、武康、长兴以入，而皆由吴江分流以入海。则《禹贡》所谓三江既入而后震泽底定者，昭然可见。“又汉虞仲翔云：“太湖东通长洲、松江，南通乌程雷溪，西通义兴荆溪，北通晋陵溇湖，东连嘉兴，水凡五道，故谓之五湖。观此则翕受既多，泛滥亦甚。惟泄其下流之三江、白茅、七浦等港，深疏畅达，使归墟无阻，而后上流沿历之郡邑，浸润灌溉，咸收其利也。爰举太湖灌注之堰渎溪港湖河，分上流下流开列于左。其不与太湖接壤而自为水利者，如江宁之秦淮诸水，别见于后。

太湖上流之堰渎溪港，其最著者凡三十有五。

五堰，在溧阳县西八十里，高淳县东五十里，一曰银林堰，长二十里。少东曰分水堰，长十里。又东五里曰苦里堰，长八里。又五里曰何家堰，长九里。又五里曰余家堰，长十里，所谓鲁阳五堰也。西有固城、石臼、丹阳南湖，受宣歙金陵姑孰广德及大江水。东连三塔湖、长荡湖、荆溪、震泽。中有三五里颇高阜，春秋时阖闾伐楚，用伍员计开渠运粮，今尚名胥溪镇。西有固城邑遗址，则吴所筑拒楚者也。自是湖流相通，东南连两浙，西入大江。唐景福二年，杨行密将台濠作五堰，拖轻舸馈粮。其后东坝既成，遂不复通。惟永阳江水入荆溪。明太祖都金陵，以苏浙粮道自东坝入，可避长江之险。洪武二十五年，浚胥溪，治石闸司启闭，命曰广通镇。永乐元年，始改筑土坝。自是宣歙诸水希入震泽。而坝犹低薄，水间漏泄，舟行犹能越之。正德七年，增筑坝三丈。水势相悬远甚。嘉靖三十五年，复自坝东十里许更筑一坝，名东坝。两坝相隔，湖水绝不复东矣。傅同叔云：“自宜兴航太湖，经溧阳至邓步凡两日水路。自邓步登岸上小市名东坝。自东坝陆行十八里至银林。复行水路百余里，乃至芜湖入大江。银林之港，邓步之湖，止隔陆路十有八里。此十八里中，有三五里高阜，而苦不甚高。遇暴涨，则宣歙金陵之水，皆由荆溪入太湖。此高阜不足以遏之。五堰之所以作也，单锺著《吴中水利书》，谓五堰废则宣歙诸水尽入震泽，三州水患无已。”王鏊《震泽编》云：“以此一源最巨，为苏常患。”伍余福《三吴水利书》亦谆切言之：“苏常湖水利之一大锁钥也。”

安港，在镇江府东北八十里，通大江。自安港而东北百里，为丹阳之包港。

新丰湖，在镇江府东南三十五里，亦曰新丰塘。

润浦，在镇江府城东一里，北通大江。

练湖，在丹阳县城北，一名练塘，俗谓之开家湖，纳丹徒长出高骊诸山之水，凡七十一流。唐时近湖民筑堤，横截十四里，遂分上下二湖。开渎泄水，取下湖地作田。清康熙中复下湖，民赖其利。

自鹤溪，在丹阳县东南十里。由古荆城入金坛县北，并句曲之水，东流入常州界。

烈塘河，在常州西十八里。南枕运河，北流四十三里入大江，一名得胜新河。

西蠡河，在常州府城东南，北枕运河，接溇湖。宜兴有蠡河，故此名西。明正德间疏浚，亦曰西运河。支流入扬子江。

纲头河，在常州府城北，延袤六十五里，入无锡江阴界，支流入大江。

丁堰河，在常州府东，南枕运河，北流二十里接纲头河。

黄汀河，在常州府东北十五里，西接纲头河，东入江阴界。单锺云：“常州运河北偏右，有泄水入江一十四渎，即孟渎、黄汀渎之类也，今所存盖无几云。”

陈墅河，在常州府东二十五里，南枕运河，北接三山港。

三山港，在常州府东三十里，西接戚墅堰。

芙蓉湖，在常州府东五十五里，昔时湖岸南北相距凡八十里，南入无锡，北入江阴。又北注于大江。明周文襄公围作圩田千余顷，东南流曰五渑水。

溇湖，在常州府西南三十五里，南北百里，东西三十余里，今南北通漕河，导流东注于湖。

孟渎，在常州府西三十里奔牛镇东，南枕运河，北流六十里入扬子江。

澡港，在常州府北五十里，西即魏村镇，与烈塘河口相接，南接纲头河，北入扬子江，袤四十里。岁久淀淤。一名灶子港。

戚墅港，在常州府东三十里，南接运河，东入于三山港，东南与江阴接界，西北入申和二港，入扬子江。

庙堂港，在常州府北今湮。

蠡湖，在无锡县东南五十里，与长洲县分界，东西长三十里，南北六里，唐刺史孟

简开泰伯渎，东连蠡湖即此。

阳湖，在武进县东五十里，东西八里，南北三十二里，与无锡分界，今多淤为田。

五渑河，在无锡县北，南枕运河，北至江阴、武进两县界，又北至申港，入扬子江。

濠湖，在无锡县东南六十五里，北为常熟县界，东为长洲县界。

梁溪，在无锡县西，源出慧山，北合运河入太湖。

洮湖，一名长荡湖，在宜兴县西北，与溧阳、金坛分界。周处、酈道元皆以洮湖为五湖之一。湖周一百二十里，西通石臼、丹阳等湖，东通太湖。自东坝筑，而丹阳、石臼湖诸水俱西流入大江，与长荡湖相隔。

荆溪，在宜兴县城南。其在城西者亦曰西溪。在城东者亦曰东溪。凡广德、溧阳、金坛、并县西诸山涧水俱流汇于溪。乃贯城绕郭为东溪以下太湖。旧志：荆溪上承百渎、兼受数郡之水是也。今谓之东九里河，西九里河，河流甚长，土人以九计里，因名。今自县东分二流，其一北达常州，为漕河，溧阳运河俱由此出。其一东达太湖，谓之东渑溪，本名东舍，讹为渑，一名蒙溪，又名五云溪。

百渎，在宜兴县西南七十五里者为上渎，北六十里者为下渎。昔以荆溪居数郡下流，于太湖口疏百派以分其势。又开横塘，袤四十里以贯之，濒湖亩浚皆通焉，后渐废。

夹芋干渎，在宜兴县西北。昔时渑长荡湖之水东入漏湖。由漏湖入大吴渎、塘口渎，白鱼湾、高梅渎及白鹤溪而北入常州运河。又出运河分流入一十四渎，注于大江。今湮。

申港，在江阴县西三十里。相传春申君所开。导江南流，置田为上下屯。又南经武进县界，分为二。东入无锡五渑河，西入武进三山港。俱达于运河。

利港，在江阴县西五十里，导江水南行入武进县界，下流亦达于运河。

黄田港，在江阴县北二里。相传春申君所开。导江水溉田，因名。邑人于江口置闸，号上闸。于县西南十里蔡泾口置闸，曰下闸。旧有支港数十处，今多为潮汐所湮。其南接于运河。

横河，在江阴县城东。引黄田港水贯城而东，达县东六十四里之谷渎港。

蔡泾，在江阴县西南十里。西接夏港，东通黄田，有蔡泾闸。又东穿运河而接于横河。明天顺间，运道浅淤。议改从孟渎蔡泾出漕舟。

石头港，在江阴县东三十里。北通大江，南入横河。

此上皆江、常、镇三郡之水，或疏其经流以入太湖，或导其支流以入于大江，而治于上流者也。（按《太湖备考》云：“运河西北自京口，历丹阳、常州而至无锡，以达于苏州，此正流也。分流北出者，俱下大江。其自丹阳七里桥分而南出者，

曰珥渎。（即金坛运河，俗称七里河。）至金坛与洮湖（即长荡）会。其在常州分而南出者，郡之西曰直渎，曰官渎，曰南洞子河，皆入于太湖，曰西蠡河。（即宜兴运河

）亦与太湖会，皆由荆溪入太湖。郡之东曰采菱港，曰戚墅港，曰饮马河，皆至新塘乡入太湖。其在无锡分而南出者，由志公港、双河、曹王泾、新安溪、沙墩诸港入太湖。其自直渎至西蠡河，宜兴之上流也。采菱港至沙墩港，无锡之上流也。）

镇江水源，茅山去金坛西五十里，发源有二：一为唐王溪，一为直溪，东北行入长荡。曰白龙荡，曰钱资荡，曰北渚荡，与诸渎诸港，皆经纬乎其中，溢则南奔长荡，以入太湖。由宜兴而来者为东渎溪，一名菴画溪，又名五云溪，在宜兴县南三十六里。君山发源为湫溪，

（在宜兴东三里）入荆溪。章山，（去宜兴县西南六十里）发源为张渚，合流于童渚，以入荆溪。小山，（去宜兴县西南六十里）发源处为虾泾，入荆溪。又一发源为运河溪。东为白云泾。北分为长荡湖之水。又东为西九溪，东与游瀾合入荆溪。讲湫渚，

（去宜兴县西二十七里）受溧阳诸水，注于荆溪。东九溪承荆溪入百渎，余皮渚一名余皮湖，曰阳溪，曰沙塘湾，曰太浦，曰东蠡湖，皆在县南入太湖。蠡湖为范蠡所开，伐吴时以通漕。运河，

（宜兴县北）西接荆溪，北为黄土渚，即白鱼湾，北通武进太湖。

按以上为太湖来源。

太湖下流东南入海之大川有三。

吴淞江，即古松江。一名松陵江。自太湖分流，出吴江县城东南之长桥，北流至庞山湖，合尹山湖入长洲界。折而东入独墅湖。过大姚铺抵夏驾铺。入昆山县分为二

，南为吴淞江，北为剿娘江。复合为一，东流入嘉定界。经上海又东南流，与黄浦合，迤邐至吴淞口，入于海。

（附：明沈几《水利议》：国家财赋，仰给东南。东南民命，悬于水利。水利要害，制于三江。《禹贡》所称“三江既入，震泽底定”者是也。自海塘障而东江湮，止二江受全湖之水，宋元以来所以多水患也。然犹有二江也。至嘉靖之季，而松江塞矣，嘉靖壬戌诸年之所以多水患也。海忠介公受符治之，功未及半，而松江之士夫嫡髀焉，谢事去。万历己卯诸年之愈多水患也，然犹有半松江全娄江也。自庚辰来五十年间，松江以半开而易塞，娄江以全身而半塞，是以半江受全湖之水，十年九湮，夫奚疑哉。请先言娄江，夫水势必趋东南，娄在太湖东北，而水全趋之者，其故有二。一者地近，北为唯亭，南为角直，皆去湖不五十里，而潮汐通焉，呼吸相接，地近则趋，从其便也。二者趋迫，两江既塞无分派，全身趋娄，其势重，其流愈急，从其迫也。若然，则娄之所系大矣。而水利之官空设，开浚之策不讲者，士夫为之碍也。娄江自苏之娄门出下雉渚，经唯亭至昆山，由番子河抵太仓而入刘河者，人以为娄江故道而非也。此娄江之最平稳处，故治以为官道，而险不在焉。在北为阳城湖，连亘百余里，而走白茆塘，南遮松江之半身，连亘四十余里，其广者可百余丈，狭者可十四丈。而走安亭漳浦，其大凡也，而至广至狭不与焉。潮势汹涌，挟泥沙而上。泥停水去，日渐一日，泥壅沙浮，河身高浅，小民射利，傍岸备种茭芦，茭芦既生，泥沙藉之可以安立。不二三年可种菱藕，菱藕衍蔓，泥沙愈凝。不三四年可种苗稻。筑为外圩，照前渐扩，于是河之百余丈者，渐为数丈，数丈者，渐为二三丈。平时不觉，迨至夏雨时行，水势一涨，急不得泻，膏腴之壤，尽为巨浸，直须臾耳。以所升之毫末，易所湮之巨万。以千百家之受利，易万姓之灾荒，其利害易知，而士夫为子孙计，徇目前之利，必不肯弃此以谋军国之大计也。故曰：白茆开，利归苏。而阻挠者必苏之士夫也。其次言松江，夫水势趋东南，其正脉也。而入海之道稍远，既合东江之水，汪洋浩渺，不可复治官道，所以驿传借路嘉兴，其中水势既盛，蓄泄甚难。而松江泥沙同于嘉兴，其味卤，其质重，易于凝滞，结为原壤，向之河身，已架高屋楼房，起为坟墓。嘉定以南，华上以北，一望平芜，百里之中，不闻舟楫。此岂尾闾之地所宜也哉。就耳目所及，举一以例余。如吴江长桥，浙直孔道，凡有轩车，无不驻节。试观长桥之下，为门七十有二，以杀水势，古人苦心极虑，触目可思。而间有贪利者，东西占为茭芦，数百顷渐填为平壤，架为市房，坐视吴江之民频遭水厄，潮水一涨，溉城而入，全县之田荡然为患。士民屡屡具呈，贪者执不肯行。宁两府全荒不恤也，又近之而一县全荒不恤也，又近之而本户所荒百千余亩子粒不存，又不恤也，而止顾此尺寸之利，罔念滔天之害，何愚一至此哉。观此一处，例如万情。故曰：松江之开，利归松江。而开之有阻挠者，必松江士夫也。然则弃小利以弭大害，捐情面以专责成，是在今日当事矣。）

娄江，亦名下江，自太湖分流出吴江县西北鲇鱼口，北流入运河。经城东为娄门洪，注流为上下雉渚。东南为陈湖。东北为阳城湖。巴城湖之水入焉。历娄山至和塘

东，合新洋江至太仓州城南，又东为刘河口入海。吴淞江一带流至新洋江口及夏驾浦二处，交会于娄江。

黄浦，在华亭上海境巨川。自黄潦泾受黄桥斜塘水，斜塘水自三泖来，其上为淀湖，为急水港，为白蚬江，自松江分派而来，又受嘉兴塘水，东流至詹家汇，为瓜泾塘，演迤而东。凡南北两涯之水皆入焉。至邹家寺折而北流，趋上海县。东西两涯之水皆入焉。又东北会吴淞江以入海。浦约长二百五十余里。比吴淞娄江更阔大，故论者指为东江焉。

（附：明归有光《寄王太守书》：“某昨承明府论及水利，匆遽辞别，不及尽言。某非能知水学者，然少尝有意考求。见卢公武郡志止抄录事迹略无纲要，今新志因之，而近来言水利者，不过祖述此耳。尝访求故家野老得书数种，独取郑氏二三家，断以为专门之学，遂汇录成书，非能特有所见也。惟以三吴之水，潴于太湖，太湖之水泄于吴江，古今之论，无易此者。故著论以畅前人之旨。尝又读《禹贡》，注三江者迄无定论，惟郭景纯及后来边实之论为是，故定以为三江之图。明府见谕，谓吴淞江与常熟县无预，某所论三江之水，非为常熟一县之水也。江水自吴江经由长洲昆山、华亭、嘉定、上海之境，旁近之田，固藉其灌溉，要之吴淞江之所以为利者，盖不止此。独以其直承太湖之水，以出之海耳。今常熟东北江海之边，固皆高仰。中间与无锡、长洲、昆山接壤之田，皆低洼多积水，此皆太湖东流不快之故。若吴淞江开浚，则常熟自无积水。然则吴淞江岂当与许浦白茅并论耶。明府又谓，扬子江、钱塘江何与于吴中水利。某意特欲推明三江之说。盖自来论吴中之水，必本《禹贡》“三江既入”之文，自孔安国以下，以中江、北江为据，既失之泥。班固、韦昭、桑钦近似而不详。故当从郭景纯。唯三江之说既明，然后吴中之水可得而治也。经曰：“三江既入，震泽底定。”先儒亦言：“三江既入，震泽自定。”文不相蒙，然吴淞一江之入，震泽底定，实系于此。经文简略不详耳。某诚恐论者不知此江之大，漫与诸浦无别，不辨原委，或泥张守节，顾夷之论，止求太湖下之三江，用力虽劳，反有支流湮汨之患也。但欲复禹之迹，诚骇物听，即如宋郑宜时之丈尺，时力亦恐未及，而水势积壅为害，欲求明府先令所在，略据今日河影开挑茭芦，使自昆山夏驾口至嘉定栅桥，寻入海之口，则江水有通流之渐矣。今春量拨赈饥之谷，召募饥民，或可即工。又旁江之民积占茭芦，指以告佃为民，所纳斗升之税，所占即百顷之江，兼之涨滩之税亦多，吏胥隐没，官司少获其利。昔宋时围田皆有禁约，今奸民豪右占江遏水道，更经二三年，无吴淞江矣。若责所占之人，免追花利，止令随在开挑，以复旧迹，则官不费，而奸有所惩矣。某二十年屏居江上，未尝敢献书当事者，异日吕公有意水利，然以平日非相知不敢有所陈。前以分司旧识，因开瓦浦问及之，而明府亲屈二千石之重，敦行古谊，虚怀下接，且倦倦以吾民鱼鳖为忧，故特有言耳，故区区所望于明府有大于此者。昔魏王召史起问漳水可以灌邺，曰：“子何不为寡人为之？”史起曰：“臣恐王之不能为也。”王曰：“子诚能为寡人为之，寡人尽听子矣。”史起敬诺，曰：“臣为之，民必大怨臣。大者死，其次乃籍臣。臣虽死籍，愿王之使他人遂之也。”王曰：“诺。”

使为邳令。史起因往为之。邳民大怨，使籍史起。史起不敢出而避之，王乃使他人遂为之。水已行，民大得其利。由此言之，兴一世之功，不当恤流俗之议也。区区之见，要以吴淞江必不可不开。即日渡江，远离节下，岂胜瞻恋。因还船，附此不宣。《水利后论》：单鶚以吴江堤横截江流，而岸东江尾，茭芦丛生，泥沙涨塞，欲开茭芦之地，迁沙村之民，运去涨土，凿堤岸为桥走水，而于下流开白蚬安亭江，使湖水由华亭青龙入海。虽知松江之要，而不识《禹贡》之三江，其所建白犹未卓然。所以欲截西水壅太湖之上流也，苏轼有言：“欲松江不塞，必尽徙吴江一县之民。”此论殆非鶚之所及。今不鑜去堤岸，而置为千桥，亦守常之论耳。崇宁二年，宗正丞徐确提举常平，考《禹贡》三江之说，以为太湖东注松江，正在下流，请自封家渡古江开淘至大通浦，直彻河口，当时惟确欲复古道，然确为三江之说，今亦不可得而考。元泰定二年，都水监任仁发开江，自黄浦口至新洋江，江面才阔十五丈。仁发称古者江狭处犹广二里，然二里即江之湮已久矣。自宋元嘉中汴渚已壅噎至此，何啻千年。郑氏云：吴淞古道，可敌千浦。又江旁纵浦，郑氏有言：“小时犹见其阔二十五丈。”则江之广可知，故古江蟠屈如龙形，盖江自太湖来，源不远而势既广。若径直则又易泄，而湖水不能蓄聚。所以迂回其途，使如今江之浅狭，何用蟠屈如此。余家安亭，在松江上求所谓安亭江者了不可见，而江南有大盈浦，北有顾浦，土人亦有三江口之称。江口有渡，闻之百岁老人云：“往时南北渡，一日往来仅一二回。”可知古江之广也。本朝诸御史崔恭凿新道，自大盈浦东至吴淞江巡检司，又自新泾西南蒲汇塘入江，自曹家河直凿平地至新场，江面广十四丈。夫以郑氏所见之浦，尚有二十五丈，而都水所开江面才及当时之浦。至本朝之开江乃十四丈，则兴工造事，以今方古，日就卑微，安能复见禹当时之江哉。汉贾让论治河，欲北徙冀州之民当水冲者，决黎阳遮害亭，放河北入海，当败坏城郭田庐冢墓以万数。以为大禹治水，山陵当路者毁之，隳断天地之性，此乃人工所造，何足言也。若惜区区涨沙茭芦之地，虽岁岁开浦，而支本不正，水终横行。今自嘉靖以来，岁多旱而少水，愚民以为自今不复见白水之患。余尝闻正德五年秋雨七日夜，吴中遂成巨浸。设使如汉建始间霖雨三十日，将如之何。天灾流行，国家代有。一遇水潦，吾民必有鱼鳖之忧矣。或曰。“今独开一江，则余溪港当尽废耶，日禹决九川，距四海，浚吠浚距川，江流正则随所在可引以灌田，且江流浩大，其势不能不漫溢。如今小江尚有剿娘江分四五里而合者，则奇分而旁出娄江，东江之迹或当自见。且如刘家港，元时海运千艘所聚，至今为入海大道。而上海黄浦势尤淘涌，岂能废之。但本支尊大则支庶俱得所矣。）

此上皆承太湖之下流，而纳诸港之水以入海者也。东北入江之大浦有八。

白茆港，在昭文县东七十里。横广三十余丈，长亘九十余里。为苏常诸水东北出江第一要道。盖震泽之水北注于阳城巴城等湖，而江阴无锡诸邑接受宜兴溧阳诸山之水，又回环聚于华荡尚湖等巨潴。东江既失故道，娄淞浅涩，震泽洪流东指之势，独自茅为尾闾。宋人言水利者，每言导太湖分流东北，由诸浦注之江，而诸浦中白茅最大，今屡议疏浚。

福山港，在常熟县北四十里，自城北水门二十里经斜桥，又二十里，经福山，入大江。亦曰福山塘。

浒浦，在常熟县东北七十里。自县城东北三十五里，经梅李塘，又三十五里为浒浦，入大江。宋时以茜泾、七鸦、白茅、浒浦、下张，为昆、常间五大浦，又以梅李塘、白茅浦、崔浦、福山浦、黄泗浦为常熟五浦，屡议浚治。今浒浦塞，不复为要口。浦东有徐六泾，西南出梅李塘，为往来通道。

梅李塘，自雉浦入耿泾千步迳。迤邐常熟县东入浒浦出口。李墓塘在常熟县东，其源自周泾而来，至白茅塘入江。

黄泗浦，在常熟县西北八十里。南通江阴县界，北入扬子江。

崔浦丁泾，皆在福山港东北。亦旧时通江之口，今俱湮。县北五十里有崔浦桥，即入江处。

入海之大浦有五。

七浦，亦名七浦塘，亦曰七鸦塘。在昆山县西北三十里。常熟县东南三十里，太仓州北三十六里，接三县界。水自昆山至和塘而北，合常熟、昆承及阳城、巴城诸川泽，汇流为七浦塘，经太仓州西三十里直塘市，又东北十里为沙头市，又东北十里，经涂松镇一带入海。

杨林塘，在太仓州西北二十里，其上流承七浦塘及巴城湖之流，东经新塘而东，至州东北八十里花浦口入海。

顾泾港，在嘉定县东四十里入海。

川沙港，南接顾泾港东北入海。

黄姚港，在嘉定县东北四十里，西接新泾东北入海。

以上皆沿海沿江而泄三江之支流者也。其经络于白茆港、浒浦、梅李塘、李墓塘者，元和塘，即常熟北来运河，俗讹云和塘，南属长洲县，北属常熟县。柴泾、徐墅泾、罗墩荡、六里塘、大和塘、官禄塘、黄庄塘、五丫塘、西陈泾、湛泾、魏泾、东横泾、徐泾塘、莫门塘、卫泾塘、南张泾、周泾、黄泾、龙泾、南桑浜、曹家浜、时泾塘、北艾泾、朱堰塘、严舍泾、悬泾、徐泾、杨尖泾、戈庄泾、五瞿塘，以上诸水流梅李塘者，东北入浒浦，流李墓塘者，东入于白茅港，流福山塘者，北入于扬子江。其经络于七浦者茜泾。其沿湖泄水之口可指名者鲇鱼口，在太湖北，去

吴江县十八里，流为澹台湖。自分水墩南流，径吴县城东南为庞山湖。胥口，太湖支流。东出香山胥山之间者，曰胥口。东流为木渎。白洋湾，太湖支流。东出吴山南，曰白洋湾。北流为石湖。东一溪北流横塘曰越来溪。与木渎水合，入胥门运河，曰胥江、管渎、小溪港、瓜泾、夹浦、张家河、北车桥、漾湖溪、上渎港、陆家浜、虎山桥、石家港、南宫塘、蒯家泾、九曲江、后塘桥、梅梁溪、龙堂河、迎城山、菱湖港、太平桥、泽塘浜、灌渎浜、和尚浜、长洛浜、王家漾、山径港、渡水港、黄渎港、后保河。其他水不可殚记，皆泄太湖之水，东入三江诸浦，而归于大海者也。

湖之次大者：

石湖，在吴县吴江县分界，上承太湖，东接澹台湖。

澹台湖，在苏州府西南十八里太湖之东。其水过宝带桥入运河，分流入黄天荡、陈湖、金泾渚。北行经葑门，环城为濠，至娄门东入于娄江。

庞山湖，在苏州府南二十里，当澹台湖之东。太湖之水，自吴江县之鲇鱼口及长桥下东北出者，皆汇于此。导流为吴淞江，东南流为黎湖、菱湖、叶泽湖、新湖。叶泽湖东为九里湖、急水港。又东姚城江、

白蚬江、小龙港、杓头潭、西禊袴湖、笑面湖，与汾湖接，皆吴江县界。

尹山湖，在苏州府东南二十五里。西北接渎墅湖及车坊漾之水，委流入于三泖。

渎墅湖，在府城东南十里。南接尹山湖，东入大姚港及陈湖。

唐家湖，在吴江县南三十四里。西连盛墩湖及夹马湖，为太湖之委流，东注于运河，复溢而东出，播为诸荡漾，凡数十计。又北潞为三白荡，西北去县二十五里，又北接白蚬江，其东出则为急水港，接松江之淀山湖。

莺脰湖，在吴江县南四十里。其上流纳烂溪、荻塘诸水，出平望安德桥，汇流成湖。南达于汾湖，北接太湖。

汾湖，在吴江县东南六十里。与浙江嘉善县分界。东合诸湖荡。又东通三泖，入华亭界。其北连诸湖荡，入莺脰湖。

陈湖，在苏州府东南三十五里。湖广十八里，接昆山县界。《宋志》：陈湖自大姚港、界浦、渡头浦、朱里浦，入吴淞江。今渡湖而东南三十五里，即淀山湖，路出松江三泖。

沙湖，在苏州府东二十里。北对阳城湖，湖中有至和塘岸道出昆山，其南通吴淞江有湖堤。

阳城湖，在苏州府东北二十里。上接吴淞江，东流入昆山县界。常熟县南境之水亦流汇焉。吞吐群川，波流浩瀚，灌溉甚溥。东为包湖、傀儡诸湖，皆余流所浸溢也。东北为巴城湖。

巴城湖，在昆山县西北二十里。其地有古巴城，因名。西为施泽泾，出阳城湖。南曰尤泾，出至和塘。东曰焦温泾，达城。

尚湖，在常熟县西南四里。长十五里，广九里。虞山峙其北。东通运河，西出江阴县。

昆承湖，在常熟县东南五里。长三十六里，广十八里。《水经》云：“广长各十八里。”无锡以东，长洲以北之水，泛滥而出，汇流于此。昔时分流入白茅、泆浦以达于江。其后诸浦渐湮，湖流亦日狭，土人于滩浅处占为田，而分为泾港，散入于太仓、昆山之界，从七鸭浦、刘河诸口入海。

淀山湖，一名薛淀湖，在松江府西北七十二里，与青浦、昆山县接界，吴淞江水汇流处也。唐宋以来，淀湖深阔，境内无水灾。宋南渡后，渐至湮废。其源自长洲白蚬江，经急水港而来，北由赵屯浦，东由大盈浦，泻于松江。东南由烂路港以入三泖，潮沙淤淀，渐成围田。今赵屯、大盈浦去湖益远，由何家港及南北曹港，受湖水以泄于松江，非复淀湖之旧矣。

泖湖，在松江府西三十五里。亦名三泖，泖有上中下三名。图经西北抵山泾，水形圆者曰圆泖，亦曰上泖。南迎泖桥，水势阔者曰大泖，亦曰下泖。自泖桥而上，萦绕百余里曰长泖，一名谷泖，亦曰中泖。泖湖之水，上承淀山湖。凡嘉湖以东，太湖以南之水，多汇入焉。下流合黄浦入海。

以上皆与太湖联属，广袤历数百里，其水则东南出嘉定、吴淞江及松江、黄浦，东出昆山、娄江，及东北出常熟白茅港，而入海入江者也。

泾渎港浦与吴淞江相贯注者：

白蚬江，在吴江县东南四十里。西北与庞山诸湖相通。又东为小龙港，引流入吴淞江。其西与诸湖荡相连，汾湖之水亦流汇焉。

姚成江，在吴江县东北三十里，亦与白蚬江相接。

新江，在昆山县，宋嘉祐间所开。西接吴淞江，南入陈湖。

千墩浦，在昆山县南四十里。新洋诸江之水汇流于此浦。接吴淞江入海。

大虞浦，在昆山县西南九里。又有小虞浦，在县西南。二浦皆北出新塘，南通吴淞江。

白鹤江，在嘉定县西南四十三里。自松江府青浦县流入境。北入吴淞江。

大盈浦，在嘉定县西南五十里。自松江府流入境，注于吴淞江。

大卢浦，在嘉定县西南，南通青龙江。北迳冯浦入吴淞江，亦曰渡头。

黄渡浦，在嘉定县西南四十里。南通吴淞江，对岸即大盈浦也。

练祁塘，在嘉定县南。东西长七十二里，自县中分曰东西练祁。今自顾浦纳淞江之流，东祁贯于吴塘。又东过盐铁塘，贯县城而东，抵罗店镇，稍东北入于大海。

走马塘，在嘉定县东南二十里。西通至于横沥，东南由湾浦，入吴淞江。

赵泾，在嘉定县西南二十里。北通练祁，南为月河，出吴淞江。

赵屯浦，在松江府西北七十里。旧当淀山湖北，直受湖水，泻于吴淞江。后水利不修，浦去淀湖益远，湖水自北漕港分支北流，愈北愈隘，仅通舟楫。其接漕港处，又名新河。浦分二支，一曰南小赵屯浦，一曰小赵屯浦。俱入吴淞江。

顾会浦，在松江府西北二十二里。其上源为通波塘。出府城北流为五里塘。又北为泽祥湖。别流为嵩子浦。北出凤凰桥，又往北斡山入青浦界，又北通新江塘，西接青龙江，东为艾祁等浦，入吴淞江。

嵩子浦，在松江府北十五里。自顾会浦分流，经县之东北五十里，入吴淞江。

盘龙浦，在嵩子浦东。其上流曰盘龙塘。自府东三里，北流绝俞塘及上海、青浦境内之六磊、泗泾、横塘、浦汇诸塘。而北入于吴淞江，长八十里。其入江处曰盘龙汇。

沙冈塘，在盘龙浦东南。绝黄浦至捍海塘，北入吴淞江。

横沥塘，在沙冈东。其北绝吴淞江，入嘉定县界。

西上澳浦，东上澳浦，二浦皆南通乌泥泾，北入吴淞江。

西芦浦，大芦浦，亦北入吴淞江。

上海浦，即黄浦下流，合吴淞江处。

新泾塘，在松江府东八十里。华亭濒海塘浦之一也。亦曰新泾浦。北过吴淞江，其支渠甚多，皆能引水以灌田畴。

沈泾塘，在松江府西五里。南接秀州塘，北合诸泾港之水，北流为神山塘，经佘山西，又分流会诸泾港之水，西北入大盈浦，东入顾会浦，而合吴淞江。此塘所以泄西南上流之水，岁旱浚之，可引吴淞江水，资以灌溉。

朱泾，在松江府西南二十七里。自秀州塘分流而东，合于三泖，为松江西出之要路。

张泾，在松江府南，西接新运盐河。

艾祁浦，在青浦县东北二十八里。南接顾会浦，东北流达于吴淞江。

吴淞江南诸浦之著名者：北平浦、破江浦、养蚕浦、南漈浦、梁纆浦、石臼浦、分桑浦、内勋浦、石浦、道褐浦、萧市浦、金灶浦、注浦、张潭浦、棠黎浦、同邱浦、诸天浦、张浦、帆归浦、角直浦、渡头浦、甫里浦、东齐浦、刹刀浦、界浦、浮高浦、顺德浦、大姚浦、破墩浦、盍头浦。以上皆西受陈湖等水，而入吴淞江者也。

吴淞江北诸浦之著名者：安亭浦、徐公浦、北潞浦、瓦浦、三林浦、顾墓浦、金城浦、木瓜浦、下界浦、霸浦、广浦、杜城浦、马仁浦、尤泾浦、梁里浦、华祥浦、心渎浦、乐浦、薛庄浦、黄渎浦、直义浦、下里浦、戴墟浦、上顾浦、青邱浦、凤里浦、任浦。以上皆西受阳城湖诸水，横绝至和塘而入于吴淞江者也。

娄江之西：

至和塘，自苏州府城娄门，东经沙湖，又东入唯亭诸水，至昆山县，一南绕城为濠，东行北转，一北行而东，横贯城中，并入娄江。

其支流相贯注者：

半泾，横带太仓州城东数里，南入娄江。北迳湖川杨林，属于刘家港。

吴塘，在太仓州城西三里，南入娄江。

太仓塘，引娄江水入州城大西门。相传为至和塘，稍南为陈门塘，引娄江水入小西门。

湖川塘，在太仓东，环出小塘子，入娄江。

徐公浦，在嘉定县西北，南通顾浦，北达刘河。

刘家港，在太仓州城南。自昆山县流入境。又东南七十里为刘河口，即古娄江入海之口。自此抵崇明一百二十四里，为滨海要道。元人海运，由此入海。水面寥广，与他港不同。自刘家港而西，为北治漕，为麋长河。又西为北时沟，为杨子泾，为小塘子，为三江口，为石婆港。南盘曲处为湄场湾。北为新开河，为青福泾，为菖蒲泾，为半径。以上皆引诸河水，而入于娄江以达海者也。其通吴淞江水而达娄江者：夏驾浦，在昆山县东南二十里。志云：新洋江南口，即夏驾浦。明夏原吉以松江自夏驾浦而东，沙涨猝不可去，江北岸有刘家河入海，乃凿夏驾浦，掣江接浦汇于刘家河，故名。新洋江，在昆山县东南六里吴淞江北。南通松江，而其流溉于冈身，北通至和塘，即娄江。横沥，在嘉定县治东。南北袤六十里。自县治中分，有南北沥之名。自县西南二十七里孙基港口，受吴淞江水。折而东合上槎等浦，经南翔镇。又北二十里贯城而北出，抵南北十二里之娄塘。又东北折而为双塘，复少折而西北曰公塘，俱入刘河，今渐微。盐铁塘，在嘉定县西十五里。南接陆皎浦抵吴淞江，北贯练祁塘，经葛隆镇达于刘河。顾浦，在嘉定县西南五里。引吴淞江水入吉泾，自吉泾塘稍东复北为下戚虞泾。与南盐铁、张泾、横沥水东西相并，俱入娄江。南盐铁在戚虞泾之左。张泾、横沥在戚虞泾之右，而盐铁横沥其所通犹甚远。以上皆吴淞交会于娄江而入海者也。

黄浦之源委支流：秀州塘，在金山县西，俗呼为官塘。其源出杭州西湖，历嘉兴县而东至枫泾镇入界。去府六十里，由镇而东过白牛塘，绝长泖至万安桥。北流合滕港，又合黄门桥，合斜塘，过李塔汇、石湖塘，过吉阳汇合古浦，东流入市为沈泾塘。过小青河至平政桥，入郡之西水门出东门与俞塘诸水合，循西城而南合张泾米市塘，入官泾塘，北过采花泾东北合顾会浦，自万安桥东流为朱泾。自斜桥东流入横潦泾，为黄浦。

斜塘，在金山县西北。自大泖来，与黄桥门水皆湍悍，东入横潦泾。

横潦泾，在金山县北，即潦泾黄浦之首也。楚黄歇所开。今东江注焉。西起秀州塘，东入上海境。又有小横潦泾，西引秀州塘水，东南入于黄浦。御史泾，在松江府东门外，起南俞塘，北为斜塘。南俞塘，自松江府东门经三里汀至吕塘庙，南入盐铁塘。分流东南为语儿泾，入黄浦。华亭上海二县于此分界。

盐铁塘，自吕塘庙南入黄浦。

北俞塘，自松江府东门，东流贯沙竹冈横泆新泾，东入黄浦。

蒲汇塘，在上海县西南四十里。自青浦县受盘龙泗泾之水，绝沙冈竹冈横泆诸水，东经县南入于黄浦。

六磊塘，在上海县西南。自盘龙塘分支，东北流为乌泥泾，入黄浦。

乌泥泾，在上海县南三十里。其西南与华亭县分界，北为郑家漕、曹湖泾等浦，并自西南入黄浦。

界泾，在松江府城西。南接嘉善县界。北通秀州塘东南为横泆。横泆，其源自当湖长泆来，华亭县与平湖县分界。其支流为华家泾、丁家洋。丁家洋之东为惠高泾、彭巷港，北为处士泾，又北泆泆塘。

胥浦塘，相传伍子胥所凿。自长泆接界泾而东，尽纳惠高、彭巷、处士、泆泆诸水。东为驱塘，掘挹泾二水，并出横泆泾。

望湖泾，在南桥北入黄浦。

运盐河，自金山卫城北流，经张堰镇，西为张泾，过前后冈塘高蒋泾等，北至张泾桥，与郡城河接。凡西南诸水，皆由之以入于黄浦。

闸港，在上海县东南新场镇西。入黄浦，其入处，乃浦之折而北行处。

都台浦，在运盐河西。因明巡抚崔恭浚，故名。通盐运河入浦。

沈庄塘，在上海县西入黄浦。

周浦塘，在上海县西入黄浦。

三林塘，在周浦塘北，西入黄浦。

杨溜港，在三林塘北，入黄浦。

南跄浦，在上海县东北三十六里。即永乐中导黄浦由此入江处，今故址已湮。而东北有跄港，大跄浜，南近都台浦，相传即南跄旧流。

汭渎港，在上海县北二十里。《吴郡志》曰：“松江，东泻海曰汭海。亦谓之汭渎。”即黄浦。

此皆黄浦之水也，皆苏松二郡治于下流者也。

补太湖各港：常州府无锡县境各港，则有沙墩港，上流自望亭塘运河，分流出北桥，西行入太湖，此港外宽内隘，大舟不能行。高墩港、新姑港不通诸河，乃溉田之小港。大溪港深阔，即赤城溪。《无锡志》：“运河自南门塘分流，西行为曹王泾。泾水又分而南为蠡渎，南行贯新安溪，过八字桥，名赤城溪，广数十丈，长五里，出溪桥港而入太湖。”小溪港，大溪港支流。店泾港已塞。青石桥港，新安溪入湖支流。张桥港，蠡口河入湖支流。

（以上俱隶新安乡）湖西埭港，赵舍港，羊千港，万步港，壬子港，港口有仁渚桥，疑港本名仁渚。作壬子者，讹也。塘漕港，庙港，自湖西埭至此，皆新安溪入湖支流，而湖西埭壬子二港分来。

（以上诸港，惟沙墩口向西，余俱向南。）吴塘门上流，东一支为新安溪，北一支为长广溪。《无锡志》：“新安溪自运河新安塘分流，出自白龙桥，西行贯赤城溪。又西行贯张桥港。又西行，分而南为湖西埭，为壬子港。又西与长广溪会，长广溪源出诸山，北有石塘，通五里湖。南行合蠡口河洪邱渎唐千渎之水，又南经下泽桥，与安溪会，合流出杪木桥，入于太湖。”（以上俱属开化乡

）独山门有汛，《常州郡邑志》俱云：“独山孤峙湖中。”《震泽编》云：“锡山脉西来，至是中断，为太湖。舟行其中，曰独山门，是湖水通流之处，与陆地入湖之港有别。滨湖水口，当在五里湖岸、石塘、马蠡、大渲、小渲诸处，非独山门矣。”备考并载五里湖岸诸港，如石塘口在五里湖南岸，马蠡港在五里湖东岸，大渲港、小渲港，并梁溪支流，皆在五里湖北岸。后溪港上流为梁清溪。《常州府志》：“锡惠诸山泉聚为梁溪。”《无锡志》：“梁溪自县西门大保墩，分运河流下西定桥。西北行至仙女墩，分而南为中桥河。又西南行，分为大渲、小渲。又西北行尽入太湖。其口曰后溪港。水自五里湖出者浊，自后溪出者清，故又名清水溪。”（以上俱隶扬名乡

）闾江港，《常州志》名白射。《山河图志》云：“上流之无锡境来者为志公港，分运河水南入北阳湖。从北阳湖出而南行，为直河港。又南行至富安乡为西溪，与阳湖县西来之龙游河会，自阳湖界来者为戚墅港，分运河水。南行至邱渡，过周桥，分流至周家渡，入无锡界为龙游河。与西溪会，合流而南过白石山。分流入水溜港。其河身又东行，抵闾江。”《无锡志》云：“闾江，太湖之别浦，今湮为田，广可通舟矣。跨闾江有桥曰青龙桥。水从桥下入太湖。”（以上隶富安乡

）阳湖县界各港：水溜港，俗称水路港。上流东通白石山河。入无锡界，北通薛堰河。旧谓是薛堰入湖支流。跨港有桥，名水溜桥，亦名闾江桥。水溜闾江二港。其上流有分有合，故桥受是名。芦荻港，俗称芦席港，薛堰入湖支流。毛湖港，薛堰入湖支流。洞桥港，薛堰入湖支流。新村港，亦名秦村冈，薛堰入湖支流。下埠港，一作鸦步，亦作下浦，薛堰入湖之干流，薛堰河。

（《续纂水利全案》作雪堰）南行为白马泾。又南行为河上渡。又南为下埠港入湖。（以上隶新塘乡）百渎港上流，西一支为黄土河，北一支为太平河，至分水墩合流南下，至此入湖。黄土河西通官才渎，漏湖之水从此来。太平河北通戚墅等港，运河之水从此来。今闾江港已淤。百渎港桥秩置栅，舟不能进。惟下埠为通渠，府治东南之门户也。

（以上隶太平乡）

宜兴县各港：钓泾港口塞，丁卯港口塞，山渎港浅，盛渎、湾浜港浅，下泽港浅，吴溪港，上接吴溪。《府志》：“吴溪在县东北十五里，西通荆溪，东入太湖。”又《河渠》说：“运河东出之支有殷村港，由万石桥出尹龙桥，折而东北，合吴溪，下太湖。”大墟港进内二里为周铁桥镇。水北通分水墩，南达丁蜀山，东出大墟港，入湖。长凌渎桥，有石栅。沙塘港，在竹山下。县东北五十里，东入太湖。符渎通。黄渎塞。五千渎，旧作午千渎。欧渎通。彭渎通。毛渎、葛渎、赵渎、何渎、徐渎、师渎、龚渎、黄千渎

（自毛渎至此，皆浅小。）旧渎通。阳溪渎通。在县东北四十里，源出阳山，东入太湖。北津渎通，《府志》作准，下中津南津同。辛渎同。中津渎通。茭渎口塞，旁皆茭田，上有茭渎庙。社渎浅小。南津渎，港口外分内合，土人呼为二渎。五字浅小，汤渎浅小，陈渎塞，官渎通，吴泗渎通，洪港渎塞。卞渎塞。洋汇渎通。大浦渎通。在县东三十六里。李蟪所谓大湖浦也。今桥港外弥望芦滩，意即浦之淤涨。

荆溪县境内各港：后河渎通。凌义渎淤。赵庄渎淤。漳渎、北朱渎、魏渎、邵平桥渎塞。五房桥渎、观音渎、市渎、吕渎、杭渎、庙渎、洋大渎、双桥渎

（以上淤塞。）定跨港，口隘内大。乌溪渎，最深阔。南杭港、南朱港渎、兰后渎、新港、董塘港为江浙二省分界。

苏州府震泽县境各港：薛家港、丁家港、吴淡、方港、张港、叶港、八角亭子港、蒋家港、（以上隶六都。）五界亭港、倪家亭港、马家港塞、从双板石桥港入湖。双板石桥港、陆家港、亭子港塞，俗名半夜港。西邱庙港、更楼港、小杨港塞。王家港、徐家港、捞茭港、五齐港塞。南盛港、骆驼港塞。沈家港塞。濮家港塞。崔

家港塞。张家港、永安港塞。大庙港，跨街亭港，又名西浦港，塞。东浦港塞。永定寺港塞。龙髯嘴在此。庄港、鸿雁港、新开港、汤家扇港、又名邱老太港。庙桥亭港、一名东盛港。鸦雀港、大明港、俞家港，塞。乌梅港塞。盘粮港，即寰联港塞。榆树港塞。草庵港塞。罗家港塞。栋树港塞。陌界港、白浦、赵家港、亭子港、百婆亭港，即娘娘庙港。破车港，塞。从亭子港入湖。叶家港、小成港、大咸港，马鞍港、盛家港、灶家港、张家扇港，

（以上皆隶五都）。（按：《水利全案图》：薛埠港前尚有湖渚，蒋家港前尚有东丁家港。徐家港作徐杨港。庙桥亭港与东盛港本二港。破车港在百婆亭之前。未知其为古今之异，抑二说或有一误，均不可知。今录之以俟知者订正。

）诸港上流，皆自荻塘来。荻塘，西自南潴，接乌程来水，东行至曹村，南受金花漾、划船漾、曹家三漾诸水会。荻塘又东至马赋讨，南受赋溪水。从马赋、杨定二桥港北行，与蠡思等港水合。播为周胜塘、新漾，和尚漾、钵头漾、汪衙潭、迕家漾、东西骨塔漾。荻塘又东至震泽镇，南受蠡泽河水，从新兴、通泰、斜桥、张湾四桥港北行。潴为唐白漾、葫芦兜长漾，北为马耳漾，

（一名马尾，）为翁周漾。（一名荒邱。）荻塘又东至双杨村，南受北麻漾水，从仁安、众安、斜路诸桥港北行，潴为宝苏桥湖与翁周漾水会。（以上诸漾荡水，皆由横草路分入五界亭诸港，下太湖。

）甘泉港塞。尹家港、蒲地港塞。朱家港、姚家港、张骑庙港。（以上隶十都）西宋港、东宋港、金家港塞。戢港、潘奇港、陈思港、坍缺港、直渚（以上隶四都）诸港上流亦自荻塘来。荻塘自双杨至梅堰，南受北麻漾、双田漾水。从三里、百步、西吴、东吴诸桥港北行。潴为包家荡、桃花漾，北由草路入甘泉诸港，下太湖。茅柴港上流即桃花漾之东行者，潴为陆家荡，从此下太湖。韭溪港，相传越伐吴，方会食，谍知吴杀子胥，即进兵，弃韭于溪，故名。上流亦自荻塘来。荻塘自梅堰至平望，南受东西穹荡水，从诸六里二桥港北行，播为茶家漾、石礞漾、大龙荡、长荡，合为祥鸡荡。从此下太湖。又莺腹湖水，从荻塘泄水大通二桥北行为后溪。由平望镇后，出长老桥入运河，亦分流入沟渚，入韭溪，下太湖。

（以上隶三都西），由此以上，皆各港之入太湖者也。练聚桥港，一名黄沙港。黑桥港，此二港并南受太湖水东行，入唐家湖，从石塘袅桥入运河。（并隶二都南）。二港之外，尚有孙田、后浜、新泾、上横杨家直港、六港，与练聚、黑桥，共八港。今止有练聚、黑桥二港矣。沈氏罄云：“湖中水皆北流，惟此八港水南流。盖太湖下流甘泉等处壅塞，则水漫波溢，惟隙是求。唐家湖以东，诸港骈集，宜其舍彼而就此也。又田八港警于盐盗，或坝或开，有通有塞，是当时已不能全通，宜今之六港皆湮也。南仁港，即南仁河，一日南胜，一名和尚。北折而为西水路，东北流十八里，至长桥河。又东北折而为东水路。十八里而至白龙、甘泉、三江等桥。

和尚河与南仁通为一河，今土人以西近太湖者为南仁，东接西水路者为和尚。

（按《水考》云：“牛毛墩湖尽淤成田，止存三大河泄水，其由南仁河入者为西水路，东水路由卜家簃入者为江漕路。”可知南仁河为湖涨成田后所存之河口，东西江漕路乃南仁河之支派。今人所称前城湖，即东湖之别名，南仁港其口也。今之菱草路，北行达长桥河者，即西水路也。

）南舍港有洪庙，故又称洪庙港，简村市在其内，太湖左营守备驻防处。（按：舍港全案作厓港二字，古音本同。）唐家港、马家港、小清港今塞。陆家港、庞家港、沈家港、南潞港，今名南吴家港，又名长板桥港，西接太湖处，阔十三丈。穿草路以东，阔八九丈。东行出甘泉桥。中潞港，今名中吴家港，又名新开河。东穿草路直出三江桥，今草路以东，淤塞不通。吴家港、西港、湖墓港

（二港属湖墓）五方港、梅里港、庙港（三港属梅里）。龚船港、石里后港

（二港俱属石里）（此七港俱西通太湖，东通斜路。乃溉田之小港，时通时塞。自南仁港至此，所谓湖十八港也。）（按：《水利全案》南舍港作南厓港。小清港作小青港。湖墓港又名划船港。五方港又名大木头港。梅里港又名李家港。庙港又名小庙港。龚船港又名大王庙港。石里后港又名西港。

）由此以上，皆各港之泄太湖者也。太湖与东南湖连贯之港凡十八，枢纽湖心，朝夕吞吐，利害最大。其西之田日蚀于湖，谓之坍湖。其东之沙日涨为田者，谓之新涨。东南二湖俱成原隰，则壤为科各以万计，议水利者，于斯三叹。

（以上共九十六口）。向时东南二湖，未曾淤涨之前，并无港形，太湖之水直至长桥石塘，由诸桥泄入运河。自湖涨成陆，始有南仁吴家等港，西接湖水。今以近湖诸港为太湖泄水之上口，又附塘岸诸桥于后，为太湖泄水之下口。一据现在之湖形，一存旧时之湖界。牛腰泾西受太湖水，东行入于七里港。吴江县属七里港，西受太湖水，至七门外之流虹桥，凡七里，故名。其东泄入吴淞之港。一为北城河，东流过永济桥、广运桥，为南仓河。一为书院前河，东流过大有桥为北仓河。俱由三里桥河出吴淞江。一为新港，东流过七里桥运河，出吴淞江。一为南柳胥港，由界牌运河出吴淞江。此港江震二邑分界处。北柳胥港，西受太湖水，出柳胥铺，东流与南柳胥合，俱入运河，由夹浦桥出吴淞江。瓜泾港，俗呼花泾港。县北九里，西受太湖水，东过古塘入元和县界，经运河而南，由夹浦桥东出吴淞江，此乃太湖出吴淞江之大路。王家汇西受太湖水，东入瓜泾港。许稍桥港与王家汇港相并。西受太湖水东行，北折出罄塘。一支由蓑衣港东出古塘。鲇鱼口南受太湖水，北流汇为罄塘。又北过五龙桥入吴县盘门运河。其罄塘之东折者，至分水墩为古塘口，入元和县澹台湖，过宝带桥与运河合。有面杖港水合流至古塘，此为娄江之首，太湖北泄之干流也。莫舍淞，一名绮川，南受太湖水，汇于楞伽山下为古湖。湖水一过越

城桥，经范丹墓至横塘。一过行春桥，沿磨盘山出跨塘，合木渎西来之水，东行至横塘，与越城桥水会。东流七里至于胥门运河。其滨之东折者，为九曲港。石湖之东注者曰邵巷港、市里港，俱出罄塘合焉。白塘湾，即太湖湾。阔有六七里，皆沮洳菱芦。太湖之水，从菱芦中分港。北行有斜戗、东戗、西戗等港。其实皆白塘湾也。其水北注越来溪。又十里许入石湖。越来之东泄者凡四。前朱村港复出太湖，马墓港姚湾港俱出太湖。以上共九口。

吴县界内各港：木履桥港、花大港、沙泾港、高坑港塞。东凌渎港、西凌渎港、双墩港、张家港、牛桥港、茅圻港、前巷港、宗里港、庙桥港、石社港、庄子桥港，即黄洋湾。太湖自黄洋湾稍西折，北进大缺口，是为凌湖。新泾港、新开港、黄墅港、菱湖汛在此，太湖至菱湖嘴又折而东，是为胥湖。沈家泾港塞。仙渎泾港塞。韩渎港、前湊港塞。大渎港、洋河港、下堰桥港、天官港、直进港、沿河之港，各随所向以纳湖水，横金一河直贯于中，统纳诸港之水，东行合越来溪，以入石湖。胥口在胥山、香山之间，西受太湖水，东行十里至木渎镇。铜坑西来之水，出斜桥注之。又东行二十里至横塘。与石湖南来之水会，合流过横塘桥。东行七里，入于胥门之运河。别一支由彩云桥、达枫桥入运河：此为吴县境太湖泄水第一要道。香泾河在香山下，东北流入于箭泾、九曲河塞。唐桥港即南官塘之东口，太湖至此又折而西，沿法山至黄茅嘴，折而东北至吕坡桥。吕坡桥港，即南官塘之西口，太湖至此又折而西北。

（以上二港，皆出而复入，非泄水港也。）铜坑在西迹山安山之间，西受太湖水，东行为东西二崦，过虎山桥为光福塘。又东过善人桥，经灵岩山下为山塘。箭泾之水南来注之。又至木渎镇，出斜桥，与胥口水合流而东，太湖泄水之口自此止。自吕坡桥至此，沿湖皆山，无河港。太湖至此，又折而北，为游湖。安山港在安山下，内通光福。陆巷港在幽里山下，内通光福。大野港，昨通渠。新桥港北通浒墅，西由龙塘桥入贡湖。长山港西由师姑港入贡湖，安山以下五港，自东而北而西，在游湖岸。三面太湖，于游湖口三洋坟嘴外，又折而北，是为贡湖。师姑港，即长山港之西口，今塞。郁社港，东通游湖。

（以上共四十口。自塘桥下，皆出而复入。或湖水所溢，不在泄水之列。）

长洲县境各港。龙塘港东由新桥港出游湖，北通浒墅。金墅港，前溪港，仁巷港，牡丹港，以上五港亦在贡湖东岸，皆非泄水之港。湖中诸山港渎，东山具区港，与武山分界：南北通湖为行巨港，自湖亭嘴入口，南至茭田村外止，再南即太湖矣。长浜泾、席家湖、金家湖、殿泾港、叶巷港、漾桥港无外口，亘乎叶巷、施巷二港之间。施巷港、潦里港、俞家舍港、王家泾、夏家湖、周家湖、青龙泾、涧桥港、查湾港、杨湾港、北望港、王舍港、张巷港、朱巷港，北叶港、嵩下港、蒋湾港、陆巷港、寒山港、武山港、西金港，亦南北通湖。仙桥港、即西金北口。朱家巷，亦西金南口。葛家渎、吴巷港、鸡山港、西山、头陀桥港，与鼋山分界，西北由辛

桥港，东北由后埠港，皆通太湖。后堡港。镇下港、龟山港、山东港、旻坞港、明湾港、汇上港、圻村港首尾通湖。徐家港、冯山港、塔头港、绮里港、慈东港、慈四港、郑泾港首尾通湖。山下港、

瞳里港、唐里港、陈巷港、涵村港、东湾港、下金港、东村港、金铎港、寿乡港、亭子港、辛桥港，南由后堡港、头陀桥港，东由后堡港，通太湖。鼋山、石宁浜、紫家洲、黄渚港以后堡辛桥二港，为外口通湖。角头山、衙湾港、大步港、小步港，

（以上靖湖厅境）。马迹山、大渚、辛渚、咸河俱在寨前。吴渚、杭渚、汎渚俱在张清。马渚在新城。官渚、钱家渚，俱在古竹。姚巷河、秦巷河、后湾河，俱在耿湾。蜇河、南浜、中浜、北浜，俱在雁门。横河，在新城。姚花港，在桃花。牛塘河，在牛塘。内间渚在内间顾渚。庙渚，俱在西村。辛渚，在西纽。

（以上阳湖县境）以上为太湖下委及各山通水之港。按以上诸港，均本之《太湖备考》，为志太湖者所必应及，今撮其大要，以补所未备云。

第八卷 水利

江宁府

秦淮河，在府治南，发源黄堰坝，抵句容、溧水来绕府城，经流甚长。城内外交资其利。

娄湖，在东南，吴张昭所凿以溉田。

江宁浦，在府南，溉田百二十顷。《建康志》：浦在县南七十五里，源出当涂县界。

班渚，在府北，久湮。

莫愁湖，在江宁县水西门外。

三城湖，在县镇。

白都湖，在县白都山下。

牧马湖，在县西南三十九里。

南涧，即落马涧。

(以上江宁县)

杨吴城濠，在上元、江宁之境。今自乾河崖南转出北门桥。又南过莲花桥，与进香河合。又南过浮桥，与珍珠河合。又西转至竹桥，青溪之水自驻防城下入焉。又西过复成桥，明御河之水自驻防城下入焉。又西过大中桥至东水关，与淮水合。

运渚，在上元、江宁境。今自笪桥西南过南北乾道桥，至斗门桥入于淮水。自笪桥而东北，转至大市桥，与护龙河合。又东至内桥，与青溪合。自笪桥而西，经仓巷、望仙诸桥直抵西城，循铁窗棂而出。

明御河，在上元县驻防城内。东出青龙桥，西出白虎桥，至百川桥，入城濠。

后湖，在县太平门外，周四十里，中有旧洲、新洲、龙引洲、莲萼洲。燕雀湖旧在上元，今驻防城值其地。

稳船湖，在县佛宁门外。

半阳湖，在县城东北。

掇湖，旧在县掇山侧。

白米湖，在县城东。青溪，在县古溪水，发源钟山，北通潮沟入于淮。自杨吴城金陵水分为二：一自驻防城内穿城而西北转至竹桥，合于杨吴城濠之水；一自内桥至昇平桥，与护龙河合。又过四象桥至淮青桥，与淮水合。

乌龙潭，在县清凉门外。

新开河，御赐名便民港，起上元掇山，至句容龙潭。又东至镇江、丹徒，下师古滩入于江。

义沟渎，在县治东二十里，下流入秦淮，溉田百余顷。久湮。

(以上上元县)

绛岩湖，在句容县西南，原出绛岩山，县南境诸山溪之水悉流入焉。下通秦淮，上元之田赖以灌溉。吴赤乌中，筑赤山塘，后废，唐大历中修复之。周一百二十里，立二斗门以节旱潦，溉田万顷。又有百堰堰，在县西南三十五里，与斗门同置，湖水由此入秦淮。南唐修筑，不废。宋时，湖禁尤严。湖心有盘石，以为湖水疏闭之节。庆历中，又立石柱，刻水则于其上。

官塘河，在县东白土市。

新河，在县东来苏乡。

斗溪，在县南。

(以上句容县)

石臼湖，在溧水县西南四十里，高淳县西二十里，西连丹阳湖，出芜湖入江。《寰宇记》：水旧有二派，入龙潭、梅梁港通浊水。沙湖在县南，周五十余亩为堰，以溉田。《一统志》：湖今为埭，名沙塘埭，以资灌溉。

沙湖，在县南六十里。

石龙潭，在县南九里。

蒲塘港，在县南二十里。

还步港，在县东南三十五里。

(以上溧水县)

固城湖，在高淳县西南五里，北通石臼、丹阳二湖，与当涂、宣城界。旧由宜兴入太湖，后筑五坝，遂与太湖隔。

藕丝堰，在高淳县北三十里，自寻真观北至石臼社凤凰桥折入横沟，与溧水分界。沟汇戴家城江夏桥诸水，并出堰口。内有圩杆十余座。共计田万余亩。

洪漕坝，在高淳县西三里，自襟湖门外西新桥及正义桥，过永丰仓桥，至坝北随花犇冈，出薛城大葑桥。

漆桥河，在县东三十里。

澄沟河，在县西三十五里，宣城水由是入芜湖。

横溪、东溪、芦溪、炼溪，皆在县境。

王母涧，在县东。

牛儿港、于家港，在县南。

白龙潭，在县南五十里秦家圩内。

(以上高淳县)

珍珠泉，在江浦县东北，溉田甚广。《一统志》：在定山西南麓，东流入江。

汤泉，在县西北，水流数里，灌溉甚广。

琥珀泉，在县东北，溉田甚广。

汤沟泉，在县东北，溉田数十顷。《一统志》；北流入三河。

墨泉，在县沧波门外，界六合。其色黑，又名黑水泉。

韦游沟，在县西南乌江镇，引江水灌田五百顷。

东龙塘，在县南四十里。西龙塘比东塘差小，并藉以溉田。

孤塘，在县西三十里，溉田甚广。

(以上江浦县)

石梁溪，在六合县西北。

芳草涧，在县东北三里。

冷泛涧，近县屏山。玛瑙在灵岩山。

程驾港，在县西二十里，下入滁水。

惜水湾，在县东南十五里。

石脚滩，在县滁水东岸。

葫芦套，在县西五里。

河子沟，在县东南二十五里。

东沟，在县长芦寺侧。

(以上六合县)

苏、松，常三府水利已详见太湖。

镇江府

凡丹徒、丹阳、金坛、溧阳之水利不与太湖通者。

丁鼻塘，在丹徒县西十八里，北入大江。明时，为民隐占。万历中，县令庞时雍浚之，以备旱涝，民称其便。今复半为田矣。

甘露港，在县北固山，下通大江。宋转般仓在此，史弥坚尝浚之。今淤。又有新港在京口、甘露二港间，明弘治中浚。(以上丹徒县)

九曲河，在丹阳县北，南接漕渠，北达大江，委蛇七十余里。

简渎，在县南五里，一名香草河，南接延陵镇诸水，东北达漕河。珥渎河在县南七里，自漕渠经珥村镇达金坛，俗称七里河。丁义渎在县南三十里，自鹤溪分流溉田。

(以上丹阳县)

大溪，在金坛县西二里，一名清蒲河，通昆仑河，东南流入长荡湖。又高湖，在县西北十里，周百余顷，北受五十渎之水，南流入大溪。又直溪，在县西三十五里，受茅山丁角诸水，东南通大溪。

思湖，在县南六里，一名白龙荡。

(以上金坛县)

梁城湖，在溧阳县西六十里，俗名三塔渰。周四十里。

荆山塘，在县西南四十五里，一名官塘。有司浚之，而民利焉。

百沟，在县南五里，一名百步沟。源出燕山，东流入白云溪。设坝储水，以资灌溉。

(以上溧阳县)

淮安府

涧河，在府城外运河东岸兴文闸下，分泄运河暴涨，灌溉山阳、盐城二县。按：相传宋时所开，古名菊花沟。上承诸闸洞之水，由新城东关至北涧；南涧经汴塘至黄浦之涧河，下接寿河出泾口，归射阳湖入海。此古涧河也。自黄淮冲决，故道湮淤，明嘉隆间另辟涧河起，联城门外，直下寿河，名曰大涧河，即今涧河也。

宝带河，自杨家庙兴文闸承运河分流，北至联城东闸，外接涧河。

故城河，即古寿河，旧在治东南。西南接黄浦涧河之水，东入射阳湖。

市河，上承山阳兴文闸，下分运河水贯文渠，出北门，转东注马家荡，入射阳湖。

小涧河，在山阳县东，古寿河支派也。下分数支：曰陈家河、樊家河、崔家河、施家河、曹家河、戚家河，经柳城入射阳湖。

牛神河，在县东南，分溪河之水，迳固城专柳城东，并入马家荡。泾河，在县南五十里，分运河之水，通塔儿头、金吾庄，趋射阳湖东北入海。

涵洞河，在运河东岸。旧有头浅涵洞六座，二浅涵洞二座，三浅涵洞五座；又风水涵洞二座。每洞下有渠，引运河水灌溉田亩。

北溪河，上承各涵洞水，东骛下荡入射阳湖。

南溪河，即黄浦溪，在泾河闸南十里，为山阳、宝应交界。明时，高家堰溃决，地当其冲，成此溪。

令乌沙河，在郡城西，引运河水，北至利济桥，西分。一支西北去，达三坝，曰盐河；一支东去，迳利济桥、石桥，抵三孔石涵洞，曰乌沙河，为故沙河遗迹。河西岸有山子湖。

盐河，在县北，明时开大河故道，乾隆八年挑浚。南至乌沙河分流处，西北至草湾、三坝，曰盐河。

鱼变河，俗讹鱼滨河，在郡北运河东岸，有永利闸，引运河之水入乌沙。东为鱼滨，经凤谷村达青沟、夹河，注马家荡。

罗柳河，在县西北隅，设山子湖水入涧河。

刘家河，在县西北，上承安东高家荡等处之鲍营河，宣泄上游西荡姚家庄之水。

永济河，一名新河，在县西南。自运河西岸杨家庙起，达武家墩。

运料小河，自高涧禹王庙前，迄周桥顺水堤。

范公河，在清江浦磨盘口，自普应寺前至县西南杨家庙。明末，船政同知范鸣珂循古河迹挑以御寇。

河，在县西南八十里，古名拓塘。

洪泽湖，在县西南九十里，山阳、清河、泗州、盱眙四界相连。本古淮浦县地，推水经其旁。东北通富陵河，南通白水塘，有三堰。元初，置洪泽屯田万户府，引塘水灌田。自塘不修，汇为湖。白马湖在县南六十五里，与宝应接境。

山子湖，旧有邱家湖因钵池山积水不泄，遂成山子湖，亦称邱山二湖。

白水塘，在县南九十五里，古射陂也。久涸。

青洲涧，在县西南七十里。宋时开。

唐家涧，在县西南，自高堰二堤趾下至白马湖。

洋信港，在永济河西南。久淤。

(以上山阳县)

新洋港，在永济河西南。久淤。

新洋港，在盐城县北门外二里，出天妃口达海。

新官河，在县西七十五里，由大纵湖东北流出天妃口新河，直达新洋港入海。

东界河，在县西南八十里，中流与兴化县分界，自大纵湖入口，东流至刘庄闸，归斗龙港入海。分东北流从串场河出石口。

东官河，在县西南六十里，南接兴化，西接界河，由界首铺入口舍西官河，至泾口入新河。

纪家港，河在县东南，南自兴盐界起，迤东至串场河。

西官河，在县西南五十里，接湛沟河合流于东官河。

射阳湖，在县西北一百四十里，西北抵山阳县分中流为界，由故晋至喻口北沙入海。今分埠邑。

北串场河，在县西北三里，由汉河分支，经新兴场、上冈镇复绕范公堤。东北至阜宁县入射阳湖、旧串场河。

东塘河，在县西北五十里，西南接盐河，西北入射阳湖。

西塘河，在县西北九十里，由沙沟北流，会东塘河，由油葫芦港入射阳湖。

马家荡，在县西北一百里，山、宝、盐三邑分界。东西三十里，南北五十里，入射阳湖。

西盐河，在县西北八十里，由西湖、塘河、黄土沟入口，东流至新河庙转北入东塘河。

九曲河，在县西五十里，傍有龙墩。西通盐河，北通东塘河，南通新方河入海。

廖家港，在县西北六十里，自东塘河东至上冈镇，入北串场河。今名上冈河。

院道港，在县西北七十五里，由东塘河东北流至草堰口，入北串场河。今名草堰河。

流均沟，在县西北山阳下涧河尾间。

(以上盐城县)

郭墅河，在阜宁县西北，起王家山运料小河，南入射阳湖。

大沙河，在县西北，起运料河达射阳湖。

章家洼河，在县西北，由山邑小茭陵历阜邑苏家嘴，入窑头河。南出渔滨河口。

民命河，在县西北，自芦铺抵板沟，入射阳湖。

民便河，在县西，自郭家桥抵小沙河。

小沙河，在县西陈家集。

界沟河，在县东北。今淤。

横沟河，在县东北，起岗根套，讫刘家簰，入射阳湖。

放生河，在县东北，运料新河之尾间。

九灶河，在县东北，傍海多灶场牢盆。自獐沟河下通射阳湖。

丹沟河，在县东南，接东塘河达射阳湖。

渔滨河，在县南，承东塘河西出射阳湖。

青沟镇河，在县西北，旧有渡。上承渔滨河、马家荡，分流入射阳湖归海。

苏家嘴河，在县西，旧引黄河交夹堤涵洞外泄之水，入渔滨河，串场河，南接盐城草堰口。

马港河，在黄河北岸羊寨。久废。

(以上阜宁县)

上中河，自宿迁骆马湖，历桃源众兴集，至清河杨庄闸入黄。

下中河，一名盐河，自清河县中河北岸盐坝口起，历山阳朱元庄，至安东县迤下平旺河，归潮河入海。

六塘河，自宿迁经桃源，至清河分南北二股：北由沭邑之钱家集绕安东硕项湖北，由海州龙沟出义泽河，入潮河归海。南由清河邑之刘家庄、韩家庄，历安东之古寨，至沭邑之孟家渡、武障河，入潮河归海。

便民河，自娘子庄起，至永兴镇入张家河，归南六塘河入海。新河，泄运河异涨，兼济柴盐重运。

营河，在县东北胡贤口北。

富陵河，在洪泽镇西，其源出盱眙塘山，至刘家渡入淮。

史家荡古河，自史家荡起，入包家河。

包家河，自运河堤起，穿御路入南六塘河。

(以上清河县)

民便河，在县北门水关门外，自水关门起，由茆良口、胡家楼、佃湖等处，抵响水口入北潮河。

官河，在县三十里。

一帆河，在县北三十里，西接涟河。

平旺河，在县东北八十里，东通一帆河，西接官河，上泄硕/-/项湖水，入遏蛮河下海。

鲍营河，在县西，自张家庄，历沙家练湖、张官诸荡，由官岔河过废堤，入旧鲍营河，注南六塘河。为诸荡出水尾闾。

莞渎河，起袁家庄，迤新安莞渎诸镇，抵三岔口，达盐河归海。

西河，在县西二十里，自中河、盐坝至高家沟、上三叉河，接硕项湖，达海州五丈河入海。

尤家荡河，承孙家大涧泄水，入南六塘河。于出口建闸，名华家口。

支家河，宋赐名通涟河，在县西十五里，南通山阳县新沟，达山阳河北关厢，北接成子河及中涟河。今淤。

涟水，自沭水分流，南入县境。在沭阳者，曰南涟水。入安东者，曰北涟水。昔有中涟河、东涟河、西涟水。今皆淤塞。硕项湖，在县西北一百二十里，西通沭阳县桑墟湖，东南有关头河、白头河、盐场河、平旺河分泄入海。

南潮河，在县东，直达大海。旧泄黄河。堤北积水，近淤浅。

(以上安东县)

上中河，在桃源县境。旧以三义坝以下用新中河之半，三义坝以上用旧中河之半，合为此河。

学城积水河，在县北三十里，泄六塘河堤南积水，入清邑包家河。

张家庄泄水河，入六塘河。

崔镇引水河，入六塘河。

姜家洼引水河，入六塘河。

倪家荡泄水河，在县北三十五里，泄上游垅沟本荡之水，达清邑响水口，入包家大河。

九龙潭泄水河，在县西南六十里，泄林子等湖水，入泗洲境，达洪泽湖。

蒋沟泄水河，在县治西二十五里。

房家湖泄水河，在县治西二十五里，旧泄卜家湖、长湖、房家湖三处之水入黄。

泄水官河，在县北三里。

安河，在县西七十里。马牙湖北接归仁，南通洪泽。

白洋河，在县西六十里，上通汴河，下达黄河，东属桃源，西属宿迁。

崇河，在县北。

夹河，在县北众兴集。

后河，在县北，上通六塘河，下通海口。

秃尾河，在县北。

小崇河，在河头集，水自宿迁灌入。

砂疆河，在川城北，由骆家马湖水冲通下松树、张口，经沭阳至海。

程子河，在县南，南至泗洲，北至陆家嘴。

邵家湖、西湖、谷家湖、佃湖、王化湖、柴林湖、马牙湖、长湖、房家湖、教场湖，皆在县西。

仓基湖，在县南，通淮。

灵城湖，在县北。

赤鲤湖，在县北老鸛汀，南通涟水，入于河。

白马湖，水晶湖，在县东北。

大庄湖，马厂湖、杜村湖，皆在县东南。

卜家湖，锅底湖，皆在县西。

墩子湖，在县东北。

姚家荡、董家墩、獾家荡，在县北川城。

乌龟荡，在县东北。

刘老涧，上承运河，入六塘河。

(以上桃源县)

扬州府

市河，在府治东，由南水门至北水门，城外四围皆通州。

运盐河，在城东北二十里，汉吴王濞开。自湾头起，东行七十里至斗门，入泰州界。又东行一百六十里，至海安，入如皋界。又东南行一百一十里至白蒲，入通州界。又东行七十里至新塞，入海门界。又东行八十里达吕四场。其支派通各盐场，皆为盐运河，统名之曰串场河。

白塔河，在城东北六十里，明平江伯陈瑄所穿，南入扬子江，北际官河。建新开、大桥、潘家、江口四闸，以蓄泄水。

沙河，在城东十里，宋雍熙初，淮南转运使乔维岳开。自运河通扬子江。

山洋河，在城东北六十里，濒宜陵镇，一名山阳河。旧通运盐河。南接江潮，北接至樊汉达高邮界。

宝带河，在南门外文峰寺北，一曰玉带河。

新河，在城南二里，自南门二里桥西折而南，而东，从姚家沟入旧官河。

三河，在城西南一十五里，江都、仪征、瓜州至此水分三支。故康熙三十八年赐名茱萸湾。

芒稻河，在城东北，自湾头入运盐河，东十里南通江，西北接金家湾通邵伯湖，一名蟒导河。

瓜洲闸河，在城南四十里，通惠、广惠二闸至江口。

瓜洲月河，在广惠闸上。

横塘，在城东四十里宜陵镇。

岳家荡，在扬子桥西南。

第二港、第四港、第八港、深港、华家洋港、倒流港、双港，皆在城南。

蚬子港，在城东。

马伯港，在城南。南接深港，北接三里沟。

七里港，在城南，一名十里港。久湮。

进水深港，在城东北。

十坝港，在瓜洲镇。运河东西坝凡十，各有港以通江。

官沟，在城南三十里，由河东乡南通扬子江，北抵马墙。

山扬沟，在城东北三十里，一名山阳渚，又名山阳渎。隋开。

张网沟，在城东三十里平辽乡。后汉张网开沟引大石湖水以灌民田，因名。

茱萸湾，在城东北二十里，今名湾头。

(以上江都县)

淮子河，在甘泉县城东北十二里，西接雷塘，东达运河，与槐家河相属。

槐家河，在城东北十五里。

陈公塘，接雷塘引水至湾头入运河。

保障河，在西一里，俗讹曰炮山河。自南通古渡桥，北抵红桥，西绕法海寺。

龙河，在城西北炮山河前，东通运河。

柴河，在城北三里，东通运河，西接市河。传为旧城濠。

人字河，在城三十五里，亦曰新河。

邵伯月河，在城北四十五里，一作越河。康熙志：万历二十八年，总河刘东星于运河东筑越堤，引河以避湖险。

新月河，在邵伯镇南，一作新越河。康熙三十八年，洪水冲决，南坝堵塞，后开是河。

凤凰桥引河，在城北三十五里。

邵伯湖，在城北四十五里。晋太傅谢安修筑湖埭，比以邵伯，故名。

艾陵湖，在城东北四十五里。

太石湖，在城东北四十五里平远乡。

白茆湖，在城东北黄珏桥镇东南，南有新城湖，东有朱家湖。新城湖北过汤家泮为邵伯湖。又北过东庄嘴为黄子湖。又西为赤岸湖。

淶洋湖，在城东北六十五里艾陵乡，西南接艾陵湖，东北半属高邮州界。《水经注》：淶洋作陆阳。万历《江都志》、《邵伯志》：黄子、赤岸、新城、白茆、朱家六湖皆在官河上岸，水相连接。艾陵、大石、葑塞、淶洋、瓮子五湖，皆在官河下岸，受水者也。

雷塘，在城西北十五里。旧有上下二雷塘。上雷塘长广六里，下雷塘长广七里。今为汉田。《汉书》作“当陂”。

句城塘，在城西三十五里，唐李袭誉行雷塘水筑此，溉田八百余顷。运河、亩浚之水皆会焉。又有小新塘在府西北十里，长广二里余。考陈公塘、上下二雷塘、句城塘、小新塘，旧为扬州塘，历代用以灌溉。

蔷薇港，在城东六十里，一曰蔷薇沟，相传古之蔷薇村。接高邮水贞港。

(以上甘泉县)

市河，在仪征县城内，江水由南水关入，淮水由东水关入，合流灌沟港。

河，在县东十里，出山涧，入官河。一自汉河北至城西南灵潮堰，久塞；一自汉河南，西越两闸出江。河东达扬州官河。

靖安河，在县西五十里，即沙河也。今湮。

下新河，在县西南二十里。上新河与下新河相接。

钥匙河，在县西南。河分二派：一西北行至胥浦接铜山界；一折而南行为上口，入于江。上口今名冷家湾新河口。明万历五年，知县况于梧开新河后，铜山源诸水悉从此出，与县不相顾。

十字河，今关王庙前通上下口者，水入于江。

城南新河，在马驿街西。崇祯九年，流寇至六合，守备程宏远开以卫城。

里河，在县东南二里，即今东关内西抵莲花堰者，莲花池故地也。《康熙县志》：吴楚舟楫俱自外河支渠入此，以达京师。

外河，在县东南二里，自里河口闸下通济诸闸，会大横河入于江。

堰河，在东翼城外，与莲花池通，今文山祠前河水阔处。

怀子河，在县东北三十里，河西为卢家堰，前为安抚司坝。

玉带河，一在泮池瀛洲堤外，通市河；一即城南永济桥下旧河，南通凤凰达闸河。乾隆六十年，盐政苏楞额复通之，引水入。

猪钩沙，在县东十里三都，与铁钉港相联。

茆家山塘，在仪征县境，与北山相对。旧有石坝潳河水，可溉田五百顷。

一戕港，在县西南一十五里，与青山港并。为神山、青山诸水所会，南入于江。

铁钉港，在县东南二十里，即宋珠金沙边地。为新城、三都诸水所会，南入于江。

黄连港，在县东南二十五里，有桥道通新城。其水出杨林桥，与何家港对，为三都、两图、亩浚诸水所会，西南入于江。

何家港，在县东南三十里，接运河南境，为三都、四都诸水所会，南入于江。其下

口一名窑港，又作瑶港。

麻线港，在县东三十五里，接运河南境，为五都诸水所会。南流五里与何家港合，入于江。

(以上仪征县)

市河，在高邮州治西新旧二城内。

运河，自界首入境，西受蠡社三十六湖所汇七十二涧之水，南至露筋三十里入甘泉。

康济河，在城北，亘四十余里，即今运河之半。明侍郎白昂开，孝宗赐名。

闸河，旧名运盐河，在州北遐观桥下，东抵兴化县新开湖，即今之东河。

西上河，在平津堰西南下河北。下河在堰东。

城子河，自南门馆驿后东抵各盐场。

北城子河，在州东，自南河头至十里尖，与城子河合。

南濯衣河，在州治南安定桥下。北濯衣河在通济桥下。皆西通市河。

广储仓河，在旧城南门内，东通市河。

淤溪河，在州东，南通淥洋湖，西抵运盐河堤。

白塔河，在州岳庙东南，北通运盐河，南抵焦里村。

山阳河，在州东四十五里，南通樊泼镇，接江都、山阳河界；北自三垛桥子口入射阳湖，达淮安、山阳县界。隋开皇七年，扬州开山阳渎以通，即此。

横京河，在州东北七十里义兴村，东通兴化县，西注射阳湖。

秦兰河，在州西六十里。自天长冶山发源，东入武安、新开等湖，接天长县界。至秦兰大桥以北俱县境。

人字河，在二沟东南，东通运盐河，北通横京河。

宝带河，在州东三垛镇前。

郭家河，在州北看花洞下。

马霓河，在州北界首镇下。

赵家河，在州北山阳河、罗家圈东。

杨家河，在城西六十里。

殷家河，在菱塘桥西。

新开湖，即高邮湖，在州西北三里，其水南北俱通官河。天长以东诸水汇此达于湖。

平阿湖，在州西八十里，通天长县铜城河。

五湖，在州西六十里平河东村，通天长县铜城河。

珠湖，在州西七十里，通五湖。

张良湖，在州北二十里，通七里湖。

石臼湖，在州西北五十里，通鹭社湖。

姜里湖，在州西五十里，通塘下湖。

七里湖，在州北十七里，东通官河，西通鹅儿白湖。

鹅儿白湖，在州西二十里，通张良湖。

武安湖，在州西南三十里武安村，通筋河，亦名南湖。

塘下湖，在州西四十里，通鹭社湖。俗名唐家湖，一名赤岸湖。

仲村湖，在州东北六十里眉陈东村，通鼃潭湖。

鼃潭湖，在州东北九十里中临村，通海陵溪。

月塘，在州城东北。

马饮塘，在州城南。

万家塘，在州城西北，通新开河。

石梁溪、平阿溪，在州西北，自天长县发源入湖。

樊良溪，在州北二十里，自天长县石渠河流入州界。古樊良湖也。

海陵溪，在州东，北通兴化县，西抵新开湖堤。兴化、宝应二县亦俱有海陵溪，其实一也。

烧香港，一在州西北十里，通鹅儿白湖；一在州东二里，南接城子河，北抵盐运河，西入庙桥。皆以便东岳行宫之烧香者，故名。

卖菜港，在州北九里故县村，南至新城，北至通花师潭。

吴城头港，在州西北四十里，通平阿溪入五湖。

马踏港，在州东北七十里义兴村，东通海陵溪，西入射阳湖。

茅塘港，在州西十五里。雍正二年，知州张盛德挑浚。今渐淤。

罗家港，在城西二里。四汉港，在州西南五里。五汉港，在州西南十里。杨丝港，在州西七十里。洋洋港，在州西。黄白港，在州西北四十里。太师港，在州西南三十里，通太师莹。

小堰港，在州西北三十里。曹家港，在州北七十五里。南沙港，在东北。

王家港，在州西南五里，引高邮各湖之水入邵伯湖。砂子港，在州西北沛城东村。青山庙港，在州西五十里。马家荡，在州西北三十五里黄林村，东通新开湖、黄林荡，南连葑池，北抵陆田。

黄林荡，在州西北三十五里黄林村，东通马家荡，西抵黄林村，南通葑池，北抵陆田。

聂里荡，在州西三十里沛城村，南通七里湖，东至新开湖，西北绕沛城村。拟儿荡，在州西三里新沟口。井子荡，在州东北三十五里。南阳荡，在州东北。

羊马儿荡，在州东北十五里故县村，南通七里湖，东至新开湖，西北绕沛城村。

时家荡、秦家荡、张家荡、鱼池网荡、沙母荡，在州东北四十五里。

张家沟，一在州北三十里，南通新开湖；一在州东二十八里，通淶洋湖。

子婴沟，在州北九十里，东南注射阳湖。旧有闸二座，久闭未开。康熙六十年，知州张德盛浚。至临泽出荡口。

清水潭，在州北二十里故县村新开湖堤旁，地势低洼，当河淮下流之衝。

(以上高邮州)

市河，在兴化县城内，通四水门。

运河，即运盐河，县南四十五里，接高邮州河口镇之丰乐桥。北六十里，接邹庄，至盐城县界首铺。

蚌沿河，在县南三十五里，接陵亭镇，与泰州分界。东入运盐河，一作蚌涎河。

车路河，在县东三十里，自丁溪场入得胜湖。

海沟河，在县东北四十里，自白驹场入运盐河。

蒯墩河，在县南十里。《嘉靖府志》：十五里河北有一墩，约高丈余，周六七丈，或云古冢。水自得胜湖入运盐河。

白涂河，在县东北十里，自小海场入运盐河，亘一百二十里。

山子河，在县西四里，通海陵溪，转入射阳湖。

义亭河，横泾河，在县东，自车路河入白涂河。

凤凰河，在县北三十五里，自长安河入大纵湖。

梓新河，在县东南十五里，自塘港西出得胜湖。

芦洲河，在县东十三里，自得胜湖来，入南溪下运河。

和尚河，在县北五里，入新沟。

滑庄河，在县北二十五里，自海陵溪入精阳溪。

仲家河，在县北十里，入平望湖。

新沟河，在县西北一里，自莫家河入平望湖。

孟家河，在县西南二十七里，入海陵溪。

院庄河，在县南十七里，入海陵溪。

莫家河，在县西惠政桥下，自沧浪关入下河，转入新沟。

刘家湖，《嘉靖府志》：在县北十二里，入平望湖。《县志》：在县北七里，入新沟。

蒋家河、孙家河，在县北十二里，入平望湖。

赵家河，《嘉靖府志》：在县北二十七里，入平望湖。《县志》：县北十七里，入吴公湖。

韩家河，在县北三十里，入吴公湖。

玉琼河，在县北三十五里，入大纵湖。

玉带河，在县北门内，引南门水入市河。

既济河、卢家河、陈图河，在县北四十余里，入大纵湖。

博真河，在县东南一百里，自泰州界入运盐河。

串场河，在县东一百二十里。在境内者名拽盐河。河南循捍海堰，经各场入运盐河。

牛湾河，即斗龙港。丁溪、草场、小海诸河流皆会于此。

得胜湖，《嘉靖府志》：即率头湖，在县东十里，广袤皆二十里。东南通泰州丁溪场，西北通运盐河。

平望湖，《嘉靖府志》：在县北二十里，南通新沟，北接丁沟。

吴翁湖，一曰吴公湖，在县北二十三里，西入海陵溪，通宝应。昔有吴高尚隐此，故名。

鲫鱼湖，在县东北二十三里，多产鲫。

白沙湖，在县东南三里，《南兖州记》：湖岸多白沙，故名。

千人湖，在县东一百二十里。相传隋末有千人避乱于此。

大纵湖，在县西北四十五里，西南至九都，自湖心与盐城县分界，入射阳湖。

东溪，在县东一里，自南溪入运盐河。

南溪，在县南半里，一名沧浪溪。宋范仲淹筑沧浪亭于此。

海陵溪，在县西十三里，高邮、邵伯来水所经。南自泰州来合高邮州河，西入射阳湖。

武陵溪，在县西北四十里。

精阳溪，在县东北四十五里，自白驹场入运盐河。

竹泓港，在县东三十里，通芦洲河。

东塘港，在县东六十里，通泰州运河，北通盐城蒙喻。

西塘港，在县东六十里。南北横亘通梓新河。

龙垂港，在县南海陵溪。北至兔儿港，入平望湖，在涝水泓西。

沙家港，在县南十二里，通新庄港。

新庄港，在县南十里，通北昌家港。

北昌家港，在县南五里，通南昌家港。南昌家港在县南四里半，通王家港。

何家垛港，在县东南三里，通运盐河。

百花洲，在南郭门外。芦洲在县东十三里。

莲花六十四荡，在县东南半里许。《县志》：自芦洲接得胜湖。

旗干荡，在县东十三里芦洲南。宋岳飞驻师于此。

乌金荡，在县西半里，通海陵溪。《县志》作乌巾荡。

南白驹闸、北白驹闸，二闸俱在海口，通牛湾河，以节启闭。

(以上兴化县)

市河，古名宋泾，在宝应县城内。受二闸所入水，贯于城而东注望直港。

运河，自县南六十里界首入县境。又北去二十里黄浦接山阳县界。

宏济河，在泛光湖东，延袤三十六里。万历十二年开。

济河，在县西南八十五里，北接衡阳河。

成子河，在县东南十八里，西北接望直港，南入章思荡。

衡阳河，在县西南六十里，西连衡阳镇，东入洒火湖。

泾河，在县东四十里，西接界淘沟，东入射阳湖。

蚬墟河，在县东北六十里，东西皆入射阳湖。

潼河，在县东南六十里，西南接子婴沟，东北入广洋湖。

盐河，在湖东。阴隲河在湖西。万历十九年知县耿随龙开。

学河，嘉靖四十三年，知县李瓚开。自跃龙关引运河之水，堰而为渠。入城注爱莲池。穿渠东入市河。

玉带河，万历中知县韩介、耿随龙相继于县城内别浚一河，从广惠桥折而西，环绕城中。

支河，《万历县志》：在湖东。

清水湖，在县城南，西南连泛光湖，东会运河，西通间邱溪。

泛光湖，一作范光湖，在县西南十五里，东北通清水湖，南会津湖，西接洒火湖。

洒火湖，在县西南四十里，西通衡阳河及赤水涧，南接安宜溪，东北入泛光湖。

津湖，在县南六十里，东通官河，西北会泛光湖，南接高邮界。《三国·魏志》作精湖。

白马湖，在县北十五里，西连三角村，东北会运河，北接黄浦。

广洋湖，在县东南五十里，东南通沈垛港，入博支湖，西南接潼河，北连獐狮荡，东北会三王沟入射阳湖。

射阳湖，《嘉靖府志》：在县东六十里；《寰宇记》：阔三十丈，长三百里。

博支湖，在县东南九十里，西北通广洋湖，北接马长汀。

梁湖，在射阳湖北。

白水塘，在县西八十五里，北接山阳县，西南接泗州盱眙县界。一名白水陂、羨塘，《唐地理志》：在县西南，与白水塘合。

海陵溪，俗呼琵琶头，在县东九十里，西北通射阳湖，接马长汀。陵一作冷。

瓦沟溪，在县东南十五里，东北入望直港，南通涧沟。

黄浦溪，在县北二十里黄浦镇南，西通官河，东入凌溪，会射阳湖。《嘉靖府志》作黄浦溪。

凌溪，在县东八十里，南通黄昏荡，北接黄浦溪，东北入射阳湖。

间邱溪，《嘉靖府志》：在县西十五里，西通白水塘，东南会清水湖。《康熙县志》云在县南。

安宜溪，在县西南六十里，东北入洒火湖，西南入高邮界。

望直港，在县东十五里，西接宋泾，北接黄昏荡，西南连瓦沟溪，东南通城子河。

刘家港，在县东北四十里，西接蚬墟荡，东北入射阳湖。

沈垛港，《嘉靖府志》：即沈驼港。在县东南八十里，东南入博支湖，西北入广洋湖。庐洲在县东十三里。

黄昏荡，在县东七里，南通宋泾河，西接七里沟，北通凌溪，东抵三阿乡。

火盆荡，在县东三十五里，南通獐狮荡，北接黄浦溪，东入关车荡，西连望直港。

獐狮荡，一作章思荡，在县东南四十里，南通广洋湖，北接火盆荡，西接成子河，东距双女冈。

关车荡，在县东四十里，通火盆荡。北入泾河，南抵王野乡。

蚬墟荡，在县东北四十五里，东入刘镇港，西南接界淘沟。

界淘沟，在县东四十里，俗呼拾拖沟，西南接瓦沟溪，东入泾河。

子婴沟，在县南六十里子婴铺北，西通运河，北接潼河。

(以上宝应县)

市河，在泰州城，南水门入，至北水门出，通运河，曰中市河。又有东市河，自中市河分析，至东水门出，以通外河。后东水门塞，复自东门新开一河，接连南北。又有西市河，自通水门入，通新河。俱从北水门出，名玉带河。

东河，在州东三里，通北运河。

济川河，在州南，自运河坝三十里至庙湾，又二十里至济川镇，通扬子江。

浦汀河，在州北，自鱼行坝直抵兴化、高邮、宝应，即海陵溪也。

于祈河，一名于溪河，在州东北三十里。阮昇之记。侧有于祈村。

鸭子湖，在州南二十里，周二十五里，西通济川河，东接运盐河。

鸡雀湖，在州东北四十里，周三十里，水自于祈湖入。昔多鸡雀飞集，故名。

包家湖，《嘉靖府志》：在州东北四十里，周四十里。清而无滓。一名包老湖。

小西湖，《嘉靖府志》：在州起云楼之下。宋绍定二年重浚，周一百八十七丈，为长堤植芙蓉、桃李如西湖。清瓶港，在州东九十里。

罗塘港，在州东四十五里，即今姜堰河。城子港，在州南三里。

丁溪下海闸，泰州串场河宣泄要津也，远自运河各闸下注之水，近由兴化漫入车路之水，并归串场河。东达万盈墩，合小海河流汇出王家港以入海，民田无旱潦之患。

(以上泰州)

市河，一名玉带河，自东台县串场河入南门分支；东支由严家桥至龙王庙后出外城河；西支由玉带桥至三元官右。复分二支：一由马公桥北折而东，止盐关；一出城西小桥合黄金坝之流，西北入串场河。

梓新河，在县西，自海道口、北串场河迤西，经潘洋汉至兴化县一百二十里，上承高邮各坝减下之水。

蚌沿河，在县西，自梓新河、汇河口九十里，经陵亭阁西至高邮州一百八十里，上承高邮各坝减下之水。

运盐河，在县西南，自海道口出青浦角，经秦潼、淤溪湖抵泰州一百二十里。又自秦潼西入思贤港。一经乔树抵邵伯镇一百八十里。一出孔家涵由六闸抵郡城二百七十里。上承上运河邵伯各坝减下之水，由渚洋、艾陵等湖经泰州小溪河入运河，归串场河，出丁溪闸，下古河海口入海。《行水金鉴》所谓下运河，又名北运河。

串场河，在县南，自富安场北经安丰、梁垛二场至县城五十里。自县城南门经何垛场入海道口。由丁溪、草堰、白驹、刘庄、伍祐各场至盐城县一百六十里。

十八里河，在县南十八里，自梁串场河迤西殷庄，至县城南门十八里，故名。为梁垛运盐入运河之要津。

六十里河，即三汊河，又名大尖河，在县南二十五里。自安丰串场河之李家港迤西六十里，出青蒲角，由秦潼抵泰州。为富安、安丰运盐入运河之要津。

富安新河，即海安新河，一名东官河，在县东南四十三里，自富安串场河通远桥迤南，由贾家集至海安镇三十里。内支河二道，一抵徐家坝，一通百子桥涵洞，乃一县来水一源。

富安旧河，一名阔河，在县治东南。古运盐出上官河经此，亦名运盐河。自富安西场由滥泥河至海安镇中坝。

杨冒河，即杨蛮河，在县东南。由富安串场河通远桥，经贲家集迤东十八里出上运河。

拼茶河，在县东南九十八里，自上运河立发桥内之新河口起，由范家浅沿港口至拼茶场五十四里。一由场西石桥南折出丁堰运河，一由场东庙港经丰利岔河镇出掘港运河。四境地势俱高，河水泛滥，皆由庙港下黄沙洋闸口入海。

角斜河，在县东南一百三十四里。由拼茶上运河滩河口北折十八里至丰家滩。再北五里即角斜场旧地。又北三里至范公堤老坝口。

李家堡河，在县东南一百十六里，由拼茶上运河新河口北折十八里至李家堡。为拼茶分拨运盐之要津。

西塘河，即西塘港，在县西六十里。

宁乡河，在县西南六十里。

灶河、在县治范堤东，各场灶户办煎运盐之河。东抵海滨，西抵场垣，支河议港，总名曰海河。

丁溪引河，在县北十八里。自丁溪闸至沈家灶五十里，乃丁溪场。

小海引河，在县北十八里。自小海闸至小海团五十里。

草堰引河，在县北二十八里。自草堰闸至西团五十里。

忠义河，在县西北五里。

辞郎河，在县西北五里西溪镇。

仇湖，在县南四十里，周三十里。阮昇之记，昔有仇姓居此，故名。又名白龙潭。

西溪，一名晏溪，在县西五里。宋丞相晏殊尝官此，故名。

施家溪、倪家溪，俱在县南五十里，即双溪河。

李家港，在县南二十五里。

龙开港，即斗龙港，在县北范堤东七十八里。港形纡回屈曲。

王家港，在县北范堤东。

九龙港，在县西门外慈济寺前。

富家滩，旧名费家滩，在县南一百五十里。今角斜场移此。

古河口，即卤河口，在县北范堤东。

瞳口，在县东南六十二里，西接泰州。

大小缺口，在县东南五十七里，南通老树孔，接杨冒河。

汤家泊，在县西南，广四百余亩。

天鹅荡，在梁垛场范堤东四十五里，东西广八里。

白莲荡，在何垛场范堤东。

潘洋，在县西北四十五里，接兴化界。

黄沙洋，在县南一百九十里，为耕茶场海口，接如皋界。

(以上东台县)

徐州府

奎河，在铜山县城南奎山东，东逼黄河堤，一名支河。《明史·河渠志》：自云龙山西、石狗湖北出苏堤，经山西麓。又北入郡外城，东受郡城积水。又东南过伊家桥，左受魏家河水。又南至贾家桥，入萧县境。

贾家河，有二源。西源，上承银坑泉，东流受四铺、三铺湖，又东南右受萧县雾潴泉水，又东南至周家庄南，左合东源。东源，水出女娥山东崔泉，南流左受一水名朴河，又南与西源合。有冷泉水自西南来注之。自周家庄横沟塞，水溢则潴为灌沟湖。今由周家庄南，至望州山北，入萧县界，郡城以南诸山水，皆赖宣泄。

魏家河，在铜山县东南，导源梅花山，西北经棠黎、张寨，又西南入奎河。

荆山口河，在城北二十里，广数百丈。上承微山湖，出蔺家山坝、张孤山闸下，名茅村河。下合诸山溪、苏家山引河，旧名南北新河。又东南经荆山桥，又折而东北经大小黄山南。又东北经虎山北，又东北，左合屯头湖，又东至吴家窑分二：一由泉河、官庄、汴塘；一由辛贾山东为房亭河。皆入邳界。

房亭河，在城东。有二源：一上承吴家窑荆山口河；一由出头山石闸，历苏家楼、姥家庄、王家林、东西滩头，受茅家山、回山诸水，至二岔河，又受一手禅河水，过曹家庄、贺家口至大墩入邳州境。

屯头湖河，在城东北五十里。

微山湖，与山东滕县及沛县接境，中有微山，故名。山属滕，东西四十里，南北八十里，与沛县昭阳湖通。为府北境巨浸。

黄山湖，在微山湖东；城子湖，在象山下。今俱并入微山湖。

汴塘湖，在城东北百余里，南流入邳州境，汇于运河。

鹅儿湖，《县志》：在城东辛贾山下，纳凤凰山所出柳泉之水。

成山湖，在城东南七十余里，相连者为青冢湖，凡四十余里，下入沂河。相近为泥沟湖，下合双沟。

马隔湖，在城东偏北四里，周约十里，北临九里山，西临子房山大堤北首。

店子湖，在城东响山南、虾蟆山东。东有乔家湖。水东注房亭河。

吴邵湖，在出头山下，注房亭河。

大汪湖，南临大坝。

薛家湖，在东吕梁山东。逾河西南有暑兰湖。又西北，逾山有四铺、三铺湖，潦则积水。注望州河。

石狗湖，在城西南三里云龙山西，时没时涸。古曰簸箕洼。

金家湖，同治五年徐海道李鸿裔捐挑，引渠达石狗湖。

马厂湖，在城西南。湖南即萧县境。

(以上铜山县)

望州河，在萧县，自铜山界南经望州山，北右合沈家峪河，又南右受池山湖水。又南潞为望州湖。又南经大海子东。又南入宿州界。

白米堰，即倒流河，在县东南三十里，西北流过庙桥，入双桥湖。

龙山河，上承烂石湖。西南流经城南，右受县城诸山水。又南流受黑龙潭水。又经嶂山东，西南经丁公山东。又南经浮绥山西。右合箕谷山水。又南入宿州界。

箕谷山水，有二源：一出冒山箕谷泉；一出火石山名山沟，合于冒山店寨北。南经其寨东。东南流经尖山南。又东南经丁公山南，入龙山河，与古箕谷水同源异委也。

沈家峪河，自天门山沈家峪东北经赵家楼寨西，又东北经李家古寨南，合山河东经桃山北，东沿铜山界入望州河。

山河，双顶山东南连峰曰茅山，山南有泉，曰吕泉，导流东经渺沟寨内，东北经大京山西，又北经拐山西，左合五眼泉水。其水二源：一出天门山南五眼泉，一出皇藏峪东，合而东，又会獐鹿诸山之水。又东合吕泉水，是为山河。北至李家古寨，入沈家峪河。

浮绥湖，《一统志》：县南二十里浮绥山东。

永固湖，通永固山下，俗称海眼。

梧桐湖，即古梧桐陂也。今永固、梧桐、时村三湖皆湮。自山河源出永固镇寨东南五里大观山下，西流经寨南。右会永固、栲栳二泉水，南流经梧桐山西。又南经白顶山寨北。又南绕其寨西。又南经小时村寨北。又西南入天然闸引河。

时村湖，又南有土形湖，在县西南四十里。

青庄湖，《方輿纪要》：在县南四十里罗里山东。

姬村湖，在城东北。

岱山湖，在城西北岱山河导源处。

孤山湖，又东南有池山湖，受母猪泉水，东入望州河。

谷山湖，在奎河东十里，横亘褚兰、夏瞳、桂家山三寨北。

纪家湖，在张山西、子贡山北十里。湖下酺渠曰小沟，与宿州分界。

老汪湖，在子贡山南，东北接青塚湖，与灵宿连界。

梧桐陂，《水经注》：睢水左合白渎水，水上承梧桐陂，陂侧有梧桐山陂。水西南流，经相城东而南注于睢。睢盛流于陂，陂溢则更相通注。

英州泊，在城西北六十里。旧有英州城，故名。今俗呼雁门泊。

朱珊泊，《县志》：在县北十五里，其地有渡。

(以上萧县)

夹河，在砀山县西南五十里，大河分支处也。

礼河，在县东北二十里。元季韩林儿倡义于河浒别父老处，故名。

陈霜口河，在县西二十里。旧自虞城史家皮家二口分为两河，由镇里埝二十里至县境西南合流，入陈霜口河。又南十里至汪家口。大河尝决于此。又东复分为二：一冲县之小南门，一北流绕县北门。

新盆河，在县西北四十里。旧自虞城县流经县境盐城集。又南四十里至庞家屯。又十里至羊耳河。

段庄河，在县西北四十里。旧由虞城县流入，经县西回冈集。明嘉靖二十四年沙淤水漫，流至双沟集南一里，汇流成河。又东三十里合桑叶河，流四十里入萧县界。

白川河，在县西北十五里。由虞城流入，经回冈集。又十五里入白川河。又二十里经蒋家营。五里入桑叶河。

三里河，旧志：县西三里。由虞城镇里埝二十里至吕家集。折北行二十里至县西三里。又二十里合礼河。

盘盆河，在县东六里。

羊耳河，在县东北二十里。

浊河，在县西北二十里。

桑叶河，在县东二十五里，礼河北五里。

洪沟河，茅城铺坝引河，有四渠。西二渠为倒勾河。东为王家楼沟。又东一渠，引三坝之水合于茅城坝下，南出为洪沟河。又南为张家湾。有故渠，南出至回龙集北，南入减水河。乾隆五十四年，茅城放淤冲出之道也。洪沟又南为王家湾。又东南经梁家寨东。又东南经郑家桥西。又南入永城界下，至萧县入减水河。利民河，承县西北汪家洼东流，右合永睦、双沟。又东左合义民沟。又东经县北，为旧城湖。皆湮绝。今河自城东南经阚家寨北。又南别为小神湖。冬则水涸。又东南至回龙集入减水河。小神湖下一名马家沟。

顺堤河，自洪沟东堰下，东经定国寺集南。又东经唐家寨南。又东入萧境，即欧邵河。

文家河，亦谓之旧洪，自张家楼西北，东经其集南。又东入萧县境。

永定河，自县西南徐家桥东，经陈家楼南。又东入小神湖，下达减水河。

华家坡河，在故大河北堤外，太行堤南。上自孙家庄南，东入丰县。今淤。

李工决河，嘉庆十六年，河决成渠。西南经谢寨东。又西南经鼎新集寨东。又南入夏邑界。

新汇泽，在县南郭外，以河徒成泽，南北二十里，东四十里。

小神湖，在县东南二十里，诸水汇聚成湖。康熙十七年，河臣靳辅于毛城铺建闸坝，减黄河涨水入此湖。下达睢河及萧县永固、姬村等湖，至宿迁归仁堤。入洪泽湖。

(以上砀山县)

泡河，在丰县。自华家河淤塞，砀单堤北之水由丰南境王家楼东北，至孟堤口东北出遥堤，经陈家楼南，有小水西来入之。又东北距城七里，谓之七里河。又北经城东，折而西，至城北。又东经徐家堤口，折而西北，出太行堤。又北经巩固寨东。又北至巩家窑，分为二：一为西河，经亦源寨西寨北边堤河，出堤入鱼台界，北达南阳湖；一为新挑支河。同治八年，泡流全由西河北注，鱼台患水，乃自巩家窑引

别渠，东经亦源寨北。又东经洪济寨南。又东合大沙河支渠出边堤，经刘家寨西北，入鱼台昭阳湖，水势遂分。

营子河，自单县刘家大营入境，至沛入昭阳湖，今堙。

华家陂河，自砀山东经县南，沿遥堤东南注华山之阳。又东为食城河，入沛县境。今堙。

清水河，在太行堤南，承山东曹单，东入丰县北。又东入沛县。

食城河，亦谓之顺堤河。乾隆五十九年、嘉庆元年河两决丰北，夺清水河、食城河入微山湖。咸丰初，河又决丰北，遂堙。

赵河，嘉靖元年河决丰北，分出太行堤，由丰县赵河下注。案泡河水出太行堤，下冲鱼台，疑即嘉庆初赵河故道也。

大沙河，咸丰初，河决蟠龙集，即兵三堡，成大渠，两岸淤沙，丰东之水皆倒流入泡口。寨东大沙河支渠出焉。上至沛县西北入县境，经义和寨北，又西北经董家集西。又北入泡河支渠。今无水。

秦沟，在县东三十里华山北，相传秦始皇时凿。明嘉靖中，大河尝决于此。今淤。

丰西泽，在县西。《续汉郡国志》：丰西有大泽。

(以上丰县)

运河，在沛县东北四十里，西北接山东鱼台县界，东接山东滕县界。自夏镇以北，即明嘉靖中所开新河。自夏镇以南而东，即万历中所开洳河也。

薛河，在县东南十里，《齐乘》谓即古漯水。自滕县境西南流合昭阳湖，由金沟口合于泗河。明嘉靖四十四年开新河渠，石堤横截其流，南注微山吕孟诸河。

南沙河，一名郭河，在县东北，源出滕县连青山，流入昭阳湖。又西南合于薛水。旧有北沙河。今湮。

鸿沟河，在县东十五里。旧自滕县界引昭阳湖入薛水，后废。今北赵团有地名鸿沟大楼，下有渠通昭阳湖，为唐团南界河，即其遗迹。

辛庄河，在县东北，出滕县西南五十里，南流十里入昭阳湖。又章公河，在县东北三十五里，明弘治间主事章拯浚。

食城河，上承丰县华家陂河，东经沛南与铜山毗接，东入微山湖。嘉庆元年，河决，夺河。

顺堤河，自丰县缕堤东入县，南至石林入黄河。

大沙河，上承丰县决河之水，东北入县境。经石集寨东，又北经朱集寨东。又北经刘范庄寨东。又北入新团分渠，灌溉公田。又北会于北王团寨南。又东而北至城子庙东，入昭阳湖。久塞。

赶牛沟，在县东北，源出滕县五花泉，至县界三河口与沙、薛二河合。明嘉靖末，开新河遏之，而合鲇鱼泉，注于新河。

湖团边沟，城西北侯家团西，东经团南。又东经新团南。又东南经唐团西。又东南经北赵团西。又东南接铜山界东湖口。

昭阳湖，在县东北八里，《齐乘》谓之山阳湖。俗名刁阳湖。有大小二湖相连，周八十余里，北属滕。南属沛。诸山之水俱汇于此。下流与薛水合，自金沟达泗。

微山湖，在县东。案：县境有赤山、微山、吕孟、张庄诸湖，与昭阳湖并为潳水济漕之处，今并为一，俱以微山湖名之。

(以上沛县)

运河，在邳州西二十里，自山东峰县黄林庄入州境。南流历洳口镇，经徐塘、猫儿窝、马庄集、万家庄、窑湾口，入宿迁县界，即万历中所开洳河也。

沂河，自山东郯城南流入州境。经齐村西又南流，得卢口坝分渠。其经流又南经丁楼寨东。又东南经袁家湾寨北。又东，白马湖注之。河又南历龙池社，分支东入宿迁沂河。又南至窑湾寨北，分为二：东出为臧家口，下达宿迁骆马湖，南出右合隅头湖。又南至竹篓坝，漕艘过，启以济运，至冬坚闭，蓄水蓄坝。分渠西出，经沟上寨，南分为二：西流者入武河；南流者名山河，经官湖寨东。又南右合连渊湖水，下达徐塘口入运河。

白马河，旧为白马湖。上承郯城，南经齐村寨东，又东南经郇家楼寨西北，有三渠自郯城南来注之。又东左合一水。又南经小湖寨东，左合沙沟水。又南入沂。

小河，上承余行省城南沙沟湖，南经炮车寨西，有沂水故渎，自丁楼寨北南来合之。盖古沂水正流。

武河，自峰县流经堰武乡入蛤湖，至乾沟口入泗，其旧迹也。今自郯城界孟家桥南流，经北冯场寨东。又东南，大沟水自北来注之。武河又南合沂水分渠，即卢口分水也。又屈而西南，至州治外城北三里虎哑分为二：一西至灰山北入燕子支河；一南流周邳外闰城北，合灰山支渠。其西北分渠入柴沟河，曰刘家口。又城西分渠入倚宿湖，曰邳家口。城南分两渠，南流复合而南，至沙家口入运。

燕子河，自山东兰山入境，经呦鹿山寨东，屈而西南，左受芦塘河水。又经韩家寨西分二渠：西渠经卞家湖，鹅蛋湖自北来注之。燕子河西入艾山河。南渠经艾山东、灰山北左会武河支渠。又分流灰山西南入武燕子南渠。又分自灰山，西流入艾山河，谓之猪龙口。

芦塘河，在燕子河东、武河西。自山东兰山县南入州界，经呦鹿山东又西南入燕子河。

鹅蛋河，又名三沟河。自山东兰山入州界，经呦鹿山西又南至卞家湖入燕子河。

艾山河，古名艾水。《金地理志》：下邳有艾水，一名柴沟河。自兰山芙蓉河分流，故又名芙蓉河。南经我沟寨东，左合燕子河。又南经艾山西。又南左合猪龙、刘家二口支渠。又南为倚宿湖。又东南出二道口，入运州治而南。武、艾二水支渠互受。

洧河，有二源。自兰山入州界，经四户寨西，又南少西，至岔河寨东，右会小泥河入西洧，谓之东洧河。《邳州图册》谓即汶河，又名营河。引河自兰山入州界，南经石埠寨西，又南经大良壁寨西，又南经岔河寨，合东洧，谓之西洧河。小泥河者，一名鱼沟河，亦自兰山入，经四户寨、大良壁寨东，介两洧河间。南至岔河寨，合两洧。故寨又名三合村。三水既合，经黄石社而南入运，谓之洧口。

礪石河，自峰县计山至疃上社入境。今经东庄村寨北，合赵村湖南酺渠，至黄道人桥入运。亦名渊头河。

陶沟河，在州西，出峰县山谷，至陶沟桥入境。东南入赵村湖。

伊家河，西微山湖，自峰县流入，经黄林庄寨南东北入运。潘家河、铜山荆山桥河自卞塘入境，东经茸山坝，初由坝东南出为彭家河。乾隆二十九年，彭家河淤废，乃引水东北为潘家河，由宿羊山北达河成闸下入运。今宿羊山南麓之水皆归之，东流俗名不老河。

靳家河，自葦山坝分荆山河北出，经葦山东，又东北分支。南汇泽为靳家湖。河又东北经王母山南，东入运河。稍南左，得泲日也。

房亭河，自铜山吴家寨流入境。东经八义集寨北。又东经过满山北。东南经竹林寨东，右会睢宁顺河集之水。又东经虎邱渡，顺堤河合之。房亭河折而北，合萧家河、城子河，折而东合唐家诸湖。又东经三岔河寨北合运。

萧家河，自铜山吴家窑分荆山桥河。东南至下河寨北，东入州境。又东南右会大同山水。又东南为淤泥河。又东经虎邱水潳为虎邱洼。又东北，城子河自西来注之。又东入房亭河。城子河今导源碾庄寨东，经城子河庄东南入萧家河。又自城子河庄南分支，东入房亭河。

白马河，自睢宁占城寨北又东北入州境，至虎邱渡，合房亭河于虎邱桥，又分渠东出为顺堤河，经土山、唐宋山北。又东北经猫儿窝西北入运。

旧城河，首受旧城湖水，东北至刘家口，距窑湾寨南十里，支渠南出为阎家河。河又至东北入宿迁阎家河，东南入黄墩湖酺渠，亦入宿迁。

官湖，在州东八里。

倚宿湖，在州西六里。北云台寺山之水名秃尾河。湖南为坡里湖，二湖相连，下达二道口入运。

白滩湖，在泲口寨北五里。西附显阳诸山水入泲。

赵村湖，在黄林庄寨东七里。错界邳峰，水南入运。

卞家湖，在城北三十五里，吐纳芦塘、燕子等河之水，下达艾山。

沙沟湖，在余行省城南，旧与官湖通。今渐涸。

连渊湖，在城南十二里。湖北有枯渎，上承武河，南合于湖，名外河。今湖水南入沂水支渠。

墩里湖，在炮车寨南。渐涸。南接妙峰山。

隅头湖，在窑湾寨北十里。《续行水金鉴》：与骆马湖相连。今湖在沂水西，地形殊异。

龙沟湖，在窑湾寨西，运河之西，谓之薛家湖。

黄墩湖，在窑湾寨南十五里青墩社，与宿迁分界，西为柳湖。今涸，崖堑犹存。

旧城湖，在旧邳寨北，故为州治。康熙七年陷为湖。

彭家湖，在州南三岔河西五里，其西北为唐家湖，长二十里，广二三里，水通房亭河。

靳家湖，在州西南黄墩社，荆山河分支潴于此。

吴家湖，在王母山西，邳西垂山之水汇于此。

芙蓉湖，州志：东泇河南流芙蓉湖至三合村。今为经流。

(以上邳州)

运河，自邳州入宿迁县境，承骆马湖经县北，东并黄河，北入桃源县界，谓之中河。

六塘河，上承骆马湖，酺为五渠，汇于永济桥下。东经义合寨南，为总六塘河。又东经保和寨西南，又东经意和寨西，分渠为北鲍家河，其正流为南鲍家河。

归正河，即故睢河也。上承睢汴枯渎，自泗州乌鸦岭北入县界，始渐通流。东经归仁寨北，又东北受罗家河，分支南出为安河，《县志》谓之董家沟。河由泗州入洪泽湖。河又东经聚生寨南，又东新安河自北来注之。又东北经闸塘集北，又分支南出为新河，南合安河入湖。河又东北经集义寨南，又东北分为鲍家河，南入桃源境。河又东北合蔡家河，又东北至早闸口，通大河故渎。河南岸为归仁堤。

九龙潭河，在孝乡，泄民田积水，入安河。今淤。

罗家河，自泗州东入县界。东经潘家山北。又东南入归仁河。《县志》：罗家等河皆谓入安河。盖归仁河之通称。

林子河，上承睢宁自塘等河，东入界。经庆安寨南。又东经安义寨南，分渠左通蔡家河。林子河又东南经信义寨北。又东南经二图入归仁河。所谓安河也，亦名沙家河。

沙河，源承睢宁东流成渠。经蔡家集南、耿车集北。又南经叶家寨西，右通林子河

。自下通称沙家河。又经东南，经集义寨西南，南入归仁河。案：嘉庆十一年河决，周汛三堡，冲刷成渠，即此河也。

民便河，在仁县，泄民田坡水入刘老涧。

县东河，源承县东湖，由仁乡七图入仁六图，东过刘家石桥，水由六乡庄入砂礪河。

砂礪河，源承六塘河，东北经仓基湖北入桃源界。今谓之北鲍家河。

墨河，《明史》作麦河，发源郟城县东北墨泉，由街头北入县境，西南入于沂，合入骆马湖。

沭河，自郟城红花埠东入县境。南过刘马庄、唐店、邵店、口头诸集，至新安集东，入沭阳县界。

蔡家河，在顺乡，泄五工湖及黄墩湖积水入河。

骆马湖，在县西北十里运河北岸，旧作落马。受蒙沂诸山之水，汇为巨浸。县西二里有陈沟口。又西二十里有董沟口，即湖水南通大河之口也。今湖潴水之区，周百四十余里，北受墨河，西北受邳州龙池社沂水支河，西受邳州咸家口沂水支河。湖东出支渎经众庆寨北。又东经姜庄寨南。又东分渠入沭湖。东南引二渠南入运，引五渠东出永济桥。六塘河之首也。

侍邱湖，在县东十里，周三十余里。由草狼沟入河，一名东湖。

泊水湖，在县三十里，由武家沟入河。

仓基湖，在县东南三十里。今淤。相传石崇建仓之所，有闸曰石崇闸，其水导流为崇河，入桃源县界。盖即砂礪河也。

白鹿湖，吴伟业诗原注：湖在县东。今淤。其地积水成渠，东出退省禅院石桥下。又东经龙虎山北、茆家河南，东入刘老涧。今谓之蒋家河。

笕坊，《旧志》：在县北四十里，嶂山东北，俗名小湖。

滹沱湖，在县北二里马陵山西。丁家湖在县西北五十里。

雷家湖，在县西北六十里。张皮湖，在县西北七十里。巴头湖，在县西北八十里。

白湖，在县西北九十里。潼沟湖，在县西北一百里。朱衣湖，在县西四十里。黄龙湖，在县西五十里。姚湖，在王家湖寨西，东为下湖，俗名王家湖。下湖之北，大汇河分墨河之水西来注之，南受峒嵒山北之水。又田家寨自祁家湖之水亦北注下湖。湖东出为龙桑沟，入沔。东北出者二渠，经杜家口合而注沔。

黄墩湖，在县西五十里顺二图，受邳旧城阎家等水，东分二渠分运。《县志》：有蔡家闸河在顺二图入运者，疑即此湖分渠。

灌子湖，在安二团墨河西，其东北为诸葛湖，在安三团半庄寨西。上承郯城之水，南入灌子湖。又藕湖在安西团，亦潳郯水入灌子湖，湖水南入骆马湖。城东北三十里有傅家湖，在童家湖东南。二湖引渠相连，中有桥。

童家湖，在北五图太和寨西。

县东湖，在县东三十里，水分砂礪河潳为湖。

祁家湖，在黄华莱岭东，去县北七十里，接下湖。

刘老涧，一名江家河，在县东南四十里。泄运河水，下至仰化集，与茅家河水合。又北通六塘河。《东华录》作流潦涧。

(以上宿迁县)

自塘河，在睢宁县西北小李集，南经城四冈头社，又东南经汤集寨东大石桥，合灵壁睢水枯渎，又东南经池山社之找沟集寨北，左合沙河；又东入宿迁，名林子河。《续行水金鉴》。县北有白塘湖引渠，东南经县西者名龙家河即此。今渐湮。

沈家河，今名沙河。自县北南经县城东八里桥，又南经芹沟社，又东南经凌城集南，又东南右合自塘河。东流为林子河。今多淤。

沙河，源承瓜蒌社之水，东南经沙集东，又东南屈经丁圩南，又东入宿迁界。

峰山湖，周十二里。明万历中，河臣潘季驯筑双沟遥堤，恐河涨入湖，分流旁决，因筑羊山横堤以备之。

合湖，一名葛湖，流合沂水，南入大河。

(以上睢宁县)

太仓州水利已详见太湖。

海州

石閼堰，在州西南，宋劝农使王贯之导其水以灌田。

涟水，即沔水下流也，在沔阳县北桑墟湖东北。流经州南石湫镇，又经州东南黑土湾渡入海。

六塘河，上自桃源县，经清河、安东、沔阳，分为南北两股，沿泗至海州境，一泄沔河之水，入盐河归武障河入海；一泄陵沟十字桥诸河之水，入盐河归项家冲河入海。

陆里河，在州南一百三十里，通官河，东入海。

蔷薇河，在州西一里，南自新坝通涟水，内接市河入州城；西北通赣榆临洪镇，东北达海。

景济河，在州东南二十余里，为运盐道。

板浦河，在州东南四十里板浦镇东，东北流入海。

一帆河，在州东南八十里，自淮安府安东县东北流入，经伊卢山南入海。按《舆图》此即安东县之盐河也。北流经州南新安镇，西接硕项湖东南口。又北分为二：一东流入海为淮口，一北流与硕项东之水会而北经大伊山南，又东北经伊卢山东北入海。

武障河，在东南，分泄六塘河水入海。

义泽河，在州西南，分泄六塘河之水入盐河归海。

高墟河，在州西南八十里。相近有王官口、下坊口二河，俱分泄前后沔河。水由烂泥洪、青伊湖入涟河归海。

(以上海州)

小沙河，在赣榆县南六里，源出山东莒州，下流由青口镇入海。亦名青口河。县界九口，惟此口利舟楫，通商贾。又县东北二十里有朱汪河，下流为龙王河入海。又县北五十里有拓汪河，六十里有分水河，七十里有荻水河，俱入东海。

大沙河，在赣榆县南五十里，旧名庙湾子河，源自山东郯城县，东流经大沙镇东入海。

(以上赣榆县)

流水，在沭阳县东南，《水经注》：水出琅琊东莞县西北大并山是也。水至县分为五道：一入涟水；二入桑墟湖；三入硕项湖。萧梁时，土人张高等于县北凿河引水，溉田二百余顷。俗呼红花水。又宋沈括为沭阳簿，疏流水为百渠九堰，得上田七千顷。案水自郯城，合马脊固诸涧水，折而东，入沭阳县界。至县西北，分为新挑河；又东至县西五里张家沟分为后河；又东迳县南曰前河；又东至上市镇分为上市河，折而东南入大海。

新挑河，在沭阳县西北五十里。流水分流入桑墟湖。

砂疆河，由宿迁经桃源县入沭阳张开河口，归前沭河，达涟河入海，系分泄六塘河之浟河。

硕滢湖，在朐山县南一百四十二里、沭阳县东八十里，与涟水三县分湖为界。

桑墟湖，在沭阳县北四十里、州西南九十里接界处，上承沭河，下流入海。

金湖，在沭阳县东南五十里。

(以上沭阳县)

通州运盐河，自扬州府城东北二十里茱萸湾分支，东南流至通州治四百里。(按：汉吴王濞开运盐河，引淮水自高宝至湾头分支入闸，经泰州至海安，历如皋、通州、海门、上十盐场、中二盐场入海为上河。高宝以东，泰州、海安以北，兴化、盐城二县，东台、富安等中下十场，地势洼下，形若釜底，众水所归，汪洋停汇为下河。上河较下河高逾数丈。上河为上十场运盐之路。下河各场，一路由秦潼河，一路由西溪河，一路由车垛河，或至泰州北门过坝，或至高邮北门过坝。富安则间由阔河四十里至海安中坝过坝。若上河浅涸，仍由安丰至高邮、泰州二处过坝。此上下河运盐之路也。)

串场河，在州东北，串吕四、余东、余中、余西及金沙、西亭、石港诸场，出丁堰闸，会于运盐河。一从立发河进口，串丰利、掘港、马塘三场，亦出丁堰闸，会于运盐河。(按：各场俱有河。金沙河在州东二十里。宋咸淳五年，两淮制置使李庭芝凿通运盐河入金沙余庆场。西亭河在州东北二十里，通运盐河入西亭场。官河在余西场。运盐官河二道三汉，南通大运河。西吕四河在吕四场，运盐河即此。石港河

在分司北二十里，由许家环走石港场七十里。又南十里为新河。仇家河在新河东七里。岸河亦在石港。后从掘港场范公旧堤彭家缺口起，中包马塘，南至石港新堤界止，今呼为包公堤河。新开运河在吕四场。清康熙四十三年，邑人夏申书等开通运盐新河，东接本场，西暨余东、余中二场。南运河在余中场。又金沙场东有新旧运河，旧河西通西亭场，新河南至大运河，北至江场界。掘港河、马塘河、丰利河，并在如皋界。)

市河，在州城内，经东西水关达濠河。

濠河，在州城外，一名城河，与市河通，北接淮水，西汇江潮，东达诸场。

立发河，在海安牙桥坝东(一名徐家坝)，去州治百六十五里，元末开。明洪武初，筑坝长十二里，后则水涸滋害。

狼山港，在州南狼山前。

裤子港、大撇港，在军山东。

芦潭港，在州东南。又东为天生港、姜灶港、川港。

进鲜港，在川港北。大港在川港东，北有袁灶港。

便民港、李灶港、十九总港、十八总港、十七总港、三仙港，并在袁灶港东。

灰沙港、白洋港、河基港、官河港、郁家竖河、船板桥港，并在大港东。大汛港在州西北。

九圩港、西天生港、捕鱼港、司鱼港，并在西北。

姚港、花毛港、缪港、任家港，并在州西南。

卖鱼湾在石港场。

运盐河有二：一在旧海门县城南，西至通州四十里，一在城北，通运盐河十八里，当余西、金沙之间。其北河东抵吕四里，西北通掘港场丁堰闸。(按：海门屡徙，河渠亦屡变，今所存者，金沙、西亭、余西诸港耳。其余自运河而外，凡通江而以港名者，曰西河，曰徐稍，曰西七里，俱在县东礼安乡；曰新河，曰黄沙，曰东明，曰生，曰大河口，俱在县东人和乡。而东通海者，为顾团，为西周，为麋鹿，为船横，为料角，为芦苇云。其在县东崇信乡而通江以港名者，为陆，为孙潭，为陈铁

，为道堂；其为杨树，为薛家，为西黄泾，则在县东之嘉会都。若张港，若胡港，若曹港，若天港，若套口港，若腰夹港，若江泆港，若头条港，若潭泆港，若新港，亦通江，俱在县西之智正都。有为尸沟者，有新沟者，在县东。白水荡，在吕四场。其地广漭，为麋鹤藪。诸沟港荡，坍没已久，姑存其名。)

(以上通州)

市河，在泰兴县，北绕县署后，南逾通泰桥入江。久淤。

濠河，周绕城外，通潮汐，与诸河接。

龙开河，在城东，由黄桥通界港，达如皋、通州各场。

通泰河，一名胥子河，在城北二里，达泰州。又一支自李薛河，由鸭子河达泰州。

马桥河，在城西南，通江。回流与龙开河接。

新河，在城西南三十里，通江。磨垛河，一名小新河，在城西十五里。

得胜河，在城西南四十五里，通江，本名盛大港，明太祖克张士诚于此，改今名。

新开河，在得胜河东。印庄河，在城东二十里。溪桥河，在城东四十里。赵列河，在城东南二十里，通江。长挺河，在城东南四十五里。丁桥河，在城东南六十里。沙浦新开河，在城东南七十里。

姜溪河，在城东南，直达靖江界。分界处有界河。

鸭子河，在城北五十里，一名鸭子湖。

河，在田家河上流。王家港，在城西南三十里，与孟渎河对。

过船港，在城西三十里，通江。南有断港、野汶港、李家港。又三汶港在野汶港内，叶家港在李家港东。明成化中，自印庄港至庙港筑江堰。嘉靖中，又自庙港至过船港筑江堰以卫田，大为民利。

小心港，在双沟南，新河分流而东。新港在小心港南。添港又在新港南。

盛大港，在城西三十里。庙港在西四十五里。

洋豫，在王家港北，通江。

印庄港，在城东南三十里，通江。观音港在其西。

秦家港，在城东南四十里。沙港，在东南五十里。

镰刀港、蒲港，并在城东南。蒋家港，在城西天宁庄。

横港，在城西南十五里，北通磨垛河。又马家港、余泗港，在城西南。

小麦港，在城西南三十里新河东。东有严家港、扁港，西有时家港。

界港，在城西三十里。灌济港，在城西北二十五里。

唐家港，在姜溪河西。秀才港，在城东六十里。

石碇港、蔡家港、庙树港、柏家港，俱在城东南。

孟家溪，在城东四十里。古溪，在东北八十里。

莲花汪，在城西南隅白莲庵前。

戴家湾，在城西南二十里。尤家湾，在西四十里。

相见湾，在东北龙开河内。凌家湾，东南通新河，北通王家港。

洋儿荡，在城南十五里。莲子荡，在东南六十里。江家荡，在西二十里。卢家荡，在北二十里。

陶湖，在城南二十五里。东湖、鹅湖，并在东六十里。

(以上泰兴县)

市河，在如皋县，一名玉带河。由北水关入，遶县治学宫前，北折出东水关。会于运盐河。

濠河，在城外，北接运盐河，东通诸场，南达州治，西迳窑子河，四十五里至泰兴县界。

龙游河，在县南，北接濠河，南通扬子江，西入靖江界，一名通江河。

毛雉河，在城东南十五里，北接运盐河，南通龙游河。

大明河，在城南三十里。阡家河，在南七十里。

葛堰河，在城东南二十里，东通十灶，西接运盐河。

丁堰河，在城东南四十里，从县濠东迳老坝头至东陈，又二十里为丁堰河，南至白蒲。一支从丁堰闸向东，通串场河。

凌河，在丁堰，后通拼茶场。

河，在丰利场，南通运盐河，北抵海。

小溪河，在城西北，东接运盐河，西通泰兴县。

窑子河，在城西，通黄蒲溪，迳芹湖，入泰兴界。

(以上如皋县)

第九卷 水利治绩上

前详各府州水利，此详治绩，故重列府州分见焉。

江宁府

三国吴赤乌中，使校尉陈勋发兵三万，凿句容中道，至亏阳西城，号破冈渚。筑赤山湖，立盘石为疏闭之节。

南北朝宋明帝时，使沈瑀筑赤山塘。陈高祖时，修复破冈渚。

唐麟德中，令杨延嘉因梁故堤，修复赤山塘。

大历十三年，令王听修复赤山塘，周百里，立二斗门，以节旱涝。

明成化中，知溧水县熊达疏百丈沟为灌溉之利。

弘治初，知溧水县杨荣开浚百丈沟八百丈，中存九坝，民赖其利。

正德三年，知高淳县李岫筑三坝，因名李坝。

嘉靖三十年，知江浦县侯国治筑孤塘堤。

隆庆三年，知高淳县筑邓坝，自石家嘴至花溪，长二十余里。

万历七年，高淳县居民戴瑞筑均丰坝。十六年，高淳县筑横埂，以捍湖水。二十五年，知高淳县丁日近重浚天生桥河道。二十九年，知句容县茅一桂咨访水利，议得高乡以地之凸凹，为水之盈涸，相地置闸，谨启闭时，蓄泄灌溉之利，不劳余力；低乡自秦淮河以西，麻埭桥以东，相距数里，若浚为一河，自可直达。仍东西置闸，防其壅涸，从中经纪其陂池，鳞次其胜陇，不失前代筑堤建二斗门之意。上诸台。不报。四十三年，南京工部尚书丁宾题准开浚秦淮河道。顾起元曰：江宁自秦淮河通舟外，惟运渚与青溪古城濠可容舳舻。然青溪自淮青桥入，至四象桥而阻；运渚自斗门桥入，西至铁窗棂东，亦至四象桥而阻。以河身原狭，又居民侵占者多，易湮塞也。顷工部开浚青溪运渚，其意甚善，然仅城中利搬运耳。若郊外诸湖，湮塞既多，秦淮源远而受水复众。溯秦淮之发源：一自黄堰坝而东，上抵句容之南门；一自方山东南，上抵溧水。其诸水相灌注，一支绕方山东面，上抵彭城山；一支自张山上溯金陵镇，过马家桥抵横山；一支西抵后乾桥；一支西抵陈墟桥；一支自上方门外小河，东历高桥门，抵沧波门郭内；一支自涧子桥南上至天界寺。此皆可以行舟，而为田地侵蚀，遂多狭窄，且易淤垫，伏秋水涨，处处梗咽。盖溧水、溧

阳、句容诸水，惟一秦淮为之尾间，夏秋江潮盛大，上壅下泛，无支流分泄。所以近年江宁时苦水，而各乡尤甚，正坐此耳。若当事者，肯议挑濬，或令傍河有田者，计其亩数，帮出工值，委两县官分程督浚。功成之后，不但支流分派，水无泛滥之忧，而往来搬运，舟航所至，省财力无限，关系国计民食者非轻，此亟宜讲求者。《东南利便书》云：建康古城，向北秦淮既远，其漕运必资舟楫，而濠堑必须水灌注。故孙权时，引秦淮，名运渎，以入仓城

（今斗门桥以北一带，河至铁窗棂者是），开潮沟以通江水（今北门桥至珍珠河一带是），又开渎以引后潮。此其大略也。自杨溥夹淮立城（今自通济门起，西至石城皆是），其城之东堑，皆通淮水

（今通济门外南门一带是），其西南边江以为险。然春夏积雨，淮水泛滥，城中皆被其害。及盛冬水涸，河流干浅，在今日正与宋无异。宋隆兴二年，张孝祥知府事，奏秦淮流经府治，正河自镇淮

（今南门桥）新桥入江。其分派为青溪（今洞神宫后一段经四象桥一带是），自天津桥（今内桥）出栅寨门（今铁窗棂）入江。宋时，水西、旱西二门外未有土也，石城下即临江。栅寨门近地属有力者，因筑断青溪水口，创为花圃，每久雨，水暴至，则正河不能急泄，水势于是泛滥，城内居民被害。今古潮沟、青溪、运渎河身皆为居民日久侵占，湮塞不通，故水患正与此类。于今欲复通栅寨门，使青溪径直入江，则城内永无水患。及汪澈继孝祥知府，诏澈指定以闻。澈言开西园古河道通栅寨门尤便。从之。戚氏去云，秦淮水源甚远，小川流入者甚众，又古来贮水湖衍，后世筑为圩田甚多，每夏雨暴至，江潮复涌，水即泛滥，皆经流城内一河入江。自源及委，所过不计几桥，凡过一桥，皆为水石岸堰束扼；及居民筑土，侵狭河道，故水失其常，横流弗顺。是以必资栅寨门河及长干桥下河

（今南门外大桥），分泄其势。其关国赋民食者非轻，通便舟楫，特是小事。自前如孝祥所言，止谓城内被水，然多不过数日即退，其害亦轻。观乡村圩田，始见其害，盖上元、江宁、溧水多圩田，每遇水至，则举村合社，日夜并力守圩，狼狈淤泥中。如遇大寇，幸而雨不连降，风不涌浪，可以苟全。其或坏决，则水注圩中，平陆良田顷刻变为江湖，哭声满野，拏舟结筏，走避他处，国赋民食，两皆失之。是皆水不安流之故耳。

清雍正十一年，江浦县浚朱家山河道，并建闸二座。

嘉庆二十二年，巡道陆方体浚运渎支河。

同治四年，总督曾国藩浚上元、江宁城河及支渠小港。是年，浚后并建闸。八年，疏浚上新河、北河口、三汊河。九年，莫祥芝浚上新河双闸至大胜关出江。十二年

，孙云锦浚石埠桥便民河。

光绪元年，提督吴长庆修浚江浦县玉带河（今名四泉河）。二年，浚外五龙桥河。又浚金陵闸、双塘，并砌驳岸。是年，知县万青选捐浚内城河。五年，浚江宁铜井河、浦口城东扁担河。六年，知县顾景濂浚大胜关新河。

苏州府

夏《禹贡》：三江既入，震泽底定。《史记》：禹抑洪水，于吴通渠三江五湖。

周元王元年，越大夫范蠡开漕湖（亦名蠡湖）。

赧王五十二年，楚春申君黄歇城故吴墟，其城内北渚，四纵五横。

梁大通二年，诏遣前交州刺史王奕浚大渚。

唐贞元八年，苏州刺史于顿缮完堤防，疏凿畎浍，列树以表道，决水以溉田。

元和二年，观察使韩皋、刺史李素开常熟塘，自齐门北抵常熟，长九十里，因名元和塘（后讹称云和）。（附刘允文记略：吴之薮，曰具区。按《图经》云：南北之路，自城而遥，百有余里。旁引湖水，下通江潮，支连派分。惟强家大族，畴接壤制，动涉千顷，年登万箱，岂伊沿溯之功，实出灌溉之利，故名常熟，岁无眚焉。贞元年来，大旱填淤，荐为涂泥，而沦胥怨咨，殖物痛矣。郡守陇西李素，闻于本道廉使、吏部尚书韩公秉文，请事疏凿，于是参井邑之役，则经费工力，而长洲三之一焉。县宰李曩，复善供命，乃计工量日，候隙庀徒，为利涉之宜，蔽反壤之害，询蓄泄之势，增远近之防，人不告劳，事为永逸。工毕泉出，山泽作气，江湖发源，积为长流。实自新析，舟楫鳞集，农商景从，春秋有施，水旱斯备。都人士以允文在公之余，备详其事，请刻于石。

）五年，苏州刺史王仲舒堤淞江为路。时吴江境南北西俱水乡，抵郡无陆路，故堤路以达之。

太和中，疏常熟县盐铁塘。

天祐元年，吴越王命都水庸田司督撩浅夫，疏导诸河。

宋至道二年，知苏州陈省华议筑昆山塘。

天禧二年，江淮发运副使张纶、督知苏州孙冕疏五湖及诸港浦，导太湖水入海，复

岁租六十万斛。

乾兴元年，诏苏、湖、秀三州，疏导壅淤，命发运使发邻郡兵助工。

天圣元年，苏州水坏太湖外塘。又海旁支渠湮塞。八月，诏转运使徐奭、江淮发运使赵贺董其事。自市泾以北，赤门以南，筑石堤九十里，起桥十有八，浚积潦；自吴江东赴海，复良田数千顷。

景祐二年，范仲淹守乡郡，亲至江浒，督浚白茆、福山、黄泗、许溪、三丈浦，而茜泾、下张、七鸦次之，利及数州。复奏言：江南圩田，蓄泄有备。钱氏偏安，民间米石钱五十文，今米石不下一贯，其故可揆。臣请每秋降敕转运使，俾辖下吏民，各陈农业利病，选官讨论，择其简易者，畀转运司著为令。初除州县吏，辄颁一册属之。此养民之本，富国之术也。

庆历二年，苏州通判李禹卿堤太湖。

至和二年，昆山主簿邱与权等作昆山塘，为桥梁五十二，名至和塘。（附邱与权记略：吴城东

闾，距昆山县七十里，俗谓之昆山塘，北纳阳城湖，南吐松江。由堤防不立，故风波驰突，废民田以潜鱼鳖。其民病赋，曰从逋徙，奸人缘之，通盐贾自利，劫行旅，吏莫能禁。自唐至今三百余年，欲有营作，而弗克也。有宋皇祐中，发运使许公建言：苏田膏腴，常苦水患，乞置官司，以畎泄之。请令舒州通判、殿中丞王安石，先相视焉。朝廷从之。王君至，询其乡人，尽得其利害，度长绳短，顺其故道，施之图绘。疏入，请议如许公，朝廷未之行也。至和初，太守吕公下车问民疾苦，盖有意于疏导矣。明年，与权为昆山主簿，始陈五利：一日便舟楫，二日辟田畴，三日复租赋，四日止盗贼，五日禁奸商。令钱君复言之。太守喜其谋之协从，得请于监司。十月甲午治役，先设外防，以遏上流；立横埭以限之，乃自下流浚而决焉。畚闸所至，皆于平陆，旬有九日而成，深五尺，广六十尺，用民力一十五万六千工，费民财若干贯，米四千六百八十石。为桥梁五十二，蒔榆柳五万七千八百有二，河植菱蒲、芙蓉称是。计其入，以为修完料民之余。治小虞，自严村至于鳊蜩壤。治新洋江，自朱沥至于清港。治山塘，自山南至于东，浚渚泾六十四、浦四十四、塘六。于是阳城诸河若壤，皆导而及江，田无湾渚，民不病涉。是役也，自城东走二十里曰任浦。昆山治其东，长洲治其西。以俗名非便，更曰至和，识年号也。）

熙宁三年，昆山人郑亶上言：吴中水利，六失六得。其书与图及治田利害七事，有旨令亶与两浙运使及本路提举司相度开治。

（附郑宣《上水利书》略：天下之利，莫大于水田；水田之美，无过于苏州。然苏州五县，虽号水田，其实昆山之东接于海之冈陇，其地东高而西下。常熟之北接于江之涨沙，其地北高而南下。是二处皆谓之高田。而昆山冈身之西抵于常州之境，常熟之南抵于湖、秀之境，其地低下，皆谓之水田。高田常苦旱，水田常苦涝，但水田多而高田少，水田近于城郭，人所见而税复重；高田远于城郭，人所不见而税复轻。此议者所以但知治水，而不知治旱也。今先取所谓高田者，设堰渚水，以灌溉之，浚其经界沟洫，使水周流以浸润之；立冈门以防其壅。然后取凡水田者，一切罢去其某家泾浜之类，循古遗迹，或五里七里而为一纵浦，又七里或十里而为一横塘。因塘浦之土，以为堤岸，使塘浦阔深，而堤岸高厚，虽大水不能入于民田。然后择江之曲者决之，则塘浦之水自高于江，而江之水亦高于海，不须决泄，水自湍流。吴淞江南北岸，水田约一百二十余里。南岸大浦二十七条，北岸大浦二十八条，淞江北横塘二条。以上塘浦五十七条。并当松江之上流，皆是阔其塘浦，高其堤岸，以固田也，久不修治，遂至隳坏。议者不知此塘浦原有大岸固田，乃谓古人挑此大浦，只欲泄水，此不知治田之本也。今当浚治其浦，修成堤岸，以御水灾。不须远治他处塘浦，求决积水，而田自成矣。）（又治田利害七事略：一论古人治低田高田之法；二论后世废低田高田之法，三论自来议者只知决水，不知治田；四论今来以治田为先，决水为后；五论乞循古人遗迹治田；六论若先往两浙相度，则议论难合；七论先诸司农寺陈白，则利害易明。大概以为环湖地低，故常多水，沿海地高，故常多旱。盖古人治水之迹，纵则有浦，横则有塘。又门堰泾沥布列其间，总二百六十有余。今欲略循古人遗法，七里为一纵浦，十里为一横塘，又因出土以为堤，度用二千万工，水治高田，旱治下泽，要以三年，而苏州田毕治矣。）（郑侨《再上水利书》略：浙西昔有营田司，自唐至钱氏时，有堤防堰闸之制，旁分其支脉之流，不使溢聚，以为畎亩之患，是以钱氏百年间，岁多丰稔。惟长兴中一遭水耳，暨纳土后至今，其患始剧，盖由端拱中转运使乔维岳不究堤岸堰闸之制与沟洫畎浍之利，惟务便于转漕舟楫，一切毁之。初则故道犹存，尚可寻绎。今则去古既久，莫知其利，营田之局，又以为闲冗而罢废，堤防之法，疏决之理，无以考据。乾兴、天禧间，朝廷专遣使者，兴修水利。远方之人，未识三吴地势高下，与夫水源来历及前营田之利，皆失旧闻，受命而来，耻于空还，不过采愚农道路之言。以目前之见，为常久之策，指常熟、昆山、枕江之地，为可导诸港而决之江，开福山、茜泾等十余浦，殊不知古人建立堤堰，所以防太湖泛溢，淹没腹内良田。今若就东北诸港决水入江，是导湖水经由腹内之田，弥漫盈溢，然后入海。所以浩渺之势，常逆行而潴于苏之长洲、常熟、昆山，常之宜兴、武进，湖之乌程、归安，秀之华亭、嘉禾，民田悉已被害。然后方及北江、东海之港浦，又以水势方出于港沟，复为潮水抑回，皆聚于太湖四郡之境，积水弥漫，常不可治，此足以验明开东北诸浦为谬论矣。昔禹治水于吴，通三江以泄一湖之水。今三江已绝，惟吴淞一江存焉。疏泄之道既溢于昔，又为权豪侵占，种植菰蒲芦苇；又于吴江之南，筑石塘以障太湖东流之势。又于江中多置簰，致吴江不能吞来源之浩瀚，日淤月淀，下流浅狭。一旦积雨，诸山之水并溢太湖，苏、常、秀之间，陂淹浦港，悉皆淤漫，四郡之民，惴然有为鱼之患。虽有中高不易之地，种已成实，顷刻荡尽。尝按吴淞江

故道，深广可敌千浦，向之积潦，尚或壅滞。议者但以开数十浦为策，而不知临江滨海地势高仰，徒为无益。臣今究治水之利，必先于江宁治九阳江、银林江等五堰，体势故迹，决于西江；润州治丹阳练湖，相视大纲，寻究函管水道，决于北海；常州治宜兴漏湖、沙子渰，及江阴港浦入北海。以望亭堰分属苏州，绝常州轻废之患，如此则西北之水不入太湖为害矣。又于苏州辟吴江之南石塘，多置桥梁，以决太湖，会于青龙、华亭而入海。仍开浚吴淞江。其他江湖风涛为害之处，并筑石塘及淤彭堰与诸湖漾等处，寻究昔日港泾，自南经北，以渐筑为岸堤。所在陂淹，筑为水堰。秀州治华亭、海盐港浦，仍体究柘湖、淀山湖等处，凡有民田高壤，障遏水势不可疏决者，并与开通，达诸港浦。杭州迁长河堰以宣歙杭睦等山源，决于浙江。如此，则东南之水不入太湖为害矣。此所谓旁分其支脉之流，不为腹内畎亩之患者此也。往来治水之说，大约有二：一则导青龙江，开三十浦；一则使植利户，浚泾浜作圩岸。二者各得其一偏。今治水若止于导江开浦，则必无近效；若止浚泾作捍，则难以御暴流。要当合二者之说，相为首尾，乃尽其善。但施行先后，自可次第耳。为今之策，莫若先究上源水势，而筑吴淞江两岸塘堤，不惟水不北入于苏，而南亦不入于秀，两州之田，乃可垦治。今之言治水者，不知根源，始谓欲去水患，须开吴淞江，殊不知开吴淞江而不筑两岸堤塘，则所导上源之水辐辏而来，适为两州之患。盖江水溢入南北沟浦，而不能径趋于海故也。尚效汉、唐以来堤塘之法，修筑吴淞江岸，则其去水之患，已十九矣。

）六年，检正中书刑房工事沈括言：浙西江浦当浚。从之。仍命括相度浙西水利。

元祐六年，诏导苏州诸河。

元符三年，诏苏、湖、秀三州开治浦港沟渎，修垒堤岸，置斗门水堰。

崇宁元年，置提举淮浙澳闸司于苏州。浚杨林河、福山塘。

政和元年，诏苏、湖、秀三州治水围田工费。三年，知常熟县李光浚山塘、小山港。

宣和四年十二月，知昆山县吴昉浚至和塘。

绍兴二十四年，大理丞周环开常熟福山港、白茆塘。二十八年，两浙转运副使赵子谿、知平江府蒋灿计科开江。明年正月兴工，从常熟东栅至雉浦入丁泾。开福山塘，自丁泾至尚墅桥，北注大江，分杀水势。二月工毕。知平江府陈正同禁围里湖田。

（附赵子谿治水利方略：浙西诸州，平江最为低下。而湖、常等州，水皆归于太湖，自太湖以导于淞江，自淞江以注于海。是太湖者，数州之水所潴，而淞江又太湖

之所泄也。然以数州潴水巨浸而独泄于一淞江，宜其势有所不逮。是以昔人于常熟之北，开二十四浦，疏而导之扬子江。又于昆山之东，开一十二浦，分而纳诸海。两邑大浦，凡三十有六，而民间私下泾浦，又不可胜数。皆所以决壅滞而防泛滥也。后因潮汐往来，泥沙积淤，旧置开江之卒，寻亦废去，此太湖所以湮塞，而民田有漂没之忧也。天禧、天圣间，运使张纶于常熟、昆山各开诸浦，以导积水。景祐间，郡守范仲淹亲至海浦，开浚五河，以疏导诸邑之水，使东南入于淞江，东北入于扬子江与海。今相视合开紧急去处：常熟县梅李塘、白茆塘、崔浦、福山浦、黄泗浦，昆山县新洋江、小虞浦、顾浦、郭泽塘，总计役夫三百三十七万四千六百，工钱三十三万七千四百贯，米一十万一千五百石有奇。昆山四浦工力不多，止用本县食利户开浚。常熟五浦工力浩瀚，系与吴、常等县利害相及，欲与三县雇人充当。缘平江积水，今经两月未退，已妨种麦。若不于农隙之际支給钱米，雇夫开治，恐来岁春雨，积水愈甚，亏失常赋不便。望指挥施行。）

隆兴二年八月，诏江浙势家围田，湮塞流水，诸州守臣，按视以闻。其平江府陈弥作相度。弥作乃上言：宜先治者十浦，并合开围田一十三处。诏令守臣沈度依状开决。

（附陈弥作水利议略：常熟之浦二十有四，皆北入于江。昆山之浦十有二，皆东入于海。盖以太湖居其上流，昔人患淞江之不能胜受，而使众水泾得其归者也。诸泽之水，兴始于天禧，成于景祐。逮政和间，稍已湮废，当命赵霖浚之，仅能复常熟、昆山二三浦而罢。窃考周官有稻人掌稼下地之法，所以潴水，则今之塘湖是也；所以泻水，则今之潴浦是也。今诸邑之间，曰湖，曰壤，以累百。而沿江滨海，小川故道，往往淤滞，不特所谓三十六浦而已。潴之过多，而泻之过少。重以今年淫雨泛滥，横溢非常，比年识者，皆以开浦之利。不但今日特以工费甚广，不敢轻易倡议。今若并举大役，切虑歉岁民无余力，官无羨储及至劳扰。辄择其宜先治者凡十浦，而其缓急又半之。兴工之日，仍乞以缓急为先后。）

乾道元年，沈度、陈弥作又言：疏浚昆山、常熟县白茆等十浦，通彻入海。诏从之。知平江府沈介依次开浚。五年，增置撩湖军兵。

淳熙元年，知府韩彦古与许浦驻劄戚世明开濬许浦。

二年，两浙转运副使姜洸奏开常熟县黄泗浦、崔浦、许浦、白茆浦，浚通波塘，置张泾堰闸。水军都统冯湛、知平江府陈岷浚治诸泾塘浦。

六年，发运使魏峻疏至和塘，东至夹潮塘，西至戴墟浦，亘四十余里。又立栅三十二，以为禁防。官出钱二万三千二百缗，米二百一十石有奇。

嘉定元年，知常熟县叶凯浚水洋子泾。十年，知府赵彥稀疏锦帆泾以达运河，兼备

农田旱潦。

淳祐三年，知常熟县张从龙开支塘，长四千寻，广一丈，深倍之，用夫六千工。

宝祐四年，知常熟县王文雍浚城河，开福山塘。

咸淳元年，命知平江府沈度开决许浦，自梅李塘、雉浦口东，开至白荡桥、白茆浦；自黄沙港开至支塘桥、崔浦；自丁泾塘开至浦口、黄泗浦；自十家港开至奚浦口、茜泾浦；自界泾开至鸭头塘、下张浦；自东海甲开至千步泾、七鸦浦；自梅浦开至李漕泾、川沙浦；自梅窖开至六鹤浦、杨林浦；自杨林桥开至陶家港、掘浦；自海口开至五圣港。

元至元二十四年，宣慰朱清谕上户开浚娄江。三十年，诏平江、松江等路府修治湖、泖、河、港。

大德二年，立都水监庸田使司于平江路，专一修筑田园，疏浚河道。

至治三年，诏开吴淞江、淀山湖及诸河渠。

天历二年，吴江知州孙伯恭大修石塘。

至正七年，吴江州达鲁花赤那海大修石塘，垒石原砌高一丈，广丈四尺，长一千八十丈，为环洞一百三十有六。立石亭于南浦亭之南，表之曰：至正石塘，建丁亥庵，为居守置常稔田，嗣修葺。二十年，平江路通判郜肃大修昆山州田围。三十四年，张士诚遣吕珍督浚芝塘山泾口，堑其地为港，长亘九十里。

明洪武七年，常熟县开奚浦。九年，开至和塘堰坝。二十八年，凿太平河。

永樂元年，苏松水患，命工部尚书夏原吉偕通政赵居任、大理寺少卿袁复、给事中姚善凿吴淞江，疏昆山下界浦，掣吴淞江水北达娄江。又挑嘉定西顾浦，南引吴淞江水，北贯吴塘，亦由娄江入海。又浚常熟白茆塘、福山塘、耿泾，导昆承、阳城诸湖水入扬子江，浚上海范家浜接黄浦，引湖茆水入海。

（附夏原吉治水奏：浙西诸郡，苏松最居下流。太湖绵亘数百里，受纳杭湖宣歙溪涧之水，散注淀山等湖以入三泖。顷为浦港湮塞，涨溢为害。拯治之法，要在浚涤吴淞诸浦，导其壅滞以入海。按吴淞江袤二百余里，广一百五十余丈，西接太湖，东通海，前代常疏之。然当潮汐之冲，旋疏旋塞，自吴江长桥抵下界浦一百二十余里，水流虽通，实多狭浅。从浦抵上海南仓浦口一百三十余里，潮汐淤壅，已成平陆，滟沙浮泥，难以施工。臣等相视嘉定之刘家港、常熟之白茆港，皆系大川，水

流迅急，宜浚吴淞南北两岸安亭等浦，引太湖诸水入刘家、白茆二港，直注江海。又松江、大黄浦乃通吴淞要道，今下流壅遏难疏，旁有范家浜至南仓浦口，可径达海，宜浚令深阔，上接大黄浦，以达湖泖之水。此即禹贡三江入海之迹。每岁水涸时修筑围岸，以御暴流，则事功可成，于民为便。

）二年，户部尚书夏原吉导娄江，浚千墩浦、至和塘。四年，浚常熟福山塘三十六里。十三年，昆山县重浚太平河。

宣德七年，苏州知府况钟言治水，诏周忱与钟治之。九年，常熟县知县郭南浚盐铁塘。

正统二年，郭南浚七浦塘。七年，吴中大水。秋七月，飓风。巡抚周忱奏请量留官粮，府一二十万石，县五六万石赈济。并增修低圩岸塍，浚金山卫独树营、刘家港、白茆塘沿海各河。十年，常熟县浚七浦塘。

景泰五年夏，大水淹浸田禾，经久不退，侍郎李敏、知府汪浒议，当开浚白茆等塘以泄之。浒躬往常熟相视，时久不疏浚，塞成堤堰。近民耄倪皆泣卧其上以求免，言一开浚，则堰下之田亦就浸矣。浒不许。挑濬青墩浦、模沥塘共五六里以通白茆塘；凿开三堰约三四里，引水通鲇鱼口；其海淤塞，漫生丛苇，仍挑去约千余亩。于是水得归海。

天顺三年，巡抚崔恭檄苏州知府姚堂、松江通判洪景德等浚吴淞江。苏州自夏界口过白鹤江，至卞家渡、庄家泾；松江自大盈浦，东至吴淞江巡司，自新泾至蒲汇塘入江。又自曹家沟平地凿至新场。又自华泾塘、六磊塘、莺脰湖、乌泥泾入浦。又浚湖川塘。

（附钱溥《松江水利记》：书云：三江既入，震泽底定。然水至吾松，则又分二道而入海。盖西北塞，下则自太湖入淀山湖、吴淞江入海；东北高，仰则受杭湖之水达黄浦以入海。高下既殊，旱淫交病。然早为东北受病，其患小；水则西北列郡无所归泄，其患大。吴淞江自胜国末湮塞，迨今逾百年。兴言修浚，非无其人。然或沮于浮议，或忧于巨费，因循岁月，卒莫能举。稍遇淫雨，即成一壑，国赋亏而民艰食矣。天顺二年，都宪崔公奉敕巡抚东首询水患，以淞为尤甚，乃举府判洪侯景德暨二县尹杨昕、李纹治之。侯等相视，以为江之故道，虽浚必合，莫若从新地凿之，力易为而功不坏。起自大盈浦，东至吴淞江巡司，计二万二千丈。又自新泾西南至蒲汇入江，计四千丈，阔皆十四丈，深皆二丈。而低乡之潦可泄。东北则自曹家河平地，凿及新场，计三万余丈，深阔皆与江同。又新华泾塘、六磊塘、莺脰湖、乌泥泾入浦，而高乡之旱亦免。大小连络，无不通贯。噫！亦勤矣哉！用工总三万五千余。沿江耆老，相与鼓舞而言曰：兹江之湮，为吾民病久矣。曩时字人者虽廉得利害，而迄无成功。宁知物有通否，必待其人耶？是役也，程工而授，计口而食，

民虽劳而不怨，则国本垂永之计。孰愈于此哉

！溥松人也，且职史事，故请书之。）

成化五年，吴县知县樊瑾准本地民呈请起民夫，重浚九曲港，共三千八百五十余丈。八年，吴县知县雍泰奉檄筑西华石塘。雍见采香泾废堰旁粮田数千顷，遇旱禾槁。泰领民寻源，得于穹窿山陇阪间，盖由山腰法雨泉流出者。上为一堰，下陂分二道：一道东由白马岭南流，逾赵墓，折而西；一道西下山淙，环赵墓，复迤而东。二流相合，近采香泾潴聚成潭。仍躬相地宜，甃筑二道石堰，堰各置一闸，随水早启闭。复市山石田，由马迹山西南而东，筑堤千丈，未百日告成。湖田藉以种获。十年，巡抚毕亨与苏州知府邱霁开吴淞江，自夏界口至西庄家港，昆山、嘉定二县分浚。十一年，筑常熟县赵段圩田围

（附黄体勤《赵段筑圩记略》：苏，天下大郡，常熟又苏之大县也，地处下游，古号泽国。赵段一圩，又其最下堤，创宋元间，久而尽圯，无复存者。湖南悉为巨浸，岁屡不秋，逋租者日以就困，民空其居以徙，有司艰于理。成化乙未春，民告于县，县上其状于巡抚都宪毕公亨、巡按御史戴公缙，念为民忧，乃调度所征之材，以倡其邑。而谋于治水念宪吴公骈曰：受朝廷特命之严，寄吴越民事之重，纲纪振肃系焉，尚可隳怠

？手授其机宜于郡判何君唐。何君曰：专农商以牧民，民瘼未瘳，岂善牧者哉！遂责成于县尹兰君玉。君属父老以谕意，众皆感悟。于是财获于官，力借于民，抑聚敛也；代石于山，运土于陆，因地利也；量田授役，获利于倍，出其工邻，壤者半焉，均徭役也；较人力多寡以为寻尺，验土筑虚实以稽勤惰，课章程也。堤之袤延亘数里丈一千有奇。用木为橛，橛之内编以竹，甃石为址，而高与土等，上广八尺，而下加三之一，固基本也。堤之形势，逶迤若环带然。其外则种以萑苇、茭芦，杀水势也。又惧其塞之难，溃之易，预为设备，垂永久也。木以万计，竹倍差于木；石以舟计，及二千艘；钱谷之需，累万巨有奇，工役则五万三千有奇，用虽伙而民不见扰也。始工于是岁二月二十六日乙巳，告成于三月二十九日丙子。功之成，何其速哉

！于是沮洳之乡，变为禾稼；流徙之民，相续而还。岁已登而赋无愆期，泽之及何其溥耶？夫治水必治于下流。赵段之水既治，则众流不劳而治。治之施又何其知所先务耶？宜民乐之不已，而形诸歌，歌曰：堤之未筑，田混于湖，居者以徙，赋者以逋。堤之既筑，湖润于田，徙者以还，逋者有年。噫嘻长堤，屹乎天作。伊谁之功

？台宪民牧。田稼芃芃，湖水溶溶，百千万祀，泽流无穷。）

弘治元年，带理水利佥事伍性浚吴淞江中段四十余里。二年，苏州府通判张曼疏盐铁塘。是年，修娄江堤。七年，徐贯浚吴江县长桥诸茭芦之地，导太湖水散入淀山、阳城、昆承等湖。开吴淞江并大石赵屯等浦，泄淀山湖水，由吴淞江以达于海。开白茆港并白鱼洪、鲇鱼口等处，泄昆承湖水，由白茆港以注于江。开七浦、盐铁等塘，泄阳城湖水，由七丫港以达于海。开常州之百渎，泄荆溪之水，自西北入于太湖。设导河夫子沿江。

（附徐贯治水奏：窃维东西地势低下，水患自古有之。永乐初元，水复涨溢，太宗文皇帝命户部尚书夏原吉大加疏治，方得止息，逮今九十余年。各处港浦，仍复湮塞，为患滋甚。仰维皇上轸念地方，命臣等会司修浚，盖将拯垫溺之民于衽席之上，化鱼鳖之区为稻粱之域，臣等敢不罄竭弩钝，以图仰副圣意。用是夙夜不遑宁处，相度施工。窃见嘉、湖、常、镇，水之上流，苏松水之下流。上流不浚，无以开其源；下流不浚，无以导其归。于是督同委官民人等，将苏州府吴江长桥一带茭芦之地，疏浚深阔，导引太湖之水，散入淀山、阳城、昆承等湖。又开吴淞江并大石赵屯等浦，泄淀山湖水，由吴淞江以达于海。开白茆港并白鱼洪、鲇鱼口等处，泄昆承湖水以注于江。又开七浦、盐铁等塘，泄阳城湖水以达于海。下流疏通，不复壅塞。开湖州之娄泾，泄天目诸山之水，自西南入于太湖。开常州之百渎，泄荆溪之水，自西北入于太湖。又开各斗门以泄运河之水，由江阴以入江。上流疏通，不复湮滞。自弘治七年十一月十七日兴工，八年二月十五日工毕。幸今天气晴和，人无疫疠，凡百众庶，争先效劳。即今水患消弭，人无垫溺之忧，田有丰稔之望，列郡士民，莫不庆忭，是非臣等之能事，皆国家盛德大福广被东南之所致也。今将修筑过港渎画图贴说，谨具奏闻。

）九年，工部主事姚文灏筑沙湖堤，广三丈，袤三百六十丈。是年，浚白茆塘、福山塘。十年，姚文灏浚至和塘，委苏州府通判、昆山知县募工开浚，东自新洋江口起，西至九里桥，凡长四千九百六十五丈，用人夫九万六千五百工。计工授直，用钱一百三十五万。浚七鸦浦，籍昆山常熟两县近浦之户二万二千三百人，疏自尤泾东至木樨湾，凡五千五百九十丈。半月成功。计工银五千二百七十两。开白茆海口。

（附杨循吉记略：弘治四年、五年、七年，本府连遭大水，民以匭告，工科左给事中叶绅请浚河水入海要道，乃以工部左侍郎徐贯与巡抚副都御史何鉴同董厥功，以其年十月有事于白茆。是港在常熟东南，输昆承湖、阳城湖而注之海，往时水由是行。其阔六十丈，长亘九十里，通潮往来，吐泄湖泖。张士诚设爬沙之夫，岁加疏浚以为常。永乐中，尚书夏原吉治水时，相度地势，于潮水交会之冲，虑水独从七浦入海，因作斜堰障之，分其流注于白茆，欲俾地方各沾其利。天顺中，潮汐日涨，港渐狭小。其后又有水之独出七浦而决坏斜堰者，于是水遂改道，更无波冲洗潮泥，而涨沙日甚一日，隐然成堤矣。乃以五万九千人专其役，东起海口，西抵支塘，凡长六千五百五十五丈。相传开治港面，阔五十六丈，深一丈七尺，而以土积岸

之两旁。又崇明出巨舰，相联内向爬去，壅弃于海中，俟其活动，仍决坝放水冲之。一时因白茆而浚者，其上为鲇鱼口，传导湖水来脉，有新开河、龙潭洪、白鱼洪、落星港四支，浚之总计六千四百丈，凡用万七千六百人。而尤泾长九里，盐铁塘长十八里，皆通白茆，凡用万四千九百人。其他不因白茆而别治者，七浦与吴江水口而已。七浦长四十里，径通海，时有堙塞，凡用万七千人。吴江水口在长桥外，桥长二里，有七十二洞，其外汇为大沼，广千亩，太湖之咽喉也，久为芦荻所碍，已成淤淀，凡用万六千人，三阅月皆以成告。盖以鲇鱼口为白茆上流，斜堰为七浦上流，而长桥为诸水上流。其在苏州一府，施工如此。议者犹以为当时大役，莫如白茆，所恨辍事太急，未获成效。已而岸果颓圯，复为潮汐凝积，塞而不通。于是常熟县知县杨子器以为港身迂曲，水不能泄，致使横沙拦接海口，施工为难。又看得湖潮上接芝塘，其长不过三十里，径自入海。况又河形现存，虽则浅狭，水亦通流。因请水利郎中傅潮乞浚之。议方行，子器被召入。郎中臧鳞来管水事，首理故牒，锐意举修，乃檄通判陈啼署县事。同知何宗理视状，皆言本漕视白茆诚为径直，但缘两旁各居民庐墓必须拆卸，方可即工。然理实应开，而工程浩大，计当用夫三万。鳞因利便以奏。诏行巡抚都御史彭礼、巡按御史冯允中会勘，应否定夺。于是知府林世远以十六年四月亲诣本处相勘，得前项港漕俱在芝塘分流，但港曲漕直，以此微有远近。然漕形阔不过三丈，深不过数尺，设以此拟开阔十丈，两岸田地各占三丈五尺，浚深八尺。所起之土，占压田地，尤难预计；况有民庐坟塚在上，关系事重。不如仍开白茆为便。惟海口壅沙，则有马车浜五里许，浚此可为曲避之计。及将本港迤西一带至白鱼洪等处，但遇干浅，俱各挑深，水行势达，壅塞自除。

）十一年，提督、水利工部郎中傅潮浚常熟许浦、梅李二塘，从知县杨子器议，委县丞赵祥董役。三阅月计工。浚至和塘并立昆山等县斗门。十二年，傅潮重督长洲县兴筑沙湖堤。（附吴宽记略：郡城东二十里曰“沙湖”，凡太仓、昆山、嘉定、崇明之人之所必经者，其广袤各数十里，横绝道上，其北多腴田，其中多舟楫。旁有盗藪，以行劫为业，客舟为风波所阻，集于岸下，多不能免者。昔人欲筑堤以捍水者久矣，皆谓土石所施，无所附丽，其功难成，遂置之。弘治丙辰，工部主事姚君文灏奉敕来督水利，始白于巡抚右副都御史朱公瑄，谓堤可筑。公往视之，亦曰可筑。且曰，是宜用卷埽法，盖吾治河决时所已试者也。谋既协，姚君乃专任其事。先是公从工部侍郎徐公贯浚常熟江口，获苇利之占于民者充公用，及是遂赖其济，一时夫卒尽力，财用毕具，功垂成而君移疾去矣。今郎中傅君潮来代，周行田野，水和大兴。他日行至沙湖，叹曰：是堤之功其可已乎

？至是巡抚、左副都御史彭公札复劝相之，而堤竟以完告。其阔为丈三，长为丈三百六十，隐然如城，坚壮可久，安流成渠，人皆称便。盖耕者无浸淫之苦，则安于田亩；行者无覆溺之忧，则乐于道路；贾者无掠夺之恐，则保其货利。是役也，前守为史侯简，今为曹侯凤，皆经画其事者。若通判陈玮、知县刘珂、郦瑶，主簿喻秉，则劳绩并著，皆可书者。于是傅君使来，请文刻石。予郡人也，喜水患之能去

，且知君才操与姚君并美，无忝于上命也，遂为之记。）

正德十六年，巡抚李充嗣分督工部郎中林文沛，发民夫，起常熟县东仓至双庙，浚白茆故道一万三千八百二十丈。又亲至支塘，询土民，开出水口，议论不一。充嗣与苏州知府徐瓚拟循故河疏治，常熟县主簿余浪独主凿新河，不敢发言。适巡按御史马录来会议，浪于道中陈白。录具告。充嗣相度形势，以簿议为是，议遂决。凿新河三千五百五十丈。又浚尚湖、昆承、阳城等湖支河一十九道，凡四阅月功成，农田得稔。时林文沛身亲董率，暴露风日，不言劳惫，役夫不敢苟且塞责。

嘉靖元年，工部郎中颜如环檄苏州知府徐瓚、松江知府孔辅开浚吴淞江，自下界口起，至龙王庙旧江口止；又浚赵屯、大盈、道褐等浦。使上流下委，递相容泄。

（附王鏊《吴郡治水碑记》：今天下财赋多仰东南，东南财赋多出吴郡。而吴郡于东南，地最下，最多水患。南方夏秋间，最苦多雨，苏湖渺然，辄成巨浸，故官多逋负，民多流殍。于是廷臣争言水利，而以吴淞江、白茆港为首，请设官专治。时巡抚应天西蜀李公充嗣方著若绩，诏委之，进工部尚书，得便宜从事，复以工部都水郎中林君文沛、颜君如环佐之。公博访群采，相度源委。谓东南诸水，咸汇太湖，由三江入海。而东江久失故道，不可以复寻，独娄江尚在。吴淞江虽在而多涸。其别出一支，从常熟白茆港入海。最大且驶，而海沙淤塞，久成平陆，民且庐墓其上。自成化以来，每议开之，辄畏其难而止。夫太湖吞纳众流，犹人之腹；白茆、吴淞，则尾闾也；阳城、昆承、淀泖诸湖，犹络脉也。尾闾不泄，腹且胀为病，四肢百脉悉病矣。公乃驻节湖上，且行且度，度地量功赋役，仞浅深，计远迩，力取诸近，财取诸远。庐舍有次，樵

爨有所，分授以责。成时，犒以行赏。天时晴和，法令明一，众心竞劝。率未明兴作，入夜未已。河上灯攒如星，锸畚如雨，欢呼之声，数里不绝。不数月工告成。初，白茆自北达于江，河形结屈，不可复通。乃改就东南，挑平陆直注诸海。自双庙至东仓通一万七千三百九十二丈，其深一丈五尺，阔三十三丈。白茆上流，又开尚湖、昆承、阳城湖各隘，为塘、为洪、为港、为泾、为淡者，凡十有九。吴淞江上流颇通利。自夏驾浦至旧江口，不复容舟，因其旧形，广之深之，凡六千三百三十六丈，其深一丈二尺，阔十八丈。白茆港口，海潮日至，沙泥易淤，则为石闸一。阳城湖水至斜堰分流七浦塘，则可少杀白茆之流，又为堰一。淞势弱，不能荡激，易淀且淤，又为石闸一。盖疏宜兴、湖州诸淤，水归太湖无碍，则常之宜兴、武进，湖之乌程、归安，松之华亭，可无水患。浚吴淞、白茆之淤，太湖之水入江海无碍；则苏之长洲、常熟、昆山可无水患。而吴淞、白茆之役最大，功费尤多，始事于正德十六年十月，嘉靖元年四月讫工，凡为工四十一万二千五十三，银为两若干，米为石若干，费亦大矣。保而勿坏，则在后之人焉。

）十七年，知常熟县冯汝弼建各港石闸，三丈浦连泾诸河向无闸者，皆置。

隆庆元年，巡盐御史蔚元康浚常熟、太仓、嘉定三州县境七浦、杨林、盐铁、吴塘、顾浦、青鱼泾。二年，知常熟县张博建白茆港石闸。五年，巡按御史刘白睿檄苏州府通判吴宗吉、常熟县知县连三元董浚奚浦，长四千四百一十丈，广五丈，深六尺，用夫八万八千九百五十人，官给银二千二百三十三两，俱支赠餼。

万历五年，巡视下江御史林应训行委水利按察使冯叔吉檄苏州府同知王事圣、知县王一言勘浚自庞山湖口至长桥达吴家港。六年，林应训行委水利按察使徐节檄同知王事圣、常熟县知县留震臣勘浚自归家坟小石桥起至横塘止，长四十五里，面阔十二丈，底阔八丈，深一丈二尺。八年，常熟县重浚三丈浦。三十二年，常熟县知县耿橘浚福山塘。三十三年，吴江县知县刘时俊筑石塘。

（附周道登《吴江县新筑石塘碑记》：万历三十有三祀五月朔，邑侯刘公新筑石塘成。塘修九万九千八百一十四丈，为桥十有三，为窠三十有七，南连樵李，北接茂苑。并葺旧者，为里八十有三。其石约二而成丈，博一尺有八寸九分。其博一以为厚，四垒其厚以为塘之崇，倍其崇以为基。和之用灰，支之用木，每尺而支者三。以石之厚，为木之围，三倍其围以为修。水递深而递加，率一木而为五支。薪其木末，以当庸直。计木五万九千八百八十六，三分之加一，以为石之数，二分其十加一，以为石之工，佐者居三之一，灰三千有四百石，铁灰索纆直二百五十余，凡费二万七千金有奇。役始于癸卯正月十七日。主其议而捐俸以倡者，曹中丞也。邑二尹西蜀李宗程则督视，邑人王郡倬忠则劬勩，沈方伯季文则协议，沈寺丞璟、沈僉宪瓚、沈孝廉令名与不佞登则出纳，父老屠大化等十人则宣力，凡再阅岁而效其成于公，亿兆欢呼，得未曾有。荐绅先生构亭莺湖，属不佞记其事。夫以塘之积圯，岁岁修而圯日甚，空为县官费何益，公新以巨石，为邑永利，是大有造于我也。且不烦官，不强民，百计拮据，杯酒讽劝，而事忽大集，我享其利。美哉公绩，可以颂矣。

）三十七年，常熟县知县杨涟筑元和塘，浚沙浦、马泾、袁张浜。三十九年，昆山知县祝耀祖筑至和塘。四十年，长洲县知县胡士容浚练祈塘、马路塘、谭家浜。四十一年，胡士容浚走马塘。四十二年，胡士容筑至和塘。

（附文震孟《长洲县兴筑娄江石堤记》：苏固泽国也。江淮之水，由京口历毗陵，皆从苏以注海。震泽汇宣歙霅苕之巨浸，宣吐于长、昆二县间，有娄江实所由道，至和塘最当其冲荡云。自宋转运使乔维岳决堤为泾，水患滋起，以迄于今，当事者咸鳃鳃虑焉，而苦于任事之难。至插棘树版，以杀水势，亦几无谋矣。广济胡侯士容，自嘉定令移剧长洲，曰延父老，问所疾苦，而知娄江之塘，不可缓也，曰：是且病涉，病溺，病飞挽，病农。农兹土者，至累岁不登半菽，谁司民牧，责可缓诸。既又相度土宜，而知非石堤无以障水势，曰：是金泾、阳城诸河荡之所震憾也，是太湖、沙湖之所腾跃而澎湃也，是新洋、吴淞诸江之所逆驾也，是两龙泾、朱泾、萧泾、吴泾、陆泾诸要害之所泛而旁啮也。苟不为永赖谋，仅饰目前，又岂司牧

者之实意欤

？于是量工经始，里计者四十有五，丈计者六千七百，桥计者二十有六，其巨者一十有八。金钱计万五千有奇。顾邑民苦贫，府库竭，莫可调发，侯又不能如正统中周夏两尚书奉玺书从事水利，复田租，征发属邑，仅搜导河官帑之羡金不满千，悉捐岁俸与赎醵所入，集好义之众，期月而成。自长至昆，长堤如带，屹然如山。于是行者歌于道，鼓枻者歌于河，农歌于野。侯益尽捐禄俸，买田三顷其半，以属耆老，为永堤计焉。

）四十三年，昆山县知县陈祖苞浚至和塘、小虞浦、横塘。

崇祯八年，巡抚都御史张国维同巡按御史王一鹗檄吴江县知县章日价勘核石塘，全坍应修一千五十五丈，半坍二千八十六丈；平望西诸家铺水缺，应筑内外塘七百六十丈，并修长桥、三江桥、翁泾桥。绅士、商民乐助竣工。九年，张国维疏导吴江县长桥淤。先是县民虞燧具奏敕部行抚按查核覆题，奉旨允行。檄下疏浚，自长桥以至九里石塘，通行开凿。十年，张国维同巡按御史路振飞重修至和塘。兵备冯元飏、知府陈洪谧、推官署县事刘鸣谦各捐助有差，属里民马负图营办董成，仅四阅月毕工。十六年，昆山县知县杨永言开浚夏界河，特举贡生朱集璜董其任。集璜分河为四则：自龙王庙坝口至郭泽塘为一则；自郭泽塘至兵墟为一则；自兵墟至葛港为一则；自葛港至赤泾口为一则。以淤塞浅深，为致功难易，共开河身四千九百八十二丈。调夫，分区之主客，主六区，六十亩出一夫，客区一百十亩出一夫，用夫十二万一千九百七十四。贴役，主区每亩钱三十文，客区一十六文，计得钱每工给八十文，又官给钱六十文，每工受钱百有四十。工始于是年十一月，毕于次年四月。

清顺治九年，工科给事中胡之骏请浚吴淞以泄陈淀之水，浚刘河以泄巴阳之水。奉旨准行。十一年恩谕，东南财赋重地，素称沃壤，连年水患为灾，民生重困，皆因失修水利，致误农功。该督抚责成地方官悉心讲求，疏通水利，以时蓄泄，水旱无虞，民安乐利。

康熙十年，巡抚马祐奏请开浚吴淞江、白茆河。恩准。留苏、松、常三府漕折银九万两，浙省杭、嘉、湖三府漕折银五万两，充疏浚河工经费。督同布政司慕天颜檄苏州府水利同知于阶及太仓、吴江、昆山、嘉定各州县官，开刘河淤道二十九里，建闸三座。开吴淞江，东至新泾口四千三百五十二丈，自新泾口迤西至赤雁湖黄渡七千五百丈，修复旧址闸坝。

（附马祐《请浚刘河、吴淞江疏》：臣看得苏属刘河、松属吴淞江，乃走泄太湖之咽喉也，修则六府同其利，塞则六府同其害。历代以来，凡遇淤滞，俱遣大臣驻劄吴中，专修水利，动支正项钱粮，拨充疏浚经费。臣稽考成书：明嘉隆年间，吴淞

道淤，湖水四溢，淹没田庐，民生困苦。时有巡抚海瑞，条奏疏治。因役大费繁，请留漕米二十万石，又动江浙六府无碍官银，俱充工费。令各处被灾饥民，上工就食，修复水利，兼行赈济，水灾宁息，事功告成，刊载典章，班班可考。迄今已及百年，潮泥日积，故道全淤。凡官斯土者，憚于工程浩大，财费无资，视为末务，因循不举。去岁夏月，霪雨连旬，潮水泛滥，禾苗尽淹，民居胥溺，积水三月不消，农工废业，人户流亡，总因刘河、吴淞入海之口，淤塞涌聚，无从走泄故也。臣念国课民生，关系重大，悉心讲求，博采舆论，并以疏浚二河为今日第一急务，檄藩司委官丈勘刘河淤道二十九里，长五千二百二十丈，计用人夫三十九万八千四百十二工。连闸二座，每座工费千金，以备水患蓄泄，约共需银四万两。吴淞江东至新泾口，皆成平陆，应浚四千三百五十一丈；自新泾口迤西至赤雁口黄渡，应浚七千五百余丈，修复旧址坝闸，约共需十万两。臣再四思维，当此水灾之后，村落饥民逃荒乞食，臣与属官勉力捐俸煮粥，不过苟延旦夕，万难全派民夫。举此大工，若欲徒责地方各官设处捐助，亦终成画饼。势不得不请用正项，以济目前急务。仰恳皇上俯念江浙六郡为国家财赋重地，将康熙九年苏、松、常三府漕折银九万两，浙省杭、嘉、湖三府漕折银五万两留充疏浚河工经费，俾各处灾荒饥民，就近上工趋食，是修复水利中兼行救饥之事，诚一举两利。倘蒙皇上轸恤灾伤，动支正项，地方幸甚，民生幸甚。）（又报浚完工疏：臣查刘河自盐铁口起至航船港以达海口，该五千一百八十丈，河面阔十一丈，底阔六丈六尺，深一丈，积土四千九百余方。勘原旧河身，有尚存一线及浅洼处，扣除不用挑工土方外，实该挑土三万三千九百四十方。每方用夫十四工，雇募民夫四十七万五千一百六十九工。筑大坝、副坝一十条，支港水口筑小坝一十四条。于康熙十年二月二十六日起工，至十一年五六月内陆续完工。吴淞江自黄浦东口起，至新泾口施家港止，计该一万四百九十一丈，挑河面阔十五丈，底阔七丈五尺，深一丈五尺，积土一十七万七千余方。内有原旧江形及低洼之处，扣除不用挑工土方外，实挑土十三万一千四百三十九方，每方用夫一十四工，雇募民夫一百八十四万一百五十七工。内筑大、小坝一十六条，又支港水口筑小坝十一条。于康熙十年十二月初八日起工，至十一年四月二十六日完工。又查刘河原议建闸三座，约费工料银三千两。臣又同司道各官覆勘情形，若于一处分造三闸，恐闸基单薄，不能坚久，故于天妃宫地方，总造大闸一座，分别三洞泄水。虽工费稍加，实可一劳永逸。吴淞江于黄浦口建大闸一座。臣又思两江闸座与内地不同，恐闸门被潮往来冲击未能坚久，故各于闸旁四角修筑，以图永远。查刘河闸座，已于康熙十一年三月内完工。刘河各项工料，共实用银三万一千六百八十二两八钱七分零。吴淞江各项工料，共实用银一十一万一千一百七十九两一钱二分零。此系臣经驳减核实应销之数，复取各官印甘结在案。今据该司造册呈详前来，除册分送户工二部查核外，相应题报，听部核销。

）二十年，巡抚慕天颜奏请浚常熟县白茆港、武进孟河。奉旨准行。开白茆自支塘至海口四十三里，浚河七千八百五十六丈，广十丈，深一丈五尺，用民夫九十九万四千工。建闸一座，费公帑四万两。

（附慕天颜疏河救荒议：窃维三吴治水之功，历稽往绩，惟使太湖之水，导入江淮，而潮汐亦可上通，以时蓄泄，则旱涝无虞。自三江湮塞，震泽泛滥，以田为壑，而苏、松、常、湖、杭、嘉六郡，受害日深。上年水患，弥漫四野，数百里间，不第禾尽无收，抑且室庐漂没，流离疾苦，不忍绘图。仰荷宪台，轸念民生，首饬议浚刘河，以通水利。宪檄谆谆，谓吴淞江出海之处已成平陆，修复工繁，未可轻议，惟有专力刘河，为今日第一急着。此宪台为浙吴百万生民造无疆之福也。本司导行苏、松二府，详加确勘。兹据苏府详议，估计工程，请动正赋开工等因。又据松江府上海县详开吴淞江故道，酌请江浙六郡正帑，协济大工，各绘图形，申复宪台在案。本司载考旧志，披阅新图，按湖水之奔趋而东也，一自淀山、泖湖从华亭之南，折而东北入海者为黄浦；一自吴江长桥历常州、昆山、青浦、嘉定界至上海，合黄浦以入海者为吴淞江；一自吴县鲇鱼口北入运湖，经郡城娄门注上下雉渚，抵昆山至和塘，东合新洋江，由太仓归刘家港入海者为娄江，即今刘河也。迨吴淞入海之处，沙壅茭丛。昔夏忠靖公引黄渡以西之水，北入刘河，是今日刘河一线为淞、娄二江之尾闾，合苏、淞诸郡之民命攸关者矣，浚之乌可一日之缓哉！但在苏则望刘河之深广，而昆、太、嘉为尤切；在松则必图吴淞之成渠，而上青诸邑为尤切。两府所议，各就其切已者而言，未可为全局之通论也。本司规画再三，采访舆论，目前救时之策，在急疏刘河，将来远大之谋，吴淞亦所必浚。盖吴淞实太湖泄水之中条，其故道较刘河更阔，其地势较刘河更直，江浙六郡同其利，议协于浙，可冀旦夕成功焉。但今民穷财尽，更际凶灾，两工决难并举。刘河处其易，吴淞处其难，莫若缓吴淞而先事刘河之为便。本司细询绅民父老，刘河之功，固自不小，而吴淞亦有不得不决策并浚者。当日导淞水并入刘河者，有昆山之夏驾、嘉定之顾浦，以及盐铁、新洋诸港浦，淞与娄相通。今则诸港浦尽塞，淞自为淞，娄自为娄，则刘河虽开，止泄震泽半面之流，而汇纳于泖、淀以奔涌松江者，仍未得宣通也。若再开蒲汇、新泾，重浚虬江之顾浦，费力于支河小港，何如并力于吴淞乎

？况从来以工役救荒，使贫民食力以糊口。如范文正公守郡时，吴中大饥，发粟募民，诸工毕举，以是公私仰给，民不迁流。昔人于凶岁之后，无不共循此意。盖小民至困苦中，工力必赋。且饥寒迫身，民多思盗，河工兴而乐趋畚鍤，盗贼亦可潜消。荒政之施，莫此为大。然必须咨商浙省督抚，早为区划，将全局会疏题明，共计两河工费，先开刘河。至冬间水涸之时，旋兴吴淞大工。本司管窥如是。今所急惟在钱粮，灾荒之后，杼轴既空，不得不请销正赋。但朝廷方在蠲灾恤饷之时，又何敢言动帑

？惟念兴水利而后有农工，有农工而后裕国计。若惜一时之费，不作永久之图，将来海口淀沙，日淤一日，必至水灾洊告，蠲赈迭施。今合两工所需，约计十四万金，较之一岁所蠲，未及其半。而田工无患，国赋常充，可垂千百年之大利，一劳永逸，功在斯时。考海忠介开吴淞之疏，留漕十万石，佐以协济稻谷赃罚等，不两月而功成。仿其遗谟，敢请宪台，俯赐会题，于苏、松、常康熙九年折漕银内留四万两以应刘河夫工，康熙十年折漕银内再留五万两，浙省钱粮接济五万两，以应吴淞

夫工。仍比归仁堤事例，两省续开援纳捐助，请于河工告成之后，补此漕折正项钱粮，方行停止，即于是月，一面择吉施工。谨先就刘河工程，缕析条议，并三江全图，绘成宪览。吴淞工费亦可照例核销。此皆宪台为万年国脉百世民生起见，用敢敷陈，伏乞采择。）（又请浚孟河、白茆河疏：江南赋税，甲于天下。苏、松、常、镇课额，倘水旱失宜，必致灾祲叠告。此广渠资溉之功，所以断不可缓也。今夏霪雨连绵，河流四溢，田地任在沈淹，庐舍更多漂没，臣疚心疾首，力督司道府州县等官，多方设法宣泄，分头挽救。而附近刘河之太仓、嘉定、吴江、娄上等州县，俱藉两江出泻，旋溢旋消，虽告被水，幸不重困。华亭并未告灾，昆、青灾亦无几。长洲、无锡去两江稍远，东南之水，不能骤消，西北诸流，奔江无路，田禾淹没甚多。宜兴首当高、溧诸山下流，亦赖震泽转泄。虽东南一面稍沾刘河淞导引之益，然较长昆等处更远，西北全无出水之路，故受灾倍于他邑。若夫常熟、武进、江阴、金坛等县，既与刘河淞绝隔，惟藉大江汇归。其如本地出水要口，任在淹塞，遂致积雨成壑。臣从权救济，将江、常二邑沿江一带通潮小港、马路筑埂之处，暂行疏导出口，随于洪水泛滥无归等事案内，题报在案。此不过救急一时，稍平水势，旋即堵塞，非永久远之图也。臣前疏请浚白茆港、孟渎河、福山三港，三丈浦、黄四港、申港、包港、安港、西港、七丫等处，盖既鉴上年之奇旱，预料今夏之大涝。从长筹画，实非泛言，虽部议未邀即允，然关切地方民事，岂容缓图

？再四筹画，先择其工易而费简者，若七丫一带，业已劝民浚涤淤沙，通崇明之运道。福山港、三丈浦道县各官详据里民自愿分段疏通。再如黄四、申、包、安、西等港，另行酌量缓急，多方设法，次第兴举外，惟是常熟之白茆港，系苏、常诸水东北出江第一要河，自明季失修，湮塞成陆，旱则潮汐不通，涝则宣泄无路。若此港一通，不惟常熟水旱无虞，即昆山、长洲、太仓、无锡、江阴无不共沾其利。又武进之孟渎河系常镇诸水归江要道，凡高、溧西北诸水，竞趋东南，则流注于宜兴、金坛，更转泻于丹阳、武进，惟藉孟河一口出江，今亦年久失修，河身壅积。武进以西，丹阳以东，宜兴、金坛以北，诸水归江阻道，于是水旱并灾，人力难施矣。此两河者蓄泄之利，等于刘、淞，淤塞之形，亦不亚于刘淞。今刘淞疏通，苏、常、松资其益者甚巨；白茆、孟河淤塞，苏、常、镇被其害者，亦复不小。此臣身在地方，目击亲切，日夜筹画而不敢忽者也。是以分委道员，细加察勘。兹据副使刘鼎、参议祖泽深勘估议详前来，查白茆自常熟支塘起迤东以至海口，淤道四十三里，长七千八百五十六丈，应浚深阔不一等，总计人夫九十九万四千工，并议修大闸一座，与夫筑坝戽水等项，共需费五万六千两。孟河自武进奔牛镇之万缘桥起，至孟河城北出江，淤道四十八里，共长八千五百三十三丈，应浚深浅不等，总计人夫八十四万工，并议建大闸一座，兴筑坝戽水帮岸等项，共需费四万八千两。二河共需费十万四千两。据各该道请照刘、淞事例，先动正帑济工，不惟水利克修。现在望赈饥民得以赴工趁食，不设赈而民已全活，数善备焉

）。四十八年，总督邵穆布、巡抚于准奏准开白茆、福山二港，修白茆归闸，建福山新闻。福山开土一万二千一百五十方，白茆开土二万八千八百方。共发帑银三万

四千九百九十七两零。

（附上谕。雍正五年二月初二日，奉上谕：地方水利，关系民生，最为紧要。如江南户口繁庶，宜更加修浚，时其蓄泄，以防旱涝。向来屡有条奏之人，但未经本省督抚奏请。朕意亦久欲兴修，以资农务。因海塘工程，正在营治，且水利事关重大，必得实心办事之人，方有裨益。即如目今畿辅水利，赖有忠诚任事之怡亲王，始可兴此大工。不然则亦未敢轻易举行也。我皇考念切民依，周知稼穡，因康熙四十六年巡省江浙，所至必细验水土燥湿、高下之宜，详考五谷种植之性，躬亲讲求，将附近太湖及通江潮之处，条分缕析，特颁谕旨。令江浙督抚，于苏、松、常、镇、杭、嘉、湖地方，疏浚河港，以资灌溉，修建闸座，以便启闭，皆动用公帑钱粮，不使丝毫出于民力。恩至渥也。乃当时督抚诸臣，不能实心仰体，惟以虚文奉行，糜费帑金二十余万，大都饱于官吏之侵渔，而无实效，深可痛恨。朕即位以来，事事仰继皇考之贻谟，永图民生之远计，本欲俟直隶水利兴修之后，令怡亲王前往江浙地方，相度情形，酌商兴修之举。今巡抚陈时夏特行奏请，且称费用不过十余万两，即可成功。据陈时夏陈奏，应是地方不可迟缓之事。副都统李淑德曾任江南松江府同知，谙悉水利事宜，曾经条奏，颇为明晰。原任山东巡抚陈世倌年力精壮，现在闲居。著李淑德、陈世倌会同陈时夏、总河齐苏勒、总督孔毓珣悉心踏勘，详加酌议。倘齐苏勒河工紧要，不能亲身前往，即行文知会商酌，定议具奏。凡建立闸座，疏浚河流，务期尽除淤塞，以杜泛滥之虞，广蓄水泉，以收膏泽之益。其一应工费，俱动用库帑支給。一切工程，交与李淑德、陈世倌监督办理。并谕吏部，将现任部属及候选部属府州县人员内，有具呈愿往效力者，挑选十余人，带往江南，不必令出资财，惟令办理事务，交李淑德、陈世倌二人，酌量委任。特谕。）

（又四月二十六日谕齐苏勒、范时绎、陈时夏、李淑德、陈世倌：朕轸念民瘼，以苏松地势稍下，特遣大臣会同督抚开浚水道。为久远之计，太湖之水归海，刘河、白茆二河为要，必径直深广，令水畅出，方能一劳永逸。《图志》新载二河形势，数十里一径，直趋出海，无少曲折。因年岁久远，海口为潮湮塞，悉成平陆。太仓、常熟之绅衿土豪，霸占耕种，然报科者十无二三，私获重利于己。今既开浚疏通，务必尽去新涨地亩，以复故道方是。闻背公怀私害众利己之徒，有不愿者，串买地棍，报具公呈，或请别开支河，或请另开新道，其言纷纷不一。陈世倌乃但知洁己而不奉公之人，李淑德亦旗下武员，识见浅鄙。倘以似是之言，或惑于听闻，或希图微利，或稍徇情面，迂回迁避，使积水不能畅出，数年后仍渐致壅塞，则汝等罪不可追矣。该督抚钦差等当竭力秉公详勘，务为一劳永逸之策。倘绅衿恶棍，生事阻挠，尔等指名题参，严惩数人，则不公不法之刁风自息矣。尔等若少将就欺隐，苟且塞责了事，异日代人领过之时，莫怨朕未明白晓谕也。

）本年原任山东巡抚陈世倌请先挑吴淞、白茆、孟渎、德胜、九曲河。俟完工之日，各河依次开濬。

雍正六年，户部议覆郎中鄂礼条奏近海诸河，并设立犁船、混江龙，以疏积沙。十

二年，总督赵弘恩题请普修江南渠港。

（附赵弘恩疏题：为江南港渠亟宜普修，以全水利，以广皇仁事。窃照江南屡蒙圣谕，普加修浚。仰见圣主軫念民依，有加无已，如淮扬诸河及通州闸坝，现今兴修完备。苏、松、常、镇之娄江、吴淞江、白茆、徐六泾、福山塘、运河，长桥、白河、万顷港、互流港、孟渎、德胜、新河、九曲河、紫藤坞、刘河、七浦河等处，通河达海。大河及海口各闸，亦俱蒙皇上命发帑金，兴修完竣。又蒙将松江等府沿海石塘、土塘通行建筑，商农乐利，万世蒙庥。惟民田以内，一切支港小渠，万脉千寻，皆原流于大河，通联于潮水，旱则引潮以灌田苗，涝则归河以消积水。关系并重，其利亦溥。只因港渠既多，地更深僻，工程碎杂，费用零星。故历听民间自为修浚，难以一一动帑兴修。无如小民勤惰不一，书役需索冒侵。年久竟成道旁筑舍，潮沙渐积，淤塞日甚。臣经临苏、松、常、镇一带，留心察勘，在在皆然。除华亭县龙泉等九河，吴县穹窿山麓堰闸池塘，已经抚臣高其倬饬行浚筑。其余应修小河港渠甚多，必须即为逐细疏挖，一律深通。庶港渠湖河，内外畅达，旱涝兼资，同收巨效，博采輿情，无不乐于兴举。查江省历来私派贴费陋规，每县盈千累万，悉饱蠹棍欲望，以苏、松、常、镇四府一年而计，即共有数十万金。今清厘酌革，民力已得宽舒。所以此等港渠，以及圩坝涵洞，似应即从今冬为始，劝民循照旧例，按田派工，业户给食，佃户出力，逐一兴修。所开土方，运送远处，不得堆积两岸，仍淤河道。以无益之陋费，为水利之正用。明白开导劝督之下，百姓谅必踊跃趋事。此番大修之后，将来岁修，易于为力。至此项工程，查有水利效力部员陈梦瑛，谨慎勤劳，实心办事，可以总理相度。臣亦加意督察。其分任更须多员，方能细为查勘，逐加劝谕，随勘随修，周流督率，以期实济。现任州县，各有刑名钱粮诸务，各府同知、通判，州、县佐杂并试用等官，亦各有本任事件。及别项紧要工程差委，且少熟谙河务者，更恐滥差书役，需索扰累。再四思维，惟有仿造河工投效，及前署督臣尹继善办理海塘将情愿效力之人题请赴工之例，查明实需工员数目。有生长沿河及曾任沿河因公罣误之员，或向随工员在河料理，熟谙河务及熟习风土人员，具呈情愿效力，皆考验确实，留工差委。如能勤情任事，工竣题名，酌量录用。倘有怠玩，即行参处。又苏、松沿河塘路坍塌，行旅艰难，民田亦少保障，或劝民力并修，或动公项支应，亦渐次经理。行据苏州布政使白钟山查案议覆佥同，并称苏、松等属有宝山、华亭、奉贤、娄县、金山、南汇、上海等数县，向例业户按田每亩捐钱五文，以为岁修塘工水利等用。各该县此番大修港渠工程，即可于此捐钱项下动用。又太仓、镇洋等州县，向例亦有每亩捐钱三文二文不等。此次大修，并应听其量为加捐凑用。募夫挑浚，均不必拘业户给食、佃户出力之例。此外，各州县如有愿仿此式每亩捐钱者，亦应听民酌量派定钱文，交县汇集。工程募修，庶百姓不必人人赴工，往返多费。而工程又得速竣，不致掣肘延误，亦为地制宜之善举。总以民间物力，仍归民生实用。至部员陈梦瑛可以总理其事，仍令苏、松、常、镇二道，各于所属就近协办，稽查工费，考察勤惰，更为有益。沿河塘路试港渠修浚次第料理等情，臣覆无异。除应用工员，俟选定具题另造履历送部外，理合一并具疏题请。臣谨会题。）

乾隆元年，开浚震泽县浪打穿直港。二年，重筑元和塘。三年，浚吴江县长桥河。四年，修筑震泽县荻塘。重修昭文县许浦。浚常熟县竺塘、景墅、长琪、仲桥塘、西横塘等五河。九年，重浚昆山县玉带河。十年，重浚昭文、常熟二县城内诸河。十一年，重浚府城内诸渠。十六年，浚福山塘。十七年，浚三丈浦。十九年，开浚白茆塘。是年，建筑海塘。二十六年，浚福山塘。二十八年，修三江水利。二十八年，建白茆滚坝。二十九年，修筑元和塘。三十二年，浚木渎横金塘河。是年，再浚福山塘。三十五年，浚白茆塘。四十年浚福山塘。四十三年，民自浚支塘、白茆河一段，五十年，浚贵泾塘。

嘉庆十二年，浚常熟城河。二十五年，浚至和塘。

道光元年，浚昭文城河。二年，浚常熟城河。又浚昆新城河。十年，浚吴县雕鹗河。是年，浚吴县兴福塘。十三年，巡抚林则徐奏浚刘河。是年六月，浚武进县孟渎、得胜、澡港三河。十四年，浚白茆河及徐六泾。十六年，浚福山塘。三十年，浚白茆诸河。

咸丰九年，浚昭文城河。

同治二年，浚常昭城河。四年，浚常熟三丈浦。是年，浚昭文许浦塘。五年，巡抚丁日昌浚刘河。五月，浚关塘。七年浚白茆河。十年，巡抚张之万浚太湖淞港。是年，浚吴淞江。十一年，浚昭文徐六泾。十二年，重浚苏城河道。是年，重浚吴江分水港。是年，浚木渎市河。是年，筑白茆闸大坝；开越河。十三年，重浚吴县横金塘河。

松江府

周敬王二十五年，吴行人伍员凿河，自长泖接界泾而东，尽纳惠高、彭巷、处士、沥渎诸水。后人名曰“胥浦”。

唐开元元年，筑捍海塘，起杭州盐官抵吴淞江，长一百三十里。

宋宝元元年，两浙转运副使叶清臣开松江盘龙汇。按绩吴郡图经，盘龙汇介华亭、昆山之间，步其径才十里，而回沅迂缓乃四十里。江流为之阻遏，盛夏大雨，则泛溢沦稼穡，坏室庐，殆无宁岁。乾兴间屡经疏决，未得其要。范仲淹守平江，常经度之，未遑兴作。至是清臣转漕本路，以太湖民田为豪右，据上游而水不得泄，建议酹为新渠，从沪渎入海，道直流速，其患遂弭。

庆历元年，知华亭县钱贻范开顾会浦。

（附章岷记略：浦在县西北六十里，趋青龙镇，南通漕渠，下达松江，舟楫去来，实为冲要。自籛山之阳，地形中阜积淤，渐与岸等，垂三十年。至是乃籍新江、海隅、北亭、集贤四乡之民，得役夫三千五百五十人，府教以尉孙君专董其役，兴三月辛酉，讫四月己丑。始于邑郭，终于江邀，增深四尺暨广八丈。无虑役工十万二千九百五十。畚土平道者不预焉。）

嘉祐三年，转运使沈立开顾浦。六年，转运使李复圭、知昆山县韩正彦开松江之白鹤汇，如盘龙之法。崇宁中，郑亶又浚治之，皆为民利。

绍圣中，开大盈、顾会二浦，浚柘湖、新泾、下金山、小官浦，悉入于海。

崇宁二年，提举浙西常平徐确考禹贡三江之说，以为太湖东注于海，松江正在下流，向来潮泥湮塞，水溢为患。请自封家渡古江开洶至大东浦，直彻海口七十四里，以常平钱米十八万三千余充调夫之费，因令饥民就食，确躬操畚鍤以先之，水道遂通。

大观元年九月，从中书舍人许光凝请，令本路监司检按松江故道，同发运使属官，疏导积水入海。三年，开吴淞江，置闸。

宣和元年，两浙提举常平赵霖浚白鹤汇，围裹华亭泖为田。

绍兴四年，盐官丞王珏开华亭近海河二百余里，通漕溉田，民享其利。十五年，通判曹泳开顾会浦。（附杨炬记略：绍兴甲子夏，大水，吴门以东沃壤之区，悉为巨浸，部使者飭郡邑询求故道，导源决壅，以泄水势。于是监州曹公历览川原，考视高下，访于父老，得顾会浦自县之北门至青龙镇浦凡六十里，南接漕渠，而下属于松江。按上流得故闸基，仅存败木，是为旱涝潮水蓄泄之限。复得庆历二年修河记于县圃，而知兹河废兴之岁月，与夫浅深广狭之制，役徒钱谷之数判然，察其惠利之实，有在于此矣。盖历百有六年，河久不浚，而沦塞淤淀，行为平陆。遂以状请于朝，籍县之新江、海隅、北亭、集贤四乡食利之民以疏治之，官给钱粮，而董以县令簿尉。兴工自十月二十有六日，役三月而河成。起青龙浦，及于北门，分为十部，因形势上下为级十等。北门之外，增深三尺。而下之镇浦，极于一丈，面横广五丈有奇，底通三尺，据上流筑两狭堤，因旧基为闸而新之。复于河之东，辟治行道，建石梁四十六，通诸小径，以分东乡之渟浸，不浹旬水落土坟。由是籛山东西民田数千顷，皆为膏腴。役工二十万，用粮以石计七千二百，为钱以缗计二万五千。

）三十年，知华亭县刘侯修秦山、盐铁、蚌港三堰。

乾道二年，转运副使姜诜开通波大港（港即顾会浦），置张泾堰闸。（附许克昌浚

河置闸碑：甲申秋八月，淫雨害稼。明年大饥，上赋粟以活饿者。会有言苏、秀势最下，华亭尤近海，十八港皆有堰捍潮。可一切决之四湖，所潴水宜为斗门，以便节减。上览而异之。亟命两浙转运副使姜诜与令丞行视其宜。姜侯既受旨，諏访故老，周览川野，尽得其便利以闻，曰：东南濒海之地，视诸港反高，虽有神禹，不能导水使上也。今宜浚通波大港，以为建瓴之势。又即张泾堰增庠为高，筑月河，置闸其上，谨视水旱，以时启闭，则西北积水，顺流以达于江，东南成潮，自无从入也。上称善。即丐以常平之帑贍其役，且与守臣郑闻会其事，制许焉，则相与它徒揆日，赋材计功，既具，以授之县令，倚其铨威，以棍奸说，以使人检程视作，勿容苟简。乃浚河自簞山达青龙江口二十有七里，其深可以负千斛之舟。因其土治高岸，护青墩傍，今有青墩港，故水所败田数万亩还为膏腴，为闸于邑，东西四十有八里，故土七尺，甃巨石，两趾相距，常有四尺，深十有八板，板尺有一寸。月河之长三千三百五十有五，广常有六尺。凡浚河之工万有一千二百。金工、石工、木工、畚闸之工、伐取运致之工，总其数概七倍于浚河。糜钱缗九千三百五十四。粟石二千三百有九十。凡五十有五日而毕。盖敛未尝及民，而民亦若不知有是役也。

）七年，知秀州邱密修华亭濒海十八堰，遂移新泾堰于运港。九年，置监堰官于亭林。《松江府志》：华亭东南并海，自柘湖堙塞，置堰一十八所，以御咸潮。宋政和中，提举常平官兴修水利，欲涸亭林湖为田，尽决堤堰，以泄湖水。华亭地势，东南益高，西北益卑，大抵自三泖五浦，下注松江以入海。虽决诸堰，湖水不可泄，成水竟入为害，于是东南四乡，为斥卤之地，民流徙他郡。中间州县官惧其害，复故堤堰，独留新泾塘以通盐运。海潮晨夕冲突，塘口至阔三十余丈，咸水延入苏、湖境上。是岁八月，邑人石正言、许克昌于朝，时密以太傅除知秀州，奉命行视，与令堵观议，以新泾塘湖势湍急，运港距新泾二十里，水势稍缓。于是募四县夫移堰于运港，并筑堰外诸港及运港之两岸。东岸自堰至徐浦塘二十四里，西岸自堰至柘湖二十三里，上阔六尺，下阔一丈五尺，局六尺。明年正月，遣御史萧之敏按视还奏。诏增密秩复租。九年，招复流民。又明年正月，遣中使宣谕守臣张元成增筑。二月，特设监堰官一员，土军五十人，置司顾亭林，以防盐运私发诸堰。后堰外随潮沙涨，牢不可坏，二州之田，得免咸潮浸灌之害。十三年，修华亭县新泾塘闸，增置招贤港、徐浦塘二闸。十五年，命浙西提举常平司开浚华亭县三十六浦。

淳熙二年，立庸田司于平江，撩鹿吴淞江泥沙，浚各闸旧河渠渎，及松江之张泾、通波、南北俞塘、盐铁、官绍、盘龙、蒲汇、六磊、石浦等塘。十三年，罗点提举浙西常平，以淀山湖泄诸水道，戚里豪强占以为田，故水壅不泄，民田病之，奏乞开浚。有旨命点躬亲相视开掘，农民闻命欢跃，不待告谕，各裹粮合夫，先行掘凿。于是，并湖巨浸，复为良田。

元至元初，中书省准浙江行省咨任仁发言吴淞江淤塞，奏立都水监，仍于中江中书以闻，特命行省平江撒里提举修浚，一切便宜经画。以松江故道湮塞，西至上海县

界，东抵嘉定石桥洪，迤迳入海，袤三十有八里。

（附任仁发水利议答。议者曰：吴淞江前时深通，今日何为而塞，岂非如海变桑田之说，非人力所可为者欤？答曰：东坡有言，若要吴淞江不塞，吴江一县之民可尽徙他处。庶上源广阔，清水力盛，泥沙自不能积，何至有湮塞之患哉！归附后，将太湖东岸出水去处或钉栅，或作堰，或筑狭处为桥；又有湖泖港汊，又虑私盐船往来，多行塞断。所以清水日弱，浑潮日盛，泥沙日积，而吴淞江日就淤塞。正与东坡所言合。若云海变桑田，一付之天，则圣人手足胼胝，尽力沟洫，皆虚言也。圣人岂欺我哉

？所当尽人力而可为也。议者曰：钱氏有国百余年，止长兴间一次水灾；宋南渡百五十余年，止景定间一二次水灾。今或一二年水灾频仍，其故何也？答曰：钱氏有国。宋南渡全藉苏、松、常、秀四郡所产，以为国计，常时尽心经理。高田低田，各有制水之法。其间水利当兴，水害当除，合役军民，不问繁难；合用钱粮，不吝浩大，必然为之。又使名卿重臣专其事，豪户势家，箴言不能乱其耳，珍货不能动其心。又复七里为一纵浦，十里为一横塘，田连阡陌，位址相接，悉为膏腴之产。以故二三百年之间，水灾罕见。国朝四海统一，又居位者，未知风土所宜，视浙西水利与诸处无异，任地之高下，时之水旱。所以一二年间，水患频仍也。议者曰：苏州地势低下，与江水平，故曰平江，故称泽国。其地不可作田。今欲筑围，亦逆土之性耳。答曰：晋宋以降，仓廩所给，悉仰给于浙西之水田，故曰“苏湖熟，天下足。”若为地势低下，不可作田，此诚无稽之论，何以言也

？浙西之地，低于天下，而苏湖又低于浙西，淀山湖又低于苏湖。彼中富户数千家，每岁种植茭芦，编钉桩篠，围筑埂岸，岂非逆土之性，何为今日尽成膏壤？此明效大验，不可掩也。既是淀山最低之处，尚可经理为田，岂已成之田，反不可作田耶

？议者曰：水旱天时，非人力所可胜，自来讲究浙西治水之法，终无寸成。答曰：浙西水利，明白易晓，何谓无成？大抵治水之法有三：浚河港必深阔，筑围岸必高厚，置闸窦必多广，设遇水患，亦不能为害。昔范文正公请开水浦，议者沮之，公力排浮议，疏浚积潦，数年大稔，民受其赐。载之方册，昭然可考，谓之无成可乎

？议者曰：河渠、围岸、闸窦三者俱备，则水患可无，民食可足，诚为久远之计，朝廷胡为而废之？答曰：国家收附江南三十余年，浙西河港、围岸、闸窦无官整治，渐致废坏。今欲募夫供役，必取办于富户；部夫督役，必责成于有司。二者皆非其所乐，是以猾吏豪民构扇，必沮之而后已。朝廷未见日后之利，但厌目前之扰，所以成事则难，坏事则易。东坡亦云：官吏挥其经营，百姓畏其出力，所以累行而中辍，不能成久远之利也。议者曰：行都水监既是有益衙门，何众口一词，皆为无益，而朝廷罢之？答曰：民可使由之，不可使知之。事之利害，久而始明，彼小民无知

，但见工役之繁，豪民肆奸，又吝供输之费，所以百般阻挠，但为无益，以败乃事。殊不知浙西有数等之水，拯治方略皆不相同，非立专司，岂能成功

？使水监衙门真为无益，古之有国者，亦废而不治久矣。何为周、汉、唐、宋之世，经营水利，列之史传，代有其人。浙西低下之地，不须水监。即今中原高阜之处，安用水监河道司为哉！高阜之处，水监既不可缺，而低下之处，乃谓不必置，何不智之甚也。数年之后，河港浅塞，水害滋甚，有忧民忠国者出，必复兴修水利之事。彼横议者，岂得终沮之哉！议者曰：水利固不可不修，然今陇西、汉唐二渠，止责于有司修浚，民更不扰。浙西水利，何不亦责之有司

？答曰：陇、西二渠，长流水也，浚成深渠，水自下流，治之无难。浙西水性不一，整治方法亦殊。岂可以汉、唐二渠例视之哉！又平江等路水利状：太湖纳湖州、宣州诸溪之水，而南北东江海之岸皆高，水积其中，势若盘盂。设遇雨涝，则环湖低田，悉皆淹没。若欲导泄积水，在乎时时点检太湖东北两岸通江河之道，不致淤塞可也。盖环湖低田利在泄潦。沿江傍海高田，亦仗湖流奔注，冲散潮沙，使江河通利，乃可引潮灌溉。诸水湖在太湖迤东及北者甚多，皆能接泄太湖，注江达海。数内淀山湖自大盈、赵屯等浦以出吴淞江，与浑潮相接最近，若上源所注不急，则潮沙注湖，渐成淤淀，富家因淤淀围裹成田，由是湖水与诸浦渐远，而所泄益微。若非就湖内围田，多开河渠，及时修浚诸浦，则此湖之塞，恐不止于是也。又接吴江石塘，障遏东流之势，致潮沙日涨，半为平地。此乃太湖泄水，下吴淞江第一要处。古来于堤间，多置木桥与凿水洞，上则通行，下则泄水，盖欲占其急流，冲涤潮沙，免致水患。人不知此，或便于行路，则塞坝河口，或惰于巡防，则密置桩橛，矧以茭芦、鱼簖等物障遏，必得官司于此处榜示告戒，使之咸知利害可也。

）二十八年，诏开淀山湖，命江淮行省燕仲南同左司郎中都尔弥失督浚治。

（附潘应武决放湖水议：浙西地势极低，米粮丰厚。自福山而下，有二百八十余里沙冈身，以限沧溟。冈身之间，有港浦一百五十余处。太湖三万六千顷，受纳三江之水，溢流而下，一路径下吴淞江二百六十余里抵海；又一路自急流港五十里下淀山湖，由港浦而入海。古人开江浦淞泾沥之类，无非为去水计，使民居无昏垫而土可耕种。居民常常修筑围塍，官府常常修浚水路，涝则车水出田，旱则车水入田，则公私之利，岂不溥哉。若公私之力少有不及，则民居荡析，而厚利以失。钱王时，置撩浅军四部七八千人，专司导河筑堤。宋初废弛，故常有水患。至仁宗朝，范文正公亲历海滨，开浚五浦，废米钱一十八万余贯石。自后置丰田水利使者，专管湖塘河渠。赵运使任内，用钱米四十余万。至理宗朝，创立魏江、江湾、福山水军数千人，专修江河湖塘，仅免水患。归附后，军散营废，湖港湮塞。其淀山湖中有山寺，宋时在水中心。东有出水港，曰斜沥口，曰汉港口，曰小漕港，曰大沥口，曰小沥口，各阔十余丈，通潮水往来。潮退即引潮水下大漕、大盈等浦，入青龙、盘龙江而出海。古人谓之尾闾门。宋法禁人占湖为田，为泄水路故也。今山寺在田

中，虽有港渚，悉皆浅狭，潮水湖水不相往来，拦住去水。东南风水回太湖，则长兴、宜兴、归安、乌程、德清等处泛滥，西北风水下淀山湖泖，则昆山、常熟、吴江、松江等处泛滥。皆因下流不决，积水往来为害。去夏大水，淀山湖、太湖四畔良田至今不可耕种。昨随营田司官亲曾相视水势，与高年老农知识地理，讲究得淀山湖东大小漕港斜沥等处，故是泄水尾间，今为权势占据，卒难复旧。淀山湖北，有道褐浦、石浦、千墩浦、小沥口四处，取江颇近，水势顺便。今若先于此四处开浚，决放水路，以救百姓，以保公私，实为居安虑危经理根本之计。候水减退，然后次第开浚诸处河港。此古人所谓下流既通，上流可导也。)

大德二年春二月，中书省奏立浙西都水庸田使三品衙门于平江路设置，专一修筑围岸，疏浚河道，务要田农得济，水道疏通，围岸坚固为一事。浙西淀山等湖，已有定立官湖界，诸人不得似前侵占，复为民害。违者庸田司就便追断。又浙西海水昼夜两潮，随带泥沙入港，渐成壅遏。宋时另设撩清军人，耑一撩洗。今仰庸田司于二八月内，依时督责，如法疏浚，无致壅遏与民为害。据浚治河道，修理堤岸闸坝，合用人工，如何措置，可以常久通行，行省便为从长议拟。又浙西官田数多，俱系贫难佃户，春首缺食，又自行修理，官司不为存恤，深为未便。今后管民官不得将此等佃户差充里正主首一切等役。又淀山、练湖诸人占湖为田，岁纳诸粮，官司另行收贮。若有合行修浚，人工物料，从庸田司募工支用。八年，浙省平章政事燕只吉、台撒里浚决吴淞江。

至治三年，诏开吴淞江、淀山湖及诸河渠。

泰定元年，行省左丞都尔只班、知水利前都水少监任仁发浚治淀山湖。二年，朵尔只班、任仁发浚吴淞旧江、大盈浦、乌泥泾。三年，任仁发置赵浦、潘家浜、乌泥泾三闸。

至顺二年，江浙行省浚乌泥泾。

至正元年，修浚吴淞江，治渠堰。三年四月，都水庸田使司修华亭捍海塘。

明永乐二年，浚黄浦，由范家浜入海。十年，浚上海盘龙江。

正统八年，修浚金山卫独树营至刘家港口边海诸河。

景泰二年，知府叶冕修淀山湖堤。湖北界昆山，各据彼此。工莫克就，冕一视之，督府民修筑万余丈。二邑赖之。

天顺二年，巡抚崔恭督工挑浚上海县自白鹤江至卞家渡四千六十七丈。浚蒲汇塘及新泾四千丈，凿曹家沟南抵新场二万丈，广皆十四丈，深皆二丈。浚六磊塘、莺脰

湖、乌泥泾、沙竹冈诸水，通流入浦。民感其惠，因呼曹家沟为都台浦。

成化八年，浚吴淞江。

弘治元年，带理水利佥事伍性浚吴淞江中段四十余里，及顾会、赵屯、都台诸浦，蒲汇、杨林、新泾诸塘。七年，水利侍郎徐贯开吴淞江，并大石、赵屯等浦，泄淀山湖水以达于海。十二年，提督水利工部郎中傅潮浚崧子浦，檄通判原应宿董役。

嘉靖元年，工部郎中颜如环浚吴淞江。二年，工部郎中林文沛督率华亭县开南桥塘、金汇塘、官路港、站船浜、北蟠龙塘、南崇塘、官庄泾、青村港、黄泥糟、尹山泾、米市塘，共长一万九千四百九十五丈；上海县开旧江、走马塘、周浦塘、站船浜、盐海塘、六磊塘，共长一万六千五百五十丈，以泻当湖、三泖、淀山湖诸水，使各通黄浦、吴淞江以入海。

（附林文沛请修水利疏略：浙西天目诸山西来之水，皆归太湖，再流入于阳城、昆城、淀山、三泖等湖，其性本皆欲东。故神禹相地分流，疏其东北入海者为娄江，东南流者为东江，并淞江为三江，以分泄之，自是不闻有水患。后世近江淤泥之地，悉成上田，而东江之故道塞矣。由是欲使东江之水迤迳北旋，会入淞江，而趋下之性迟矣。故后人于常熟县北开二十四浦，疏而导之扬子江。又于昆山县东开一十二浦，分而纳之海，所以补东江不通之力也。又虑潮沙易淤，各于浦口置立板闸，潮来则扃之以御泥沙，岁旱亦扃之以备灌溉。又于闸外或设开江之卒，或设撩浅之夫，皆所以决壅塞而防泛滥也。永乐间，尚书夏原吉区画经度，如开刘家、白茆二港，甚合古人之法。弘治七年，工部侍郎徐贯奉命断理其事，有通判姚文灏辅之。一时疏浚之法，亦有次第。旧制板闸夫卒之设，围岸之筑，皆未全备，是以诸浦之壅塞如故。近年虽有带管佥事，事既不专，名亦虚设，以至水利日废。迄命庭臣计议，敕命专理。及今秋收之后，访前代疏浚之规，为来年水患之备，或计各府钱粮容乏，容其借取课钞支用。开诸浦以泄诸湖之水，复版闸以严启闭之规，立夫卒以继疏浚之功，筑围岸以防横流之势。虽日费用浩大，然计被灾免征之费，孰为多寡，从可知矣。

）四年冬，命水利佥事蔡乾浚松江、上海张家浜、陈村塘、马家浜、旧江、青龙江。二十四年，巡按御史吕光洵浚艾圻、通波，以溉青浦。

隆庆三年，巡抚海瑞开吴淞江。

（附海瑞疏：《禹贡》称：“三江既入，震泽底定。”三吴水利，当浚之使入于海，从古而然也。娄江，东江系入海小道，惟吴淞江尽泄太湖之水，由黄浦入海。年来水道臣旷职不修，以致潮泥日积，通道淤塞，虽曰水势就下，而无下可就矣。时久撩震荡，太湖因之奔涌四溢，淹浥禾亩，如嘉靖四十年、今隆庆三年是也。而小

为淹没漂湍之患，亦时有之。是吴淞江一水，国计所需，民生攸赖，修之举之，不可一日缓也。臣于旧岁十二月，巡历上海县，亲行相视，按行故道，量得淤塞当浚地长该一万四千三百三十七丈二尺。原江面阔三十丈，今议开十五丈。计该用工银七万六千一百二两二钱九分。今以水荒缺收，饥民动以千百告求赈济。臣已计将节年导河夫银、臣本衙门贍发银两、各仓储米谷、并溧阳县乡官太仆寺少卿史际义出赈济谷二万石，率此告济饥民，按工给以银谷。于今正月初三日兴工挑浚。委松江府同知黄成乐督率上海县知县张崐、嘉定县知县邵一本分理。兴工之中，兼行赈济，千万饥民稍安戢矣。但工程浩大不敷，饥饉频仍，变故叵测，官储民积，计至二月间尽矣。江南四百皆荒，湖广、江西有收成，府县又执行闭粜，无从取米。伏望皇上轸念民饥当恤。吴淞江水道，国计所关，敕下该部酌议，量留苏、松、常三府漕米二十万石，准照前旨银数改折。凡应天等十一府州县库贮不拘，各院道诸臣项下无碍贍罚银两，听臣调用。浙江杭、嘉、湖三府与苏、松、常三府共此太湖之水，吴淞江开，则六府均蒙其利，塞则六府同受其害。其库藏银亦如应天等处，一例取用。彼处居民，亦听上工就食。吴淞借饥民之力，而故道可通；民借银米之需，而荒歉有济。一举两利，地方幸甚。）

万历六年，御史林应训督知府阎邦宁浚大川六、支流四十七、港浜之小者九十有一。求圩岸之故迹，尽修筑之，逾年乃成，作水利圩图。十年，松江通判刘师召开浚奉贤黄泥、白龙、百曲、新港、白莲、三林、走马、虬江等河，修筑淀泖黄浦等处堤岸。十六年，水利副使许应逵浚吴淞江。二十八年，知府许维新开浚府城市河。

《松江府志》：松郡近海潮汐往来，泥沙易淤，而城市尤甚，兼以居民侵占，河道日溢，间有疏治，旋即壅塞。维新锐意兴复，特委上海县典史庞尚鸿经理其役。凡势家占造水桥、河房，悉皆撤去。东西两关，直河南北岸，拓复故迹一丈有奇。初，众议难之。尚鸿不畏强御，三月而竣。河道即通，货舰鳞集，众沾其利。至于编工计程不役塘长，造船运土，弃之废地，随浚而毕，尤为良法。四十五年，上海知县吕濬开繇府城抵县内外水道。

天启元年，华亭知县章允儒同吕濬浚莘村塘，华亭长三千三百丈，上海长一千丈。二年，华亭知县郭如阅浚官绍塘横沥河，长二千丈有奇。上海知县鲍奇谟浚张家塘，东至黄浦口起至华亭界，长三千二百丈。三年，郭如阅复浚府东北城濠二百四十丈。四年，郭如阅复浚蒲汇塘、徐家浜及城内市河，长三千四百余丈。五年，华亭知县徐尚勳浚海螺港，长一千七百八十丈。鲍奇谟复浚张家塘，长一千一百六十丈。尚勳复浚城壕河泾及集贤泾等河。《松江府志》：自万历间频遭水患，专设导河夫役，有司加意修浚，每岁举行，江河通利。六年，青浦县知县郑友元修筑田圩。

《松江府志》：青浦自水灾后，低乡田亩日洼，友元令业主出米，佃户输力，分大圩为小圩，界长圩为短圩，便于戽救。旁邑传以为式。

崇祯元年，苏松水利道张孝浚华亭新村、蒲汇、官绍等塘，长六千四百余丈。浚上海陆道浜、莘村塘、小闸港，长四千七百余丈。二年，巡抚曹文衡檄同知钱永澄浚

华亭金汇塘、横泾河、吕河泾、徐家浜、上海俞塘等河，长万余丈。修筑黄浦塘岸，长二千余丈。是年，知府方岳贡浚府县城内诸河，发帑募夫，随运河土增筑官塘，自西马头至五里桥，长堤高固，行旅耕作胥利焉。三年，巡抚曹文衡浚上海肇家浜，长二千五百余丈。四年，知府方岳贡浚华亭盘龙塘、亭林、鹤泾汇、河运港、后港、盐铁塘、南横港，长六千余丈；上海新泾，长一千八百余丈。五年，巡抚庄祖海督通判朱启元浚华亭祝家港、浙河，长三千六百余丈；上海新场河、沈庄河、青浦蒲汇塘，长四千八百余丈；筑泖塘淀河岸，长二千八百余丈。七年，巡抚祁彪佳督浚华亭蒲汇、官绍等塘工；青浦蒲汇、莘村等塘，长万余丈。八年，巡抚都御史张国维督松江知府方岳贡，修滢阙石塘。是时，滢阙坍塘长二百八十九丈，内患口一百十九丈，东西两塘接连患口一百十七丈有奇。东尽塘五十三丈。官给料价工食银二万余两。岳贡率属经使举人吴嘉印综核冒滥，石塘以成。十三年，方岳贡复建捍潮石塘，举人何刚董其役。

清顺治九年，巡按御史秦世贞檄华亭知县刘成龙浚春申、六磊、紫冈、沙冈、竹冈、蟠龙、蒲汇诸塘，及邱泾、横沥、张泾、俞塘、沈漕泾、千步泾，并支河二百余条。仍令塘长每岁修治。十年，知府李正华大浚府城诸河。

康熙十年，巡抚马祐奏准开浚吴淞江。

雍正五年，挑吴淞、白茆、孟渎、德胜、九曲河，并各河次第开浚。九年，开浚苏、松、常、镇四府河道。工竣。（以上三条俱详见太湖）

乾隆元年，上海知县褚菊书浚蒲汇塘、沙冈、急水港、淡水河北蟠龙塘。二年，署上海知县徐良模浚圆沙浜，协浚千步泾。三年，奉贤知县许逢元复浚青村城濠。五年，上海知县王世睿浚城濠，浚马屯泾。六年，华亭知县邹玉章与金山县合开乡界泾。

（泾绵亘二十八里）娄县知县胡具体开二里泾坝。七年，上海知县王世睿浚华泾港、龙华港。九年，巡抚陈大受檄浚蒲汇塘。十年，上海知县王倬浚城濠、漕河泾。十一年，上海知县王倬浚六磊塘、马屯泾、三林塘。十二年，上海知县王倬浚李从泾。十四年，华亭知县余畅、金山知县常琬详浚运石河。十五年，上海知县李文耀浚沙冈及城濠。十六年，奉贤知县李治灏详浚张泽港。十八年，上海知县李希舜开浚城濠及薛家浜，改建石闸。肇家浜方浦口筑坝蓄水。奉贤知县李治灏浚竹冈。十九年，华亭知县陈筠濬盘龙、盐铁诸塘，并议置石闸于三里汀。

（按是时议置石闸于三里汀，随时启闭，以遏泖泾东流之水。先是盘龙、俞塘诸水直入泖泾，其流甚驶。故盐铁塘来势寝缓，湖日壅，旋疏旋积，议者欲坝截三里桥。俾盐铁之水，一意北流，彼此均受其利。会有好事者以舟楫道迂，力阻众议而止。至是复有斯议云。

）奉贤知县李治灏浚南桥塘。二十年，华、娄、上、青四邑会详开浚蒲汇塘。上海知县李希舜详开肇嘉浜，并浚外城河。是年，署奉贤知县涂扩浚璜泾。二十五年，华、奉、娄三县会浚仓城河。二十六年，华亭知县邓培蒋浚前港顾胥塘。上海知县卢师武开浚赵家浜、周泾及内河城河。南汇知县刘若洙疏浚盐铁塘、南都堂浦、蒲达泾。二十七年，奉贤知县刘伯坝开浚南桥塘。二十八年，巡抚庄有恭奏请开浚吴淞江。

（上海自王浜起至大野鸡墩；青浦自四江口起至大朴树；另开黄渡越河，自怀浦直至许家港。）又檄署娄县知县许钢，挑浚泖口之古浦塘、石湖塘、头陀港

（附庄有恭请浚三江水利疏略：窃见太湖居苏、常、湖三郡之中，北受荆溪百渚，南受天目诸山之水，汇为巨浸而分疏之。大干则以三江为要。三江者，吴淞江、娄江、东江也。东江自宋已湮。逮明永乐间，开黄浦江，宽阔深通，足当三江之一，故今亦谓之东江。此三江之分流交错，经吴江、震泽、吴县、元和、昆山、新阳、青浦、华亭、上海、太仓、镇洋、嘉定十二州县之境，其间港浦纵横，湖荡杂错。大概观之，无处不可通流，无流不可分泄，似亦可安于无事，必有所阻。查太湖出水之口，不特宝带桥一处，其他如吴江之十八港、十七桥，吴县之鲇鱼口、大缺口，为湖水穿运入江之要道，亦不无浅阻，又加入吴江之庞山湖、大斜港、九里湖、淀山湖、淑浦等处，向称阔宽深通，大资宣泄者。迩来民间贪图小利，遍植茭芦，围筑鱼荡，亦多所侵占。刘河现在河形亦大非昔比，舟楫往来，必舢舨待潮。昆山外濠为娄江正道，浅狭特甚。苏州之娄门外河为江源出运咽喉之地，河面仅宽三四丈不等，偶遇秋霖，四水汇集，江身浅窄，先为本境之水所占，必俟境水稍退，然后湖水得出为之传送，而上游已多所漫淹矣。若及早治之，事多而功实倍。今臣筹所以治之之法：其运河以西，凡太湖出水之口，但就其有桥可通，有港可泄之处，为之清厘占塞，规仿旧额，务使分流，迅速无阻。其运河以东三江故道，吴淞江自庞山湖以下，娄江自娄门以下，凡有浅狭阻滞处，相度情形，疏浚宽深，务与上源所泄之数，足相容纳。其江身中段，一切植芦插籐，及冒占水面之区，查明尽数铲除，嗣后仍严为之禁。则水之停蓄有处，传送以时，并即以挑河之土，俾令加培圩岸。再将现在闸座，为之经理，其有去海太近，建置非宜，难于启闭者，另为酌量改移，务令启闭得宜，足资蓄泄，庶浑潮不入，清水盛强，而海口之淤，亦将不挑而自去。）（又知府李源议吴淞应与刘河一并浚深稟：查勘得娄江淤淀，较甚于吴淞江。吴淞江之淤滩，浮沉于水面之间，尚有中洪四五丈。娄江之淤滩，已成平陆，中洪颇狭。疏浚之方，应将娄江加宽加深，固无疑义，第吴淞江现议以水深七尺为率。伏查志载：前明海忠介于吴淞江有关太湖宣泄，请帑疏浚开成河，面阔一十五丈，底阔七丈五尺六寸。本朝康熙十年，请帑并浚刘河、吴淞二江。刘河挑浚，面阔一十一丈，底阔六丈六尺，深一丈；吴淞江挑浚，面阔一十五丈，底阔七丈五尺，深一丈五尺。雍正五年，复浚刘河、吴淞二江。刘河挑浚，面阔一十二丈，底阔六丈，深止八尺，吴淞江挑浚，面阔一十五丈，底阔七丈五尺，深一丈。是前浚吴淞三次，面底阔宽相等。惟浚深，前二次尚属相仿，后减三分之一，以致淤浅。

倘以水深七尺为度，诚恐一浅一深。吴淞上游，湖水掣入，刘河下游，浑潮汹涌直入，况潮水现过黄渡，并至泗江口以上，湖水不能敌潮，沙泥留淀吴淞一带，中洪立见其淤。似应将吴淞江上段，照依现估刘河新口，面宽十六丈，底宽十丈，自水面至底浚深一丈，与刘河浅深一律相平，则宣泄通畅，利益无穷矣

）。三十二年，娄县知县谢镇藩浚李塔汇、官塘。三十六年，华亭知县高辰浚城内外市河及泖泾。三十九年，华、奉、娄三邑复会浚仓城河。四十年，上海知县史尚确浚城内外河道。南汇知县成汝舟浚闸港、都堂浦、白莲泾。四十一年，巡抚杨魁檄浚蒲汇塘、蟠龙塘。是年，娄县知县张履观浚西门外市河。奉贤知县黄元燮浚南桥塘、璜泾。四十二年，署上海知县韩运鸿开方浜坝基，并建石闸。南汇知县成汝舟浚新场包家桥港、洪福桥港。四十三年，南汇知县成汝舟浚老护塘港。青浦知县黄潼鲤浚城内各河。四十四年，署娄县知县邱涟、知县张履观浚李塔汇。南汇知县成汝舟浚周浦塘。署青浦知县边见龙浚珠溪市河。四十六年，华亭县金山巡检司吴金相详浚方西塘。奉贤知县王梦文浚南桥塘。四十七年，署娄县知县张大器浚沈泾塘。

（自水云亭至古山水桥止。）上海知县林培选浚华漕港。奉贤知县王梦文浚璜泾。四十八年，华亭知县林培由浚城内河及东北城濠泖泾至大湾。上海知县范廷杰浚肇嘉浜、薛家浜、方浜、侯家浜及大、小支河。五十一年，娄县知县谢庭薰浚西门外市河，并浚东南城濠、官绍塘。署青浦知县黄玉湖浚黄渡镇吴淞旧江。

（按旧江系嘉定、青浦跨江成市之地，自二十八年开浚越河之后，二十余年几至淤塞。是年始疏浚。）五十二年，华亭、奉贤二邑会开运石河。五十四年，华亭县知县梁兰生浚方西塘、祝家港，并浚学前河。奉贤知县张永和浚南桥塘。五十五年，华亭知县程明憭、娄县知县宁贵、上海知县周云翮、青浦知县蒋励宣浚蒲汇塘。华亭又浚春申塘、盘龙塘、运港、招贤泾、三里港、新泾塘。青浦又浚附近之盘龙小涑河。五十七年，华亭知县程明憭浚叶谢塘。奉贤知县王桂怀浚南桥塘、望河泾。

嘉庆二年，华亭知县王劝、娄县知县张昌运会浚东北西城濠。奉贤知县王桂怀浚南桥塘。上海知县汤焘浚薛家浜、肇嘉浜、方浜及各支河。南汇知县张桂林浚闸港。三年，南汇知县张桂林浚周浦塘，又浚盐铁塘、周浦市河。五年，奉贤知县赵堂浚南桥塘。六年，署松江府知府康基田浚华亭、娄县、上海、青浦联界之泗泾、蒲汇塘，奉贤之南桥塘

（塘西口建闸，因千步潮水冲激，不数年仅存片石）、金山之张堰塘。又浚府城内外市河、上海内外城河。七年，南汇知县张昌运浚王家浜、咸塘。八年，上海知县石文连浚内外城濠、城内薛家浜、肇嘉浜、方浜、侯家浜。九年，华亭知县周炜委巡检唐步瀛督浚三里港、运港、新泾塘。十三年，南汇知县方恩承详浚周浦塘。十四年，华亭知县李绍洛、金山知县郑人康会浚滟泾。奉贤知县张敏求、县丞向文璜

督浚南桥塘。上海知县郭元照浚蒲汇塘。十五年，华亭知县李绍洛、娄县知县苏猷琛、青浦知县李廷芊详浚汇塘。十六年，上海知县王大同浚内河城河，并肇嘉浜、薛家浜、方浜。十七年，华亭知县周炜浚祝家港。十九年，奉贤知县陈文述捐廉筑坝，开南桥塘、璜泾、柘沥、浅沙、巨漕小闸。二十年，南汇县知县沈映枫浚闸港及都台浦。

常州府

周泰伯开渎，后人名曰“泰伯渎”。

汉阳美令袁玘筑长桥，凿便民河。（在吴江界）

宋元嘉二十二年，修阳湖成良畴数百顷。二十四年，治临津。

梁大同元年，绕惠山浚溪。（今名梁溪）

唐景龙二年，置将军堰闸。

元和间，常州刺史孟简开泰伯渎，人遂称为“孟渎”。按：孟渎袤四十一里，溉田无数。（附郭思极疏浚孟渎疏：孟渎在武进之北，延袤六十余里。外通长江，内资灌溉，商民舟楫，罔

不便之。嘉靖间筑堡，中流日就淤塞。尝有建议开浚，旋议旋寝，将成平陆。臣愚以为孟渎一开，则既有间道以通舟楫，而运闸得启闭之宜。又引江潮以达奔牛，而运河资接济之力，纵与亢旱，不致坐以待困。此缓急可赖之一策也。）

五代（南唐）保大元年，修孟渎水门。

宋淳化三年，知常州府王洸开珥渎。

天禧四年，知江阴军崔玄浚利港，开横河。

庆历二年，知晋陵县许恢浚申港，凡六十八里。浚澡子港，自江口起，凡四十里。浚戚墅港，自湖口起，凡九十里许。工费三十六万。凡灌田万顷。工役三月告竣。三年，知武进县杨玘浚孟渎。是年，知常州李庆余浚顾塘河。

嘉祐五年，转运使王纯臣督苏、湖、常、秀四州，筑田塍以御风涛。六年，宜兴县尉阮洪疏四十九渎洪水。以吴中水患，屡上书监司，乞开百渎。得请。遂疏四十九渎，田禾大稔。是年，知常州陈襄浚运河。襄以太湖积水，横物运河，不得入江为

民患，立法浚之，其患遂息。八年，知宜兴县司马旦凿新溪。是年，知江阴军杨士彦浚横河。

治平四年，知宜兴县楼阔浚四十二渚。

熙宁元年，楼闵复开一渚，民颂之曰，“楼公渚”。是年，岁旱河竭，知无锡县焦千之自小渲车湖入运河。复车梁溪水，由将军堰以灌农田获利。九年，知江阴县杨孝儒督治农田，兴水利。

元祐三年，诏浙西常平使者，调苏、松、常、秀四州民夫，浚青龙江。六年，治芙蓉湖，开堰。

绍圣二年，诏武进、丹阳、丹徒三县，修治河堤岸沟。是年，诏开浚苏、常二州等处湖浦。

元符二年，知无锡县赵伾兴浚水利。

崇宁元年，知常州朱彦浚后河。

大观四年，江阴县丞于溥兴水利，置黄田、蔡泾等闸，导申港、利港。

政和元年，知常州徐申重建黄田闸。三年，江阴县丞楚执柔浚治横河、市墩新河、代洪港，并创马师唐市闸、东门堰。

宣和二年，两浙提举赵霖修平江、常州一江四浦五十八渚。

建炎元年，知武进县梁汝嘉浚城濠。

乾道二年，漕臣姜铤、知江阴军徐葺浚申、利二港，造蔡泾闸。

六年，监进奏院李结献治田三议。诏令胡坚常相度以闻，谕有田之家，各依乡例，出钱米与租佃之人，更相修筑。从之。（附李结治田三议：苏、湖、常、秀所产，为两浙之最。自绍兴十三年以来，屡被水害，议者皆归积水不决之故，以为积水既去，低田自熟。第以工役浩大，事皆中辍。臣有管见，治田便利三议：一曰敦本，二曰协力，三曰因时。司农丞郑亶议云，古人治塘浦阔深者，盖欲取土以为堤岸，非专为决积水。若堤岸高厚，借令大水之年，江湖之水，高于民田五七尺，而堤岸尚出于塘浦三五尺，则虽大水，不能入于民田。民田既不容水，则塘浦之水自高于江，而江之水，亦高于海，不须决泄，而水自湍流矣。此古人治低田之法也。若知决水，不知治田，则虽开浚之地，不过积土于两岸之侧，霖雨涤荡，复入塘浦。不

五七年，填淤如旧，前功尽弃。为今之务，莫若专务治田，乞诏监司守令相视，苏、湖、常、秀诸州水田，塘浦紧切去处，发常平义仓钱米，多寡量行借贷与田主之家。令就此农隙，作堰车水，开浚塘浦，取土修筑两边田岸，立定丈尺。众户并力，官司督以必成。且民间筑岸，所患无土，今既开浚塘浦，积土自多。而又塘浦阔深，易以流泄，田岸既成，水害自去。此臣所谓敦本之议也。结又以为百姓非不知筑堤固田之利，然而不能田，或因贫富同段而出力不齐，或因公私相吝而因循不治，非协力不可；百姓所鸠工力有限，必赖官中补助，官中非因饥歉，难以募民兴役，非因时不可。

）是年，常州府筑五渚堰闸，兼修闸里堤岸。

淳熙元年，知常州府赵兼防修奔牛闸。十三年，知常州林塞重浚后河。十六年，常州府浚东蠡河。

绍熙五年，知宜兴县高商老穿故渎，疏积水。是年，知常州李嘉言浚烈塘河，置闸。

庆元元年，知武进县丁大声浚后溪。

嘉泰十二年，知江阴军邢焘浚九里河，及城内外渠。

咸淳元年，知常州史能浚后河。

元泰定元年，浚常州路江阴州各通河港。

至顺二年，江阴州同知浚河，自蔡泾北出江口，长十里一百五步，下闸以西长一千八百五十余丈。

明洪武三年，常州府知府孙用重建烈塘闸。七年，孙用浚澡子港。置闸。二十年，江阴县浚申港。二十四年，武进县浚烈塘。二十五年，武进县疏剩银河，置闸，无锡县浚新河。二十七年，常州府浚孟渎。二十八年，武进县凿大平河。江阴县浚横河。二十九年，武进县建孟河闸。三十年，武进县筑蠡河堰。

永乐四年，诏浚孟渎。九年，浚江阴青阳河道。

宣德九年，巡抚侍郎周忱建孟河闸。

正统元年，常州知府莫愚重建黄田闸。（附王直记：水之有闸，所以时启闭，谨蓄泄，通舟楫之去来，资田畴之灌溉，其为利大矣。然为仁民爱物之君子，斯能因其

利而利之。不然，则怠惰纵驶，苟目前之安，忽经久之利，其为民病其小哉。予于黄田闸之重建，而知其用心之厚也。常州、江阴城北黄田冈，引江潮贯城中，而出于南门，凡二十里，会夏港之蔡泾，以达于运河，实舟楫走集之地；附郭良田数千顷，皆赖其灌溉。港因潮之消长为浅深，长则溢，消则涸。溢则舟通，雨足以溉田；涸则田不得受利，而舟胶其败者有矣。唐长庆中，李德裕观察浙西，始建闸于城北，潮长即启以行舟，消则闭以蓄水，人赖其利。历岁滋久，缮治不继，日就颓毁，自洪武丙子以来，人失利也久矣。前之为郡县者数十人，莫有稍概于心者。宣德中，工部郎中桂林莫侯愚被简拔来为郡，上赐玺书，俾兴利除害。侯询知其事，叹曰：“此亦利害之大者也。今田利漕舟皆赖此，其可后乎。然以始至，不暇为，久之政通民和，即具奏其事。上命巡抚侍郎周忱经度之。周公庐陵人，忠以奉国，仁以惠民。侯与之协议，重建于旧址南五丈许，以避水之冲。念役重费殷，不忍赋于下。公常广储蓄以备灾，度可支数十年，欲稍发所备米，市材僦工，一切不以烦民。计其费以闻。诏可之。命通判邵武张侯龄董其役。然其调度，皆出周公。买石洞庭山，磨琢而后致之。凡用石工五十人，木工十人，金工五人，土工十人，役夫二千五百人；石四万五千尺，木二万一千一百根，砖三十万一千个，石灰四千石，铁一万一千斤，食米二千九百石。经始于正统元年八月，而于其年十月成。自是岁获大穰。再行无害。耕夫、楫徒、商人、估客鼓舞而赞颂焉。郡中父老皆大喜曰：兹闸之建，吾郡襟抱严固，风气完复，吾民其永有利也。

）六年，武进县重修孟河闸。

天顺元年，江阴县知县周斌兴水利，开通河港。四年，浚江阴县城濠。

成化四年，都御史邢克宽重建奔牛闸。（附王屿记：距毗陵城西三十里为奔牛堰。诉堰水西行百八十里，历云阳达京口为运河。其地势东倾，堰不足以时蓄泄也。尝于金口、吕城、奔牛为三闸，皆莫详其创始。按史记载，丹徒水道，自六朝千百年通吴会。隋初有诏浚治，则是此闸在齐、梁前已有之矣。自大业之后，此闸当与河相为废兴，而并不一书。至元符、嘉泰，始两书修复。我国初洪武己酉间，闸废。后更导其支流，东北出于堰为坝，自是而运河不复通。重载漕舟，多出孟渎河江。而江行险远，岁不能无覆溺之患。天顺己卯，冢宰崔公克让为都御史，巡抚江南，为言于朝，请复建闸。营度适宜，委畀得人，曾无几何，而五闸告成。其在常境者，奔牛下闸是也。成化戊子，都御史邢公克宽来继，谓奔牛犹有上闸，其遗址尚存，盍亦修建，俾互为启闭。遂以其事付之常守卓君天锡，而以武进邑丞宋瑛董役事，给费于公帑，役民于农隙。其经画之良，成功之速，与下闸等。夫自堰废为闸，闸废为坝，言水利者，时有訾病。今闸与坝两存之，春夏水溢则由闸，冬水涸则由坝，坝可蓄而闸无壅也。根遗迹笑成算以开永图，夫岂乐因循而好自用者所能仿佛哉

！）八年，知武进县熊翀浚后河。知无锡县佟珍浚走马塘。十九年，知宜兴县知县

袁道浚便民河并观鹤渚。

弘治四年，伍性浚宜兴县汤溪等渚。六年，水利侍郎徐贯浚江阴县申、利、桃花三港。浚宜兴县葛溪等渚。八年，巡抚朱瑄浚宜兴县五贤等渚。复浚孟渚等河。九年，水利工部主事姚文灏浚宜兴县仕渚等四渚。十年，姚文灏浚宜兴县白龙河。十一年，浚宜兴县黄渚等五渚。十四年，提督水利郎中臧林浚宜兴县港渚。十五年，江阴县知县徐贞修黄田闸。十七年，臧林浚宜兴县后河并三渚。

正德六年，提督浙直水利佥都御史俞谏浚江阴河港。七年，俞谏浚宜兴县河渚浜港。江阴知县黄霆浚九曲河。

嘉靖二年，开常州府河渚。四年，浚常州府河港。开闸。十五年，江阴县知县徐贞浚利港、桃花港。二十年，宜兴县知县冯讷凿通泽河。二十三年，浚江阴县桃花港。二十四年，巡按御史吕光洵督浚苏、松、常、镇四府塘浦。是年，江阴县知县赵锦建三关水闸。二十五年，武进县修烈塘闸。是年，宜兴知县方逢时穿张公坝河。

万历元年，宜兴县知县朝容浚荆溪。五年，巡视下江水利，御史林应训疏孟渚，浚练湖。六年，重修武进县烈塘闸。是年，浚宜兴县闪溪。八年，常州府知府穆炜浚后河。武进县县丞郭之藩筑芙蓉湖堤。

（详见太湖）十六年，浚苏、松、常、镇四府河港塘渚。三十七年，无锡县知县许令典浚冉泾河。四十年，巡抚应天都御史徐民式浚江阴县九里河。四十三年，江阴县知县金廷璧浚山塘河。四十六年，常镇兵备兼水利参政萧丁泰浚江阴县九里河。

天启二年，武进县知县李维乔浚城濠。无锡县知县刘五纬修筑石塘。

崇祯四年，常镇兵备兼水利参议吴麟瑞浚江阴县九里河。六年，常州府通判刘麟长浚无锡县城内河。是年，常州府知府洪周祿浚江阴县九里河。提督学政甘学润、常镇兵备兼水利副使徐世荫浚江阴县城内河。

清康熙二十年，巡抚慕天颜请浚常熟县白茆港、武进孟河。奉旨准行。四十六年冬，奉圣祖仁皇帝发帑银三万余两，修建孟河北闸，及奔牛之天井闸。

雍正五年，奉旨发帑银二万余两，疏浚孟渚河、得胜新河。犹恐江潮汹涌，泥沙淀积，又发帑银二百二两零，建造犁船四只，并领混江龙四具，招募水手，每岁春、秋二季，于江口拖刷淤垫泥沙。

镇江府

晋太兴四年，晋陵内史张闾立曲阿新丰塘，灌田八百顷。陈敏凿练湖。

齐建武中，曲阿令邱仲孚凿长冈埭。

梁天监九年，造谢塘。

唐永泰中，转运使刘晏、刺史韦损重开丹阳之练湖，作斗门以通灌溉。（附李华练湖颂序：大蜡之祭辞曰：土反其宅，水归其壑。先王因下流而道之，故曰九洲涤源；因迤汇而渚之，故曰九泽既陂，以疏天地之气，以利元元之用。崇伯汨五行而殛羽山，台骀障大泽而封汾川，《洪范》首之，《春秋》载之。地有广狭，事无古今。大江具区，惟润州其薮曰练湖，幅员四十里，菰蒲菱芡之多，龟鱼螺鳖之产，饘飫江淮，膏润数州。其旁大族张家，泄流为田，专利致富。自丹阳、延陵、金坛环池三百里，数合五万室，旱则悬耜，水则具舟，人罹其害九十余祀。凡经上司，纷纭与夺，八十一断。呜呼

！曲能掩直，强可吞弱，老幼怨痛，沉声无告。永泰元年，诏公卿，选贤良，先除二千石，以江南经用所资，首任能者。是岁十月二十三日，拜前常州刺史京兆韦公损为润州，声如飙驰，先诏而至，吏人畏服，男女相贺。即日上无贪客，下无冤愤。公素知截湖为壤，灾甚螟螽。临事风生，指期以复。群谤雷动，公恬然独裁，乃白本道观察使兼御史中丞韦公元甫。中丞抚掌惬心，如公之谋，且曰兴利除害，得其人而后行，非常之政，敢归叔父。公申戒县吏，率徒避之。人不俟招呼，忤然从役，畚鍤盖野，浚皋成蹊，增理故塘，缭而合之。广湖为八十里，像月之规，铸金之固。水复其所，如鲸睽射，汹汹隐地，雷闻泉中。先程三日，若海之滌望，灏灏如吞吐日月，沈沈如韞蓄风雨。所润者远，原隰皆初，耕者饱，忧者泰。于是疏为斗门，既杀其溢，又支其泽，沃瘠均品，河渠通流，商悦奠价，人勇输赋，遐迩受利，岂惟此州！每岁萌阴乘阳，二气相薄，大雨时行，群潦奔流，水势所入，盈而无伤，龙见方云，稼蒙其渥。时前相国彭城刘公晏统东方诸侯，平其贡税，闻而悦之，白三事以闻，诏书褒异焉。彭城刘公宣命至江南，捧诏授公。公率元僚掾吏令丞以下，至于耆艾，西向拜手，忻戴皇朝。人心上感，天降膏泽，如有神祇，昭协厥志。公正直而和，专静而断，嫉恶宥过，惠良察奸，纯精坚百练，不耗代冰之贵，降从土札。诗云：靖共尔位，好是正直，宜其享福也。吏人入贺，公拱而谢之曰：尚书刘公，观察韦公，奉行王泽也，鄙何力之有焉

？丹阳令杜孟寅，秉公之清白，延陵公李令从，如公之爱人；金坛令杜孟寅，秉公之成规。及丹阳耆寿周孝环、百姓汤源等拜首而请曰：兑为泽，兑说也；水归于泽，而泽说于人。百年浸塞，而公启之，臣哉邻哉，克谐亭休，永代是式，三县无灾。若不碣而刻之，王命不扬于厥后，后之人无以倚负也。华尝学古，见访为颂。颂曰：望沄沄兮视冥冥，鸟闲鱼乐葭莩生。膏腴利倍起讼争，斯人怨抑痛无声。韦公正直动神灵，百年游淀为滌清。饥者食兮病者宁，诏书光宠恩濡荣。划然眊复皎明

，追琢刻颂扬芬馨。)

武德二年，刺史谢元超复置南北谢塘以溉田。

五代（南唐）昇元元年，知丹阳县吕延正濬练湖。

（附吕延正濬治练湖状：当县有练湖，源出润州高丽长山，下注官河一百二十里。臣考之碑志，访诸乡老，当为湖日。湖水放一寸，旱可引灌溉，潦不致奔冲。其利田几逾万顷。昔环湖而居，衣食于渔者凡数百家。有斗门四所，由前唐季湖废。近湖人户，耕湖为田，后农家失持，渔樵失业。民复思湖以御灾，而无所寘力。臣频承条制，修葺陂塘，窃度其湖，为利甚薄，遂聚役工于斗门基上，以土堰堰捺，及填补破缺处。初谤议震动，谓臣不良图；且废湖丰已者不十余家，有湖无灾者四县之地。臣明知利害，独如弗闻。自今秋后不雨，河道干枯，累放湖水灌注，使商旅舟船往来，免役牛牵。当县及邻县人户请水救田，臣并掘去湖岸给水。如将久远，须置斗门，方得通济。其斗门木植，须用楠木，乞给省场板木起建，下所司处分。）

宋绍圣二年，诏武进、丹阳、丹徒三县修治河堤岸沟。

（互见常州府）知丹阳县苏京重浚练湖。

元符元年正月，知润州王愈建言：“吕城闸常宜车水入澳，灌注闸身以济舟。若舟沓至而力不给，许量差牵驾兵卒，并力为之。监官任满，水无走泄者赏，水未应而辄开闸者罚，守贰令佐，常觉察之。”诏可。

崇宁四年，臣僚言：“有司以练湖赐茅山道观，缘润州田多高仰，及运渠、夹冈，水浅易涸，赖湖以济，请别以沙田赐之，仍令常平官考求前人规画修筑。”从之。

宣和五年，诏漕臣补葺练湖堤岸。《宋史·河渠志》臣僚言：“镇江府练湖与新丰塘地理相接，八百余顷，灌溉四县民田。今堤岸损缺，不能贮水，乞候农隙次第补葺。”诏本路漕臣并本州县官详度利害，检工料以闻。

绍兴七年，两浙转运使向子堙增置练湖斗门、石。《宋史·河渠志》：向子淫言：“镇江府吕城、夹港形势高仰，因春夏不雨，官漕艰勤。寻遣官属李润询究练湖本末，始知此湖在唐永泰间已废而复兴。今堤岸弛禁，致有侵佃冒决，故湖水不能潴蓄，舟楫不通，公私告病。若夏秋霖潦，则丹阳、金坛、延陵一带良田，亦被淹没。臣已令丹阳知县朱穆等增置二斗门、一石，及修稿堤防，尽复旧迹，庶为永久之利。”知丹阳县郭京浚练湖。

乾道六年，知镇江府蔡洸浚河。七年，诏漕臣沈度修筑练湖堤岸。《宋史·河渠志》臣僚言：“丹阳练湖幅员四十里，纳长山诸水，漕渠资之，故古语云：‘湖水寸，渠水尺。’在唐之禁甚严，盗决者罪比杀人。本朝寝缓其禁以惠民，然修筑严甚。春夏多雨之际，潴蓄盈满。虽秋无雨，漕渠或浅，但泄湖水一寸，则为河一尺矣。然堤岸圯阙，不能贮水。强家有专利，耕以为田，遂致淤淀。岁月既久，其害滋广。望责长吏浚堙塞，立为盗决侵耕之法著于令。庶几练湖渐复其旧，民田获灌溉之利，漕渠无浅涸之患。”诏两浙漕臣沈度专一措置修筑。八年，知镇江府宋颺浚河。

淳熙二年，知镇江府陈居仁置黄水醚。十六年，总领钱良臣修丹阳练湖横坝及诸斗门、函。绍熙间，丹阳县开丁义渎。

庆元四年，知镇江府万钟浚道市河。

嘉定元年，丹阳县主簿马荣祖修筑练湖堤岸。

淳祐二年，知镇江府柯元寿修练湖闸。

景定三年，知丹阳县赵必棣修筑练湖堤埂。

成淳六年，知镇江府赵潘改筑程公上、下二坝。

元至元十三年，金坛县作南坝。三十一年，诏丹阳县浚练湖。

大德九年，行都水监浚练湖。

泰定三年，疏漕渠。修浚练湖。《元史·河渠志》：练湖在镇江。元有江南之后，豪势之家，于湖中筑堤，围田耕种，侵占既广，不足受水，遂致泛滥。世祖季年，参政暗都刺奏请依宋例，委人提调疏治，其侵占者，验亩加赋。至治三年十二月，省臣奏：“请役夫三千余人，浚涤练湖，九十日可完。人日支粮三升、中统钞一两。行省、行台，分官监督。所用船物，今岁预备，来春兴工。合行事宜，依江浙行省所拟。”既得旨，都省移文江浙行省，委参政董中奉率合属正官，亲临督役。于是董中奉言：所委前都水少监崇明州知州任奉政、镇江路总管毛中议等议先开运河，工毕就浚练湖。省准所言。各监工官言：已分运河作三坝，依元料深阔丈尺开浚，至三月四日毕工。又监修练湖官言，任奉议指画元料，增筑堤堰及旧有土基，共增阔一丈二尺，平面至高低滩脚，增筑共量斜高二丈五尺。依中堰、西石、东旧堤、卧羊滩修筑，如旧堤高阔。以及所料之上者，遇有颓缺，修筑令完。中堰、西石磁至五百婆堤西上增高土一尺，有缺亦补之。五百婆堤至马林桥堤，水势稍缓，不须修治，其堤底间有渗漏者，窒塞之。三月六日破土，九日入役，至十一日工毕，

实役三日。又镇江路言：练湖今已开浚，若不设法关防，徒劳民力。应关本路达鲁花赤兀鲁失海牙总治其事。同知哈散、知事程

郇专管启闭斗门。

明建文元年，镇江府知府刘辰、丹阳县知县董复重浚练湖。

宣德六年，巡抚侍郎周忱修五堰。

正统六年，丹阳县知县陈谊筑练湖堤及修斗门。

最泰二年，修练湖。六年，巡抚应天都御史邹来学浚简渎。

成化二年，丹阳县知县蔡实筑练湖堤，置斗门函管。

弘治十二年，浚丹徒县甘露港。十三年，丹阳县知县高谦修筑练湖堤岸。

正德三年，镇江府作博望、新闻闸。

嘉靖二十四年，吕光洵督浚苏、松、常、镇四府塘浦。三十四年，丹阳县知县陈奎置水关石闸。

隆庆二年，镇江府同治马豸浚马嘶港。三年，修练湖堤岸。六年，修浚苏、松、常、镇四府堰坝田园。（互见苏、松、常三府）金坛县知县刘美凿长新捍渠，建义成、广泽二闸。

万历十六年，浚苏、松、常、镇四府河港塘渎。（互见苏、松、常三府）十八年，丹阳县知县周应鳌开境内支河。三十六年，浚丹阳县郑泾河。

清康熙四十七年，巡抚于准修复练湖。

第十卷 水利治绩下

淮安府

唐上元中，于射阳湖置洪泽屯。

大历中，黜陟使李承置常丰堰。

宋雍熙初，淮南转运使乔维岳开沙河四十里，以蓄泄水利。绍兴五年，修广惠髓。

淳熙六年，教授刘炜重开广惠。

绍熙中，淮东提举陈损之言：“楚州、高邮间陂湖渺漫，宜创堤堰以为蓄泄。”乃筑堰，自江都经高邮、楚州、宝应，北至淮阴达于淮；凿新河，至高邮入兴化，东至盐城极于海。又于扬州墟镇创斗门，引水由泰州海陵南至泰兴彻于江，所经画甚具，溉泽卤田百万顷，两淮之民赖焉。明洪武二十九年，复修广惠。洪武间，筑万年堰。

万历八年，巡盐御史姜璧题塞石磁口。九年，盐城令杨瑞云开射阳湖。

（附余孟麟《重开射阳湖记》：“盐城蔽长淮而阻于海。去县治一百四十里为射阳湖，山阳、宝应、高邮、兴化、通、泰之水皆汇于湖，由湖入海。先是湖水湑流，不湮不溃，沃原膏土，缅甸乎百利可兴也。岁久填淤，诸水丛奔致无以泄水怒，田庐既圯，舟楫不通，环湖民居，一望荒墟，用是胥成，盖三十年所矣。其有捍患兴利者，或情狃于便安，或事尽于惜费，迄无成功。邑大夫杨君至，乃按行隐度，备无遗谋。因议上郡守，郡守上监司，监司行事，凡三反覆而白于督府。督府以奏闻，下大司空决笑之，然后报可，而皆不能易杨君之议也。杨君既受事，画地分工，奉其躯与肩负跣驰之众，同其甘苦，疏浚积淤，增葺颓岸，盖合土木、金石之工，而使水得所壑，经始于万历九年正月，凡九阅月而告成。邑人士相与言曰：‘斯湖之开，邑大夫之泽。异时大水散溃潴城，邑民且阽于危亡，今庶几流不他徙，而公私家以万计可倚而宫也；五方之财，千里之货，所不能力致者，今庶几翼翼浮航可一息而驰至也；田以水啮，民故艰食，今庶几禾栖于亩而可有秋也。斯湖之开也，大夫之泽，弗可泯也。’乃征文于予，而记其开湖始末，以告后之君子。”）

清康熙十七年，给事中李宗孔请修翟家坝。按坝属山阳，在周桥迤南，接盱眙界，长二十五里，称天然波水沟。近被冲刷，渐成河港。淮水径入宝应湖，汇入高邮。岁岁决堤，甚为漕患，必筑成堤岸，平铺坝基，方可过水，经久不坏。盖淮、黄二渎交会于清口，由安东之云梯关入海。此上流之故道也。黄河过宿迁等处，至白洋河与濉水合。濉水涨，易趋淮、泗。于是治归仁堤以束之。淮水经盱眙等处至清口

，又与黄之过清河者合。淮水涨趋高宝，于是治翟坝、高堰、古沟以束之。此又上流之要害也。故患淮水南下，则莫如急治归仁；患淮水南下，则莫如急治翟坝等处。三十六年，奉上谕：总漕、总河会勘下河积水，何故壅塞不能迅流，应作何策，尽行归海，涸出民田。详阅议奏。总河桑格等会题疏浚各口及应闸之处。次年七月，命廷臣会议开下河。

（详见扬州府）四十年正月，允总河张鹏翮请开虾、须、沙沟等下河。

（附张鹏翮疏略：臣检查旧案，康熙三十八年三月初一日，奉上谕：下河见有积水，不得不引出归海。将串场河、射阳湖、虾、须、沙沟一带挑通，引积水流出归海。仰见我皇上軫念民生，指画周详，下河数百万苍生莫不感颂我皇上如天之仁矣。因前河臣于成龙未暇兼顾。今臣遵圣训，疏通海口，黄水有归路矣；堵塞六坝，开辟清口，引淮水会黄，二渎合流入海矣。上河渐次就绪，乃亲往查勘下河，见水势渐消，高原已经种麦。惟兴化县形如釜底，积水不能一时全消，较泰州、盐城水患尤甚。臣相度形势，博采舆论，高宝、山阳、盐城一带之水，由射阳之虾、须二沟入庙湾以达于海。今虾、须二沟因童家营漫溢，淤为平地，虽有戛梁河出水，但河身浅狭，不足宣泄，是以泛滥于兴化、盐城一带。今宜将虾、须二沟淤塞之处，约计四十余里挑挖，口宽十丈，深九尺、一丈不等，引水入朦胧河，以达于高邮。滚水坝下之水，由兴化县安丰镇至白驹场，以达于海。今自鲍家庄至白驹八十余里，地高水壅，宜挑口宽八尺、深六七尺不等，引水由白驹场入海。其高邮一沟以下，见有河形，一片汪洋，兴化白驹闸以下畅流入海，俱不须挑挖。又自兴化车路河至丁溪，由捞鱼港以达于海。今捞鱼港淤塞八十余里，应挑口宽八丈、深六七尺不等，引水入海。宝应县之水，由子婴沟、老河口入射阳湖，以达于海。今老河口一带淤浅三里余，应挑口宽十丈、深六七尺不等，引水入湖。泰州之水，自淤溪至车儿埠滔于河，以入于海。今滔于河三十二里被土商筑坝钉桩，淤塞不通，宜开口宽八丈、深六七尺不等，引水由苦水洋入海。如此则水有去路，积水可以渐消。至于串场河，自泰州以至盐城，长三百余里，多有淤浅，若挑至庙湾入海，商民两便。但旧例系盐商挑濬。范公堤长三百里，昔人筑以捍海，今已残缺，修治需费不貲，应俟下河积水消后，民有起色，渐图修举。）

雍正十年五月，署总督尹继善等议奏江南水利事宜，奉旨允行。

（附尹继善等疏：江南水利，鄂礼条奏淮扬工程事宜，奉旨。令臣等详酌定义，臣等相度确勘，公同筹画。查如皋之丁堰至丰利、掘港场河道，共计程一百二十里，为盐艘必由之道。其浚口自丁堰起至三岔河三十五里，俱系深通。自岔河而北至丰利场二十八里，又自岔河而东至掘港场五十里，深自二尺至四尺余不等，应请各就深浅分段增浚，均俾蓄水五尺，以利运行。又如皋之力乏桥内起，至周于沟三十七里，入泰州界之新河口，至拼茶场东新桥三十九里盐河一道，乃拼茶、角斜两场运盐要津，两岸数十里，民灶粮田，均资蓄泄灌溉。现在水深二尺至三尺余不等，应

请浚深蓄水五尺，粮田盐运受益弘多。河既浚深，新坝桥向有土坝一道，内蓄河水，外拦海潮。河水大听其由滚水坝而出，海潮大亦必过坝方入，出入俱有分寸，防御更为合宜。又泰州之高安场至盐城县境串场河一百六十余里，前署督臣范时绎原经题估通身开浚。雍正七年改估案内，仅将兴化之白驹场起至盐城之伍佑场七十里开浚。自白驹场南段起至富安场九十余里，以水尚深通停浚在案。今白驹场南段三里湾与前浚之河紧接处起，至草堰场三十余里，现在水深二尺至四尺余不等，盐运每多浅塞，仍须盘剥。查草堰、白驹、刘庄、伍佑等场之盐，俱由此运载，而两岸民灶田地亦资灌溉，应请仍照新浚之河一律疏浚。又山阳县境内旧有河二十道，中央沙、冈，其南为大沙河，其北界沟河，各长七千三百余丈，当年舟楫由此往来，田亩赖以蓄泄。自康熙三十五年童家营堤工漫溢，二河遂淤，积水无从宣泄，田畴连岁被浸。查看此河，实属紧要，亟应疏浚，以利民生。再扬州府城内城河二道，又绕城河二道，皆处处委积，以致扬城内外积潦莫泄，百货难通。查疏浚城内之河，应照城外之河稍狭而加深，以资久蓄；其出入水口，各建单金门石闸，以便启闭，则内外畅达。）

乾隆三年，汪德濬盐城旧串场河。五年，浚阜宁苏家嘴河。七年，山阳县令浚刘家河。八年，疏浚山阳、阜宁、桃源、安东四县境内诸河。是年，加筑六塘河两岸子堰。九年，浚盐城县境内诸河，阜宁九灶河、丹沟河。十一年，知府卫哲浚清河、史家荡、古河、盐城九曲河、阜宁放生河、桃源学城积水河。十二年，浚清河、民便河。

扬州府

周敬王三十五年，吴城邗沟通江淮，东北至射阳口，北至末口。吴越春秋，吴将伐齐，掘江通淮。按即今自仪征江岸，北至淮安府清江浦入淮之河路。漕运水利，俱赖之者也。

（附史爽河防议：江都河渠有关于河防水利者，惟运河为大。北接高邮，南至大江一线，漕堤与河俱长。而最险要者，则自邵伯金家湾起，北至露筋界牌止，计堤四十余里。堤以西日上河，自朱家湖、黄子湖迤西地势渐高，常忧旱。堤以东日下河，自堤迤东势渐低，常忧涝。昔晋谢太傅始筑邵伯堤以界之，堤以西无旱忧，堤以东无涝患，民皆便之。其遗爱比之召伯甘棠云。至明季高堰失修，翟坝冲决，水势直灌高江。此江都漕堤之所以屡决也。然患虽中于江都，而所以受患之故，则有来源去路，不仅在江都也。试约而言之，须分三路，治水之法，可得而该矣。三路者何

？曰：上流、中流、下流也。所谓上流者，高堰、周桥、翟坝是矣。高堰宜帮阔也，周桥不可开也，翟坝宜坚筑也，则淮水不致旁泄，得以全力冲出清口，上而清口不淤，下而高江不溺矣。再查高堰之上有归仁堤，又宜照旧制实筑也。归仁堤筑，

而洪泽湖来源减半，高堰、翟坝俱为易守，则来源既少而上流治矣。所谓中流者，自淮至扬运河漕堤是也。旧制十里设一小闸，旱则蓄，涝则泄，以济漕运，以卫民田也。堤西诸湖，霪雨非常，及清江浦之上通济闸水下与盱眙、天长、高良涧水陡发，运河不能容受，于是在山阳则开泾河、黄浦二大闸；在宝应、高邮搭界则开子婴沟大闸；在江都则开金湾三闸，及新河十四里芒稻河东西两闸。自邵伯至江不过三十二里，泄水最为直捷，康熙年间，河院王光裕又于两闸之西开闸三门，亦因此地泄水最易也。但金湾闸门尚窄，闸下新河孔家湾南北淤沙浅窄，宜开通广阔也。再将陆漫沟以北开二三大闸，使运河水势南北分泄，则蓄泄有方，而中流治矣。所谓下流者，则范堤各场之海口是也。云梯关在昔止为淮水尾间，致能容受，而无沙淤之患。自宋神宗熙宁间黄河南徙，黄始入淮，浊流夹沙而行，稍一旁决，则势缓沙停河塞，愈塞愈决，愈决愈塞。且黄家嘴七里沟相继旁决，而云梯关大淤，正坐此病。是云梯关为黄、淮两水之尾间，乃第一要紧海口不必言矣。其外，若山阳之庙湾海口、盐城之石磁天妃庙海口、兴化之流庄青龙桥口、白驹之斗龙港口、草湾之卤河口、小海之小海团口、泰州丁溪之龙开港口、河垛车儿之滔子坝口，凡此皆所以泄堤东七邑之水者也。年来非不开放，而究竟田庐不免湮没，人民不免漂溺，屡蒙破格蠲赈，而不免于水患者，有二说焉：一则各海口离漕堤俱三四百里而遥，纡回曲折不能直达也；一则下河七邑，四高中洼，地形如釜。沿堤减闸之水，譬之由釜边而入。范公堤各场口地势反高，譬之由釜边而出。夫水由釜边而出，则釜底之田庐已宛在深渊矣。昔《兴化志》有云：沿堤三十余减闸之水滔滔东注，非民田受之而焉往也。又王文通云：堤东下河之水，既不通江，又难入海者，诚有见也，故运河之水导之入江入海者，上策也。不得已而泄之下河，则当准漕堤闸口之水与各场海口之数相等，庶来源去路，足以相当。而其中之行水河路，积年淤塞，尤不可不亟为深浚者也。在泾河黄浦之下，则射阳湖一路。子婴沟之下，则盐城旧官河一路。清水潭之下，则泰庙东河一路。以及兴化之海沟河、白望河、东路河、邵伯河之下，则颜家庄、杨家庄以达樊汉及泰州西溪河。并各场之串场河与范堤东达海河路，俱开通深阔，则水有去路，而下流亦治矣。）

汉广陵太守陈登筑塘，以资溉田。扬州刺史刘复开吴塘陂。

晋太傅谢安筑广陵之邵伯堤。

隋大业元年，广开邗沟，引淮通江。

唐贞观中，李袭誉为扬州长史，引雷塘水，筑句城塘，灌田八百顷。淮南节度使杜亚，自江都西浚渠，蜀冈之右，疏勾践湖，及爱敬陂以通漕，溉夹陂田。

元和三年，淮南节度使李吉甫筑平津堰、富人塘，溉田数千顷。长庆中，复修白水荡。

宋咸平初，淮南转运副使吴遵路于高邮等处置斗门九十，蓄泄水利。

熙宁间，陈时开筑陈公謁，灌田千顷。

元丰中，江都县知县罗适浚大石湖。

建炎中，知兴化县黄万顷筑绍兴堰。

乾道中，转运司修陈公塘。

淳熙四年，泰州修桑子河堰。淳熙八年，提举淮南东路常平茶盐司监赵伯昌言，通州、楚州沿海旧有捍海堰，东距大海，北接盐城，袤一百四十二里，始自唐黜陟使李承实所建，遮护民田，屏蔽盐灶，其功甚大。历时既久，颓圯不存，至本朝天圣改元，范仲淹为泰州西溪盐官日，风潮泛滥，淹没田产，毁坏亭灶，首请于朝，调四万余夫修筑，三旬毕工。遂使海濒沮洳潟卤之地化为良田，民得奠居，至今赖之。自后寢失修治，才遇风潮怒盛，即有冲决之患，自宣和、绍兴以来，屡被其害，阡陌洗荡，庐舍漂流，人畜丧亡，不可胜数。每一修筑，必请朝廷大兴工役，然后可办。望令淮东常平茶盐司，今后捍海堰，如有塌损，随时修葺，务要坚固，可以经久。从之。九年，淮南漕臣钱冲之言：真州之东二十里有陈公塘，乃汉陈登濬源为塘，用救旱饥，真州岁藉此塘，灌注长河，流通漕运。其塘周围百里，东、西、北三面倚山为岸，其南带东则系前人筑叠成堤，以受启闭。废坏岁久。见有古来基址，可以修筑，为旱乾灌田之备，凡诸场盐纲粮食漕运使命往还舟舰，皆仰之以通济，其利甚溥。本司自发卒贴筑周围塘岸，建置斗门石磁各一所。乞于扬子县尉阶衙内，带“兼主管陈公塘”六字，或有损坏，随时补筑，庶几久远，责有所归。

绍熙中，淮东提举陈损之言：“楚州、高邮间陂湖渺漫，宜创堤堰以为蓄泄。”乃筑堰自江都经高邮、楚州、宝应，北至淮阴达于淮；凿新河自高邮入兴化，东至盐城极于海。又于扬州墟镇创斗门，引水由泰州海陵南至泰兴彻于江，所经画甚具，溉泽卤田百万顷，两淮之民赖焉。

（见淮安府）。

嘉定中，修陈公塘。（附李孟传《修陈公塘记》：真州扬子县二十里，有塘名陈公。汉建安中广陵太守陈登所筑，周广九十余里。西南所至，全隶扬子，惟东北接扬之江都者仅十之二。塘倚山为形，独一面为堤，以受启闭，凡八百九十余丈，冈势峻昂，环叉三十有六，毕汇于此。故停漫涵蓄，为利不赀。异时，公私取给，才下其尺，则已赡足，淮人恃之，用备不虞，恭爱之祠，庙食弗替。但中更抢攘，久废弗理，刳茭障湮，岁益浅淤，颓堤断洫，漫不可考。敷文钱公以郡最褒擢督漕于此，躬历其所，周视形便，规寻利源，顾谓僚佐曰：“今连岁旱暵，苟有毫发便于民

者，虽使规创犹不当避其劳。况兹塘隐若天造，丰功厚利，肇自昔人，即旧以谋，顾安可后耶。”乃具其修复利害疏言于朝。报可，即命属吏米任、旧僚刘玮规图其事，量功记日，度厚薄，分畚筑，计徒庸，虑材用，以授有司。募流徙之民，厚其直，勉使赴工，众皆乐趋。自春三月至秋八月告成。总工徒凡三万三千一百一十有二。旧有斗门石各一，岁久缺败，不可复据，贝迁其少西二十丈而更新之。浚东西两漱以谨蓄泄，与斗门之建，皆仍旧址。饰龙祠以还旧观，作新亭以待临察，委官以专护守，列卒以供檄巡，而为塘之谋益备。昔信臣浚沟渎，杜母修塘，南阳楚相起芍陂，文公穿腴口，古之致本利者，未始不赖后之人修其废而后乃益彰。恭爱之绩，自建安至今垂千三十余年，乃始因公而后兴，是岂偶然哉

！)

明洪武九年，诏扬州修高邮宝应湖堤六十余里以捍涛。

永乐六年，高邮知州韩简言：州管河西接新门河，东通兴化县，旧设上下二闸，以时启闭，舟行甚便，今闸坏河不通。且子婴沟塞，沟旁田皆荒芜，又减水阴洞常闭塞，其岸东田潦辄不收。请俱浚治，从之。

成化十三年，总漕都御史李裕、巡河郎中郭昇重修白塔河。

（附王屿记略：疏旧河二十里筑东、西捍水堤，四十里建通江、大同二闸；增建土坝三。夏月潮涨则由闸，冬月水涸则由坝。又建减水闸五，以防泛滥；浅铺五，以备疏濬。）

弘治中，仪征县新建拦潮闸。（附杨一清记：弘治辛酉春二月二十四日，仪征县新建拦潮闸成，便漕也。仪征为漕河，自前代已然，我国家定都北方，岁漕东南粟以供京师，多由此道，盖喉襟最要地也。顾漕河之水至是当入江，高卑势殊，河易泄且涸，宋嘉定间，守臣建白置三闸为蓄水计，寻再举废。国朝洪武辛亥，始即其地筑而坝之，舟之下上，必车坝乃达，不尽剥载，则不敢以举，力稍不济舟辄坏。由是仪征之地，舸舰云接，贩鬻喧阗，罔利之徒，萍聚而蚁附，居货食力，惟坝是便，闸不复讲矣。成化甲午，巡河郎中郭君昇建议置闸四：为东关，为响水，为中闸，为罗四闸，以通于江，一时称便。独妨罔利者，煽为泄水之说，任耳者和之，闸遂不用。弘治戊申，朝廷用言者下工部檄郎中施君恕相所宜，复东关、罗四二闸，废响水中闸而新之，舟复通利焉。然江滨无闸，潮无所滞，上闸启注不可遏，于是复起泄水之议，漕运总戎郭公铉尝欲增置滨江拦潮闸，或谓江滨多浮沙，不果。弘治己未冬，都御史张公敷华奉敕为巡抚总漕事，有以拦潮之策献者。公询于众。扬州府同知叶君元进曰：“元尝承檄董浚河，浚及江滨深七尺，上黄壤无沙，闸必可置。”公曰：“然。”遂以闻。即得旨，乃会郭公檄叶君任其事。君受命惟谨，会籍程物，卜以庚申十月八日始事。度地势，定造闸之规，高一丈八尺，中广二尺八

寸，袤三丈，翼而东西亘加袤之二。爰琢爰甃，犬牙相入，磨砢铲爽，厓削砥平，叠石数重，以固其涯，松桩栝比，以固其底。凡用物石段八千七百九十，木五千四百七十株，板四百九十片，铁二千九百八十斤，麻一千六百七十斤，篾六百十斤，桐油一百斤，石灰二千一百三十担，粳米四百八十石，秠米三十三石。诸佣僦所取直，得先年浚河羨余银千两有奇，不责办于有司，故工巨而官不知费，事集而人不告劳。距经始之期，才四阅月耳。冯君谓闸启闭宜有定规，乃会刘君议，视河盈缩及潮之长落启闭，传檄有司遵行之。是岁，江河会通，舟无留行，扬旗伐鼓，通数十百艘于饮食谈笑之顷。比秋霖潦浹旬，潮水大涨，得以时泄，不横决为堤堰害，亦为是闸赖焉。所省漕土之费，岁当若何？民船商舶所省，又当若何？以岁继岁，吁其不可量也。）

嘉靖中，开浚句城塘，其水东南流至乌塔沟。十八年，傅珮开兴化县河。（附傅珮《兴化县玉带河记》：兴化居维扬奥区，地势卑抑，溪湖河塘之水皆注焉。河道肤直，中无所容，每雨霖霖辄复泛滥，田里城市，荡然为池。北门势尤峻绝，诸水倾瀉而趋，澎湃百里，靡所渟蓄，甚非所以奠民居，厚黍稷，毓灵气也。昔者，先王建邦设邑，必观阴阳，相流泉，度隰原，长策却虑，以怀永图。兴化若此，其能靖哉。珮为此惧，乃历郊圻，涉遐迩，越二期，始得海子河。河形曲，量宏，可容可泄，计决北河而通之，则水绕城郭，环邑间，周遭流衍，弗震弗腾，为利大矣。先旬日谋诸耆俊，僉曰：是役之议，百十年于兹矣。军民参错庐其上，弗可以轻徙；工费之资数百计，弗可以轻集，盍慎诸

？予曰：“庐有值，吾其偿之；役有费，吾其劝之。奚有。”于是乃捐俸为民先导，下令经始之。邑民曰：“吾事也，侯先之，其忍重累侯。”于是富不爱力，智不爱谋，协力共谋，不逾月而畚鍤告终。厥易民舍地长一十七丈九尺，东广三丈六尺，西广一丈九尺；军隙地长三十三丈六尺五寸，东广一丈七尺，西广三丈七尺七寸；厥凿池长四十一丈八尺五寸，广一丈八尺，深九尺五寸。）

万历十年，泰州守李裕浚丁溪海口。（附陈应芳《浚丁溪海口记》：大江以北，长淮以南，为广陵郡。其隶高宝、邵伯之间，诸水汇为湖者，延袤可百里而遥，号泽国焉。东则沮洳千有余里，盖高、宝、兴、泰四邑田赋、盐利所从出，地环其中。国初，平江伯陈公瑄因故道而疆理之，北筑高家堰以障，汇之南徙，使合河入海；东筑长堤以障，湖之东注，使南疏入江，是为东南转漕咽喉。而堤以内四郡邑之水，各循其地形高下派分之，以达于海。泰州故海陵郡，一称吴陵。若今丁溪场龙开港，则绾毂海陵之口。而淤溪、溱潼、西溪、宁乡及东台河垛串场河之水，所由以宣泄者也。正德乙卯后，稍就湮塞，然故不为害。迨己巳之岁，河决而南，淮受之，高堰堤遂圯以注湖，汪洋万顷，不复辨疆邑。令诏遣重臣经略其地，修平江伯故事，两堤复还其旧。然水平沙积，湖之高几于堤埒，而减水之议起矣，由淮阴达邵伯，就堤为闸者四十有奇，湖水自是岁岁减而东注。而兴与泰视高宝更若釜然，内洼而外高，其来也日积，其去也日壅，而膏腴沃衍之壤，荡而为萑苇潴泽之乡者，

垂十二年。岁壬午，巡按御史贵溪姚君士观兼督学行部，士民遮道以开海口请状累千百计。御史下其事于海防兵备参政通城舒君大猷，而以属泰州及高宝、兴化郡邑各守若令议，有异议者，事遂寢。是年秋，黄冈李君裕衔命而来，他务未遑，毅然属耆老而告之曰：“州赋税六万石佐县官费。而民不有田，又安所从赋也

？事急矣，议筑舍无成，守土者谓何？”即日驾小舸涉海上，周览而咨度焉。至丁溪之东，由姚家口迄蒋家坝测之，水可五尺；由蒋家坝至冯家堰测之，水可三尺。叹曰：“此非入海故道乎

？而何云创始也！”由坝而下五里许，是为龙开港，其势渐下，其望弥远，测之不下数十百里。而民灶田在范堤内，远不相涉。则又叹曰：“此岂海潮所能至乎？而胡虞咸淡交侵也！港而下不越一线之河，非有汪洋开拓之势，又安能受余皇使浮海而入乎

？今而知所以策矣。无已，则下流施品桩，以杜舟楫之往来。而冯坝以上，建石闸司启闭，使蓄水者过四尺而泄，则虑且万全。奈何勘议者不察，而徒曰：海口、海口，使不逞者藉以骇惑人也

！”归而具其事于牍，娓娓数百言，辨析甚剴切，上之按御史。按御史色动，谓将亲按部，则以三月发广陵，道府以下皆从。至凡所议建置具如李君指，因会疏，以丁溪白驹工并列以请。诏可。于是两郡邑画地而治之，三阅月而工竣。浚四尺者丈七千一百有奇，浚三尺者，丈二千七百有奇，夫应募者三千有奇。石闸一。品桩四。食若金皆取给两台赎醵及食粮之备赈者。而白驹工在兴化，亦同时报成事矣。盖水自是以海为壑，而阡陌沟洫井井也。

）十二年，邵梦弼创筑高邮东通兴化各场盐运东河一道堤岸，北下低田，尽为沃壤，盐船行人俱称便涉，十九年，宝应县令耿随龙开阴鹭河。二十四年，江都县令张宁于宜陵镇筑坝，塞山阳河，为窦通水，以资灌溉。三十三年，泰州知州李存信修宜陵坝。建下河八港南岸大闸三座，共九门。

（闸下即高邮芒稻河。）

天启二年，巡按房可壮筑上、下雷塘。

（附明王恕《请修复扬州水利疏略》：窃惟扬州一带河道，南临大江，北抵长淮，别无源泉，止藉高邮、邵伯等湖所积雨水接济。湖面虽与河面相等，而河身比之湖身颇高，每遇旱干，湖水消耗，则河辄至浅涩不可行舟。若将河身比湖面濬深三尺，则湖水自来，河水自深，虽干旱亦不阻行。前项河道自南至北四百五十余里，中间除深阔不用挑浚外，其浅窄可挑浚去处，尚有二百余里，约用九万余人六十工，

每人日给口粮二升，该用粮米一十万八千余石。卷埽打坝共用桩木一万六千余根、草二十余万束。及看得高邮河自杭家嘴至张家沟南北三十余里，俱系砖砌堤岸，每遇西风大作，波涛汹涌，损坏船只，漂溺钱粮人命，不可胜计。况前项堤岸之外，地势颇低，再溶三尺阔一十二丈，起土以为外堤，就将内堤原有减水闸三改作通水桥洞，接引湖水于内行舟。仍于外堤造减水闸三座，以节水利，虽遇风涛，可无前患。若兴此役，约用一万三千余人、六十工可完。每人日给口粮二升，该用粮米一万五千六百余石。合用筑堤桩木五万四千余根、草二十七万余束。造减水闸并改造通水桥洞，约用砖石、桩木等料并工价银二百余两。又看得扬州湾头镇迤东河道，内通通泰等五州县二千户、富安等二十四盐场，其间有鱼、盐、柴草之利。在前河道疏通之时，二千户所运粮船只，俱在本所修舱。客商引盐装至仪征，每引船钱不过用银四五分。扬州柴草每束止卖铜钱二三文。近年以来，河道淤浅，不曾挑捞。加以天旱雨少，河水干断，舟楫不通，鱼、盐、米等项俱用旱车装载，二所运粮船只不得回还本所。牛车脚价迥贵，柴米价高，以致客商失陷本钱，运民难以遣日。前项河道自湾头起，至通州白浦止三百四十余里，俱用挑阔八丈、深三尺，约用八万五千六百余人，六十工可完。每人日给口粮二升，该用粮米十万二千七百九十余石。再看得雷公上、下塘、句城塘、陈公塘，俱系汉、唐以来古迹，各有放拦水闸座，年久坍塌，遗址见存。近年以来，止是打筑土坝拦水，随修随塌，不能蓄积水利。若每塘修造板闸一座，减水闸二座，潦则减水不致冲决塘岸，旱则放水得以接济运河。以上四塘，共造放水板闸四座、减水闸八座。除旧有砖石外，约用砖石桩木料价值并匠作工价银二千余两。杂工止用各塘见在人夫，不必劳民动众。臣虽无识，尝询之于众，咸以谓若将以上三件河道依前整理，庶几舟楫疏通，永无浅阻风涛之患，而为往来军民无穷之利。）（清许承宣《请修复渠塘疏略》：窃惟一方有一方之利害，善为治者，收其利而绝其害。伏见江北之扬州为漕运大道，而扬州之水利莫过于五塘。考明永乐二年，平江伯陈瑄总漕，全资塘水。宣德八年，大旱，四塘干枯，运舟阻滞，知府李贞奏专修五塘济运。成化四年，侍郎王恕奏发帑银三千两，于上下雷塘、句城塘、陈公塘各筑石闸水碓以蓄水，旱则由淮子河乌塔沟放水入河，接济运舟。其余开浚五塘灌注长河者不可殫述。厥后湮废不治，而塘之利遂绝。然其间石桥梁独存一二，若能急为修复，潦则蓄蓄之处而不至于泛堤，旱则灌溉之资而兼可以济运。此江以北之水利不可不议举行也。淮、扬、徐、泗之水难于入海，使五塘之利兴，而不为求其所归，犹非策之全也。臣闻近海三十六盐场尚有涵洞古迹，今可修葺以泄水。旧制：洞门自外拴，海潮至则海水内冲而洞门自闭，海潮退则海流直走而洞门自开。门闭则潮不得入，而无咸水以害田；门开则河无所阻，而有支港以达水。如是则水咸趋海，而无湮没之患矣。）（倪启祚《新修上、下雷塘记》：扬之塘有五：曰陈公塘，曰句城塘，曰小新塘，曰上雷塘，曰下雷塘。句城为唐长史李袭誉筑，四塘则皆汉太守陈登筑也。扬故以高阜多陵。名曰：广陵。西自盱泗寿春诸汉涧泉潦之水，越十四塘注于高宝三十六湖。五塘盖汇诸塘以导于湖者也。扬当南北咽喉，江南数千漕艘皆从此飞挽而北。偶当浅涩，全堤一线之水，势必藉塘之时启以济漕运。历考前志，四月漕粟渡淮入汴。唐书纪之。宋都汴梁岁漕东南粟六百万石，率由斯路。至成祖定都北平，罢海运，跨江绝淮，经

河越海，兼四渎之水为漕用。而是塘于分黄导淮之策均有赖焉。嘉靖中，仇鸾首没塘为田。嗣是冯夷为沴，而淮水汤汤，而南山水由天长、六合而东下，率然遇合。淮不得遂其就下之性，辄逆走高宝、邵伯诸湖，每伏秋水发，西风驾浪，下河千里沃壤尽化为鱼鳖之区。万历二十年间，备兵使者吴公秀、御史中丞郭公光复后先守扬，力主复塘之议，会工部题奏得旨，遂先复小新、上、下雷三塘，二租一租报罢。自是湖水安澜，河堤不再告溃。即五塘未尽复，而塘之兴废，关国家之大利大害也明矣。乃谋利塘民误以除租之官塘，认为子孙之世守，随修随决，迄无已时。虽经前御史康公丕扬、二千石宋公锦斯、郭公之琮多方缮葺，亦仅保小新塘如旧而已。彼上、下雷塘延袤既广，窞穴滋多，即有官私料理，但惜费用不赀之说，以成筑舍。岁在辛酉，侍御房公奉敕按扬，下车之始，乃以修塘之议，累数年未定者特匍匐请之公。公俞其请。且出奉钁二百金，以期告成。事以今年二月初吉鸠工筑堤。约上塘补筑者纵计百五十丈有奇，横凡三十丈有奇。旧闸冲突久，桩木不堪再附，因稍移于旧址上流筑之。下塘筑土纵约百四十丈有奇，横凡二十丈有奇，二闸各加阔丈余以杀势。又照旧底各加高一尺。而闸板则可徐议。盖前此水或夜发，启闭不时，以故细人得为崇其间。又水可内注，而蓄泄一任其性。所谓以水治水而不与之争也。未几，两塘蒙葺之地，汪洋千顷。而侍御公之濺泽著矣。是役也，郡邑大夫仰承公意，不以责营办于胥吏，而以重考成于师儒。师儒者，刘司训世埜也。

）兴化令边之靖请修丁溪、草堰、小海、白驹、刘庄拦潮诸闸。明年，湖河大涨，汇流入海，海潮突高数尺，赖诸闸堵御，而潮无内灌，河流亦迅驶入海，禾麦不害。四年，修陈公塘。

清康熙九年，修筑江都之范公堤。二十五年七月初四日，上谕工部右侍郎孙在丰：朕前因巡幸，爰至江南，见高、宝、兴、盐、山、江、泰等处积水汪洋，民罹昏垫，朕甚悯之。应行开浚下河，疏通海口，俾水有所归，民间始得耕种。特发帑金，拯救七邑灾民。屡集廷议，兼询輿情，允协佥谋，事当厘举。兹命尔前往淮扬所属下河一带车路等河并串场河、白驹、丁溪、草堰场等口，挑浚事务，专属于尔监修。尔宜往来亲历，多方经画，讲求源流脉络，次第兴工督率。带去司官等务实心任事，毋得怠忽扰害。其司、道、府、厅、州、县等官，如有违玩贻误，及势豪绅衿妄行干预、包揽生事、阻挠工程者，指名参奏。浚过工程丈尺，用过夫料数目，造册画图贴说具奏。尔受兹专委，须竭忠尽力，悉心区处，速竣大工。使海口疏通，水消田垦，蒸黎复业，以副朕救民至意。如因循怠忽，虚费财力，责有所归，尔其慎之。故敕。三十六年十月十五日，上谕大学士伊桑阿等：下河地方久罹水患，朕心时切軫念。前命挑濬白驹、冈门等口，原欲使水尽通流，田皆涸出。今见兴化、泰州等州县积水尚多，田仍淹没，民生甚属苦累。著行文总漕、总河亲往会勘，将下河积水何故壅塞，不能迅流，应作何尽行归海涸出民田之处，一一详阅议奏。

（附总漕桑格等奏疏：臣等看得下河为泄水入海之区。自淮安以至邵伯镇，计运河东岸共有涵洞三十处，闸十座，滚水坝八座。此皆运河及高邮、邵伯等湖之水，由

诸涵洞、闸、坝等口归入射阳、广洋等湖，就下流以至白驹、冈门等口入海。总由下河受水之处甚多，而泄水入海之口犹少，是以水势汪洋，易于停蓄。在雨暘时若之年，水循故道，田犹无恙。惟去岁及今两年，夏秋霪雨异常，诸河泛涨，以致水势汹涌，通流不及，潞漫四散。而下河之高邮、宝应、泰州、兴化、盐城、庙湾等处地方皆洼下，均受其灾。兴化地方更低，积水尤甚。臣等谨遵谕旨，沿河踏勘，详阅泄水诸口。除庙湾、冈门、白驹三口水颇畅流，无容置议，及兴化通丁溪、草堰、白驹之车路、白涂、海沟引河三道，并射阳湖下海之虾须沟朦胧院道港，又高邮湖通邵伯湖之曹家湾、杨家绊、七节桥，目今水未全消，不分堤岸，无由勘明，必须水落确勘，再将应行疏浚情形另疏请旨外，今将臣等阅明亟宜疏浚各口及应建闸之处，为我皇上陈之：一高邮湖之水势宜分也。查邵伯镇南有金湾三闸，闸南有金湾滚水坝一座，三闸之水由人字河入芒稻河下江。其金湾坝外原无引河，今议于坝外挑引河五里通人字河，将高邮湖之水引入邵伯湖，由金湾闸坝同归人字河，入芒稻河下江。其人字河计长十八里，见今浅窄，应加挑浚。又芒稻河原来旧闸二座，西闸六门，东闸三门，今俱损坏，应加修建。如是，不但邵伯湖水不至下河，高邮湖水亦可分泄，而下河受益矣。一车儿埠入海之口宜开也。查泰州河垛场有车儿埠口，其上流乃高邮漫涨之水，及兴化梓新河之水，均至河埠场之老坝，汇流于车儿埠口，以致不能宣泄。今议将车儿埠口至姚子灶四十里河身淤浅应加挑浚，姚子灶至苦水洋三十余里间有河形，应加开导入海。其车儿埠口、老坝两处，各应建闸一座，以备启闭，而泰州之民田受益矣。一丁溪入海之口宜通也。查丁溪闸口至捞鱼港六十余里，河势深通，无庸疏浚。自捞鱼港至苦水洋七十余里，河俱淤淀。若循旧河挑浚，其河势甚平，不能迅流，费帑无益。今相度情形，议于捞鱼港之北，就近直挑四十里，即入黄家港下海，而丁溪入海之水疏通矣。一小海场入海之口宜开也。查小海场有一河形，原系泄水入海故道，年久淤塞。今议于小海河口建双金门石闸一座。自闸口起至邓家窑计长四十里，应照旧河再加挑深。自邓家窑起至姚子口计长二十里，虽旧有河形，然地势纡迴，宣泄不畅。今相度情形，自旧河北岸邓家窑起向姚子口就近直挑十里，以入旧河。再自姚子口以下将旧河挑浚十余里，会入斗龙港入海，而兴化又增一泄水之道矣。一、草堰场泄水之闸宜增也。查草堰入海之道虽畅，但因只有闸口一座，兼之窄小，上流水大，不能一时宣泄，常至漫溢。今议于旧闸之上添建一闸，下挑月河七十丈，则上流无壅阻之患矣。一运河之水势宜分也。查淮安城南运河东岸有兴文小闸一座，此闸系分泄运河泛涨之水流入涧河，由射阳湖入海。见今涧河淤浅，兼之闸门窄狭，水不畅流。今将闸门改阔，并将涧河八十余里再加深浚，以泄运河之水，则运河之水不至高邮，而兴化等处更有裨益矣。

）三十七年七月，命廷臣会议开下河。总漕等会勘得下河各州县地方历被水灾，皆由上源受水之处甚多，而泄水入海之处甚少，兼之各邑通水故道俱多淤淀，以致泛滥横溢，成此积水之患也。今欲救此灾黎，舍开浚故道多分水势之法别无善策。是以前疏内议修芒稻河者，欲分高邮、邵伯两湖之水入江，使不至下河也。议挑曹家湾、杨家绊、七节桥者，系开通高邮、邵伯两湖淤塞之水路，使通芒稻河以下江也

。议挑车儿埠之滔子河者，欲使泰州所受之水由苦水洋入海也。议挑涧河者，欲分运河之水流下涧河，由射阳湖入海，使不至高邮也。议挑海陵溪者，欲使高邮所受之水通冈门下海也。议挑车路、白涂、海沟三河者，欲使兴化所受之水，由丁溪、草堰、白驹入海也。议挑虾、须二沟、夏梁河并朦胧西首淤塞之射阳湖者，欲使高、宝、兴、泰、盐、山等处之水俱由庙湾下海。此海口为下河最洼最宽之地，泄各处上流之水尤为宣畅也。今臣细加覆勘，与前无异，毋容更议。惟是九卿会议所云，江海有无倒灌之处。臣等细察各处海口以及江口，皆系历来泄水之旧迹。而臣等所议挑建诸工，皆内地淤阻之河道，照旧开通，使水得达之予口，泄之江海，自无倒灌之虞。至于会议所云，或系海口高阜，内河低洼，以致积水不能出海。如照此挑浚下河，积水果能入海，田地果能涸出，有益民生等语。臣等阅历形势，海口较之内河终属低洼，见在泄水，而目今水势尚在汪洋，民间被淹田地多未涸出者，皆由诸河水道淀塞不通之故。若使前议挑浚之工一举，水得循其故道，自必下流归海，田地自当涸出，实为大有益于生民。十一月十五日，上谕大学士伊桑阿等。开浚下河，民生攸系。朕为闾阎疾苦，深切軫念。曾命凯音布、孙在丰、于成龙、王新命等，专司开浚。伊等俱奏工程告竣，民生大蒙利益，载在册籍，存部可考，人亦俱在，可以质询也。由今观之，止是虚糜国帑，水势并未消减，田亩并未涸出，所谓有益民生者，果何在耶

？今桑格又奏当行开浚，而九卿并不详诘及前开浚诸人，亦不稽考册籍，遽议准行。如果此次开浚，巨浸全消，疆理尽复，民业得济，朕于钱粮绝无吝惜，即动发帑金，令其兴工而已。至捐助事例，并不宜允行，即今山、陕所捐银米，其事尚未明晰。若下河果如其所请疏凿开浚，而桑格等能必水即消，田即出，有裨于民，以身家保奏，则即令开浚之。御史吴甫生亦以此事条奏，所言甚是。可将其疏并发九卿，详询前次督浚者，复稽考诸册籍，然后确议以闻。四十年，总河张鹏翮请开虾、须、沙沟等下河。

（详见淮安府）

雍正五年十二月，范时绎、齐苏勒、陈时夏奏泰州、兴化、盐城三州县串场河修筑事宜。（附范时绎疏奏：串场河道自泰州富安场通远桥起，至盐城县伍佑场徐家港止，通计三万四百丈，均应酌量地势，分别挑深。自泰州东台场三里湾起，至兴化县刘庄场止，一万一千丈，地势较洼，堤岸庳薄，今以挑河之土加帮。近河范公堤，其离堤穹远之处，增筑子堰，以束水势。至场河闸座依时启闭，利商便民，最为紧要。查丁溪场双门石闸一座，白驹场南北中闸三座，尚属坚固，止可加高补修，便可留用。至小海场、草堰场所有二闸，年久坍塌，止存闸基，兹酌采旧石，改建双门石闸二座，以裨节宣。又如皋县之苴河洋，兴化县之青龙桥，盐城县之石磁口、廖家港、草堰口等处，均系水道入海要区，最为便捷，今增建大小石闸五座，以利宣防，其盐城之天妃口河宽三十丈八尺，泄水最畅，但盐潮倒灌，茫无挡拦，民田多被淹损。今相度地势，估建十洞金门石闸一座，设版启闭，以资关键。又如皋

县之黄沙洋，系泄水入海要道，因地系浮沙，难建闸座。今勘建范堤，由郑家庙地方土性坚实，估建单金门石闸一座，并筑子堤二道，直接范堤，以资保障。查闸下海河，除草堰、白驹二闸海河俱深通，毋庸挑浚外，其丁溪闸下自麻墩起，至智家港东口接小海闸河内万应墩止，共六千二百七丈；小海闸下起，至王家港海口止，共一万四千九百八十丈；青龙桥改建双金门石闸一座，闸下河一道至牛湾河止，共五千七百二十丈，均系场河通海捷径，因年久未挑，河道浅窄，并有淤成平陆之处，亟应挑浚深通，以裨宣泄。又泰州运盐河自北门新城店起，至河垛场止，共长二万八百八十丈，系由州城直达临海各场之要道，向无堤岸收束水势，以致湖河相连，舟行多险，应令挑河一道，即以河土加筑北岸长堤一百二十里，直接海道口，以分河湖，以利挽运。又兴化县地势最洼，诸水下汇，先注此邑，然后分流入海。其县属有梓新、车路、白涂、海沟、界河等五河，上受诸湖众水之奔注，下为各场海河之门户。内除梓新、白涂二河见今地势稍平，水无阻碍，其车路河下尾接丁溪闸七千七百四十丈，海沟河下尾接白驹场闸九千丈，地形稍高，河身稍浅，界河长一万八千丈，为大纵等诸湖泄水要区，见今河身淤浅，亦应分别疏浚，庶上源迅速，下流无阻。嗣时绎续将丁溪、小海、青龙桥三河照原估河面加宽一丈，河底加宽五尺。泰州南门高桥起至如皋丁堰止，前系带水量估间段兴挑，今拟将间段不挑之处，一律开深五尺。串场河原估通河开浚，今逐段测量，自泰州之富安场至兴化之白驹场南段九十余里，河底见在之水亦皆七八尺不等，可以停其挑浚。车路等河亦有于原估丈尺之内，见为水刷深可以挑浚之处，及河身湾曲开挑径直，应核减丈尺。如皋县之苴河、黄沙洋二处，前议建闸，今查该二处地势外高内下，应改筑土坝二处，遇水大之年，再开坝宣泄。又盐城县天妃海口前估建闸座，查该处土性松浮，难以建闸，且该处若遇水大之年，正可留以宣泄内水。前估闸座，亦无庸议建。

）雍正九年，开浚江北等处河道工程告竣。一浚乌塔沟。自仪邑乌塔沟起，至江都句城塘口止，内高外低。自外开至塘口，浚深七尺至九尺不等，共浚二千八百七丈。一浚槐子河。自运河口至下雷塘闸口上筑堤开浚，共浚一千八百五十四丈。一浚运盐河。西北承扬州湾头闸下之水，东南接通州白蒲之渠，共浚二万五千七百八十丈有奇。一浚丁溪闸下海河、串场河宣泄要津，约共浚一万一千一百五十四丈。一浚小海闸下海河，既浚深，且建闸座，并开越河一百丈，共浚一万三千四百八十丈。一浚刘庄场青龙桥下海河。改桥为闸，闸旁开越河，共浚四千五百二十丈。一浚串场河，自白驹场起至徐家巷止，共浚一万一千八百八十六丈五尺。一浚车路河，在丁溪场之西，共浚五千四百三十丈。一浚界河，在刘庄龙闸之西，共浚九千七百丈。一浚海沟河，在白驹场之西，即车路界河之中，共浚七千七百四十七丈。一浚涧河，在淮安城外运河东岸兴文阁下，通河开浚，并于湖口加筑子堰，共浚一万五千二十四丈。一、浚河垛场，在串场河中道，东接富安东台等场之水，改建海道口桥。一浚小海场，在串场河北岸，系小海海门之河，改建双金门石闸一座。一建草堰场双金门石闸一座。一修白驹场南、北、中三闸，得宣泄分流之效。一改建石磁口双金门石闸一座，在城东串场河北岸。一改建廖家港单金门石闸一座，泄盐城东西塘河下注之水，归新兴等场下海之道。

（互见淮安府）十年五月，署总督尹继善议奏江南水利事宜，得旨允行。（详见淮安府）

乾隆四年十月，大理寺卿汪滢等奏各坝启闭事宜。

（附汪滢疏略：淮扬运河东岸堤工，实为数州县之保障。向因设有泄水大坝，以致下河被淹，民罹水患。所最甚者，高邮南关五里车逻三坝，其次邵伯之昭关坝，宝应之子婴坝，一经开放，则泰州、兴、盐等属尽被淹没。今年将洪泽湖之天然坝坚闭不开，高宝东堤等坝俱加谨不许开放，所以水患顿除。请将坝基全行平撤，俾东堤一律相平。拟于子婴五里、中坝、车逻三处坝下原有河渠之路，各建泄水闸一座。事下大学士九卿议奏。寻议前项旧坝宁可闭而不用，俾遗址尚存，以防患于未然，不应全行拆毁，将前功尽废，致难补救于事后。应责令该管河道加意防护，谨闭不开。至子婴等坝三处坝下各添建泄水闸一座，应准其添建。）（十二月，汪滢复奏：下河向来大害，西边开放高邮三坝，东边易进盐水。盐水易进之处，唯天妃口与白驹三闸为甚。天妃口向无闸座，现请添建。白驹三闸，年久颓坏，并行拆建。其沿范堤一带之丁溪等闸，内有上冈、北草堰二闸，俱各颓坏。更在于串场河里口开闸，不免盐水内灌，闭闸则盐船不能通行，应请移建于串场河之外口。其余各闸有墙石底石损坏，有闸版绳揽腐朽者，均应修葺完整，因时启闭，则盐水东来之患可除。水患既除，水利可兴。九属地方，关系綦重，臣等亲勘，用水平量，验兴化地方，东比白驹三闸近海之范公堤，西比高邮运河东堤之内湖河之水，深浅均平。并勘下游诸水之大势，俱向东北由盐城界赴海。臣汪滢等会同督河抚臣，并会盐政臣妥议，查盐城之东塘河等处，群流奔注，为分泄要津，久经淤垫，迤下上冈、草堰二闸，内外河道亦经淤垫。其阜宁之清沟河、苏家嘴河，山阳县泾河、市河，宝应县子婴河，兴化之北官河、溪河、白涂河、梓新河、兴盐界河，泰州之小纪、宗邨二河、蚌蜒河，今俱淤垫浅涸，应请一律疏浚。高邮、宝应见议添建三闸之处，宽广散漫，不足以束水势，应请将河头略为挑浚，引入下游河道。并泰州分司所属串场河，以及秦潼河、新河、旧河俱各浅阻，应请挑浚。其沿串场河范堤长三百余里，逼近海滨，其残缺处所，不足以资捍御，当分别地势，以定堤身高度，酌量加增宽厚，即将挑河之土加添夯砌，一律修筑。其通州分司所属串场河亦俱浅阻，应请挑浚。至沿串场河范堤，唯拼茶、角斜二场堤工内有八千余丈，去海仅止三四里，潮汐日至堤根，应请加帮宽厚。以上俱系东流入海之河。

）二十六年六月，高晋、陈宏谋奏准疏濬归海引河事宜。（附高晋等疏略：见在南关、车逻等坝封土，金湾坝加挑新河，分泄归江，一律俱已完工。自此，运河之水不致东注，下河诸邑可免西水之患矣。惟是下河各州县境内支河汉港及田间积水，向俱汇入串场河，北流二百余里，于盐城境内之石达、天妃等闸归海，道远纡回，骤难消涸，每有西水不至而雨水亦积而为患者。查范公堤绵亘六百余里，串场河自南而北，向建石酷闸十八座，每闸俱有引河，嗣因洪湖之水由高邮各坝东注，下河形如釜底，水未到闸，地已被淹，是以不暇计及闸下之引河。见在盐城境内石、天

妃闸引河宽深，由新洋港泄水归海甚畅，又兴化境内之白驹、青龙、入灶、大团等闸引河，于乾隆二十三年挑浚，由斗龙港归海，闸水分趋，颇资宣泄。其余迤南之丁溪、小海，迤北之上冈、草堰、陈家冲三闸引河，有竟成平陆者。臣等亲往查勘，现有王家港水深八九尺至一丈二三尺，宽十四五丈。又有射阳湖宽深更甚。请将丁溪、小海二闸引河疏浚深通，顺势再开一引河，汇入王家港归海。又将上冈、草堰、陈家冲三闸引河疏浚深通，顺势再开一引河，汇入射阳湖归海。就其阻塞之途，因势利导，裁弯取直，总以海为归宿。）

徐州府

明成化四年，淮安府同知安钝、睢宁县知县何皞开湖田。（附金铄《开湖田记》：睢宁有肥饶湖田与黄河接境，消长相为吞吐。邑七社之民，旧种二麦于其间，罔知筑堤捍患，累岁为黄河湮没，无所于获，遂弃置不复经理，以其所有易租偿官不为怪。近湖豪富以堰潴水，以擅鱼利，民庶不以告，县令不以言，郡牧无所知，垂四十年于兹矣。成化四年秋，淮安府同知睢阳安公钝加意民瘼，询求以知其故。适公安何君皞来知县事，意欲复我湖田，公喜其志合一，委之检勘，始知频岁湖淤高于黄河，而黄河水不复为患矣。公得报大悦。召豪横者语之，不悛绳之以法。划其堤，泄其所潴，轮广共得地九百五十五顷有奇，召民尽复故业。自己丑至辛卯凡三岁，岁艺麦有三颖四颖至五颖者，两歧者不可胜计。所获视他阡陌直不啻数倍而已。民田富庶，何令谓安公之功大，不可无所纪述，因书刻石，置诸湖田之上。

）修筑吕梁洪堤坝。（附李东阳记：徐州有二洪，一以州名，一以山名。山名者曰“吕梁”。吕梁之为洪有二，上下相距可七里。盖河之下流与济水会于徐，以达于淮。国家定都北方，东有漕运岁余万艘，使船来往无虚日，民船商舶多不可籍数，率此焉道，此其喉襟最要地也。洪石狞恶廉厉，虎踞剑擢，阳隘险阻，中仅可上下，水势为所束不得肆，则激为飞流，怒为奔湍，哮吼喧阗，见者皆骇愕失度。巨缆绞引，进不得寸尺；乘流而放，瞥掠瞬迅不复措手。其艰如此。铅山费君仲玉以工部主事，督水利于徐，顾而叹曰：此可以人谋胜也。乃循行洪北，见其支流水所泄处，旧阙以束藁，水至则荡为浮梗以去。会州县所具藁岁至二十五万，以钱输者加十有三，而恒病不足，则又叹曰：谋之不臧，劳无益也。乃白诸部长及总漕都御史张公瓚、平江伯陈公锐，聚徒给廩，辇块石，埴壤土，叠为长堤百六十又五丈，广五丈，而崇不过五尺。水小则迫之归洪，河用不涸；大则纵之使漫流其上。又于堤西筑坝三十余丈，以杀湍悍，而堤得以不啮。又观于东堤丛石间，民困牵挽，足不能良步，乃畚瓦砾实其洼隙，外以石甃之，为丈四百二十有奇。又东则甃为长衢，而行者亦因以为利。吕梁之险，历数千万年而十去五六，君于是有奇迹焉。然问其役，则洪夫之余力；问其费所出，则岁课之赢财；问其食所由致，则剥载之余粟。而自以经画佐之，未尝责办于有司，劝假于漕士，及往来之商民。而所奏减藁束岁十余万，民钱至二十余万，功倍而费省，可谓难矣。初，君自成化庚子越三年而成西堤，任满当代，民交章借君。又三年而东堤成。君既报政选员外郎，予友华容刘

国纪亦与君有宿昔，适知徐州，遍观君所营作，叹其绩不可无述，请予记。予复闻于君从子翰林修撰子充者为详，乃为说曰，天地之道，必赖于裁成辅相，然后可以利乎民。故唐虞置虞官，益掌山泽，佐禹治水。周礼以中士为川师，掌川泽之名，辨其物与其利害。其为治不可详，然其职固在也。今漕河所经各有分职，要害之地，则委郎官以总之，利病兴革，惟其所任。然不过水道之疏塞，如所谓沟逆地泐之属，不就理者则浚涤之而已矣，修治之而已矣。若长虑倍力，去险为夷，因害以为利者，诂不甚难矣哉

！天下事固有一劳而永逸者。故苟其利倍十于旧，则虽殫财利而不惜。今以利校之，殆不訾矣。然则阅历代之险，而为永久不迁之利者，诚可谓之难耶。夫功不必己出，惟其有益于民与世。继费君者尚缉而保之，则兹洪之益于国家愈大，而圣天子财成之治不为小补矣。君名宣，仲玉其字。为放舟之厅，集夫之营，市易之场，皆洪事所赖。又值岁歉，以余粟千石赈州民，六百石给漕士，亦洪之余费。故附载之。）

万历二十三年，宿迁令何东风筑罗家口新堤。（附吴廉《宿迁罗家口新堤碑记》：弋阳前进士何公，以庐江才令调宿迁，至则治行为淮南第一，下车两稔，河菑衍溢，新决罗家道口，无论潢潦泥淖，往来使者，轮蹄陷溺，人吏趑趄。既河伯不仁，黄淮相激，直走东湖，田谷湮没，遂成巨浸，实宿迁一大要害也。公日束带供张使者于罗家道上，怅念久之，乃手稿请筑遍于当道，时急分黄工，竟无肯报可者。公奋然曰：“事不同民心难于出令。是役也，害息利兴，正佚道使民，虽劳不怨，奚俟于要费储耶

？”即命耆老许汝楫号召土著小民，各以其地之相近，力之相当，量出一切人徒薪米，筑而堤之。径轮三十丈，广袤二十尺，顶高七尺有奇。肇功于孟夏甲寅，卒事于仲夏辛亥。莽苍相望，长衢卧虹。往来无褻裳之劳，耘耔多有秋之望。由是郊原竞劝，庶民子来，争相接筑，愈引愈长，中流望之，若天堑焉。嗟夫

！小民至愚，而享其利者为有德。昔苏公之守杭也，筑西湖之堤，以灌湖田数千顷，民咸德之于古；何公之令宿也，筑河东之堤，以卫湖田数千顷，民咸德之于今，孰谓古今不相及哉

！)

清乾隆二十三年，浚宿迁境内诸河。

道光二年，铜山知县高攀桂挑浚屯头湖河。

太仓州

宋景祐间，郡守范仲淹开茜泾浦以泄水。亲至海滨，因设填屯兵，专治浦闸。

崇宁四年，命司封员外郎李传等疏浚娄江。

宣和三年，开茜泾浦自太仓斂口。

隆兴二年，大水。县长李结浚茜泾七鸦下张顾浦。

淳熙元年，提举浙西常平薛元鼎开平江府茜泾七鸦下张诸浦。

元至元二十四年，水灾。宣尉朱清喻上户开浚，自娄江导水，以入于海。

泰定三年五月，都水监佥事李居仁，疏盐铁塘之在城中者。十月，浚盐铁塘，南北并疏导。

天祐元年，浚刘家港及白茅。时张士诚据吴兴。

明洪武三十二年，修筑海岸。先是晋湖州刺史虞潭于沿海筑垒，以遏潮冲。至是因老人朱六安奏海患，工部遣官修筑，南抵嘉定县界，北跨刘家河，长一千八百一十丈，高一丈，基广三丈，面广二丈。

永乐元年四月，户部尚书夏原吉浚刘家港入海。二年冬，户部尚书夏原吉复浚夏界顾浦，引吴淞江水贯吴塘，由娄江入海，白茅入江。十三年冬，浚太平河，东至半泾，阔十丈，深一丈七尺。

宣德五年，巡抚周忱浚顾浦及太平河。七年，吴中大水。秋七月，飓风。巡抚周忱奏请浚刘家港。

弘治四年，浚盐铁塘。八年，嘉定浚盐铁塘至娄江。十年冬，工部主事姚文灏浚七鸦浦。按郡志：八年，侍郎徐贯浚白茅七浦。龚氏考又云：四年，盖误以奏请为工期也。十一年八月，通判陈席，浚盐铁塘，自北门至七浦。

嘉靖二年，工部郎中林文沛，檄太仓州昆山县开杨林河，泄阳城湖水入海；开南大虞浦，泄阳城湖水入于娄江。四年，水利佥事蔡乾浚嘉定等县塘浦河港。二十四年，巡按御史吕光洵浚顾浦、吴塘，知州周士佐筑娄江堤。

（附张寅《娄江新堤记》：苏郡属治，惟太仓处剧，雄镇娄江，西受震泽之水。震泽之水入三江，而娄江为大。其南东江、吴淞江，今且溢流矣。东受海潮之水入三港，而刘家河为大。其北戚浦、白茅港，今为汗渠矣。州之西鄙东去城三里，西接

吴塘口，为里者半。近郊称险，画庐名关。传馆送迎，舳舻舛泊，馈运连艘，贾货滋殖，游人喧渡，渔户围网，田无辍耰，樵无停采。地为至要，势当其冲，知政君子，治莫可缓。其水涯旧址，广若康衢，能捍水患，年代寢远。堤防渐坏，况当湖潮二水之会，波流滢回，惊涛悍湍，走陆啮道，土随流去十且六七。舟隔则揭跣以登，岸逼则易廛而徙，往来局促，行旅咨嗟，公私病之。牧守周侯士佐，白于代巡吕公光洵、宪司敖公璠、郡长范公庆，悉可其议。视厥庶民有偶尔犯科，情可矜疑者，条为法程，使分治之。计直而自用其财，鳩工而自食其力，耕夫无所徭，舶贾无所征。官不为劳，民不为扰。不三月而事竣。长可八百尺，广仍如旧。甃石于激射之傍，柱木于沸奔之下，如冈如墉，弗溃弗崩，以遏乱流，以薄江怒，人皆乐而利之，召堰苏堤不独专美。侯之功，其永存哉

！佐斯役者，汤君拱、阎君仪、金君江；而赞之，则阮君洪也。）二十五年冬十有一月，新建七浦斜堰闸。二十六年冬十月，巡抚都御史欧阳必进重浚七丫塘。自石桥圩至于直塘河头，涂松横泾，总丈四千五百六十有奇，深一丈，广十丈至十五丈。民夫万八千四百，糜银两七千八百二十三。计九十七日告成。共工五十一万六千四百二十八。

隆庆二年，巡盐御史蔚元康等重浚七浦、杨林塘、盐铁塘。（附王世贞《太仓州重浚七浦、杨林、盐铁三塘记》：前参政臣凌云翼言，臣吴人，颇习知吴事。吴地固不能当天下五十之一，而岁赋十之二。漕粟给大司农，遂当天下半，其农比老死不能得一佚食，日夜从事桔槔。而间者求故道多阙，无所灌泄，请一切治水，委之御史。于是侍御孝义蔚公元康议治水。而侍御洛阳董公尧封以按来曰，是小借民力，而大裨之于永永。余敢以自诿。及会蔚公及抚中丞巴陵谢公登之下按察使者汤公宾、按察使者下郡守蔡君国熙、丞金君柱、龙君庆云、吴君宗吉议曰，水数治不能周南亩，以忧吴父老，至烦参政言。然曩者尚书李公用大兴法辟召官属遍四郡，甚屈县官帑，不二十余年而塞不腆。丁未之役，台使者以名任一悴，悴以丈报，至委数万缗水土间，不二年而塞，即计之今未有能用大兴者也。然使县官不爱食，民不爱力，而使役者不爱耳目，则固未有不办治者也。夫计之力，取民近利者，田二十而夫一，远者三十而夫一。计之功夫，三而丈一，难者四而丈一。计之食，夫一而缗半。计之耳目，则丞等请以不肖驱任。三公曰：善。其申议，议四郡则先苏，议苏先常熟、太仓，次嘉定。议太仓先七浦，次杨林、盐铁。则为议七浦曰：夫七浦绾穀常熟之口，贯太仓而东注海者也，利最先。于是即以元年春金君任治七浦，其役夫合诸七浦之傍田者，而佐以杨林、盐铁之民，凡十八日而竣。为丈七千二百有奇，工六十一万一千五百十九。食若金者六千一百五十有奇。外创坝以拒海潮，费若金一百二十八。闸一，以备止泄，费若金三百五十七。又拓月河以辅之，工万一千六百五十二，食若金者百三十七。既报而谢公以迁去。今中丞莆田林公润来曰：呜呼，是余所理赋，乃以勤二三子，亡何

？侍御庆阳麻公永吉以瓜代。蔚公曰，惟余所奏玺书以嗣事，余敢辞。则会林公、

董公再下金君、吴君及悴吴君维京，则复为议杨林、盐铁曰：夫杨林者，横州之北，其右多阜易涸。而盐铁固漕河也。是二河者，太仓榦也，丈各八千有奇。出七浦坝而外者，海沙所沮洳，不浚之即扬尘也，为丈三千八百五十，计之工四万五千，食若金者五千四百有奇。俱报可。则又以戊辰春倅吴君与金君画地而治之，其规模大抵眎七浦，其役夫合诸河之傍田者，而佐以七浦之民。凡三十日而竣。）

万历五年，巡视下江御史兼都水利林应训浚昆山县慢水港至嘉定县徐公浦。（详见苏州府）十七年春，知州韩策浚七浦塘及顾门泾，又浚盐铁塘、杨林塘。二十六年，太仓州知州丁永祚浚吴塘、湖川塘。三十二年，太仓州知州陈随浚湖川塘、七浦塘。三十三年，太仓州判官李枝秀浚盐铁塘。三十四年，嘉定县吴道长浚走马塘。三十五年，嘉定县知县陈一元浚虬江东小练祁新泾。三十九年，嘉定县知县胡士容浚北横沥、鹅脰浦。四十年，太仓州知州王万祺，浚七浦塘。是年，胡士容浚练祁塘、马路塘、谭家浜。四十一年，胡士容浚走马塘。四十六年，太仓州知州赵赞化浚杨林塘。是年，嘉定县知县柴绍勋浚练祁塘。四十七年，嘉定县知县卓迈浚沙浦，长三千一百一十丈、周家浜长一千二百一十四丈。四十八年，卓迈浚温草浜，长三千一百一十九丈、袁张浜长二千五百一十一丈、小吉浦长七百丈。

天启元年，卓迈浚走马塘，长三千九百丈。二年，卓迈浚北横沥、公塘，共长三千八百一十一丈、沙浦长三千一百一十一丈、川沙浦长二千一百一十一丈。三年，太仓州知州陈如松浚城濠长二千四百四十三丈，面阔八丈，底阔六丈，加深六尺。详支民七军三银两充费。是年，卓迈浚封家浜，长三千五百一十丈。五年，嘉定县知县谢三宾浚新泾长二千七百二十丈；陈华浜长二千四百丈；黄姑塘长一千五百三十丈。六年，谢三宾浚东练祁、马路塘、谭家浜，共长八千二百一十三丈有奇。七年，巡抚都御史李待问檄太仓州知州刘彦、昆山县知县秦士奇，同谢三宾会，详导河夫等银贴助民力，浚夏驾浦长五千五十八丈，面阔一十八丈不等，加深五尺。是年，谢三宾浚吴塘长四千一百一十丈、小淞塘长一千三百丈、挑木浦长一千七百丈。

崇祯二年，太仓州知州刘彦浚七浦塘长四千八百三十丈、潞漕浜长一千六百四十丈。是年，谢三宾浚双塘长二千一十丈，姑苏浜长一千三十丈。三年，刘彦浚城濠，动支民七军三银两，开深五尺。谢三宾浚东练祁、马路塘、谭家浜、吴淞所城濠泗塘，共长九千一百一十丈。四年，嘉定县知县来方炜浚走马塘，长三千九百丈、袁家浜长二千五百一十一丈、界浜长五百一十一丈。五年，来方炜浚北横沥公塘长三千八百一十一丈、段浦长八百二十一丈、俞泾浦长一千二百三十丈、东小练祁长二千一百四十丈、殷泾塘长一千一百丈、中心横沥长八百一十丈、谢塘长二千一百丈。六年，来方炜浚虬江长三千六百二十一丈、俨倪浦长二千二百一十一丈、彭越浦长二千七百一十一丈。嘉定县知县万任浚东练祁、马路塘、谭家浜，共长八千二百一十三丈。兵备兼水利副使冯元颺浚太仓州城濠，将民七军三分段派浚，督令趋工，军三钱粮令泥夫径赴道支领，其民七下项下檄署州事知县万任调度支领。九年，巡抚都御史张国维檄太仓州知州钱肃乐修湖川塘。十七年，太仓州知州朱乔秀重浚

七浦塘。嘉定县知县钱默浚盐铁塘、顾浦、吴塘、练祁、直城之西环南北及城中河。

（附《侯峒曾治河记》：东吴水区，邑宅海堧，以殿厥足，无分山洪川原，泉之所自出。外卯江湖之流，以股引为陂泽塘浦，其水綢而繁，环紆以弱，上流以阨；潮纳沙出之不力，壤辄坟衍，岁杀水道什之一，下流以竭。忧水也于阨，忧旱也于竭。先是历数十百年无大议凿浚者，吏噤噤高坐不事事，前之人憚其劳且咎也，以俟后之人，曰前积是，吾何恤焉

？既害之也，又利之。每议役其地之缓急也，畔道之远迩也，诬工之众寡也，匿而役之，劳役也畸，以是虽大作将必无成。其小成也，财拙力勤，而人不得一日之利。水则如故。呜呼

！民其不生己乎。岁甲申，钱侯默始来问疾苦，竟首议河。以其冬浚盐铁塘，其明年春疏顾浦，次吴塘，次练祁，直城之西环南北，次及城中河。播导得序，视役必躬必亲，而厥田之家隶卒无一迹焉。其畚揭必良，其槌防必坚，其钜緘必齐，笞砾笮土必洁以完，其表必准，其绳必平，其期会必疾，其深广衡缩之功必核，凡是者，咸躬亲之力。于是万夫嗷呼，雷斤雨谷，曰咫尺月仞，往往不待期而毕。为地凡五，为道里凡一百三十有奇，讫月六，而为日八十有六，其为工凡一万八千五百十有奇。功既成，水于是乎大出，延道平陆，艤艘歛凑，农贾竞贺，酌酒欢喜，鐔夫榜人唱叹而如志，盖百十年童颜儿齿之叟未或见也。乌乎

！可以观政矣。其时省而功倍，其费俭而利侈，其水复故道而民不扰，其民力尽而不瘵。且怨赏酿罚薄、大蠲其禄，而民用歌乐。入其境者，观斯流也，则侯之为政，其所用心，举可知也已。）

清顺治三年，浚鹅旒浦、袁张浜、张家浜、陈泾。五年，浚东练祁、泗塘。六年，浚新泾、陈华浜、双塘、彭越浦、俞泾浦。七年，浚温草浜、小练祁、吴塘、徐公浦。九年，工科给事中胡之骏请浚刘河，以泄巴阳之水。奉旨允行。

（附吴伟业《论开刘河》：夫刘河者，娄江入海之口也。《禹贡》曰：三江既入，震泽底定，震泽者，太湖。三江者，淞江，娄江，东江也。必三江入而震泽始可底定，则以东南之水，太湖不足以受之，而用大海以为归也。案令甲，三江淤塞，起六郡人夫挑浚。夫淞江、娄江，其地在苏、松两郡，而起六郡人夫者，则以三江所受之水，非一郡之水，而三江所救之田，亦非一郡之田也。今刘河塞矣，太仓、嘉定沿河腴产，皆化为石田焦土，不可复耕，则其患在两邑为尤切。然两邑之所资者，独有灌溉耳。若夫宣泄之不通，其害之远且大有百倍于灌溉者，不可不察也。今即以昆山、常熟之近者观之，其田潴为巨浸，以彼堤堰圩捍之防，非不力也，塘浦泾沥，其流非不疏也，害且弥甚，则以刘河之塞扼之于口也，且非独此也。前此冬

月水涸，今冬月水不涸矣；前此一年旱，一年水，今连年大水矣，湖汛溪泖泛涨之势日增，而其民不得已乃争尺寸之地，昼夜与水相持，以益其怒。万一泽腹太满，挟五六月之淫潦，衡啮奔溃，则漕赋于何而出

？民生于何而救？故刘河之应开，不待再计而决者也。虽然所以开之之道，其难于五，而小者不与焉。一曰“议费”。夫以七十五里之河，而人工、物价又百倍于往年，此其费非可以数计而臆度也。东南为财赋重地，诚慨然发帑金，截部饷，捐数十万金钱于洪流之中，而为民建不世之绩，此在公卿大臣之谋画，非草野之中所可揣摩而想望者也。其次则责之六郡。譬如一人之身，血脉扞格不通，必其头目手足联络呼应而疾乃可治。顾人情各私其己，而又各为其乡，今以昆山、常熟之人督以治河，其田之稍高者曰，我无所事河也；其田之低洼者曰，我田在水底，尚用力于数十里外之刘河哉

！数十里如此，况于嘉湖之三四百里者哉！虽然此其人未睹治河之利也。使其人睹治河之利，则苟非并心合力，其功何由而成哉！语曰：愚民可与乐成，难于虑始。然则为此者，惟有于纷纭议论之际，直以身当之，而有所不顾。如此则费集，费集而事易办矣。故曰，议费之难也。一曰“度工”。夫地方兴一大役，须其工力宽然有余，俾公私烦费咸出其中，而事乃可就。非可据寻丈之沟，约其分寸，层累而计者也。今姑以土方之法算之，刘河七十五里，里一百八十丈，是长一万三千五百丈也。河面狭，则易塞，海忠介以十五丈为率，今纵不能及额，在十丈不可复减。土方之法，上下四旁各一丈，曰一方。是十万五千方也。使其深一丈而又五尺。则此五尺者，举前数折而计之，又六万七千五千方也。虽然此乃就河身言之也，河之口乃有阴沙，令河通而沙尚为之梗，则浑潮之入者，退必缓弱，淤泥不去，河即旋塞耳。如欲疏而去之，则必用巨舰缆大海中，木犁铁齿，栲爬捞扫，随风潮大下。是若有鬼神焉，非全藉人力者也。不则避其涨口，别凿东南一道入海，势必穿城堡，犯村落，置斗门，筑堤岸，其事又至重，不敢轻议也。故曰，度工之难也。一曰“派夫”。约略开挑之例，以十五工开一方，分段之例，以十里分一段；省计之例，以一月开一程。就一里算之，其广十丈，其深一丈五尺，得二千七千方，则四万五百工也。工程一月，是每一夫分三十工矣。统计一千四百夫，一月可开一里，积算一月之中，若开十里，则当用一万四千夫矣。他若车戽有夫，桩坝有夫，搭厂主

爨有夫，一切转移执事之人不在此数。夫沿河之地至硗瘠也，一旦聚几万人于其间，物价腾跃，将何以支？惟有贮粟数百石，官为之主粜，准其工力而给之以粟，庶公私上下可以不困。故曰派夫之难也。一曰“销田”。向者以河为田，而其民已受无穷之累，今者以田为河，而其民又失有形之利。则谓之何

？曰：否否。凡民之有芦荡者，必其老田者也，河开则民之老田尽熟，彼不喜田之熟，而惜此芦荡者！则又有疑之者曰，芦政自有专管衙门，设令上请，而所司坚持中挠，则奈之何？曰：两邑之税，收之公家甚少也。苟兴此役，当捐数十万金为之。

以为不大费者，不大利耳，岂在区区两邑之芦税耶？所患开河之初，丈量不清，册籍不立，其后衙门吏胥之生事者，今日一查，明日一勘，是又一重粮矣，不可不虑也。且其中有永捐之税，有暂免之租。夫永捐者河身开去之田，所不必言者也。有暂免则以七十余里之河，开二十万方之土，其积之也广矣，其坏田也多矣。即冈身高仰，种之仍可薄收，亦必三四年后，农民以渐锄耙，才堪播种。故曰，销田之难也。一曰“定法”。乡耆塘保开二三里陂渠，尚有卖段缓挑需索科扰之弊，而况于刘河乎

？故为之算土以正其界，为之立长以总其成，为之编号桩以量其浅深，为之打水线以平其阔狭，为之设接挑之担以节其劳，为之表堆泥之处以警其惰法。如是备矣，犹未也。官吏之踏勘，文书之催督，预定其制；钱粮之支放，物件之领办，审择其人。故曰，定法之难也。

）十二年，太仓州知州白登明因娄江塞，开凿朱泾，自东濠至和塘起，由界泾、石婆港、湖川塘、杨家浜、南治漕东出江口。旁浚北撄漕至茜泾之新塘，延袤六十余里。（附陈瑚新刘河记：弘治初，割三邑壤建州治。维时德寓天覆，阴阳交和，生息涵煦。百五十年，物盛而衰，蠹生其中，百务废阁，农政不理。既丁变革，纲维纵弛，狼贪鼠窃，因缘盘踞。民怨作讎，国有大恐。忽一日白公登明至，廉而别，仁而有体，栉垢爬痒，与民更始。凡1日令之不如古者，悉罢之。首清徭赋，岁省里甲金以万计。絢致大憨，歼之于市。月朝十五，悬法乡遂。申孝弟之教，立保甲，兴社学，风俗丕变，颂声大作。公以为未足，乃召诸生而诟之曰：“予奉职守土，幸无获戾于父老子弟。虽然田赋重，民生蹙，辛苦垫隘，无所控告，其无乃有惭德。且闻之地广大荒而不治，此亦土之辱也。”于是顾君士琯披图考志，画策进曰：“水利者，农田之本；刘河者，三江之一。刘河之议，且数十年，然役大力艰，不溃于成。窃谓东有朱泾，可以代之，厥便相埒。”公然其言，即以其任任之。令甫下，难者蠹起，公不为动。乃鸠聚徒众，立表刻期，授之以法，罔有挂漏。公单骑周巡，赏罚其用命不用命者，逾月而报绩。浚河五十里，广为丈者五，深一丈有五尺，用民工三十六万有奇。谓之新刘河云。此一役也，盖公之真实心诚信于国人，又知人而善使之，故能调一州之夫，建百世之利，拯邻邦之溺，成全吴之安，非偶然而已也。呜呼

！民命至重，帝德好生。虽时有升降，俗有因革，而吏能养人，谓之胜任。野多旷土，是为溺职，亘古迄今，未之或改。当夫有明之盛也，夏忠靖、周文襄诸公，络绎道途，问民疾苦，疏浚三江，百川归壑。及其衰也，朝廷以水利为闲官，有司以治农为迂务，灾祲叠告，膏泽不通，烟火萧条，公私交涸，兴亡治乱之故。纵曰天命，要有人事焉。俛仰今昔，可为啜泣者也。是用作诗，铭之永久，不独赞扬仁政，亦俾后之为牧者，急所先务，而毋替前人之功也。其辞曰：夏周既徂，水道湮塞，潦则为鱼，曠乃龟坼。农愁于原，妇叹于泽，不谋同辞，刘河是亟。设官扰民，财又谁出，三年不成，道旁筑室。贤哉我公，独有忧之，政通人和，与众諏之。诸

生士璫，抱图来前，刘河之北，朱泾在焉。东迎潮汐，西酃湖川，疏以代之，其利百年。惟断乃成，毋惑众言，乃相形势，乃定猷画。世业出资，穡人出力，欢声雷动，畚鍤云集。汤汤者流，浸润衍溢，用民之劳，二十五日。公心如水，公才如龙，昔汉本始，亦有白公。穿渠溉田，人颂其功，以今况古，诂日不同。娄人苦饥，公始饫之；娄人苦寒，公始被之。既富方谷，以礼莅之。

）十四年，巡抚御史李森先用太仓州知州白登明议，开刘河中段盐铁河起，石家塘止。

（附白登明开娄江说：财赋关乎农田，农田关乎水利。自刘河塞而邑之东南皆成石田，冈身之水倒注西北，是高低俱困也。甲午夏，飓风驾漕，沸溢无归，木棉淹尽。予拊膺曰：“是予过也。”易曰：“穷则变，变则通。通则昔禹开三江凿断冈身，曾何因袭。且古今异宜，不当别开新道，稍代娄江之任耶。”适顾生士璫策浚东朱泾，绘图以进，曰：“此十年之所究思，娄民之所相望也。有四大益焉：救本邑旱潦一也；泄邻邦泛滥二也；通东南舟楫三也；开巽方形胜四也。”予览厥原委，西起于至和塘，东尽天妃镇，旁及茜泾市，贯穿数支，以成全河。或仍旧迹用疏，或创新道用凿，长六十里，约计万丈，纵横界至，咸就条理。于是受干河协浚之规，斟酌派段；绝泥头包揽之弊，给食佃夫；销各圩实田，以杜规避；照鱼鳞号册，以免贿赂。革塘长旧例，而私耗可省；开新榷河尺，而虚冒无庸。别难段易段之繁简，均坐区客区之劳逸。分督则有层级，稽工则有标记。以及立限分程，赏勤罚惰。测深量阔，堆筑开挑。纤悉胪列，悬诸国门。民遂刊木伐荆，负锄荷畚以待。既役夫四至，疾于风雨，蜂屯蚁聚，万众齐施。长河蜿蜒，不日而就。予每十日一巡。一巡而工有其五，再巡而工有其八，三巡而工已竟矣。创见之举，遂克有济。盖用东南之民，疏东南之河，固其素愿，而又仿范希文遗意。当农隙饥荒，劝田主出粟，田夫用力，既役既赈，故功倍焉。若夫开江之任，乃人与数相需，有其候焉。予有志而未逮也。）

康熙十年，巡抚马祐请浚刘河。恩准开刘家河淤道二十九里，建闸三座。（详见苏州府。）

雍正五年十二月二十日，奉旨：据范时绎奏称：太仓州镇洋县士民金称，境内刘河巨工，已蒙发帑开浚。而七浦一河，原系民田沾获其利，今愿照依旧例，业主给食，佃户出力，不敢再费帑金等语。朕思君民原属一体，民间之生计，即国计也。倘遇国用不敷之时，势不得不资藉于民。今国家财用充足，朕为地方画万全之利，不惜多费帑金，兴修巨工，养育百姓。若仍用民力以办公事，非朕本心也。况小民效力工程，或致荒其本业，而又不免官吏之督催烦扰，朕心实为不忍。著将范时绎所奏士民捐助之处停止，仍动用公帑办理。并将朕旨遍行晓谕州县士民等，当体朕爱养元元之心。于工程告成之后，加意照看，岁岁疏浚，俾地方永受其益，则胜于目前之趋事赴工多矣。六年，户部议复郎中鄂礼条奏近海诸河，并设立犁船、混江龙

，以疏积沙。九年，开浚江南苏、松、常、镇等各属境内河道工竣。

乾隆元年、二年，相继请帑修筑江南塘坦坡。（陈诰海潮议略：或曰筑堤之法，向用木柜，近用排桩，兼用草坝。乃排桩时筑时倾，而草坝经年不动，岂石之坚反不如草之柔与

？曰：治水之法，于河不同于湖，海又不同于河。湖之水渟滯，无风时不动，有风时软浪磅礴，势缓而弱，故坦水石可御。河之水湍急，挟沙而行，沙淤则流必迁，故时有溃决，然不过顶冲之处而已。余皆平溜中行，故用柴即可无虞。若海则朝潮夕汐，呼吸排荡，非仅湖之波澜，河之湍流已也。古人以木柜治之，固不得已。盖湖非只木可支，亦非拳石可抵。拳石之大，不过万觔；万觔之重，百夫可举。只木之长，不能十丈；十丈之深，人力可摇。若潮之势，人力所能举者，潮无不举；人力所能摇者，潮无不摇。惟以木柜钩连，使十里二十里连而为一，则虽潮亦有不能移者矣。今以十木置土中，一人拔之，以次可举。若中有横锁，使十木为一，则非十人所能举矣。曰：然则木柜亦有倒卸者何

？曰：木柜倒卸，不过一柜两柜，孤而无辅，是以不能独完。若五柜一联，大木亘之，则合五柜为一柜矣；十柜一联，大木亘之，则以十柜为一柜矣。由此而一里十里，与夫数十里钩连不断，岂尚有崩摧之患哉

！且木柜御潮，原非平列，自近而远，自高而低，故曰陂陀塘，即湖堤之大坦水石也。湖之水静，故坦水石顺之使平。潮之水动，非木柜层叠不能御也。且木柜渐收，下阔上狭，则以柜压柜，势如累碁，即驾空尚不能坠，况又可横木为之底哉

！）（陈宏谋通饬海塘御浪檄：沿海所筑各塘，专防潮水为患。每遇潮来之期，又值东北风，海水风浪，拍岸漫塘，柳枝不能堵御，芦苇亦席卷而去。本部院连日经见有海滩所生之草，土名甘柯，草根盘结，枝叶丛生，且柔弱绵软，可以随波上下。若于土塘坦坡遍种甘柯，护卫塘身，再于塘外三丈余地遍种甘柯，则潮水至此不能起浪飞花。现在自宝山之川沙以及太仓昭文境内，塘身有此草者，上年水到无浪，不能伤塘，已有明验。又有一种枝杨，又名白杨，种地即生，柔条长藤，用绳扎结，俨如竹篱。随长随编，数年之间，俨如墙壁；而又稀疏柔软，可以随波起立，不致激水生怒，均属以柔治刚之一策。此二物者，当此春融，正宜种植，仰该官吏立即饬行管塘印官佐杂督率塘长遍种此物。塘身则多种甘柯，塘外皆有除粮余地三丈，皆可遍种甘柯。其枝杨不宜种塘身，止宜种于塘根，编篱卫护，塘外余地亦可兼种枝杨。总以塘身塘外数尺皆有此二物，以作卫护，俾潮水至此不能鼓浪兴波，塘身自然受益。如塘外余地原止减则未曾除种者，今既种草，即为除粮，或宜甘柯，或宜枝杨，随地酌种，应变通者，亦即变通，总期可以御浪卫塘。至塘长原无工食，不能枵腹办公。地方官每丈给银，以资种力，已种未足者补之。务令如法种植，小心照管，期于成活，不得虚应草率，有种无成。所需种力，县佐等官酌定数目

，不掬何项发给，事竣详候一面拨给，一面委验。甘柯成丛之后，潮泛已过，仍准塘长刈割卖用，以作工食，不妨使之便宜踊跃从事。有能设法变通渐致广盛者，另行给赏。急宜及时种植，以待潮汛，不可因循迟误。柳株不能御浪，有伤塘根，不必种植。）（尹继善石塘添用笋箫疏略：总理塘工太仆寺卿俞兆岳所筑样塘二尤坚稳，非仅由于灰浆充足，盖因工内俱用铁笋铁箫。臣等细心讲究，海水吞吐为力甚大，倘一石移动欹斜，则全身动摇。惟于两石层累之处各凿一孔，用铁笋穿合，则上下连结，于横石、排结之处，各于头尾穿孔，用铁箫关住，则左右贯穿，通身之石联络一片，虽有风浪冲激，不能撼动。较之用铁锭搭钉浮面易脱落者相去悬殊。今除已筑塘一千八百七十余丈外，尚有未足塘工二千七百五十余丈，请将此未筑塘工，外层纵横铺砌之石，俱用铁笋铁箫。每丈需用铁箫铁笋三十二枚，每枚重二斤，每斤价银一分五厘，每件凿孔银一分，共需笋箫十五万七千六百五十六枚，约需笋箫连工银五千九百余两。所费无多，塘工大为得力。但石有长短，笋箫或有增减，工竣核实报销。）（赵宏恩请石塘外增筑土塘疏略：查石塘长至七千余丈，面宽五尺，底宽一丈。以臣愚见，尚觉单薄。其外护土塘相离石塘有十余丈及数十丈之远，新筑贴石内土塘系紧贴石塘里面，而石塘外面虑少帮扶。诚恐日久潮浸雨淋，剥落擦损，亦应仿照贴石内土塘之法，紧贴石塘之外，再筑土塘一层，上宽五尺，下宽二丈，高一丈余，庶内外俱有包裹扶衬，愈可经久。又查石塘以外厚筑之外护土塘，其内隙地原广，雨水颇多积注。寺臣俞兆岳欲于石塘开三四洞，以消积水，前督臣范时绎、尹继善俱以恐伤塘根阻止。然现据百姓群吁疏泄，臣愚以为积水不消，浸泡塘根，亦有干系。若开挖数洞，实恐有伤塘身。细询工员匠民，欲于隙地中间酌开小河一道，围绕石塘之外，仍不致逼近塘根。于石塘与土塘交接之处，开一石洞引水，以入石塘内之引河，于塘工民田俱有裨益。而开河之土，即可以筑贴石之外土塘，又外护土塘以内隙地，开河之外犹多空闲，宜酌种芦苇柳株，日久根深盘结，既可以固塘基，而枝叶畅发，又可以资民用。

）元年二年，谕江南督抚，令滨海州县各于所属境内，相视浅阻，农隙挑浚，逐年举行。（二年，奏定分别官民挑浚河道。太仓州七鸦浦，系宣泄太湖、巴城、阳城诸河之水。镇洋县太仓塘，系漕艘经行之道。刘家港，系宣泄湖海之道，遇有淤垫，应动藩库匡费修浚。

）四年三月，知州江之炜、署镇洋县谢锡侯浚漕头塘。六年，知州传椿、镇洋县金鸿浚七鸦浦。又浚城濠。海防同知张汉平浚北治漕。八年，署知州王延熙、镇洋县金鸿浚刘家港。十一年，知州蔡长沄浚七鸦浦。十七年，知州宋楚望请帑筑海塘。

（知州详文：刘河以南，已于乾隆五年以后节次兴修。惟刘河以北，由县接州直至昭文，约五十余里，近来岸土渐坍，业佃人等亟请修筑。兹据该工员逐段丈勘，凡通塘五十里，离海远者一百八十丈，近者百二十丈，一律签钉。遇有房屋、坟莹让包塘内。惟田业中有田仅数亩，一旦估压挑废，粮虽请豁，不无失业之苦，似应酌给地价。所有应筑塘身，公同酌量，面宽一丈，底宽二丈六尺，高八尺，足可抵御

。计长九千四百七十丈五尺。内骑沟跨港之处，均须填土，沟旁塘脚钉桩包护，并应留涵洞以备旱潦蓄泄。其新塘、杨林、双鸣、浪港荡、茜泾、钱泾六口河身稍宽，须建桥梁，以通马路。估计土方土石工料地价约需银一万六千余两。附录刘家港七鸦口筑塘工段。查刘河口港面宽阔，潮自东西来，正当顶冲，旧筑之塘未至岸边，以致北岸现筑之新塘首，亦系直形遥对不抵港岸。若不添筑接至岸边，则必大潮内灌，浸损塘根。随于两岸塘尾逐加丈量。南岸自塘头至楚城泾止，应添筑一百十七丈五尺；北岸新塘工首直抵港岸，应接筑一百六十丈。又七鸦口港面亦宽，若东北风紧，大潮直入，该处亦当其冲。所有两岸塘头，必须斜湾绕进，庶水由港行，不致散漫。致应各抵港岸接筑以束水势，并加丈量，南岸添筑一百五丈，北岸添筑七十丈。以上共四百五十二丈五尺。现在一体挑筑，仍请于扣存八分银内拨抵。

）十七年，署知州冷时松浚刘家港。十八年，知州宋楚望浚璜泾镇市河。是年，嘉定浚南盐铁。太仓州镇洋县仍助工值。二十年，知州德安浚七鸦浦。二十三年，知州王镐浚南北横沥。二十四年，知州邵丰缙浚七鸦浦。二十五年，知州邵丰银筑海塘。二十八年，邵丰银培筑海塘基。二十八年，邵丰堠浚七鸦浦。二十九年，邵丰缙浚刘家港。又濬东勒马泾、项脊泾。三十二年，知州贵中孚浚七鸦浦。三十五年，贵中孚浚陈大港。三十七年，贵中孚浚城内太仓塘。三十八年，知州陈炎浚七鸦浦。三十九年，知州褚邦礼浚北六尺港。四十年，褚邦礼浚漕头塘。是年冬，知州秦廷堦浚南北横沥。四十一年，嘉定浚南盐铁。太仓镇洋协贴工值如前。四十三年，知州李龙湛浚盐铁塘、致和塘、七鸦浦。四十四年，知州王廷燮浚刘家港。五十年，知州范国泰浚刘家港。是年冬，知州西琳浚钱泾荡、茜泾、陈大港。五十四年，西琳浚杨林塘、麋场河。五十五年，西琳浚七鸦浦。

（王昶志：按七浦受西来之水以泄于海。自西水渐塞，力不足以刷沙，故疏之甚难，而淤之甚易。若非留东坝以堵遏浑潮，则一日两至之沙，逾年而以尺计。欲其不淤淀成陆，岂可得哉

！是年，开浚之初，本议堵塞海口，为农田灌溉之利，而傍海居民不知远虑，仍开东坝。今河流渐狭，甚者仅如一线，涝不可泄，旱不可溉，两岸塘身高于雉堞，留心民事者为之抚膺。自今以往，治七浦者，能尽道西来之水仍归七浦，使清水刷沙，潮无淤积，则东坝或可开放。然而费大，势所不能。若为七浦两旁田亩及诸支河谋蓄泄灌溉之利，则东坝以蓄清水，启闭以救旱涝，诚不易易之论也。

）五十七年，署知州王锦浚石婆港，兼浚城濠。六十年，知州鳌图、镇洋县何曾浚小塘于湖川塘。

嘉庆二年，鳌图详请借帑浚刘家港。六年，濬七鸦浦。七年，濬刘家港。十五年，知州仓斯升浚七鸦浦。十八年，请帑浚刘家河。

道光二年，知州张作楠浚七鸦浦。三年，知州张作楠、镇洋县郑光炜濬刘家港、七鸦浦、朱泾。是年，知州张作楠建涪漕闸。（在刘河镇，即朱泾东口。

）是年，大水，作楠勤于抚字，以工代赈，民不告劳。四年至七年，浚石婆港、西朱泾、湖川塘、小塘子、横沥、陆窑塘。十四年，巡抚林则徐奏浚刘家港，建闸海口。十五年，知州李正鼎、镇洋县孔昭显浚七鸦浦、朱泾、南浩漕、西十八港、直塘市河、孔泾。十六年，知州李正鼎、镇洋县孔昭显浚杨林、南萧塘、北萧塘、陆窑塘、钱泾、窑塘、南石婆、北石婆、南北洛漕湖、川南十八港、大凌门。二十四年，浚新泾。二十五年，浚直塘市河。

咸丰七年，知州王如林、镇洋县普文浚杨林湾、茜泾、鹿鸣泾、璜泾镇市河。

同治二年，浚城河。三年，知州蔡振武、镇洋县李萼馨浚朱泾、南小塘子。四年，知州方传书、李萼馨浚南洛漕、朱泾、北撙漕、西黄姑塘、茜泾、城外洛漕、六里塘、仓河、潮泾、北小塘子、陆窑塘、樊村泾、玉带河、勒马泾。五年，方传书、李萼馨浚七鸦浦、庙泾、千步泾、东港。是年，巡抚郭伯荫奏浚刘家港。七年，署知州沈玮宝、镇洋县俞明厚浚老刘河

（道光十四年，老虎湾、虹桥湾取直开挑两湾。俗以老刘河名之）、新泾（塘在茜泾城外）。八年，署知州蒯德模浚荡茜泾、石孔泾（系七浦支河）、北城河。（即城中盐铁塘，尝为朱氏所塞。元泰定间浚盐铁塘，塘始通。后张士诚筑城，塞桥为垣。是年，凿通桥门，即因桥门建水关，令盐铁水入北水关达太仓塘。康熙年间，州人黄与坚浚盐铁塘记云：盐铁在州境，汇诸水以贯穿于城之南北，此南北水关所由设。自水关废，城中水渐塞。据此，则州城南北本皆有水关。其为泰定浚盐铁塘，或张氏筑城时设，均未可知。而其废断在明代，特未审的在何时。然则今之有南北水关修废耳，非创造也。爰附志其说如此。

）九年，署知州蒯德模，署镇洋县恩溥浚朱泾。十年，知州吴承潞、镇洋县刘端凝浚杨林（太镇回干河之一。东达于海，西泄阳城、巴城、王泾诸河之水）、蒋泾、陈泾、罗泾（各支河系在璜泾镇东。河道毗连，直达钱泾海口。西河南通七浦，北接浪港

）。十一年，吴承潞浚七鸦浦（七浦干河绵长五十里，西泄太湖、巴城、阳城之水，东出七鸦口入海。不特州境民田所赖，亦上游水利攸关。是以从前奏定分别官民开浚河道）、璜泾镇市河、姚荡、东上城河。是年，浚吴松江。十二年，吴承潞浚新泾、鹿鸣泾、毛家镇市河、沙溪镇市河、直塘市河、东洋泾

（七浦支河）、南漕头塘、北漕头塘、王泾、石家泾、戴浦、桑树泾（以上俱系七浦支河）、陈智泾、孔泾、南姚泾、勒马泾。十三年，补筑茜泾口土塘，增建镇洋

县护塘坝。是年，吴承潞浚白泾、管潭

（两河均白茆支河，系太仓昭文接界）、时泾、孟河、菜花泾、横塘河、漕泾。

光绪元年，吴承潞浚蒋泾、陈泾、罗泾。二年九月，增建茜泾塘外护滩桩坝。五年，署知州万叶封、镇洋县谭明经浚南仓河、南盐铁河。九年七月，增筑钱泾口护滩石坝。十二年四月，修筑荡泾口土塘，增袁家港郁家宅护塘石坝。十四年二月，署知州莫祥芝、署镇洋县剂葆宸浚湖川塘、朱泾、六窑塘。十七年，知州程其珏、镇洋县英镜沅浚杨林。十九年，程其珏浚石头塘

（南通七浦，北达荡茜）、新泾塘、藉娄黄潮洪，卖柴泾。二十二年，署知州陈谟浚朱泾（南通七浦，北达璜泾）、南窑泾、北窑泾、南横沥，北横沥、御浜、宋家港、东花婆。二十四年，江苏即补道钱志澄浚刘家港。知州蒋体梅、镇洋县吴镜沅浚老刘河。二十七年二月，蒋体梅浚六公市河六尺花婆。

通州

宋绍熙中，淮东提举陈损之言：楚州、高邮闻，陂湖渺漫，宜创堤堰，以为潴泄。乃筑堰自江都经高邮、楚州、宝应，北至淮阴达于淮，凿新河自高邮入兴化，东至盐城极于海。又于扬州墟镇创斗门，引水由泰州海陵南至泰兴彻于江。所经画甚具，溉泽卤田百万顷，两淮之民赖焉。

（互见扬州府）

明嘉靖中，泰兴县令朱簏浚马桥河。泰兴县令许希孟浚通泰河。

万历十年，筑范公堤，浚串场支河。

（附凌云翼疏；维扬古称沃壤，而地形低下，大海环其东，诸湖绕于西，所赖堤厚河通，期田地可耕，民灶俱利。自范堤圯坏，高宝堤亦冲决不守，其中大小支河所在淤塞，于是以高、宝、兴、泰死州县为壑。而泄水无路，民灶罢于昏垫矣。臣等躬亲勘视，度地形，探水势，其治之之道有二；惟疏上流使入江，泄下流入海，沿漕堤一带之水为上流，沿范堤一带之道为下流。如西引邵伯湖之水，转南至薪安湖，复东入运河至芒稻河入江有余，则听其直泄，不足则引以济漕，则上流疏矣。如牛湾河、姜家堰、庙湾为三大海口，引各支河东会于串场河，北会于射阳湖俱入海，则下流疏矣。而兴化之堂子镇，戴家窑、海沟河、白驹、三十团灶，则牛湾河之支河也。黄土沟，皂角沟至冈门登瀛桥河，则姜堰之支河也。安丰镇至清备灌铺，则庙湾之支河也。其河埭场至白驹场一带阻浅尤甚。又河东一带旧系粮盐大河，洪水冲决，河身与岸相平，故水不循轨。而淤溪、秦潼、艾陵、葑子诸河之水，北淹

民田亿千万顷，处处俱当挑浚，俱当经营，惟是工有先后，势有缓急。今将范堤数十里先行修筑，使外潮不得入。串场支河六七道尽行疏浚，使内水有所出。果蓄泄便利，积水可消，则海口不开亦可。如支河既通之后，水患如故，即并开海口，置闸以备蓄泄。）

万历中，泰兴县令冯渠建天井河。

天启间，如皋令李衷纯建石跳于江中。

清康熙六年，开浚暇思港。

乾隆元年，浚通州吕四等场河长二万六千八百八十四丈五尺。

海洲

宋天禧四年，淮南劝农使王贯之导海州石越堰水入涟以溉田。

清康熙初，浚蓄蔽河。（改名玉带河）

乾隆八年，疏通六塘河并修堤堰。又浚玉带河、板浦河。十一年，浚大沙河、六里河。十八年，浚武障河、义泽河、高墟河。是年，修筑沭河南岸堰工。二十二年，加筑沭河、六塘河堤堰。浚砂礪河。二十七年，修六塘河，南河北堰、北河南堰。

三十年，修六塘河北岸丁家淘、汤家道口等处堤工。

第十一卷 水系

江苏东南滨海，为大江下游。故言水者，当以江为干，以海为委，先海示所宗也，次江举其要也。自江以北，地势较鲁、皖为低，故鲁南、皖北诸水皆壑入焉。水之自鲁南来者，曰泗、曰沂、曰沭；自皖北来者，曰淮，而淮为大。古泗、沂皆会淮入海。自黄河夺泗夺淮，泗、沂始失其故道。河去而淮之故道亦失，于是潞为洪泽湖；又潞为宝应、高邮、邵伯诸湖。而泄于淮南运河，又泄于淮东盐河，然后分流入于江海。泗水自微山湖出，为淮北运河。沂水亦入淮北运河，复出为六塘河，又出为淮北盐河，至下游分道入海。沭水上游为大沙河。下游则径东海之青伊湖，又东入海。此江北水道之大略也。自江以南，钟山、茅山障其北境，故省外之水，涓滴不能南来。秦淮水且合赤山、石臼二湖水西北流入江。其东南流而为干河者，则江南运河是。河水受自京口江水，至丹阳以下，则受诸溪流，而随地宣泄，皆成支津，或入大江，或入太湖。次胥河为古中江故道，受句、溧诸山谿流，南流至高淳之下坝，折而东流，径溧阳、宜兴二县境，会洮湖、涡湖诸水，又东流径大浦港入于太湖。太湖以下有二水：曰吴淞江、娄江，皆分太湖水分道入海。泖淀诸湖，亦分太湖水，东南流会为黄浦江，折而北流至上海，合吴淞江水，又北流迳吴淞口入海。此江南水道之大略也。

大海

江苏之海岸线，北起赣榆东北境，与山东日照县接界；南迄金山县西境，与浙江平湖县接界。绵长一千二百余里。附表是曰“东海”，一曰“中国东海”。

（自扬子江口北控朝鲜，东包日本，南括琉球、台湾。扬子潮流有力，直穿日本潮流。）一曰“黄海”。（由扬子江口至山东滨岸成一大深湾。其东为朝鲜。旧因黄河之口吐出黄流，海色亦黄，故名。

）东北岸起赣榆县境之荻水口。其东曰“山岚头”，即栏头山。（详江北诸山篇）水深可泊大轮。又三十里径青口。（县西北境诸山之水，挟山东兰山县水，东南流六十里，至此入海。

）其东曰“泰山”。德国兵舰初泊于此，嗣由朱蓬口登岸者也。又南流五十里，径东海县北境临洪口。其南曰“新浦”。受青伊湖、大沙河诸水。（湖水源出沭河，自湖东北尾东北流六十里，至此入海。大沙河自山东兰山、郯城两县界南流，折而东南九十里，径富安滩与湖水会，又东流十里，至此入海。

）陇海铁路至此为终点。商埠在焉。其东为云台山，古郁州山也。（详淮北诸山篇）山之东曰“鹰游门”。有东西连岛，两峰对峙，峡流深稳，可泊大轮。又北东径灌云县北旧板浦镇也。又东七十里，径东陬山河口，盐河水入焉。

（盐河别详。河水自灌云县东流六十五里径秃龙港，又十五里至此入海。一自县南十里龙王荡口东北流七十里，径秃龙港合流入海。）又南迤东流七十里，径灌河口。其上为潮河。海水潮汐之所经也。口外有开山运河水自西来注之。海水又东南流一百里，径阜宁县南境丝网浜。其西一百五十里为安东县。东南境之梯关，是曰“古淮口”，旧黄河合淮入海之故道也，今淮水盛涨时入焉。

（黄河、淮水皆别详。）口外有大沙，又有五条沙，航海者避焉。口之北深入为海州湾。（黄河口南流沙淤积，外涨为浅滩，伏水中有大沙，大沙之南有五条沙，如五指平列。口北则流沙所不及，且内屈为海州湾。

）又南流六十里，径射阳河口，大纵湖自西来注之。（射阳河，实淮水下流所汇。由马家荡、马庄分流，曲折北行，合诸小河，至城南折东流，又少南至五新镇，分为二支：一北行为北洋河口入海；一南行至征祥镇入海。大纵湖受下河泄水，东出为盐城、阜宁二县界河。东行七十里，过范公堤；东北流三十里，径丝港口会海河；又东行七十里，至征祥港会射阳河口入海。

）又西南流四十里，径盐城县东北境新洋港口。（射阳河，自阜宁县城南分而东南流沿范公堤，东为串场河，历三十五里，入县境会界河。沿范公堤西东流三十里，径县城北过天妃闸。又东北流五十里，至此入海。

）又东南流二十五里，径盐城县东北、东台县东南交界之斗龙港。（盐城县境串场河，自天妃闸西环城西南沿范公堤西南流二十五里，径纪家港，逾堤径伍祐场镇。又东流三十五里，径大蓬港东尾。又东北流蜿蜒四十里，至此入海。其在东台、兴化两县境内之串场河，皆自大蓬港东尾入海。详后《淮东盐河篇》

）。又南流七十五里，径小洞港口。（东台县境串场河，自县治东隅闸口东北流七十五里，径潮水坝，又蜿蜒三十里有奇，至此入海。）又百里，径如皋县东北境，有数小港，仅通潮水。

（掘港通内河及南通石港、吕四、丰利诸处，即盐运河。）多涨沙。（范公堤外滨海有葫芦沙、桩家沙、三角沙、白沙、棍子沙、火焰沙、拖子靠沙。将来必变成陆地。）有嫔山。（高逾十丈，贝壳所成。

）又东南流百里，径南通县东北境，明沙暗沙浮沉水际，航海者弗由也。（《通州志旧论》：廖角嘴，今海门县境，为海防险要。今则沿海一面，并无泊舟巨港。潮水涨落，变迁靡定，范公堤外海滩、盐地一望无既。或百里，或数十里，率烂淤不可立足。而滩外明沙环绕，暗沙隐伏。所谓廖角嘴者，特伏水之浅埂耳。微论海州舟不能傍岸，即洋面针路亦距岸甚远，瞭望所不及。故筹海者，只令轮艇水师，以巡为守。

）又六十里，径海门县东北境廖角嘴，界河水入焉。江水自此渐于海。（界河起南通县东南境三十里。老洪港口河水受自大江，东北流三十里，径新桥镇。又东流一百十里，至此入海。

）又南流二十里，为县东境尽处。其北为崇明及新分、启东二县境，悬居海中。（海中多沙，其大者，北曰惠安沙、青鱼沙、永安沙、永丰沙、永旺沙、永兴沙、日旺沙、连升沙；南曰永寿沙、崇实沙，皆其地也。

）崇明之西南隅，隔海与太仓县东北境相望。其地为常熟县交界处，曰白茆口，为大江南岸入海之始。尚湖、昆城湖水注之。（两湖西源远出太湖，北源近出虞山。自常熟县城东南隅通河桥合而为一，湖水东南流十里。又东北流四十五里，至此入海。

）海水东南流四十里，径太仓七丫口。阳城湖水注之。（阳城三湖，源出太湖，自东湖下段淞北流里许。又东流十里，径昆山、常熟两县界河。又二十里，径太仓直塘镇。又东北流四十里，至此入海。

）又十五里，径浏河口，娄江挟新阳江水注之。（新阳江，源出吴淞江，自昆山县境三江口分而北流十五里。又东北流二十里，径县城西而南而东，至朝阳门外；又东稍北流二十里，径浏河口入海。又详《娄江篇》。

）又三十里，径宝山县城。又十里，径胡巷口，黄浦江挟吴淞江水自西来注之，是曰吴淞口。（详《吴淞江篇》）有炮台湾，海防要地也。淞沪铁路至此为终点。有商埠，口外为大洋，亦商舶出入之所。泗礁群岛屹立海中，航行南北洋者取道焉。

（详《吴淞口外诸岛篇》）又三十五里，径川沙县东境白龙港。又南流五里，径南汇县境。又五十里，径奉贤县境。又西南流五十里，径松江县境。又三十里，径金山县城南。凡在江苏海岸，北起阜宁，南迄金山，皆有堤塘，所以捍海潮护民田也。

（范公堤，起阜宁县城南射阳河南岸，沿串场河而下，迤东南九十里，径盐城县东郭外。又四十里，径兴化县东北境大团镇。又南八十里，径东台县治东南隅。又东南九十里，迤如皋县东北境李堡镇。其东仍入东台县境。又东二十里，径嵇公堤。又东南三十里，再入如皋县境。又五十里，径长沙镇。又西南六十里，径南通县东北境骑岸镇南。又东南四十里，径年丰闸。又东六十里，径三甲镇东海神庙止。江南海塘，起常熟县西北境与江阴县接壤之界泾港口南，迤东南四十里，径县北耿泾口。又东三十里，径高浦口。又东南十里，径白茆口。又四十里，径太仓县东北境七丫口。又二十里，径浏河口。又三十里，径宝山县城北，为土塘。沿城东而东南五里，径炮台棋杆，为石塘。又南不及五里，复为土塘，径胡巷口止。中跨黄浦水

五里。越东岸，起草庵渡迤东二十五里，复为土塘。径川沙县北境王家湾南，塘分而二。其内曰护塘，自王家湾南永宁桥东迤南十五里，径川沙县城北而东。又东南三十五里，径南汇县城东。又南稍西又二十里，径涵水庙入奉贤县界。其外曰钦公塘，距内塘东西不及五里。自王家湾东南水洞桥东迤东南并轨行七十里，又西五里，亦径涵水庙而合为一。又西十里，径奉贤县城南。又西南二十五里，径华亭县境交界之外塘。至此复有内外二塘。又西南二十里，径南厍止，皆为土塘。以下复为石塘，迤西南十五里，径金山县城东南。又西二十里，入浙江平湖县界。

）又西流十里，入浙江平湖县界。

江苏海岸线长度

赣榆（长四六八五〇米，八三里。）

自苏、鲁交界汾水镇东南六里有奇荻水口起，稍西南延止于临洪口，入灌云县界。各港口间之距离：计荻水口八六〇〇米、子县口一二〇〇米、冲子口五一〇〇米、韩家口九八〇〇米、朱蓬口四六五〇米、兴庄口七六〇〇米、青口九九〇〇米。

灌云（长一一五五〇〇米，二〇一里。）

自临洪口起，先东南延折凹南方，复向北凸出，转延东南，止于灌河口之燕尾港，入涟水县界。各港口间之距离：计临洪口一五七〇〇米、猪嘴岛二七一〇〇米、烧香河四七四〇〇米、圩子口二五三〇〇米。

涟水（长四五九〇〇米，八〇里。）

自灌河口之团圩港起，东南东延止于套子口，入阜宁县境。

阜宁（长一四二〇〇〇米，二四七里。）

自套子口起，东南延止于南冲子口，入盐城县界。各港口间之距离：计套子口三五二〇〇米、旧黄河口一七五〇〇米、绝龙港一九三〇〇里、大港口六〇〇〇米、北双洋口二〇二〇〇米、喇叭口一二三〇〇米、射阳河口三一五〇〇米。

盐城（长五一六〇〇米，九〇里。）

自南冲子口起，东延海岸坦平止于斗龙港口，入东台县界。各港口间之距离：计南冲子口二五〇〇〇米、新洋港口一五〇〇〇米、新潮港口一一六〇〇米。

东台（长一一七七〇〇米，二〇四里。）

自斗龙港口起，东南延止于栟茶镇之小洋口，入如皋县界。各港口间之距离：计斗龙港口三一二〇〇米、江家港口四二〇〇米、王家港口二九八〇〇米、新关港口五二五〇〇米。

如皋（长一一四七〇〇米，一九九里。）

自小洋港起，突向东延屈曲成多数弧形，止于川腰港，入南通县界。各港口间之距离：计小洋口一四四〇〇米、环港一六七〇〇米、河北丫子口八三六〇〇米。

南通（长八二一〇〇米，一四三里。）

自川腰港起，环而斜向东南延止于海复镇东，入海门县界。各港口间之距离：计环于港外一七五〇〇米、歇御港口五二四〇〇米、对岸河口二四〇〇米、蒿枝河口九八〇〇米。

海门（长二六四〇〇米，四六里。）

自海复镇东起，南延至半滩激港，又南微西，再折而东延稍南止于高头沙东南。各港口间之距离：计海复镇东八四〇〇米、半滩激港一八〇〇〇米。

启东（长四二〇五〇米，七三里。）

北起陆亮成圩之东北方，向南偏西，再凸向东北，折而西南，成半圆形；复西延成半环形。各港口间之距离：计陆亮成圩东北东三四八〇〇米、三新港口一七五〇米、新开港口一七〇〇米、东戩激口一二五〇米、中戩激口九五〇〇米、西戩激口一六〇〇米。

崇明（长二九三〇〇米，五一里。）

始自斜路港口，止于朝阳镇之奚家港，状如舌。各港口间之距离：计斜路港口二四〇〇米、新出港口四六〇〇米、车锚港口二二三〇〇米。

川沙（长二六八〇〇米，二九里。）

自王家湾起，斜向东南延，止于九港外方，入南汇县界。

南汇（长五七七〇〇米，一〇〇里。）

自九港外方起，斜向东南延，又南西止于蜚蜞庙之大牌楼南，入奉贤县界。各港口间之距离：计九港外方三四五〇〇米、扬叶港口一三三〇〇米、兴隆港口四七〇〇米、横沙港口五二〇〇米。

奉贤（长四一〇〇〇米，七里。）

自大牌楼南起，而西延止于拓林城东南，入松江县界。各港口间之距离：计蜚蜞庙三六〇〇〇米、钱家桥镇五〇〇〇米。

松江（长二二〇〇〇米，四三里。）

自柘林城东南起，又南西直抵金山卫城止，入金山县界。

金山（长五〇〇〇米，九里。）

自金山卫城起，西南延迄于金丝娘桥之南方，入浙江省界。

全省海岸线长度，合计为九六六〇〇米，一六六九里，与本篇里数相差甚多。但表准县境，本篇准要港，可以参观。

大江

江水自安徽当涂县境入江宁县西南境，其分界处曰“和尚港”（旧名分觚港）。北岸则为乌江，与安徽和县分界（江中近南岸有徐草洲）。东北流十里，径烈山港、乱石矶

（即烈山下洲。《世说新语》：“桓宣武在南州与会稽王会于溧洲”，即此地。烈山港下有矶，突出于湍间，名乱石矶。）又三十里，径大胜关（江中东南有永定、孝德二洲），上新河水自东南来注之

（上新河俗名上河。又有中新河俗名新河）。又北流十里，径北河口，受秦淮支流水。又北迤东流二十里，径下关，秦淮水自东南来注之（秦淮水别详）。沪宁铁路至此为终点。有商埠。与对岸江浦县浦口镇相值，是津浦铁路终点也。又东北流十里，径幕府山北，是为夹江

（江中有八卦、七里二洲，绵亘八十余里，名曰草鞋夹）。又十里，径北岸六合县东南境划子口，滁河注之（滁河自安徽省滁县界陈家浅东流入江浦县境。东北流九十里，径庄闸为白毛河。又蜿蜒三十里，径六合县城，环西、南、东三门而南流。蜿蜒三十里，径瓜埠镇。又折而东北流五里，径灵岩山南。又南流十五里，至此入

江。一水源出县西北境龙山，南流二十余里，径宋庄闸口，与滁河会，合流入江

）。江水又东流二十里，径大河口，东沟水自仪征县西南境交界处分流注之。又二十里，径仪征县城南泗源沟，仪征运河水入焉，（仪征运河自江都扬子桥西分运河水西南流四十里，环县城东而南流五里，至此入江。

）是有扬子江之名，不知所自始（按隋江阳县有扬子宫，遂名扬子镇。唐改为扬子县。南唐改为永贞县。宋复为扬子县，后升为真州，治扬子。政和七年，赐名仪征。扬子江之名或以此欤

）。其南岸径句容县北境罗丝沟，龙潭水自西来注之（自江宁县栖霞山以东之水，东北流六七里入县。又东流径龙潭。又东北流十里径荷花塘。折而北流迤西五里，至此入江）。江水又东流二十里，径镇江县西境，高资河入焉

（江口有里世、征润、四一诸洲。县境水自唐冈北流五里许，径高资镇。又西北流五里，至此入江）。又东流十里，径北岸江都县西南境瓜洲口，受运河水，即古邗沟通江处也（别详《运河篇》

）。又东流十五里，径南岸镇江县城北口，江南运河出焉（别详《运河篇》）。濒江有商埠。北固山突出江中。东有象山与焦山对峙，江流其间。有炮台为江防重地。又十五里，径丹徒口

（是口亦分江水入运河）。又十五里，径大港镇。自此江宽三十余里，江中洲屿星错。（连城洲在北岸，有炮台与焦山南北相值。其东有连山、益课、天福、还沙、补沙诸洲。）北岸则江都县南境三江营口是也，有夹江，扬州运河水分流注之。

（运河自江都县境壁虎桥分数派，东南流十五里，径仙女庙镇。又二十里，径三笔荡入夹江。又二十里，径太平洲东达三江营口。外为天福洲，自东亘西南长三十余里，与镇江县共之。

）大江始折东南流三十里，径泰兴县西北境庙港，泰县盐河水入焉。（泰县盐河水，自其县城南分而西北流十里。又折东南流十余里，径马庄入县境。又屈曲南流二十里，至此入江。

）江中有大洲，昔置太平厅，今为扬中县。（洲东西长九十里，南北阔三十里、四十里不等。旧分隶江都、泰兴、丹徒、丹阳、武进诸县。清季析置太平厅。民国改今名。）自此江宽四十余里。又南流四十里，径泰兴县西南境王家港。

（港水东北流二十里，径县城南。折而南流二十里，径毗罗市，入泰兴、靖江两县

接壤之界河。又西南流二十里，径界港复入江。）南岸为丹阳县东北境包港，丹阳运河水入焉。（丹阳运河自县城东北分而东流三十里，径访仙桥。又东北二十五里，至此入江。

）又东南流十五里，径武进县东北境孟河口。由此而下，迄江阴县境诸水，皆自常州运河分泄入焉。（孟河一名孟渎河，在县城西三十里奔牛镇，受运河水。北流三十里，径孟河营。又折东北流十五里入江，曰小孟河口。其自石桥湾东北流十里入江，曰大孟河口。孟河之东有得胜河，亦受运河水。北流二十里，分为二支：一北流折而东流十里入江；一西北流十五里，径大河汛入江。得胜河之东有澡港河，自县城东北受运河水，东北流五里。又稍西折北屈曲流三十里，径圩塘北入江

）。又东南流三十里，径江阴县西境桃花港。（北商河自武进县东南丁堰受运河水，北流二十里，径汇头市东。又屈曲东北流二十里，分二支：一北流六七里，径土埭河入江；一西北流，径桃花港入江。

）北岸即泰兴、靖江两县之界港也。（界港分靖江水绕靖江县北境，东南流九十里，至张黄港，仍合于大江。自港河北西北与泰兴分界，东北与如皋分界。）又东流三十五里，径靖江县南境八圩港。

（界港河自县北境庙树港分而南流十五里，逾团河，径县城西，又南流十五里，至此入江。）南岸为江阴县城北黄田港。（北商河自武进县城北分运河水东流二十里，径郑大桥。又东流十五里，径石堰，会戚墅水。戚墅水亦自武进县东南分运河水东北流二十里，至此合为一水。屈曲东北流三十里，西径夏港，东会江阴漕河，径县城西南，环而西北流五里，径黄田港入江。

）其东濒江为席帽山峰，北岸为靖江县南境天生港。江流至此一束，阔二里许，两岸有炮台，亦江防重地也。（江面最窄处止宽二里半，水深七八拓至二十拓，朔望潮高八尺，地势收束，实为全江关键。

）又东稍北流五十里，径段山港。北岸为靖江、如皋两县交界张黄港，如皋盐河水入焉。（如皋盐河自县城南隅南流三十五里，径土墩港分为二支：一稍西南流三十五里，径张黄港，一稍东南流十里，径大石圩。又南流十五里许，径周圩港。又自大石圩东南流三十里，径碾砣港，分流入江。详后《淮东盐河》。

）又东流十里，径如皋县北境周圩港。（见上）江心有两大沙（北曰“常阴沙”，南曰“寿星沙”）。南沙有常熟县西北境川港，港水南流十五里，复入大江。南岸为江阴县东境谷渎港。

（县境水自城东隅东南流四十里，径芝生桥，折而东北流五里许，至此入江。）又

东流五里，径常熟县西北境界泾港。港东即海塘起处，江水至此始行于平地，有平江之名。又二十里，径北岸南通县西境天生港，南通盐河水入焉。

（南通盐河自唐闸分而西南流十五里，至此入江。）自此江流极阔，东西相望五十里。又东南流三十里，径狼山港，盐河水亦入焉。（盐河又自城东隅南稍西流二十里，至此入江。）南岸为常熟县福山港，尚湖、昆城湖水注之。两港形势遥遥相对，屹然为大江门户。

（两湖见前《大海篇》。一东流，一北流，各五里许，自常熟县城东南隅迎春桥合流为一。沿城东北五里，径北塘三里桥而北流三十里，至此入江。）又二十五里，径许浦口。两湖水亦至此入江。

（湖水北自北塘三里桥分而东北流三十五里，至此入江）。又二十五里，径县东北境白茆口，为江海交会处。是有白茆沙，航海者慎焉。又东流径太仓县西北境。（县境有七丫、杨林、浏河诸口，皆娄江之水入江处。然海水已上会白茆口，是乃江海合流处。故不复叙。

）北岸与白茆口相望者，为牛洪港，南通盐河水入焉。（南通盐河，自县东境金沙镇分而南流三十里，至此入江海交会处。）江水又东南流，包崇明、启东两县全境，东渐于海。

附：江海潮汛

潮汐应月而生于海。自朔至晦，每一昼夜，两生两退。月出地平而潮生，中天而潮平，过中而潮退，将入而潮尽。至地平则潮又生，入地而中天则潮又平，过中则潮又退，出地至平则潮又生。循环不息，一随乎月行之时刻也。

（《上海志》引虞氏说。易以日月为象，月受日光，盈缺有定。其言曰：月以三日出震见庚，谓哉生明，见于西方而偏南也。八日兑象见丁，谓上弦，见于南方而偏西也。十五日乾象盈甲，谓望时，见于东方而偏北也。此前半月皆候于初昏者也。十六日巽象退辛，谓既望，见于西方而偏北也。二十三日艮象消丙，谓下弦，见于南方而偏东也。三十日消乙入坤，谓晦，月在东方而偏南也。此后半月皆候于平旦者也。又曰：晦夕朔旦，坎象合戊，离象流已，谓晦朔之时。月与日同在中央，盖即合朔时也。今准此定潮汐，以地合天，以水应月，毫发不爽，真定则也。夫日月合朔，是为月之初一。其出而平地也，在东方卯位，其时亦卯时。其入而平地也，在西方酉位，其时亦酉时。故两潮亦以卯酉应之。合朔十二时，皆有不拘卯酉。然既合朔，则为月之初一。而月之出入，则必在卯酉二时。此后至望，月行渐迟。其出而平地之时，由卯而辰而已而午而未而申。其入而平地之时，由酉而戌而亥而子而丑而寅，两潮亦渐迟，而以诸时应之。时凡八刻，每刻十五分，每时一百二十分

。月行迟日行每日十二度奇，每月则迟三百六十度，又与日会而合朔矣。其每时迟日一度零，合时刻只四分耳，十二时计四十八分，是为三刻三分。每日迟三刻三分而出地，故潮来亦迟此数入地。汐至亦同。既望则为月之十六。其出而平地也，在东方卯位，与初一同，而其时则为酉；其入而平地也，在西方酉位，亦与初一同，而其时则为卯。故两潮亦以卯酉应之，而与初一同也。此后至晦，月行亦渐迟。其出而平地之时，由酉而戌而亥而子而丑而寅；其入而平地之时，由卯而辰而巳而午而未而申。故两潮亦渐迟，而以诸时应之。自既望至晦，亦皆与由朔至望同也。此定时所以合表也。故候潮者，可以仰观而得。

）惟距海近者先至，远者后至，可以天度定之。古以周天三百六十五度又四分度之一，今整齐入算定为

三百六十度。准此则月上天中距地平九十度，以今法每度当地二百里算之，潮当行一万八千里。而镇江距江阴县百余里，江阴距黄浦江海口三百余里，是距海只四百余里，潮至镇江不过迟月二度。每度当时刻四分，不过八分，海上潮生半刻后即至镇江矣。又考九江以上渐无海潮，此盖因地势渐高，与上流诸水相抵，非潮行数千里遂不往也。今以黄浦、镇江两地潮候列表明之：

黄浦潮候（录《上海志》）

黄浦潮候分四时表

（录《上海志》。表中但列十二时初正末，而不列刻数。盖潮水从东北来，东北风大则潮早，西南风大则潮迟，是又不可以刻分泥也。吴淞江潮候准此早三刻，可以类推。）

按徐光启《农政全书》候潮诀曰：午未未申申，寅寅卯卯辰；辰巳巳午午，半月一遭轮。夜潮相对起，仔细与君论。又曰：十三、二十八名曰“起水”，是谓大汛，各七日。二十、初五名曰“下岸”，是谓小汛，亦各七日。谚云：初一、月半午时潮。又云：初五、二十下岸潮，天亮白遥遥。又云：下岸三潮登大汛。又曰：凡天道久晴，水亦不长。谚云：晴干无大汛，雨落无小汛。又海人验候云：山抬风潮来，海啞风雨多。抬，谓海水，抬起常所迷望之山，皆在目前。或云：蜃气为之。啞音“齇”，如万隙声也。《海盐图经》云：天云或垂，一海尽黑，若有沕泡，在釜沸泣。土人以为海啞发时，多在晚及夜，有海鸥千百群鸣助其愀惕，便若崩涛从半空泻来。

镇江湖候（录丹徒志）

秦淮河

秦淮水有三源：北源出句容县北境大华山东麓，南流三十里，径县城东。折而西流八里，径黄门涧。又屈曲西南流二十五里，径赤山湖西北角。东源出县东境巫山及方山山峡，自心桥起西北流二十里，径天王寺西。又十五里，汇为赤山湖。

（湖之东北有一水，自胜石桥西北流三十里，亦入于湖。）自湖之北岸三岔与北流水合而西流二里许，径赤山北麓，入江宁县境。又二十里，径湖熟镇。南源出溧水县东北境东庐山，会诸溪水南流，径白马桥。又西南流二十里，径新桥。又十五里，径钱家铺。折而北流十五里，径蒲塘镇。又西流五里，会石臼湖水。

（石臼湖详后《江南诸湖篇》）又北流二十里，径红蓝埠，入山峡，流五里。（峡中有天生桥，上因山石为桥，中凿孔约二丈许，河流其间，明李新所凿，以通漕运。《江宁府志》）既出峡，受县城西南诸山溪。又东流三里许，环流为城濠水。又自城西北隅西北流十里，径曹村，入江宁县境。又二十里，径乌刹桥，与胭脂河合。

（胭脂河，引高淳县石臼湖水，西入县境与秦淮水会，明李新所凿，以通漕运。《江宁府志》）北、东二源水亦自湖熟镇分，一支西南流十五里来会。又北流二十里，径方山南受北东二源水。

（二源正流，自湖熟镇西稍南流五里。又折西北流五里，径方山下东北，会解溪水。又西流五里，至此合为一水。）三源既合为秦淮水，又北流二十里，径淳化镇关。又十五里，径上方门。又五里，径南京城通济门西流入城。其在城外者，为城濠水。西北流五里，径水西门。又十五里，径北河口入江。

（城濠水南流，折而西，径水西门。又西折北流，径聚宝门，与落马涧合一，名跃马涧。又西分支流，由赛工桥、三山桥西径北河口入江。）其自通济门入东水关者，西流五里，径淮青桥。又西南流二里许，径武定桥。又折而西北流五里，径斗门桥。

（运渎水至此合流。）又西北流出西水关，复与城濠水合。又西北流十里，径下关入江。

胥河

胥河为古中江故道。按古今地理家郡县志多言此江春秋时吴伍子胥所开，以通漕伐楚，盖高淳、溧阳二县界中高，本不通流，子胥凿之。于是芜湖西南之中江流径溧阳以东注。《前汉书·地理志》：芜湖下云，中江出西南，东至阳羡入海。夫起芜湖至阳羡，舍溧阳西南之一道，无路可由。则胥溪即汉志中江信矣。自明嘉靖时，于高淳东境增筑下坝，而芜湖西南之水，北入大江，不复涓滴东下，与子胥未凿以

前正同。然下坝以东一入溧阳境，则广川巨浸绵亘屈折百数十里，分出宜兴、荆溪二县，归太湖，注松江，以入于大海。此天然形势，必非子胥所开也。然则下坝以东之水，实松江之上流，亦即《禹贡》职方三江之一矣。《溧阳县志》亦曰：胥溪，源出高淳县东境下坝。

（明永乐时，筑上坝，然犹低薄水间泄漏，舟行犹能越之。后更于其东相距十里增筑下坝，迤西石臼、固城诸湖水绝不复通矣。）东流十里径邓步。又东北流十里入溧阳县境，名永阳江。十里汇升平荡。

（荡之南有梅渚，稍东为社渚，二水合而北流注之。）又二里许汇三塔荡。（高淳、溧水二县东境山溪水东南流注之。）又十五里径南渡荡。（一水自荡南周城来，一水自盘白山来，二水合而北流十五里，径婆陀庙，东注于南渡荡。

）过荡东二里许，北受前马荡水。（上沛步水自西来五里，上与步水自西北来十余里，二水合而东流十里，会于马前荡。）又东流二十里径县城西。（前马荡水又自东北口出东流十里。其北有竹簰桥水，东南流十五里，与后周镇水会合。而东南流十里，与马荡水合为中河。又东南流十里，至此入焉。

）溧阳漕河自北来，洮湖自小涪山口北来，而同会于县城西北隅。（溧阳漕河自金坛县城南西南流五里，径顾龙山，南受茅山东麓诸溪水。又二十里，径洮湖西岸。沿岸行五十里，湖水亦自小涪山口出。一水南流十里，又折西北流二里许。二水合流里许，至县城西北隅入于胥河。

）又东环流为城濠水，自县城南出，东南流，径下桥。（戴步镇水合东南境诸山溪水，屈曲北流二十里来注之。）又东流五里，径渡济桥，入宜兴县境，名荆溪。（旧荆溪县以此得名。

）又东稍北流十五里，径文定桥，杨巷河合徐舍河水自东北来会。（杨巷河自溧阳县北境分洮湖水东流十里入县境，受武进县南境张港水。张港水自洮湖东岸荫风河东流，径宜兴、武进二县交界处。又东流五里，又东南流十里，折而西南流四十里，径杨巷镇合于河水。又东南流二十里，径都山荡口。都山荡受溧湖水，西南流二十里，会都山珠九二荡水，并入杨巷河。又东南流五里，分而西南流为徐舍河，入于胥河。其正流自入西沅焉。

）南受山溪。（溧阳南境及县西南境诸山连亘数十里，溪流散漫，其大者西曰“莲溪”，东曰“霞溪”，合而东北流二十里。又分由文定港泚浏口入于西沅。张渚水又一支东北流，径斗门山北，沿西沈南岸行二十里，合于胥河。

）又东南流二十里，径县城西，环流至城东，宜荆漕河自北来会。（宜荆漕河见后

《江南运河篇》）又东流十里径东沈。（县北境漏湖水自西北口出马公荡，东南流二十里，合漕河水。又东南流十五里，径黄婆港，入于东沈。

）又十里分数支流入于太湖。

（一由东沈东北流十五里，会下裴、阳山诸荡水。又五里有奇，会周桥水。又里许径沙塘口。一东流里许径大浦口。一由东沈南分二水南流五里，又合流二里，径蜀山西麓，受川步湖汊诸水。又东南流五里，径莲花荡。又自莲花荡南流里许，折东流五里，径乌溪口，皆入太湖。）

吴淞江

吴淞江，一名松江，古中江下流也，为三江之一。（《禹贡》：三江既入，经有中江、北江之名，而不言南江。《水经注》谓南江受江水于贵口，则今安徽贵池地也。《汉志》谓分江水南至余姚入海。然自唐人筑捍海塘以御盐潮，南江不入浙境，而故道亦不可考矣。近世于大江之南，指娄江、吴淞江，以合三江之数。地形如故，水道变迁，非古三江之旧矣。

）源出太湖，自吴江县城东南之长桥合庞山湖水。复自瓜泾口分太湖水，东流逾运河十里，会九里湖水。又东北流入吴县境十五里，合锅底潭水。（潭水自县城濠水东南流，径黄天荡、独墅湖凡二十余里。又自独墅湖东南口出，径高店至潭口入江。

）又屈曲东北流二十里南出为澄湖。（江水自大姚汛东南流五里许，汇为澄湖。又详后《澄湖篇》）北受青溪浦水。（沙湖水南流十余里注之。）又十里入昆山县境。（有界浦，北通至和塘，长十里。

）又东流二十里，径三江口北，合新阳江水，入至和塘。（《方輿纪要》云：新洋江自城东四里运河分流，南接娄江。宋隆兴三年，开新洋江。乾道初，又复开浚。元泰定二年，都水监任仁发开松江，自黄浦口直至新洋江，江面阔十五丈。永乐初，复开浚。后渐湮塞，屡经修浚。毛节卿云：松江中绝庞山、淀湖诸水，每由新洋、夏驾而入娄江是也。今按新洋江即新阳江，娄江即至和塘。

）又南稍西流十里，径千墩浦。（淀山湖水西自基盘荡，东自渡城潭，合而北流二十里有奇来注之。）吴淞江又东北流十里，径篆葭镇与夏驾河会。（夏驾河北接新阳江，南接吴淞江，东至太仓县青鱼泾，为众水宣泄之要口。

）又南流十里，径石浦南岸，入青浦县境。又折而东稍北流五里，径赵屯港。（淀山湖水自县西南境东北流二十里，径县城西，合城濠水。又北稍西流二十五里，至

此入江。）又十五里，径四江口。

（淀山湖水又自城北合城濠水，分而北流十五里，径大盈浦。又东北流十余里，至此入江。）其北岸出一支为顾浦水。（顾浦水北流十五里许，折而东流五里过盐铁塘。又东流为练祁塘。详后《娄江篇》。

）又东稍南流二十里，径界泾入嘉定县境。（嘉定县境北岸，自四江口起至此两岸皆属焉。）顾会浦水自南来分流注之。（顾会浦水亦分淀山湖水，东径城濠东流十五里，分而北流十里，又分二支：一西北流二十里径四江口；一东北流十五里径界泾桥。又五里皆入江。

）又五里径盘龙港。（盘龙浦水自青浦县东境北流十里许入县境，又五里许，至此入江。）又五里有奇，南出一支流为嘉定、青浦、上海三县界河。（界河屈曲东南流二十余里，折而东稍北，流入黄浦江。

）其正流仍东稍北流五里许，径江桥。（自桥北出一水为南横沥。别详后《娄江篇》。）又二里许，为嘉定、宝山、上海三县分界处。又东稍南流十里，径新泾入上海县境。又东稍北流十里，径徐公铺。又折而南稍东流三里，径新闻，谓之苏州河。自闸东分一支流。

（自北泥城桥南流五里，径县城西。又西南流五里，径徐家汇，与前出支流合而入于黄浦。）其正流又东三里，径虹口合黄浦江水。（黄浦江以楚春申君黄歇凿得名，故又名春申浦，又名歇浦，又名申江。西北受泖淀诸水，南受浙西之水，汇而东流，历青浦、华亭、上海、南汇，宝山五县境，长二百余里，径吴淞口入海。

）东流十五里，又折北稍西流十五里，入宝山县境。西北流二十里，径吴淞口入海。（吴淞口见前《江水篇》）

娄江

娄江为今之浏河，亦古中江下流。源出太湖，自吴江县西北境之鲇鱼口北流，至吴县城西三十里之木渎口，由胥门外日晖桥入运河。东为娄门湖。东流二十里为至和塘。

（《苏州府志》：至和塘即运河也，旧名昆山塘。北纳阳城湖，南吐松江。风涛驰突，为舟楫田庐患。宋至和二年，县主簿邱与权修筑堤防，横绝巨浸，积土为塘，因以纪元为名。自是相继修浚。明万历中，甃石为堤。清雍正时修。自府城娄门而东北二十里起，经沙湖又东经唯亭及真仪浦，入昆山县境，二十里至县城绕城为濠，又贯城中。又东入太仓县境。

）北受阳城湖水。又二十里入昆山县境。（傀儡湖远受常熟县昆城湖水，近受阳城湖水分而南流注之。）又东流二十里，径城西南分南北流绕城至东门而合。（鳊鲤湖上承常熟县南境诸水，入县界南流十里合湖水。又十五里，径县城北。又分支东流十里许，径周市分而南流为汉浦塘。又东南流二十里，至太仓县交界处。皆入于江。

）又东流六里，合新阳江水。又东稍北流十里，南出一水会夏驾河。（新阳江、夏驾河皆见前《吴淞江篇》）又东北流十里入太仓县境。又五里径县城西南分南北流。南受盐铁塘水。

（盐铁塘水自嘉定县南界分吴淞江水，西北流三十里入县境。又十余里，至此入江。）北受七丫浦（一名七浦）支津三水，至城东南隅合流，曰刘河。又东稍北流十五里，径刘河镇。又南折稍东，再折而北东流约五里，径甘草汛闸，为老刘河。又东稍南流十里，径新刘河口入海。

娄江支津在刘河迤北者，最北曰“琅玕口”（太仓县境。）其水自常熟县境白茆浦东南流二十里，径归家庄，入太仓县境。折而东流五里，径穿山

（璜泾水自东北境六河屈曲南流二十里来注之。）又二十里，至此入海。次曰“七浦”，即丫口，其水亦自常熟县境来。（《苏州府志》：“七鸦浦自常熟县界来，北通白茆港，南通阳城诸湖，东南出石桥圩，又东经太仓之直塘、沙头入海。谓之七丫口”。

）入太仓县境，东流十里，曰“直塘”。（分一水东南流三十里，至城北合城濠水。）又东稍北流十五里，径杜松镇。（琅玕口上流水分而南来注之。）又东稍南流二十五里，径闸口，分二水东流各五里许，北曰“六浜口”，南曰“七丫口”，皆入海。又次曰“杨林口”。其水自县西北境直塘支津东来，稍北流十五里，径杨林塘。又东北流十里有奇，分二水：一东流十里，曰“茜泾口”；一东稍南流十里，曰“杨林口”，皆入海。杨林口之上分一水南流，径茜泾城。又南流十里入老刘河。在刘河迤南者，为嘉定、宝山二县境。其水纵横交错。横浦曰“盐铁塘”，曰“南横沥”（皆在嘉定县境

），皆分吴淞江水。（盐铁塘自嘉定县南境分吴淞江水，北稍东流八九里，又稍西流十里，过练祁塘。又西北流五里许，入太仓县境。又屈曲流十五里，径县城南，合至和塘为城濠水。南横沥水自上海县西北境分吴淞江水，西北流十五里，径南翔镇。又二十五里，径县城，合城濠水。又自城北分练祁塘水，西北流十里，为北横沥，至娄塘桥而止。

）曰“新泾”。南分练祁塘水，北入老刘河。（北横沥之东为新泾。自嘉定县城东

分练祁塘水，北流二十里，至太仓县境入老刘河口。）曰“界泾”。南分吴淞江水，北入老刘河。（界泾为嘉定、宝山二县分界处。自南翔镇东五里分一水，北流五里许，径东马陆塘。又十五里，径练祁塘。又二十里，入老刘河口。

）纵浦最南曰“蕴藻滨”，上流自嘉定县南境，分吴淞江水东折而北。又东流十里有奇，过南横沥。又北一水为界泾，入宝山县境，径陈家行东流为蕴藻滨。又十里径大场汛。（南出一水，南稍东流十里，径大场镇。又东流十五里，径江湾。又折而南稍西，复东迤南流二十里，径虹口入黄浦江。

）又二十里，泾胡泾口入海。次曰“练祁塘”。自嘉定县西境分顾浦水，东北流七里，过盐铁塘。又十五里，径县城，北合城濠水。又径城东（分一水北流为新泾。见上。）东流十五里，过界泾，入宝山县境，径罗店南又东稍北流十五里，径石洞口入海。

淮水

淮水自安徽泗县、盱眙两县界流入洪泽湖。湖中有老子山。山之北直贯湖心者，为泗阳县境，东为淮阴县境，东南为淮安县境。淮水经过湖中，则自淮阴县西南境张福河东北流十里，径顺河集。其东北有高堰石堤，以障湖水。又三十里，径马头镇，与中运河会。稍东南流，过天妃闸，会里运河。又东北流二十里，径青江浦城

（即淮阴县城）北。又径城东南流历淮安、宝应、高邮，至江都县东北境壁虎桥，凡长二百二十里，皆与里运河合流。又南稍西流四十里，径县西南境瓜洲口入江。一自三河口东南流三十里，径淮安县南境白马湖。又三十里，径宝应县西境，汇为宝应湖。湖水盛涨时，则与运河通流。又四十里，径高邮县城西高邮湖东南尾卢家闸口。亦入运河。又南流三十五里，径江都县北境邵伯湖东南尾通湖、昭关两坝口，与运河合流。而南又三十里，径壁虎桥，同自瓜洲口入江。淮水归江，自瓜洲口外。其由里运河分泄而出者，尚有十坝，即：沙河、老坝、壁虎、新河、凤凰、东湾、西湾、金湾、拦江、土山是。沙河坝、老坝久经堵塞，土山坝亦不轻启，西湾坝则终年不闭，以为运河航道直达三江营之捷径。其他各坝，每年夏季视淮水来势缓急酌量启放。次序先东湾，次新河，次金湾，次凤凰，次拦江，次壁虎，次土山。迨各坝尽启，水势仍涨，乃开归海五坝，即：昭关、车逻、中坝、新坝、南关是。中坝已废，昭关坝亦久堵不启。余三坝启放次序，则先车逻，次南关，次新坝。而下游归海之路，则为五港，即：射阳、新洋、斗龙、王家、竹港是也。五港中以新洋港泄水最多。至冬令水小，一律堵闭。其自壁虎桥分运河水东流者，径彭家湾市入泰县西境为淮东盐河。

（别详《盐河篇》）东南流三百五十里，径南通县东境吕四场镇，又三十里而达于海。淮水旧时又与黄河交流入海。河流既徙，淮亦失其故道。岁遇秋汛盛涨，则亦

有归海二路：一自天妃闸西北、马头镇东北流五里，径杨庄镇。又东沿黄河旧槽，东北流二百八十里，径阜陵县东北境老黄河口入海。

（老黄河详后《淤黄河篇》）

淤黄河

黄河故道，自河南虞城县界入砀山县境，河之两岸皆有堤，河身悉为平陆。自此迤东南二十五里，径县城西北十里，又东五十五里，径丰、萧、铜山三县交界处。

（黄河故道在砀山境内长约八十里。河堤南北相距，狭处五、七里，宽处二三十里不等。）又东南八十里，北界铜山，南界萧县，永安山峙其南，稍东为韩山，北为九里山，河流其间，至此一束，广不及五里。又十里径铜山县城北，东有子房山、骆驼山，西有云龙山。其东南则三山在焉。过此河身复宽。又二十里，北岸环胜云山南陇而下，长二十五里，无堤。又十五里，入睢宁县境。又东十里，北岸环仙掌山南陇而下，长二十里，无堤。又东十里，入邳县境。又东南十五里，复入睢宁县境。又东南北岸十五里，南岸三十里，入宿迁县境。

（黄河故道在睢宁境内，西自铜山县界双沟起，迤东曲折行八十里，径封家楼，过武村，入宿迁境，两岸堤埂犹存。）黄河故道，自县境西北张堰迤东十里，径皂河，北岸与运河平行。而东三十里，径县城西。又南而东四十里，北岸有古城山，南岸稍西为洋河镇，皆入泗阳县境。又四十里，径县城北五里，北岸为众兴镇。又三十里，径二铺入淮阴县境，河身狭处仅里许。又东南三十里，径杨庄镇，自宿迁县城东至此，北岸皆与运河平行。又东北十里，径县城北王营。北岸与盐河平行。又东二十里，径淮安、涟水二县交界处。又东北三十里，径涟水县城南。其南岸仍为淮安县界。又折而东南三十里，南岸为淮安、阜宁二县交界处。又折而东北五十里，径古云梯关，黄河汇淮入海处，北岸始入阜宁县境。河身至此复宽广者十里。又七十里，径大王庙为老黄河，中有深漕通海水。沿河心东北流三十里，径老黄河口入大海。两岸河堤，皆达海隅而止。

沂水

沂水自山东郯城县界流入邳县东北境，南流六十里，径姚湾、竹络坝合于运河。其西支为武河，亦自郯城流入县境南。迤西流四十里，径县城南。又西南流二十里，径沙家口。其支津北径二道沟，南径瞿塘口，皆合于运河。东南流四十里，径姚湾，与竹络坝水合流入宿迁县境。又东南流三十里，汇骆马湖。

（骆马湖面积颇巨，今已淤成平陆，惟沂水盛涨时泄入焉。其东北之沭水盛涨时，亦注入之。谚云：“沂沭不见面，见面一大片”，盖指此湖也。今自九龙庙下通骆

马湖，仅具沟形数里而已。五花桥昔通运河，有大桥，长里许，今圯不见遗迹。但有小河与运河通，水小即涸。

）自湖之东岸五花桥出为六塘河（自此以下，沂水即名“六塘河”）。东南流三十里，径白马涧（白马涧在县城北十五里，仅具河形，湖水盛涨通流）。又五十里，径刘老涧，复由运河分沂水来注之。又东南流二里许，入泗阳县境。又二十里有奇，径史家集北。又东北流五十里，分二支：为南六塘河、北六塘河。

（河水自未分支以上至刘老闸，曰“总六塘河”）南六塘河入淮阴县境，折而西南流十里，包家河自南来注之。（包家河自泗阳县东北境竹络坝起，东北流十余里，入淮阴县境，受杨堤蒋集一带潦水，会泗淮界河。又东北流二十里，径七孔桥东，复入泗阳境。数里径泗淮桥，再入淮阴境，注六塘河。

）又折而东流三里许，又东北流十里入涟水县境。二里许径古寨。又十五里径麻垛。又十五里径丁家口闸，与北支并分流入沭阳县境。北六塘河自泗阳县界入沭阳境，径钱家集南，东北流二十里，亦入涟水境，径周沈二集。又十五里，再入沭阳境，与南支并径硕项湖底。

（《方輿纪要》：在安东县，今涟水县西北百二十里，湖东西四十里，南北八十里，与海州今东海县、沭阳、赣榆接壤。亦曰大湖，又谓之石护湖，一名硕护湖。西接桑墟湖，为涟水之上源。按此湖久淤为平陆，仅存其名。六塘河南北二支，仍各分流。

）北六塘河又东北流二十里，径汤家沟，砂礪河会流水自西南来注之。砂礪河为沂水支流，自宿迁县骆马河东凌沟口东北流四十里，径鲍家河头入泗阳县境。又东流二十里，径庄圩，大小崇河自西北来注之。又东北流二十里，又折而东流五里，合流河支津。又六十里，径汤家沟入北六塘河。又东流二里许，入灌云县境。又二十里逾盐河

（淮北盐河），东流为义泽河。又三十里，径莞渎北镇南六塘河，又径高沟东北流十里，再入涟水境。又十里入灌云县境。又二十里逾盐河，东流为武障河。又三十里，亦径莞渎北镇。二河至此复合，而东北流十五里，又折而东南流十里，径响水口东北流为北潮河。又百里径灌河口入海。

流水

流水自山东都城县红花埠流入宿迁县境，曰大沙河。南流三十里，径唐店，东有唐山，又东有塔山间溪流皆自北来注之。又南流二十里，又折而东流四十里。西及南岸皆界宿迁，东及北岸皆界沭阳，自此入沭阳县境。又屈曲东北流二十里，北出一

支东北流为分水沙河。

（分水沙河东北流二十里，径贤官亭圩，又东北二十里，径大河湾，入青伊湖。）又东稍南十五里分二支：曰“前沭河”、“后沭河”。前沭河东流五里，径县城南，又南流十五里，合砂礪河水。

（砂礪河见上篇）又折而东稍北流十里，北出为官田河、港河。（港河在官田河东十余里，分砂礪、前沭二河合流之水北流。官田河亦分二河水东北流十五里，与港河合，而北流二十里入青伊湖。如遇山洪暴发之年，沂强沭弱，沂水有由官田河、港河倒灌入沭之势。

）前沭河又合柴米河。（柴米河自县东北韩山镇引一水东南流十余里来注之。）东北流十五里，入灌云县境，分二支：一东南流径汤家沟，会北六塘河；一东北流三十里，径小伊山，南逾盐河，东流为车轴河。又三十里径洑子口入海。后沭河自县城西八里许东北流二十里，径安峰镇。又十五里，径华冲汇青伊湖。

（《海州志》：青伊湖在州治西南九十里，其源自马领山西而来，沭河自桑墟湖流注。此湖夏日山水暴涨，为西南诸乡之害。又旧志有桑墟湖，无青伊湖，盖由桑墟浸灌而成，势更大于桑墟。且桑墟在沭阳境，故别系之沭阳也。今按沭阳之桑墟湖，地名仅存，即青伊，界海、沭二县境。其面积亦不过五十方里，且芦苇丛生，亦已失屯积流水之功用矣。

）自湖之东口入东海县境为蔷薇河。东北流三十里，径演武厅，曲防河自西来注之。（曲防河受狼耳荡水东流二十里，至此入焉。）东出三水：曰“高墟河”，曰“王官河”，曰“下坊河”。各东流十里有奇，合而东北流三十里，径孔望山。东曰“卓王河”，入灌云县境，逾盐河，径县治东东流为烧香河。

（沭水由蔷薇河分，经卓王河、烧香河入海，一路形势尚顺。惜烧香河上游淤垫不堪，倘加疏浚，亦分泄沭水之一途也。）又三十里，径高公口入海。蔷薇河又北流五十里，径县城西门镇。

（其西南有白水荡，北又东流十里，径王沟河，至此入焉。）又北折东流二里许，径海河口。（海河自赣榆东北境分大沙河，东南流二十五里，至此入焉。）又东流五里，径新浦口

（即临洪口。）入海。

淮北运河

淮北运河在山东境亦曰南运河。自滕县南界王口入沛县境，东南流三十里，径夏镇，受微山湖水。沿湖东岸又东南三十里，径山东峰县界韩庄。（沛县运河，自夏镇以上凡置闸七：曰留城、马家桥、西柳庄、满家桥、夏镇、杨庄、珠梅，以时启闭。

）又自峰县东南探儿庄入邳县境，径黄林庄东南流十里，过王母山东，其东为胜阳山，两山对峙，河流其间。又东南十里，径洳口，洳河自北来注之。（洳河自山东兰山县南境见义桥南流入县境，二十里径岔河汛。又二十里至此入运河。

）又二十五里，径徐塘口，徐州河自西来注之。（徐州河自铜山县北境新渡口受微山湖水，西南流十五里，径内河渡，折而东南流二十五里，入荆山湖。自湖东流出为徐州河，一曰引河。东北流二十五里，径泉河集。又东流三十里，径卞塘入县境。又二十里，径宿羊山北。又东南流二十里，至此入运河。

）又东流十里，径三岔河。陇海铁路经此，有支路通铜山县。又东南流十里，径猫儿窝。（自猫儿窝以上置闸六：曰河清、河定、河成、汇泽、马庄、万庄，与沛县诸闸相衔接。）又三十里，径姚湾镇

（镇为县东境与宿迁县交界），西竹络坝沂河自北来注之。（沂河自山东郯城县界入县境，南流七十五里，至此入运河。别详《沂河篇》）又东南入宿迁县境，三十里径皂河，骆马湖水入焉。

（湖在运河北，久淤垫，沂水盛涨则注之。平时仅为一小水。）又沿湖南而东流五里，又南流五里，径县城北；折而东南流四十里，径仰化集。北出为刘老涧，泄水入六塘河。（六塘河别详《沂水篇》

）又东南入泗阳县境四十里，径城北五里众兴镇，其南岸有徐升坝，越河潦水入焉。又四十里径头铺，入淮阴县境。又十五里，径双金闸，自闸东分流为县境盐河。（别详《盐河篇》

）又东稍北流十五里，径杨庄镇，北岸有草坝，以泄盛涨入于盐河。自是折而西南流十里，径马头镇，淮水自西南来会。（淮水见前篇）运河自皂河以上合于山东之南运河，皂河以下至此谓之中运河，亦曰中河。

淮南运河

运河既与淮水会，稍东南流过天妃闸，运河堤自此始。（中运河本由黄河缕堤外运料小河联络而成，其北岸大堤即黄河遥堤。后因黄水滥入，复于缕堤之上增筑夹堤。故中运河两岸堤埂，即故黄河原有之堤埂也。

）又东北流二十里，径清江浦城北（即淮阴县城）。又东南流五里，径淮安县城。又十里径板闸，淮安闸在焉。又十五里径县城西，有水关引水入城，为文渠，为市河。又四十里径平桥，其西岸为温山河渡，泄水入白马湖。又二十里径黄浦镇，入宝应县境。又二十里径县西，自此上溯至淮安县城。沿东堤凡十八洞，水皆东流，分泄入大纵湖。

（在淮安境者，有头浅石洞六座，二浅石洞二座，三浅石洞五座；又有泾河闸石耳洞一座，泾河正闸石洞一座。在宝应者，有黄浦闸石洞一座。余二洞俟考。）又二十里，径宝应湖东岸，湖水注之。（宝应湖水一自湖之东北境东北流十里，径龙亭闸；又一东北流十里，径南窑闸；又一东流十五里，径郎儿闸。皆入运河。

）又二十里径界首，入高邮县境。自此河流稍西，沿湖滨南流三十里，径马蓬湾，西受高邮湖水，东出为清水潭。又二十里环县城而南，湖水注之。（高邮湖之北为界首湖，南为七里湖，实一湖也。自湖之东南尾稍东南流，折而北，径卢家闸。又自二马桥港分而南流，径八里松。皆入运河。

）又东南流十里，历车、南、新三坝，泄水入于下河。车逻、南关、新坝，谓之三坝，泄运河水汇为绿洋湖，而分支流于下河。三坝俱见上《淮水篇》。又二十里，径露筋祠，入江都县境。又南流三十里，径大闸镇，邵伯湖注之。

（邵伯湖自东南尾通湖、昭关二坝流入运河。）又十里径邵伯镇，河流之沿湖堤者，至是而尽。又十里径六闸，运河西堤至此止。东堤自六闸以下四闸河水，皆由盐河分泄入江。（盐河别详。一水自六闸河东南流十五里，至仙女庙镇，一水自东湾河东南流十五里，皆径盐河合为吕四河，东南流二十里，径三笔荡。一水自石洋泾沟东南流，一水亦东南流，皆五里许，径盐河合而南流二十五里，径新马头。又东北流五里，至三笔荡合流，径三江营入夹江。

）又十五里，径湾头镇壁虎桥，运河东堤至此止（堤长二百五十里）。折而西流十里，又折南流五里，径扬州城东（即江都县城），扬由关在焉。又径南城，屈曲南流二十里，径新河湾分三支：一支东南流二十里，径连城洲入江；一支南流十里径杨子桥，又十里径瓜洲口，为运河正流；一支西南流四十里，径仪征县城东南，折而南流五里，径泗源沟，为仪征运河。俱逾江达于江南运河。自淮阴天妃闸以下至瓜洲口，谓之里运河，亦曰里河。

江南运河

运河自镇江西北境京口（一名运河口）引江水南流，径城西，又东折，径城南。一自北固山下新河口引江水南流，径城内，过通埠桥，与城南河水合而东流十五里，径丹徒镇丹徒口，复引江水东南流十五里，径辛丰镇，稍西南流五里入丹阳县境

，谓之徒阳运河。

（徒阳运河流经京岷山迤南大夹冈，入丹阳境，曰小夹冈，地势崎岖，专恃江潮以资挹注。而潮水来急退缓，最易沙淤。）又南流五六里，径张官渡沿练湖（练湖别详）东岸流二十里，径县城，环城流十里。（运河水自草堰南门分而西南流二十五里，径延陵镇南闸口，入丹阳、金坛两县界河。东流十里，径荆溪河。又南稍东流二十五里，贯金坛县城中。西南流五里，径九里桥。又南流十五里，径方洛港入洮湖。一自北门郭外郑家桥东流三十里，径访仙桥。又东北流二十五里，径包港入江。

）自大东门东南流五里许，自七里桥会金坛漕河。（河水自七里桥分流入金坛漕河，一名珥渎河。南流三十里有奇，径丹阳、金坛两县交界荆城港。又十五里，贯金坛县城中。西南流五里，径九里桥。又五里贯白龙荡，会溧阳漕河。又南流五里许，径新河港。又五里，径抱村港。又五里，径白石渎港。又五里，径后渎港。皆东流数里以次入于洮湖。又三十里，径溧阳县城。

）又三十里，径九里铺，入武进县境。又十里，径奔牛镇，北出为孟河入江。（见上《江水篇》）又五里，南出为直渎，入溧湖（直渎，一名扁担河，南流二十五里，径垂虹港入于溧湖

）又五里，径连江桥，北出为得胜河，入江。（见上《江水篇》）又五里，南出为官渎。又十里，径县城西会宜荆漕河。（河水自城西隅毗陵驿西普济桥合官渎水，会宜荆漕河，西南流十里入溧湖。宜荆漕河自沿溧湖东岸南流四十里，径洧涑口，入宜兴县境。又西南流三十五里，径宜兴县城。自城东隅东流五里贯东洧，而入于太湖。

）城北分流会澡港河，东北流三十五里，径桃花港入江。（见上《江水篇》）又贯县城中东南流五里，径戚方桥。（河水自此西南流四十里贯小娘荡分而二：一为南商河；一入宜兴县境。各东南流二十里至许墓桥，合流五里，径百渎口入太湖。

）又五里，径丁堰镇。（河水自此分东北流二十里，径郑六桥。又北流二十里，径江阴县境芦埭口入江。）又十里许，径戚墅镇，北出万安桥分流入江，南出宋建荡入太湖。（河水自镇北万安桥北分东北流五十里，径江阴县城南，环而西流。又西稍北流里许，径黄田港入江。一水自镇南兴隆桥南分流会宋建荡。又南流三十里，径凤凰山东。又二十里，径下埠港口入太湖。

）又十里，径无锡县交界之界桥。（河水自此分西南流二十里，径察亭桥南。又东南流二十里，径无锡县境洧江口入太湖。）又三十五里，径高桥，会江阴漕河。（河水自桥东分流会江阴漕河。又北五十五里，径江阴城南。折而东流五十里，径谷

渎港入江。

）又五里，径县城北贯城中流五里。（河水自城西郭外迎春桥分南流五里，径梁清溪口。又五里，径南桥镇入太湖之五里湖。）又五里，径城南界泾桥。（桥为旧无锡、金匱二县分界，今入无锡境。

）东出汇于漕湖。（河水自桥东百渎港分东流四十里，入鹅真荡，汇于吴县北境漕湖。）又二十五里，径北望亭北，入吴县境，太湖水分自西来注之。（太湖水分自东北沙墩港东稍南流五里，径吴县境通明桥入运河。

）东出为常昭漕河。（常昭漕河自北望亭东南杨家桥分运河水分东流二十里入漕湖。又自湖之东北口东北流四十里，径常熟县城南而东五里，自宾阳门外东北流三十五里，径许浦口入江。

）又三十里，径枫桥。（分一水分南流十里，径石湖口南入太湖。）又折东流五里，径苏州城西阊门。（即吴县城。河水自此分流入城，贯城东，东流五里，径娄门外永宁桥。又十里，径外跨塘镇之五泾桥。东南流十里，分而二：一径塘浦村口，一径西港。皆流入吴淞江。河水又自外跨塘镇东稍北流四十里，径昆山县城。又一水分自娄门外白渡桥东里许东北流五里，入阳城西湖。

）沿城西隅南流五里，径盘门。（河水自此南流五里，径吴县、吴江二县交界鲇鱼口入太湖。）又沿城南隅东流五里，径蜜渡桥。（河水自桥南之灯草桥分东流二里许，贯黄天荡入独墅湖。一自桥南五里蓑衣浜东南流五里，入尹山湖。

）又南流十五里，径瓜泾桥。东出为吴淞江，西出即吴江县境太湖之七里港。南流二里许，分而稍东入庞山湖。又五里，径吴江县城东。自此以下，太湖水分道入焉。（湖水一自七里港南流五里，径牛腰泾港；一自十字港东流五里来会合而东流，径大兴桥入运河。

）又十五里，径大浦桥（湖水又自大兴桥西环城南流里许，径草路港。西南流五里，大村港水分自西南来会。又五里，南库港水分自西南来会，合而东流为陆家港。又自草路港东南流十里，与陆家港水会。又南流五里许，径大浦港。又东流二里许，径桥东入运河。

）又十里，径下湾里。（湖水自练聚桥、韭溪两港合而东南流五里许，入唐家湖。自湖口东流，径裊腰桥入运河。）又五里有奇，径平望镇，分二支：一东南流三十里，径王江泾入浙江秀水县界；一会莺脰湖水西南流五十三里，径横泾塘，入浙江长兴县界。

（《苏州府志》曰：吴江运河在城东，自嘉兴府王江泾而北三十三里至县境之平望镇者，曰“南塘河”，亦曰“上塘河”；自湖州府南浔镇而东凡五十三里至平望，经莺脰湖与南塘河合者，曰“荻塘河”。二河既合，曰“官塘河”。西北行四十里至城东。又西北曰“北塘河”，亦曰“古塘河”。）

淮北盐河

盐河以运盐，亦谓之运盐河。淮北盐河起淮阴县城西二十里双金闸，稍东为盐河闸，皆分运河水以为之源。合而东北流三十里，径西坝。沿旧黄河堤北岸，又东流二十里，径朱家集东，入涟水县境，谓之中河。又东北流四十里，径县城北分一水东稍南流十五里，为民便河。又东北流三十里为一帆河。又屈曲北稍东流七十里，径响水口。又东北流四十里入东海县境。又东北入阜宁县境，为北潮河。又三十里，径灌河口入海。又五十里，径老堤头。

（盐河旧堤止此。）又北稍西流，谓之平旺河，十五里入灌云县境。又十里，径刘家埝盐卡，西受南六塘河水，东出为义泽河。（南北六塘河别详《沂水篇》。武障、义泽二河夹龙沟镇而东流十里，又合而东稍北流五里，北会六里河。又折面南流十里，径响水口会一帆河，而达于北潮河。

）又北流二十里，径滚水坝。又五里，径大伊镇盐卡。又十里，径小柴市。河水自滚水坝至此，凡东出数小河会为一水，东径洄子口入海。（最北曰牛墩河，次白蚬河，次东门河，南曰六里河，各东流十五里，会为五图河。又东稍北流七十里，径洄子口入海。

）又十里，径龙王荡，东出为车轴河。（车轴河东流二十里，会龙窝荡水。又东流五十余里入海。）又东北流十里，径灌云县西（旧为板浦镇），青伊湖水自西南来会。河水自此分二支：一径县西南而东流五十里，径东橄榄河口；一径县西而北流三十里，径东海县境新浦口。皆入于海。

淮东盐河

淮南自清江浦以下无盐河，其运盐皆道出运河，故自双金闸以东南历淮阴、淮安、宝应、高邮，迄江都县境湾头镇，凡淮南运河即盐河也。河水自镇分而东流，故曰“淮东盐河”，一曰“里下河”。十里径仙女庙镇，邵伯湖水入焉。

（湖水自湖之东尾通湖坝、昭关坝入运河，南流十余里，径六闸口出运河。又东南流十五里，径仙女庙镇西三闸口入江。）又东稍北流二十五里，径白塔河镇。（河水自此分而南流三十里，径中闸口入三江营夹江。

）又东稍南流十五里，径彭家湾市，入泰县境。东流二十里，径县城南。（河水自城南宝带桥分而南流十五里，径大北庄。又蜿蜒二十五里，径泰兴县境庙港入江。一自大北庄分而东南流十里，径大兴庄。又南流二十里，径曹何庄分而西南流，蜿蜒十里，径凌家港入江。又自曹何庄南分而南流二十里，为李薛河，环泰兴县城，过船、洋槐、王家、八圩四港，以次入江。

）北出径城东为东台盐河。（河水北出径泰坝东北流二十里，径淤溪。又二十里，径溱潼镇，入东台县境。又二十里，径时堰。又二十里，径县城西，合于串场河。西岸有泰堤。）又东南流二十里，径大冯庄。又东北流二十五里，径姜堰镇。又东流五十里有奇，径海安镇入如皋县境，阜宁、盐城、兴化、东台四县之串场河水，悉入于此。

（阜宁县境串场河，自县城南德丰桥分而东南流，沿范公堤而下三十里有奇，径盐城县境交界永济桥，至此为盐城县串场河。又十五里，径新兴场镇，河水分而东北流六十里，径征洋港，复入射阳河，径射阳河口入海。自新兴场镇又三十里，径盐城县城西北孙庄，河水分而入天妃闸。东北流径新洋港口入海。自孙庄又环城西南隅而东南流十五里，径伍佑场镇，河水自镇东分而大蓬港东流三十里，径大蓬港东尾，自斗龙港口入海。自伍佑场镇又十里有奇，径兴化县交界大团镇。至此为兴化串场河。河自大团闸口分而东北流二十五里为大团河。又北流蜿蜒十余里入大蓬港东尾。自大团镇又南流二十里，径刘庄镇。河水自青龙闸口分为支流二：一东北流三十里，径八灶河；一东流二十余里，径七灶河。自刘庄镇又十里有奇，径白驹场镇。河水自五孔闸分而东北流三十里，径东洋河。自白驹场又二十五里，径草堰市。河水自北闸口分而东北流四十里，径小燕港与东洋河会。又北流里许，与七灶河会。又蜿蜒十五里有奇，与八灶河会。又五里许，与大团河会。又蜿蜒十里，以次皆达于大蓬港东尾，径斗龙港口入海。自草堰市又五里，径丁溪镇北东台县境交界处。至此为东台串场河。河水自东闸口分东北流七十里，径潮水坝。又蜿蜒流径小洞港口入海。以上各河归海之道，皆详前《大海篇》。自丁溪镇北又十里有奇，径东台县城西里许海道闸，又东南流四十里，径富安镇。又南稍西流十五里，又东南流二十里，至此悉入盐河。

）又东南流三十里，径县城南。河水自县城南过塔桥，南流三十五里，径土墩港，分二支：一南稍西流十里有奇，径桑木桥，又分二小支：一自石庄镇西南流十五里，径永乐桥。又南稍东流五里许，径靖江县交界张黄港，即龙游河也。

（见前《大江篇》）一自桑木桥南稍东流十里，径新盛港。又南流五里许，径周圩港。皆入江。其一自土墩港东南流十里，径大十圩。又南流十里，径新盛港入江。又自大十圩东南流十五里，又西南流十五里，径碾砣港入江。环城北而东流二十里，径东陈镇。又东南流十五里，径丁堰镇。自此迤东有盐场串场河。

（河水自镇分而东流三十五里，径岔河镇。又分而东北流十五里，径丰利坝。又十五里，径丰利场镇。又自岔河镇东稍南流十五里，径马塘镇，丰利场镇水分一支南流来会。又东流二十五里，径掘港镇，丰利场镇水又东南流三十里径遍岔河屈曲南流来会。皆盐场之串场河也。

）又南流二十里有奇，径白蒲镇入南通县境。又二十里，径四十里镇。（河水自此分而西南流三十里有奇，径如皋县交界丝鱼港入江。）又十里，径平潮镇。（河水分而西南流十五里有奇，径小李港，又自镇南二里许分而西南流十余里，径九圩港皆入江。

）又东南流十里，径唐闸。（河水自此分而西南流十五里，径天生港入江。）又十里有奇，径县城西里许盐仓闸。（河水自闸分流为二：一西南流十五里，径任家港；一南稍西流十五里许，径姚港，皆入江。又自闸分环城至东南隅东南流二里许，径灰墩坝。又南流十里，径狼山北，西南流过狼山黄泥山山岬，五里有奇，径狼山港入江。

）环城西北而东稍南流二十里，径正场镇。（石港场串场河水，自西分一支西南流十里，径陈酒店东。又南流二十里，又东南流十五里，至此合流。）又东北流二十里，径金沙镇。自此以往，皆为县境盐场串场河。

（镇之上游西北三十里为石港场。镇河水自如皋马塘镇分而南流十里，径孙家窑。又西流十里至石港镇。自此东南流三十里至金沙镇。又自镇之聚金桥东南流十五里，径余西场镇。又东流三十五里，径余东场镇。又四十里，径吕四场镇。又南流十里，径海门县交界之界河。又东南流二十里入海。

）县境盐场地皆滨海，而盐河则在范公堤内，至堤尽入海门县东境始迤迳入海云。

（吕四场镇西二十里六甲坝，镇河水自唐兴闸北流里许，径庆丰闸，有狭港长里许，北达海岸，在南通县境，河水通海，仅此一线而已。）淮北诸湖微山湖，为汶、泗二水之尾间，北跨山东滕县界，东跨山东滕、峄二县界。北泓长四十五里。其北二十五里间全属沛县地，其南自沛城东三十里之滕、峄界至微山，

（微山以下诸山皆见前《淮北诸山篇》）二十里间东属峄，西属沛。南泓亦长四十五里。自微山至马山而西南尽湖尾，为铜山县境。其东北境仍跨峄。湖水东南流而达湖尾。湖身在沛县境者，宽处仅五里，入铜山境后渐广；其东南最宽处二十五里。湖中有数小山，东南岸临铜山，南岸趾与梁山接。湖水南尾自梁山北五里由新渡口西南流十五里，又东南流二十里入荆山湖。因北岸荆山得名。方不及一里，乃微山湖水所潴之小泽，徐州河水所自出也。

（徐州河见前《淮北运河篇》）荆山湖南有小泽二：曰“金陈湖”，曰“花山湖”。（荆山湖南稍西二十里为金陈湖，东南六十里为花山湖，皆方不及一里。一在淤黄河北岸，一在南岸，仅小水一泓耳。

）萧县境有小泽三：曰“岱山湖”，曰“青庄湖”，其东泓名老汪湖曰“孤山湖”。（微山湖西南六十里为岱山湖，狭长五里有奇，以南有岱山名，在县城西北五里。又城东南九十里为青庄湖，长十里有奇，广不及五里，东泓尾跨安徽灵璧县界。其北三十里为孤山湖，以北有孤山名，方不及一里。

）其东一百二十里曰“骆马湖”，属宿迁县境，在城西北五里有奇，湖身旧长五十里，广者二十里。久淤垫，大半为平陆，蒙沂诸山水发，则全湖灌注焉。（骆马湖东十余里，又有傅家湖，本骆马湖支流，方不及一里。

）又东北一百二十里曰“青伊湖”，跨东海、沭阳二县境，湖身纵横十余里。湖东五里为史家荡，长过之，广不及半，即项湖故址也。二水各东北流十余里，合流为蔷薇河。

（见上《沭河篇》）

淮南诸湖洪泽湖，为淮水所潴之大泽，西及西南跨安徽泗县界，南跨安徽盱眙县界，西北及北跨泗阳县界，东北连淮阴，东南连淮安，其东为高堰石堤，并跨二县界也。湖长一百二十里。湖水自淮口东北流，三十里径龟山，西北灌溧河洼，北灌安河洼。

（二洼皆安徽泗县地。）又东北流三十里径老子山，东北灌成子河洼。（成子河洼属泗阳县境，自老子山东北流六十里，径曹嘴折而北流四十里，径小街，即成子河口。）又自老子山入淮阴县境，东稍北流七十里径

顺河集（顺河集属淮阴县境，高堰石堤至此而止。）为湖之尽处。湖水北注三洼如钗股形，其汇流处有深槽，西起仁和集（盱眙地），东竟顺河集，广七八十里。湖东石堤西南起蒋坝

（盱眙地），东北竟高堰（淮安地），亘七十里，所以障湖水不使泛滥也。至下流

宣泄之路，一自张福河东北流四十五里，径马头镇入运河。（张福河为七引河之一，本以宣泄淮水盛涨。自黄河北徙，淮不入海，乃资以济运。自顺河集引湖水北流四十五里，径马头镇，分一水北稍西流十余里，径杨庄与中运河会。其正流则下天妃闸，合于里运河。又详前《淮南运河篇》

）；一自三河口，（湖之东南岸本有仁、义、礼三坝，后添智、信二坝，统名五坝，皆以宣泄湖水盛涨。清嘉庆时，移仁、义、礼三坝于蒋家坝南，并挑引河三道，是名三河。初时河道甚狭，起闭有时。近已宽至数里，成一河矣，仍旧名三河口耳。

）东南流五十余里入宝应湖，又入高邮湖，与二湖水合流入运河。距湖东北角五里曰“卜家湖”，属泗阳县境，在县城西南隅，长十五里有奇，广者五里，（湖水东南汇吴家洼水，北汇锅底湖及大越堤水，西南流径成子河口入湖。然大半已淤为平陆，遇大汛时，则泛滥为灾。

）乃洪泽湖之支流也。湖之西南趾老子山，为江苏、安徽二省分界处。

大纵湖，为运河东泄之淮水汇为大泽，（湖水受自淮安至宝应之运河，自头洞至李家洞，凡洞十八，以次东流，由各口入湖。详前《淮南运河篇》

）北东及东之南，属盐城县境，在县城西四十里。北端入阜宁县境，南尾入兴化县境，其西及西之南，属宝应县境，在县城东二十里。西之北角入淮安县境。湖身长七十里，北泓宽二十余里。湖水南流二十里，其西突出十五里为淮安县境，又横流而西十五里为六草荡。

（六草荡在淮安县境东南五十里，泾河平桥，皆分运河水，东流三十里注入之。）中泓宽五十里。湖水又南流四十里。南泓宽二十五里，湖水又南流十余里而达湖岸。其东亦突出二十五里为兴化县境。湖中平陆处多居民，率属宝应县境。其下流宣泄之路，一自湖东北角射阳河

（阜宁县境）东北流径射阳河口（见前《大海篇》）入海。一自中泓迤东西塘等河（西塘以下各河，皆属盐城县境。西塘河北流四十里合朱沥河，朱沥河分湖水东流十五里，二水合而东流。西塘河之东为蟒蛇河，亦分湖水五里合陈大沟水，又东流会于县城

）。各东北流六十余里汇盐城县濠水。又自城北过范公堤东北流六十里，径新洋港（新洋港亦详前《大海篇》）入海。湖水又自县城西南隅登龙桥入盐城串场河；

一自南泓东南角界河口东流六十五里，径刘庄镇入兴化串场河

（串场河皆详前《淮东盐河篇》）。湖水自南泓下注而潴为小泽者，一自迤东之中堡庄南流五里，曰“吴公湖”，方五里有奇；又自吴公湖东南流二十里，曰“得胜湖”，长十里，广五里有奇；又自吴公湖西南流五里，曰“平望湖”，方不及五里，其地俱属兴化县境，是大纵湖之支流也；一自迤西时宝镇之子京沟

（亦兴化县境）西南流三十五里，径周家港口入清水潭，合流于高邮湖。

宝应湖，受洪泽湖水，自安徽盱眙县界三河口流出（三河泄洪泽湖水，东流四十里，入宝应湖。以下诸湖，则自宝应湖流出，实一源也。），亦淮水所潴也。湖端西北斜出一巨泓，曰“白马湖”，属淮安县境，在县城南三十五里，北广南锐，广者二十五里，锐者十里。湖水南流而至湖尾长四十里

（在淮安县境三十里，宝应县境十里），自此入宝应湖，属宝应县境。在县城西南五里湖之北泓，北锐南广，锐者十余里，广者四十余里。湖水又南流四十里，中泓曰“界首湖”，居宝应、高邮两境间。湖中多洲渚，有居民。

（东曰小新河，其西为庙基港，又西为涂家沟，三洲平列。又西为泾西庄，稍大，横长十五里。其南为柏家涧，在湖中，渐入界首湖。）湖身至此广六十余里，湖水又南流十里。南泓曰“高邮湖”，属高邮县境，在县城西北隅。湖身至此又少锐，广者不及四十里。湖水又南流四十里，径湖南岸斗出三湖。稍东曰“七里湖”，长十余里，广十里；中曰“唐家湖”，长十余里，广不及五里。两湖之间有野鸭荡西一湖，长广与唐家湖等。其尾曰“凌桥镇”。湖之全体分为四段，随地异名。湖水一泻百里，四望无际，实一湖也。其下流宣泄之路，一自七里湖东口稍北，流径卢家闸入运河；一自南口南流十余里入邵伯湖。湖之南泓自六漫镇南越运河而东五里，曰“清水潭”，属高邮县境，斜长四十里。东为草荡，广十里有奇。潭水受自界首镇运河支流之马霓河，东南流十五里入焉。又自潭南三荡口南流二十里，径五里闸复入运河。清水潭之南三十里曰“绿洋湖”，属高邮、江都二县境。湖长十五里，广五里许。湖水受自运河，由车逻坝

（在高邮境）东稍南流十余里，径侯王庄卡入焉。又自湖南尾南稍西流十里许，径大闸镇（在江都境）口复入运河。绿洋湖之南十里曰“乔墅荡”，荡长二十里有奇，荡水远由清水潭之高庄南流六十里，径八字桥，西会绿洋湖水，又南流十五里来注之。距七里湖南十里，曰“邵伯湖”，属江都县境。其西北泓曰“赤岸湖”，仍属高邮境。邵伯湖在县城北三十里，湖长二十里有奇，广十余里，西南泓横出近十里，湖水受自七里湖。

（七里湖南尾分流十里，径新茆塘港入赤岸湖。）下流自湖东南尾通湖坝及昭关坝

分流入运河。各湖之水自宝应湖始，至邵伯湖止，皆沿运河西堤而下（惟绿洋湖在东堤外），与运河合流而入大江

（邵伯湖东一百里，曰“鲍湖”，在泰县境。在县城东北二十里，湖水方不及一里，亦一小泽也）。

江南诸湖

石臼湖，跨溧水、高淳两县境，北泓之西及其西南跨安徽当涂、宣城二县境。湖之在溧水境者，东北距县城二十里，湖身纵横二十里。湖中近南岸处及东南岸侧各有数小山。

（详前《江南诸山篇》）湖之南泓自溧水、当涂分界处，西南趋三十余里，濒湖处皆属高淳县境。湖尾曰“丹阳湖”，自西南角外悉入宣城县境。湖水为古中江上流，东流入海，今则西出芜湖入江，与古水道异矣。

（《江宁府志》：中江古自芜湖县东流，径今高淳县北。其首曰“丹阳湖”，古桐水入之。又东曰“石臼湖”，溧水、高淳诸水入之。又东南曰“固城湖”，其水分流为大山之水。此皆《禹贡》所谓中江也。自是过溧阳阳羡东南，由太湖而东入海，《禹贡》所谓东为中江入于海也。今则其东为广通镇，有东坝，有西坝，闭其东流，使水西出。于是固城湖入石臼、丹阳湖，至芜湖西北入江，与古水道顺逆相反。而东坝以下，自受山豁入太湖，非芜湖水矣。又详前《胥河篇》

）其宣泄之路，一自湖之北端分而北流二十五里，径溧阳县城西北，又西北流，为秦淮河（详上《秦淮河篇》）；一自丹阳湖南口，径高淳县西南境水碧桥西，而南流入安徽宁国县界。湖之东南二十里，曰“固城湖”，属高淳县境，在县城东南隅，纵横各数十里，东南岸侧有数小山。

（详前《江南诸山篇》）湖水西流合石臼湖，径安徽芜湖县境入江。（详上）其东北五十里，曰“赤山湖”，以湖西北岸赤山名，属句容县境，在县城南稍西二十里，长十五里，广者十里，为秦淮水发源处。

（见上《秦淮河篇》）又江宁县境钟山之西有玄武湖，方不及五里。石城门外有莫愁湖，方可一里。皆池沼游观之地。又有龙池湖，在江之北，属六合县境，在县城西南一里有奇，方一里，盖小水一泓耳。

洮湖，一名长荡湖，属金坛、溧阳二县境。其南址大涪山，错入宜兴县境。湖长三十五里，北广南锐，广者二十里，锐者不及五里。湖之北泓在金坛境，方广相等。西南流二十里入溧阳境。其东南岸骤缩十余里，大涪山在焉。自山之西为南泓，又

西南流十五里，而达湖尾。近岸处有小涪山

（大、小涪山皆见前《江南诸山篇》）。湖水西与溧阳漕河相吐纳。南自小涪山口南流五里，径杨巷港，折而东流，入宜兴县境。洮湖之北六十五里，曰“练湖”，属丹阳县境，在县城西北隅。长十里，广不及五里，与运河相吐纳。

（见前《江南运河篇》）其东三十里，曰“溇湖”，属武进、宜兴二县境。湖长四十五里有奇，南北锐而中广，广者二十余里，锐者不及十里。自湖东岸二县交界之洧洧口，与宜荆漕河相吐纳。洮湖东北角有支流，曰“荫风河”。沿湖东岸南流十余里，径湖头村。自此以下分五支，各东南流五里有奇，入于涌湖。

（溇湖西岸五口曰：心感渎、余柯渎、庙渎、王家渎、吴渎，五渎相距十里，皆在武进境，而以吴渎口为最大。吴渎口西为张港，与宜兴分界。自吴渎口西南流会为都山荡。参观前《岸河篇》。

）二湖脉络于此通焉。溇湖东会宜荆漕河，又自讲渎口东流二里，贯小娘荡。又东南五里许为白鱼荡。又自湖尾西南出一水为马公荡。又西南十里为都山荡、珠九荡。二荡水合而东稍南流十五里，会于西洧。西洧长十五里，广五里。其东尾曰“潭洧”，方不及五里。潭洧之水东流，贯宜兴县城。又东南流五里许入东洧。东洧长十里有奇，广不及五里。二洧皆溇湖之支流也。自东洧之尾东南流五里，径大浦口入太湖。溇湖之东三十里，曰“南阳湖”，又东曰“北阳湖”，界武进、无锡二县境

（阳湖故县以此得名），皆狭长一里许，其水受自运河，而东南流入太湖之间江口。

太湖，古曰“震泽”，一曰“具区”，又谓之“五湖”，跨江苏、浙江两省地。湖身在江苏境内者，南北径一百十里，东西参错，广者九十里。湖之北泓始无锡县境，在县城西南十里。西岸沿惠山南麓之石埠山。

（惠山以下各山，皆详前《江南诸山篇》）迤西南十五里，径间江口，南北阳湖分运河水自西北来注之。又西入武进县境，在县城东南五十里。又五里径下埠口，宋建荡分运河水自北来注之。口外有马磧山。又十里径黄公山南址之虎嘴。其西北五里径百渎口，溇湖水自西北来注之，自是入宜兴县境。在县城东北四十里，迤西南十里，径沙塘口，宜荆漕河自和桥镇分而东南流来注之。东岸自石埠山以东径管社山，又东横出一水，曰“五里湖”，纵横各五里有奇。其西南界以军帐山北址，与湖岸隔断。湖水自浦岭、独山两门入焉。湖岸又自五里湖西沿军帐山东南麓迤南十五里，径康山南址。自此迤东北二十五里，径大溪港，运河自无锡县城西北隅分而西南流，合梁清溪，折东南流二十五里来注之。又迤东南五里有奇，径沙墩港，入

吴县境，在县城西北三十五里，与运河水会。是为北泓之上段。

（湖水东流二里许入运河。凡运河皆详前《江南运河篇》。又自运河杨家桥分而东流入常昭漕河。二十里径漕湖。又东南流三十里，自石泗泾港入杨城西湖。又二十五里，径阳城东湖之黄泥田港。又东流十里，径温焦泾。又东北流六十五里，径常熟县境白茆口入江。白茆口见前《大江篇》。又自阳城东湖下段淞北流里许，又东北流七十里，径太仓县境七丫口入海。七丫口见前《娄江篇》

）湖水南流二十里，东西初广二十里，当两港对径处，广五十里有奇。西岸自沙塘港，又迤西南二十五里，径大浦口，入宜兴县境，在县城东南二十里，荆溪水自西来注之。（荆溪见前《胥河篇》

）东岸自沙墩港，又迤南稍西十里，径金墅港。（湖水东稍南流十五里有奇，径泖关镇北竹青桥入运河。）又迤西南里许，径龙潭港折而西稍南，径马山港。又迤西南十五里，径尚山北而西。是为北泓之下段。湖水南流二十里，东西对径六十里，至此入中泓。湖西岸自大浦口迤南二十里，沿大小兰山而径新桥港、莲花荡，会东洳水，及迤西诸山溪南又东流注之。东岸自尚山而南有小泽，东北斜出曰“游湖”，长十里，广不及五里。

（湖中及岸西北湖水，又自东南尾铜坑口东流里许为小泽，曰“虎山湖”，方一里有奇。）游湖之南为西迹山，湖岸环山北西南三面，屈曲十余里，而径邓尉山南。又，迤东南五里许，径黄茅、渔洋两山峡间。是为中泓之上段。湖水南流二十里，两山相距处对径七十里有奇。湖西岸自新桥港，又迤南五里沿杨梅山东陇，径斯沂港入浙江长兴县境。自此，湖之西岸，悉入浙境。东岸自黄茅、渔洋两峡间又迤东十五里，径胥口，距县城南二十五里，湖水分流入城。

（湖水东北流十五里，又东流十里，径渡僧桥，自阊门入运河。又自阊门贯城中，出娄门，东流六十里，径昆山县城，合新阳江。见前《娄江篇》。一自胥口东稍北流二十五里，自胥门入运河。又自胥门贯城中，出葑门，东流十里有奇，贯金鸡湖。又东流自新泾淞，径吴淞江入海。见前

（《吴淞江篇》）又迤西南二十五里，径大缺渡口，湖流中断，是为洞庭东山东陇之平畴。其西陇则壁立湖心，与洞庭西山对峙。是为中泓之下段。湖水南流二十里，东西初对径九十里，为湖之最宽处，后稍狭至五十余里。至此湖身趋于东南为南泓。湖水自西大缺渡口北迤东十五里，折而北流为巨泓，纵横各十里有奇。又迤北长十余里，广者五里有奇。是为吴县、吴江二县分界处。湖尾尽处狭而尖，曰“鲇鱼口”，娄江出焉。又南五里，径瓜泾口

（在吴江县城北），吴淞江出焉（娄江吴淞江皆见前）。是为南泓之上段。（湖水

自鲇鱼口北流里许，径五龙桥镇。又东流里许，曰“澹台湖”，方一里。又自五龙桥镇北流五里，径盘门入运河。又自盘门沿城南隅东流五里，径灭渡桥。南而东流五里，又东南流十五里，贯黄天荡、独墅湖、镬底潭入吴淞江。其西斜出一小泽，曰“石湖”，方不及五里，湖水北流十里，又东北流五里，径胥门入运河，与胥口之水合流为吴淞江。一自七里港口东流里许，入吴淞口。又自吴淞江张塔村西入庞山湖。又东流十里，贯同里湖而入澄湖。又自张塔村东五里入九里湖。又东南流五里许，入澄湖。又自吴淞江大姚塘东南流五里，入澄湖。一自十字港口入牛腰脰港。东南流五里，径吴江县城，环城北而东流入运河。乃上段支流之旁注者也。

）湖东岸与大缺渡口对径者，为南厓港；迤东南五里，径岸尾大浦港会运河水。二港皆属吴江县境，在县城南十五里。湖岸又迤西南五里，径练聚桥、韭溪两港。以上诸港之水皆入运河。两港水东南流五里，曰“唐家湖”，方二里有奇，又越运河而东曰“胜湖”，大半皆小泽也。自大浦港迤西达湖淡港止，径浙江乌程县界，为湖岸尽处，是为南泓之下段。湖水西南流三十里，东西斜径四十五里，自此湖之西南岸，悉入浙境。

阳城湖，属吴县境，在县城东北十五里。湖分为四：自湖之西南角起，迤东三十里而弱，讫湖之东岸，湖水相连。在西曰“阳城西湖”，长二十五里，南北广而中锐，广者五里。东岸有狭长陆地，与中湖隔断。中曰“阳城中湖”，长二十里，南北锐而中少广，广五里许，锐半之。中湖之北端迤西横出一水，曰“阳城后湖”，方不及五里。东曰“阳城东湖”，东为昆山县境，在县城西十五里有奇。湖长二十里，广十里。东、中二湖之间，有平陆，纵横各五里许，曰“阳城村”，其北端亦有狭长陆地间隔之。东南岸侧有唯亭、绰墩二山。

（二山以下皆见前《江南诸山篇》）东湖东岸入昆山县。西北境有小泽四：源出卜家港、林宅子港者，曰“傀儡湖”，长五里有奇，广不及五里；出李家角港、黄泥田港者，曰“鳊鲤湖”，长广半之；出西南两栅头港者，曰“巴城湖”，方一里有奇；出巴城湖者，曰“雉城湖”，大亦如之。皆阳城湖之支流也。湖水受自太湖者，下流宣泄之路：一自傀儡湖东南流十里，径昆山县城，贯城中，东流五里，径新阳江入海；一自鳊鲤湖口太平桥港稍北流里许，又东流二十里，又东南流十五里有奇，径至和塘入娄江

（见上《娄江篇》）；一自巴城、雉城两湖东流五里，径温焦泾入葑塘，又北流十五里，径白茆新市（在常熟境），又东北流四十里，径白茆口入江。西湖西北二十里，曰“漕湖”，属吴县北境，在县城北三十里。湖长五里有奇，广半之，西北角跨无锡县境，常昭漕河之所注也。上源受自太湖，下流自湖东岸东北流二里许，径北桥合鹅真荡水入石桥港。又东南流五里，径界牌港

（吴县、常熟分界处）。又东稍南流十五里，径尚泽荡入阳城西湖。中湖之北十里

，曰“昆城湖”，属常熟县境，在县城南五里。湖长十里，广五里。又西北五里，曰“尚湖”，长五里有奇，广五里。湖东北临虞山。两湖之水，受自太湖。

（太湖之水，自无锡县境后溪港东流十五里，径梁清溪。又东北流五里，径县城西北隅。又五里，径放马滩。又东流五十里，径常熟县境练塘市。又东北流二十里，径张姥桥入尚湖西北口。

）自尚湖东北岸流里许，径通河桥，昆城湖水自湖东北岸闸口港北流五里来会，合为一水。又分二支：一自通河桥北流，沿县城东隅，径宾阳门，又东北流三十五里，自许浦口入江，一自通河桥东南流二十里，径白茆新市，又南十五里，径七浦塘，又东流十五里，径直塘镇，又东流蜿蜒四十里，径七丫口入海

（详前《娄江篇》）。

澄湖属吴县境，在县城东南二十五里，西南岸跨吴江县境，湖身纵横各二十里有奇，为太湖下游之巨浸，湖水受自太湖东北角七里港之吴淞江。其一东流二里许入运河。自运河北五里有奇，径尹山港。又东流二里许，为尹山湖，方五里。南岸金狮港有水东南流五里，曰“赭墩湖”，方一里有奇。北岸相近处，有水北流里许，曰“独墅湖”，长十里，广者五里。西岸突出一泓，曰“黄天荡”，方不及五里。南岸有水东流五里，曰“镬底泽”，大半之。北岸相连属者，曰“金鸡湖”，方五里有奇。金鸡湖东北岸有水东北流五里许，曰“沙湖”，长五里有奇，广半之。其一南流五里，径吴江县城北隅，东南流里许，为“庞山湖”，长十里，广五里。距湖东岸里许，曰“九里湖”，长五里有奇，广少逊之。九里湖东南横出者，曰“同里湖”，方五里。南岸十里，曰“叶泽湖”，方五里。其东北尾相连属者，曰“南新湖”，长五里，广半之。诸湖在吴淞江北者，属吴县境；在江南者属吴江县境。湖水皆入吴淞江，合流而下，自大姚塘东南流五里有奇，汇为大泽，是曰“澄湖”。湖西岸突出者，曰“黄泥兜”，方五里。南岸横出者，曰“萧殿湖”，长五里，广半之。萧殿湖岸有水西流里许，曰“杨林湖”。凡西南诸小泽，皆属吴县、吴江两县境。湖东岸有水流里许，曰“万选湖”，方一里，属吴县境。万选湖东岸有水流里许，曰“杨氏田湖”，大倍之。杨氏田湖东南岸相连属者，曰“白莲湖”，长五里，广少逊之。二湖属昆山县境。黄泥兜南岸有水流里许，曰“滕村湖”，长五里，广一里有奇。滕村湖南尾有水流里许，曰“白蚬江”，其北与萧殿湖相连属，长十里，广不及五里，属吴江县境。白蚬江水自东岸口东南流十里有奇，径急水荡下注，又潳为大泽，曰“淀山湖”，一曰“薛淀湖”，属昆山、青浦二县境。西北跨吴县境，在昆山县城南偏西四十五里，青浦县城西十五里，湖之大部分属青浦境。长十五里有奇，广者二十里。其东北泓出一锐角，斜长十五里，下广如之，属昆山境。湖近南岸有平陆，横亘十里，宽二里许，西岑镇在焉。湖水环于其外，自湖西南口西南流入浙江嘉善县境。东岸之侧，淀山在焉。距东岸五里，曰“秧田湖”，长五里，广半之。秧田湖南尾有水南流里许，曰“大段湖”，大不及半。其南里许

，曰“大莲湖”，方五里，湖中有万圩寺。近东北有小莲湖，方不及一里，湖南岸之拦路口及石塘村港水入焉。凡诸小泽，皆湖流所潴之水荡也。自太湖东南以下至澄、淀两湖间，群荡环之，繁灿如列星，然不可数计也。淀山湖上受白蚬江水，下自拦路口石塘村港宣泄而出。东南湖十五里，为东西两泖，泖塔汛界其间。又五里为泖河。又二十里径大泖港。又北流五里，径松江、金山二县交界处为黄浦江，由是入松江县境。又东流十五里，南岸径南汇县界，北岸径上海县界。又东流二十里，入上海县境。又折而北迤东流四十五里

（东岸仍径南汇县界十里余），径虹口，受吴淞江水，合流入海。（自吴淞口入海，亦曰“黄浦口”，见前《吴淞江篇》）

附：河工纪年表江南水利修治工竣者四：曰白茆河，曰刘河，曰吴江浪打穿，曰金鸡湖。堤岸未竣者七：曰吴淞江，曰泖湖，曰宜兴干河及百渎，曰金坛干河，曰溧阳干河，曰溧水县秦淮河，曰高淳县撑龙港洪漕坝。已竣而未如式者一：曰苏州觅渡桥。河工中止而未续者一：曰丹徒、丹阳两县运河。勘估而未施工者三：曰赤山湖，曰便民湖，曰吴江运河。塘岸贷以资者一：曰丹阳城河。助以资者七：曰盐铁致和塘，曰老刘河，曰北横沥，曰沙溪、直塘、璜泾等乡市河，曰昆山城河，曰吴江垂虹桥，曰溧阳嘉定桥。白茆工费近二十万，常熟任其半，半则省拨以武进盛氏捐款。刘松湖泖盛氏捐款以外，带征于十县

（吴县、昆山、吴江、太仓、嘉定、宝山、松江、金山、上海、青浦等十县）之忙漕，而主管者，得自由支配者也。宜兴就地自筹，而受金坛、溧阳之协助者也。丹徒、丹阳、金坛、溧阳、高淳、溧水、句容、江宁皆截留部办之亩捐，而各县自为主政者也。兹为编年纪月，撮其纲要，备著于篇，以便省览。

民国二年三月四日，省公署委水利委员方还、技术官周秉清会勘刘河。

四月七日，水利委员方还、技术官周秉清呈报续勘白茆河下游现象，酌定疏浚办法。十四日，自茆河筑南坝。十六日，筑北坝。

九月五日，常熟县知事苏高鼎、水利委员方还呈送白茆河工程概算。

三年三月十一日，省公署委黄以霖、翁炯孙视察白茆河工。二十三日，方还请派技正施恩曦测勘白茆河工程。

四月十日，省公署委施恩曦督促白茆河工程。太仓县浚盐铁、致和两塘，水利委员拨武进盛氏捐款银一千圆以补助之。

五月，民政长韩国钧至茆河勘验工程，订定十九日开坝。三日，白茆河稽工员王元弼等请民政长拨款筑桥。

常熟县知县谢葆钧电报：十日潮涨，白茆河北坝冲坍。十四日开坝。省公署委调查员庞树典、汪承修、测量员毛炳蔚前往太仓，会同县知事杨栋筹议疏浚刘河事宜。

六月二十六日，方还呈送白茆河工收支清册。三十日巡按使委钱溯灏为刘河河工主任，蒋汝坊为副主任，组织刘河复测事宜。巡按使委庞树典主任局务，袁承曾主任测务。

七月十四日，巡按使委陈恩梓筹办吴江县水利。水利委员方还辞职。钱溯灏、蒋汝坊会同太仓县知事胡承哲筹议开浚刘河办法十条，详报省公署。

八月十日，常熟县详请将白茆河截角用地，核除粮赋。巡按使委林懿均筹办丹徒、丹阳两县水利，准借拨洋商承缴挑河经费，及乐生洲徒阳运河七成租款银一千元为开办费。二十七日，巡按使委侯镇平测量丹徒、丹阳两县运河。陈恩梓详报设立吴江县浚湖办事处，会同县知事丁祖荫编制土方表预算书，分别最要次要工程，陈请核准。

九月，巡按使委陈恩梓分赴太仓、嘉定、宝山、上海、青浦、昆山、吴江、吴县等县集商水利经费，带征亩捐。十六日，刘河河工开局。巡按使委沈维庆筹办宜兴、金坛、溧阳三县水利。宜兴县设立水利筹备处，推举陈明、任卓、潘凤仪为主任。

十月三日，水利局委侯镇平帮办丹徒、丹阳两县河工。刘河河工局详请分飭昆山、太仓、嘉定、宝山四县就地编夫开浚刘河。巡按使飭以求新厂挖泥机船疏挖吴江县浪打穿。林懿均详报徒阳河工局二十四日正式成立，启用铃记。

十一月二日，水利局委程孝颐会同高淳县知事应祖锡查勘应浚河道。陈恩梓详报验收求新厂挖泥机船，二十八日运至吴江。七日，水利局请拨款开浚赤山湖，以工代赈。陈恩梓详报吴江县疏挖浪打穿工程已于十一月二十九日开工，请以次要工程内之窑港归入最要工程内，改用人工，提前疏浚。三十日，徒阳河工局详报运河于二日测竣，并送河道图暨土方表说明书。

十二月二日，宜兴县知事陈常铎、委员沈维庆请借拨癸漕滞纳金八千元，充水利经费。四日，林懿均、侯镇平委张鹏为丹徒县河工赞助员。吴江浚湖处详送运泥规则。水利局委袁宝璐为刘河河工稽查弹压员。十三日，刘河河工局详送工程预算，水利局驳令删减。十七日，刘河河工局开工筑坝。设分局三处，水利局委杨树森、王悦谦、司徒珩为三分局稽查弹压员。十八日，丹阳县知县胡为和请拨旧道库发存机器公款银二千元充水利经费。二十二日，丹徒县知事张凤瑞请拨赈款，以工代赈，

开浚运河。金坛县知事杨光宪详请拨款，以工代赈，开浚河道。后财政厅改工程款为抚恤。巡按使准借拨丹阳县赈款银一万元，开浚运河，以工代赈。

四年一月三日，吴江浚湖处开浚窑港，详报土方价目。嘉定、太仓、宝山等县以刘河方价过低，请求增加。水利局核准每一方给钱四百文。十七日，吴江浚湖处详送浚湖工程预算册、筹备期内收支决算册。二十日，刘河河工局详覆裁减浚河经费。二十一日，吴江县知事周寿详请开浚城区各港，水利局委陈恩梓勘复。二十二日，徒阳河工局详请送筹备期内报销册。溧阳县河工局在沪订购挖泥机船，二十四日，运送到工。二十五日，嘉定县知事张镜寰请将带征积谷经费，移贴刘河方价，每方给钱五百五十文。

二月，陈恩梓详请辞职，水利局委费承祿接充吴江水利委员。七日，昆山县知事何寿朋详报设立协浚刘河事务所。刘河河工局请委吴朝绅、王熙元、陆宝奎、朱治、唐锡翰、蒋汝城为三分局正副主任。二十日，刘河河工开工挑土。二十七日，窑港工竣。巡按使准借拨丹徒县赈款银五千元，连同前拨丹阳县之一万元，合成一万五千元。丹徒分得七千元，丹阳分得八千元，各充浚河经费。

三月二日，吴江浚湖处开浚黄沙路。太仓县知事盛同枝详送分浚刘河河夫花名册。吴江浚湖处详送窑港工程收支清册。六日，昆山县知事何寿朋详报刘河方价，由县加给钱一百文，又每方加雨停工饭食钱七十文。二十四日，丹阳县委详报就地借款开浚城河，十八日筑坝，二十一日下宕，限十八天扫宕。徒阳河工局详报丹阳县运河二十一日筑坝戽水，三十日下宕挑土，限二十三天内扫宕。二十六日，溧阳县挖泥机船开工捞挖河道。二十九日，黄沙路工竣，水利局委恽福斌到工验收。

四月一日，巡按使电委水利局总办沈俭验收刘河工程。八日开坝。吴江浚湖处雇工撩摸海运漕南段石块。又请将吴江县次要工程内之海运漕北段及水落港归入最要工程，提前开挖。十日，白茆河七桥工竣，水利局委沈泗孙前往验收。丹徒县知事章同详准巡按使将前发河工经费七千元，除已领用一千六百元外，拨作赈款。十七日，丹阳县委电报开浚运河工已七成，十四五六连日大雨，潮涨漫坝，请暂停工。水利局委沈泗孙驰往勘验，并飭挖除各坝，撤销河工局。丹阳县知事胡为和详报城河工竣，水利局委沈泗孙到工验收。

五月三十日，丹阳县知事胡为和详送开浚城河收支清册，借运河工程款银三千五百五十七元六角四分七厘。丹阳县委详送开浚运河支出经费计算书册。

六月，吴江县士绅费树蔚等请补助长桥工费银一千元。巡按使飭水利局筹浚泖湖。刘河河工局条陈刘河善后办法。十二日，溧阳县委详送河工局估计干河工程预算册暨筹备期内收

支清册。吴江浚湖处以天热农忙于二十四日暂停工作。挖泥机船赴沪修理。水利局委费承禄查勘刘河拦门沙。

七月一日，宜兴县委详送应修河道工程说略。十二日，溧阳河工休假三星期。（此后年暑假各停工三星期，岁以为常。）二十五日，水利局委尹璞管理机船，前往刘河海口挖沙。

八月十五日，吴江浚湖处详送停工以前开支决算册。

九月五日，水利局调吴江挖泥机船至刘河海口。七日，开工挖拦门沙。

十一月十二日，刘河河工局详送刘河工程收支清册。

十二月五日，水利局委金汤会办宜兴、金坛、溧阳三县河工。宜兴县水利筹办处向武进厚生厂订购连珠斗式挖泥机船一艘。并推举储南强为河工主任。二十八日，刘河河工局详送海口挖沙工程预算册。

五年一月，水利局委尹璞勘估刘河海口添筑水箭工程。十四日，溧阳县委详报勘估干河工程经费。二十日，吴江浚湖处详送直渎港工程预算册。二十二日，刘河挖沙工竣，水利局委唐树到工验收。机船驶沪修理。二十五日，吴江县知事周焘请修筑运河官塘，水利局委费承禄先往勘估。三十日，宜兴县委详送开浚干河及百渎工程预算册并图表。宜兴县知事钟兴详报改组水利工程局。

二月二十九日，金坛县知事周昌寿、委员金汤详报浚河办法，造送工程预算表。

三月七日，宜兴县委详报全境干河与百渎有直接关系者，划分七部，次第挖浚。近城第一部四日开工。十六日，刘河河工局详报挖浚老刘河，十八日开工，补助银四千元。

（太仓得十之六，嘉定得十之四）二十日，吴江县浚湖处详送直渎港工程预算册表。老刘河工竣，水利局委唐树到工验收（长二千三百八十丈，挑土二万四千八百六十七方二分）。

四月，刘河河工局详报太仓县沙溪、直塘、璜泾等乡疏浚市河，补助银四千元；又浚北横沥，补助水坝费银四百元。蒋汝坊详覆刘河海口添筑水箭拦阻流沙，需银二万九千三百七十八两八钱六分，水利局令暂缓办。

五月十二日，宜兴水利工程局详报核实经费变通预算。费承禄详送测勘吴江运河官塘图表。十八日，直渎港工竣，水利局委唐树到工验收。二十六日，水利局令溧阳

县开浚干河，准在截留亩捐项下动支银三万元

（自下半年始，每半年领六千元）。刘河河工局详送老刘河工程收支清册。

六月九日，吴江浚湖处详送直渎港工程支出计算书。

七月二十五日，宜兴县知事钟兴详送水利筹办期内支出计算书。

八月二十四日，溧阳县知事邱沅请拨款重修嘉定桥。

九月十一日，刘河河工局呈送海口挖沙工程支用表册。

十月三十日，吴江水利委员费承祿辞职，水利局委陈恩梓接任。

十一月，省议会议决筹修高淳县水利，省长令水利局勘估筹办。省议会议决开浚赤山湖，水利局委袁承熙前往句容，会同县知事应祖锡勘估。省议会议决疏浚便民河，省长令水利局勘估。刘河河工局呈报太仓县公举顾聘璜、胡保恒为刘河水利委员，并公拟刘河巡视简章。

十二月五日，金坛县知事倪曾荃呈报公推王士杰为河工局主任，史耀堂、陈允元为副主任。十二日，吴江浚湖处请将吴江附郭十八港内之微丝、梅里等港择要开浚。

六年二月一日，宜兴、金坛、溧阳三县水利委员金汤辞职。四日，高淳县知事刘春堂呈

报勘估应修河道情形，并陈治三水策。省长令修吴县金鸡湖堤岸，水利局委冯夔会勘估。十二日，宜兴县第一部河工工竣。吴江浚湖处呈送附郭应浚七港预算册。机船在沪修竣，十六日驶回吴江浚湖。十三日，吴江浚湖处请将直渎港北段改用人工开浚。十九日，吴江浚湖处机船续浚海运漕南段。二十三日，直渎港北段开工筑坝。

三月八日，水利局委王秉枢会同高淳县知事刘春堂覆勘应浚河道工程。九日，水利局令吴江浚湖处将浪打穿应浚各段工程另编预算。十四日，水利局委袁承熙查勘便民河。十六日，水利局委阮家雍会办宜兴、金坛、溧阳三县水利。二十日，宜兴县第二部河工开工。二十三日，吴江县附郭七港开工。二十四日，水利局委袁承熙勘估赤山湖及秦淮下游工程。

四月二日，冯夔会同吴县知事孙锡祺呈复勘估金鸡湖堤工修费。七日，高淳县委呈送撑龙港、洪漕坝两河工程经费预算表。十二日，溧阳县知事邱沅呈报溧阳河工改

作人机并用。二十四日，吴江附郭七港工竣，水利局委唐树到工验收。二十八日，宜兴水利工程局呈送河工第一部工程费用册。溧阳县知事邱沅呈送河工局自四年三月起，至六年一月止，四次册报工程成绩、款项收支

（自开工后，每半年结束一次）。

五月十五日，吴江浚湖处呈送另编工程预算。袁承熙会同江宁、句容两县知事呈送勘赤山湖及秦淮下游图册。

六月四日，宜兴水利工程局请借拨金坛、溧阳两县协济款银一万元。七日，水利局委阮家雍勘估溧阳嘉定桥工程。十三日，吴江浚湖处呈报天旱水涸，机船停工，仍雇工抢挑直渎港浅滩。吴江浚湖处呈送附郭七港支出计算书。

七月，省议会议决修筑南端塘路，水利局委沈泗孙前往吴江，会同县知事李世由勘估，集绅筹款。十二日，省长令在水利带征项下借垫银一万五千元，接济宜兴河工。

九月，宜兴、金坛、溧阳三县士绅组织水利联合会，十一日在溧阳开会，议决宜兴浚河工费，由金坛协济银一万二千元，溧阳协济银一万八千元，以一万四千元为宜兴本年提前疏浚北干河添辟臧村桥洞折抵邮塘闸之用，以一万六千元为七、八两年协浚百渎之用。水利局委沈泗孙覆勘金鸡湖堤岸工程。十七日，吴江浚湖处机船开工续挖海运漕北段。二十一日，吴江浚湖处呈请修浚陆家港河道桥梁，并送工程预算。丹阳县知事胡为和呈请续浚连河，举林懿均、厉钟麟充筹办员。水利局令会商丹徒县。

十二月十六日，吴江浚湖处挑浚陆家港。并先于十四日开工修筑石桥。二十日，丹徒县知事倪曾莹呈报丹徒运河与丹阳分局筹办，并推举柳肇庆、王芝秀为河工筹办员。肇庆辞职。宜兴县第二部河工停工。二十八日，水利局委沈泗孙监修金鸡湖堤岸。

七年一月十一日，陆家港工竣。十四日，水利局委王悦谦监浚高淳县撑龙港。

二月一日，陆家港石桥完工，水利局委沈泗孙到工验收。二十日，金鸡湖堤岸开工。二十六日，宜兴县按照宜金溧水利联合会议案，将第五部刘河河工局请拨刘河余款银五百元疏浚刘河上游昆山城外城河。六日，宜兴水利主任储南强议复就河工总预算内缩减二千元。

四月三日，苏州关监督请捞运河觅渡桥南河道，水利局委冯夔会同吴县知事吴其昌勘估。二十日，高淳县委呈报撑龙港开始挑挖，并陈挖毁道士圩废埂成河，请增加

预算。吴江浚湖处铲毁客民私筑围岸。

五月三日，冯夔、吴其昌呈送勘估觅渡桥南北河道工程图册。高淳县委呈报春水陡涨，撑龙港暂行停工。二十一日，吴江浚湖处呈送陆家港河道桥梁工程支出计算书。三十一日，吴江浚湖处呈报湖水浅涸，机工难施，请停办水落港工程。

六月，水利局委袁承熙实测赤山湖，十日出发。十七日，水利局请省长咨调浙江任用县知事汪承修来苏委办丹徒、丹阳两县运河工程。水利局委冯夔会同吴县知事监浚觅渡桥南北河道，二十三日开工，县委袁均办理。

七月五日，吴江浚湖处呈报最要工程一律完竣，水利局委冯夔到工验收。十七日，金鸡湖修堤工竣，省长委李鹦声蒞工验收。吴江水利处呈请挖泥机船运沪修理。

八月一日，觅渡桥南北河道捞挖工竣，苏关监督委科员孙润瑾，会同理船厅验得工程尚未如式。水利局令袁均督工补浚。水利局委陈恩梓筹办吴淞江工程。吴江浚湖处呈陈善后事宜。

九月七日，陈恩梓请吴江挖泥机船调浚吴淞江。十五日，丹徒县知事倪曾荃呈请委任何恩浩、杨鼎芬等筹办运河工程。三十日，吴县知事吴其昌呈报觅渡桥南北河道会委测明丈尺绘图送核，水利局令新任知事温绍樑责成工匠照估浚深。

十月十一日，徒阳河工局呈报徒、阳两县各设筹办运河工程局，订定办事规约。

十一月四日，陈恩梓呈送吴淞江筹备期内经费预算。十五日，陈恩梓呈报勘估吴淞江工程，并陈施计划。十七日，吴县知事温绍樑呈送金鸡湖堤工支出计算书。宜兴县改建湖渎桥，放宽二丈四尺，定名宣洮桥。十九日，溧阳县知事赵汝梅、委员阮家雍呈请续留亩捐，三年将境内未浚干河一律疏浚。二十五日，吴江浚湖处呈送水利工程支出计算书。二十九日，省长令核议淀泖两湖先施工程测量。徒阳河工局呈送运河工程。委员汪承修呈请修改办事规约。溧水县知事沈德基呈请截留亩捐，疏浚河道。并拨七年分滞纳罚金银三百元，充测量经费。高淳县知事刘春堂请浚洪漕坝，并呈送工程经费预算。二十二日设局筹备。

八年一月二日，丹阳县委呈请就款计工核减工段，并另编实办预算。丹徒县委呈请就款计工缩减深度，另编实办预算。陈恩梓呈请订购发兴厂机船开挖吴淞。七日，丹徒县运河开工筑坝。九日，吴江县公民黄元蕊、简书勤请修南端塘路。十四日，丹阳县运河开工筑坝，二十九日坝工完竣。二十八日，丹徒县运河坝工完竣，开始戽水。

二月三日，省长令补助溧阳嘉定桥工银二千元。高淳县疏浚洪漕坝，二十日开工。

十七日，水利局函请省长取消浚浦局修治吴淞江计划草案。二十二日，丹阳县运河开工挑土。

三月八日，徒阳运河工程局电报：水涨坝危。八日，雷雨，大水漫坝。水利局委沈泗孙驰往勘视，以坝内水大，春汛又涨，电请停工。水利局令挖除坝基。二十日，淀泖工程测量队出发实测。高淳县呈报撑龙港筹备筑坝进行。二十六日，陈恩梓呈送吴江最要次要工程经费预算土方表。

四月十日，宜、金、溧三县代表开水利联合会，议决邮塘闸改拆低为放宽，增加协款俟后续议。财政厅水利局会议修筑吴江官塘，以三年为期，按年补助银二万元。呈请省长咨明省议会追加八年度省地方预算。徒阳河工局呈报运河坝基捞挖净尽。

五月九日，陈恩梓呈报挖泥机船工竣，省长委傅钧验收。高淳县以雨久农忙，十一日撑龙港、洪漕坝皆暂停工。洪漕坝修筑王村、凤凰两石桥。

六月五日，陈恩梓呈报吴淞江先就最要处施工。设水利工程局于纪王庙镇，订定办事规则。十七日，庞树典、袁承喧呈报淀泖工程测量事竣，并送计划书。

七月十一日，溧水县知事沈德基呈送疏浚秦淮干河工程预算书。十四日，吴淞江开工捞挖。二十三日，水利局委尹璞筹泖湖，并购挖泥机船一艘。

八月，水利局会同财政厅金陵道委沈泗孙覆勘溧水县水道。十日，陈恩梓呈报吴江骤经风雨，两岸坍塌。

九月九日，省长委张金铎验收泖湖机船。十四日，高淳县修建王村、凤凰两石桥工竣。并陈修桥及加筑岸埂经费不敷，请追加预算。

十月十五日，袁承熙呈送赤山湖图表及工程计算书。

十一月十六日，泖湖开工捞浚。

十二月四日，金坛县知事宋兆麟呈报河工局副局长陈允元辞职，公推陈绍华继任。并议定分期拨款兴工办法。陈恩梓呈送吴淞江筹备期内经费支出计算书。十二日，尹璞呈报泖湖工程情形。

九年一月十二日，陈恩梓呈送修理连珠斗挖泥机器经费支出计算书。二十六日，陈恩梓呈复查勘吴淞江下游淤浅情形。二十七日，金坛县河工开工，先从南北两水关分段筑坝。二十八日，高淳县续浚撑龙港。吴淞江水利工程局商借上海工巡捐局挖泥机船一艘。

二月六日，吴淞江水利工程局移至小沙渡，捞浚吴淞江下游。十五日，陈恩梓呈报开浚吴淞江纪王庙一带工费支出数。

三月十一日，陈恩梓呈送另编吴淞江下游挖泥经费预算书并土方表。十七日，丹阳河工局呈送运河工程支出计算书。三十一日，吴江县估送震浚塘岸图册，水利局委唐树复勘。

四月十二日，高淳县续浚洪漕坝，水利局委黄国梓监浚。

五月十日，唐树会同吴江县知事章维钧，呈覆查勘震浚塘岸工程，请款补助。十五日，水利局定泖湖工程稽工表式，令尹璞按旬填报。高淳县撑龙港停工。溧水县知事赵殿英呈报疏浚秦淮河，二十七日开工。

六月十日，高淳县委呈报洪漕坝工程预算，七月中旬完工。二十八日，尹璞呈送泖湖工程预算，及购挖泥机船、载泥船估折。